

შოთა რუსთაველის ქართული  
ლიტერატურის ინსტიტუტი

ილია ჭავჭავაძე

თხზულების

სურვი

ჩვენური

მც

ტომარ

თბილისი

2007

ილია ჭავჭავაძე

თხზულების

ტომი XIII

ჰუმანიზმისთვის  
წერილები

1894-1897

“ილიას ზონდი”

2007

ილია ჭავჭავაძის თხზულებათა  
აკადემიური გამოცემის  
სარედაქციო კოლეგია

მთავარი რედაქტორი  
ირმა რატიანი

გიორგი აბაშიძე  
ანდრო ბელუკაძე  
როსტომ ჩხეიძე  
ზურაბ ჭუმბურიძე

ტექსტი გამოსაცემად მოამზადეს, შენიშვნები და  
საძიებლები დაურთეს ეთერ შარაშენიძემ და  
ჯულიეტა გაბოძემ

ტომის რედაქტორი ნოდარ ტაბიძე

„ილიას ფონდი“ (თავმჯდომარე ანდრო ბელუკაძე)  
2007



---

პუბლიცისტიკური

წერილები

---



1894 წელი



## <ქუთაისის ბანკის შესახებ>

ტფილისი, 16 იანვარი, 1894 წელი

ქუთაისის გუბერნიის თავად-აზნაურთა წინამძღოლს ამ 20-ს იანვრისათვის დაუნიშნავს თავად-აზნაურთა საგანგებო კრება, „რომელმაც უნდა შეადგინოს პროექტი ქუთაისის სათავად-აზნაურო ბანკის წესდების მეცკლისა, რათა ეხლანდელ საზოგადო კრებათა მაგიერ შემოღებულ იქნას არჩევნები მათი, რომელნიც უნდა დაესწრნენ ხოლმე ბანკის კრებას მის სხვადასხვა საქმეთა განსახილველად.“

დღე-აქამოდე ყოფილი წესი, რომლის ძალითაც შესდგებოდა ხოლმე ბანკის საზოგადო კრება, ნება და უფლებას აძლევდა ყველა წესიერ ცენზის პატრონს ბანკის წევრს, თითონ დასწრებოდა კრებას და მიეღო მონაწილეობა როგორც ბანკის საქმეთა განხილვაში, ისეც გადაწყვეტაში. ამ სახით აწ არსებულის წესით თვითეულს ამისთანა წევრს სარჩევი და გადამწყვეტილი ხმა ჰქონდა კრებაში.

ესლა, როგორც ეტყობა, განუზრახავთ, ეს ფართო უფლება ცოტად თუ ბევრად შემოზღუდონ და ვიწრო ფარგალში მოაქციონ. ჩვენ შევიტყვეთ, რომ ეს შემოკლება უფლებისა საჭიროდ დაუნახავს თვით ფინანსთა სამინისტროს და წინადადება მიუცია ბანკისათვის, რომ საზოგადო კრება ბანკისა ამას იქით შედგენილ იქნას არა ცენზის პატრონ წევრთაგან, არამედ მათ წარმომადგენელთაგან, რომელნიც ამორჩეულ უნდა იქმნენ წევრთა კრებისაგანაო.

რა თქმა უნდა, რომ ეს ამისთანა განკარგულება სამინისტროსი გამოწვეულ იქმნება იმ არევ-დარევისა და

ურიგობისაგან, რამაც ამ ბოლო ხანებში, სამწუხაროდ ჩვენდა, ასე იჩინა თავი ბანკის კრებებზედ ქუთაისში. ერთმანეთის წევვა-გლეჯა ამ კრებებში, გამწვავება შენჩემობისა, საომრად გამოსვლა კერძო ინტერესებისა და ამის გამო დას-დასად დარღვევა და განაწილება საზოგადოებისა, ერთმანეთის გადაკიდება, მტრობა, გაუტანლობა და ათასი სხვა ვაი-ვაგლახი, ბოლოს იქამდე მისვლა, რომ საჭიროდ დანახულ იქმნა კრების ღირსების დასაცველად პოლიციის და ადმინისტრაციის მოწვევა, – ყოველივე ეს ისე არ ჩაივლიდა, რომ მთავრობას ყურადღება არ მიექცია და რაიმე ღონე არ ელონა.

ამ არევ-დარეულობას რომ სარჩულად მაინც ბანკის საქმეთა სიყვარული და სიკეთე სდებოდა, კიდევ ადამიანი ასე თუ ისე შეიწყნარებდა. უბედურება ის იყო, რომ შენჩემობა თავის უკადრისს ფრთასა კმლიდა გარყვნად და წაწყმედად საქმისა, დასამზობლად ზნეობისა, წასახდენად ხასიათისა. აშკარად სჩანდა, რომ საზოგადო საქმე, როგორც ბანკია, სულ დავიწყებულ იქმნა. იგი მტლად დაედო და ფიანდაზად გაეშალა ცალკე კაცის წყურვილსა და სურვილსა.

ამის დასამტკიცებლად შორს ძებნა საბუთისა არ მოგვიწოდებდა. აბა გაიხსენეთ საზოგადო კრებანი ქუთაისის ბანკისა, თუ თვალწინ არ აგეტუზოთ ამისთანა, მართლა რომ დაუჯერებელი და უცნაური ამბავი. ყოველი კრება ბანკისა, როგორც მოგენსენებათ, დაიწყება ხოლმე ყოველთ უწინარეს ბანკის საქმეთა განხილვითა: ჯერ ყველაზე წინად იმისთანა საგანსა სინჯავს ხოლმე კრება, რომელიც ასე თუ ისე არსებითი საჭიროებას ბანკისას შეადგენს და რომლის ასეთი თუ ისეთი გადაწყვეტა ბანკის ბედს შეეხება. ვიდრე ეს არსებითი საჭიროებანი ბანკისა იხილვება კრებაში, კრებაზე ასი, ასოცი, თუ მეტ-ნაკლები წევრი ძლივს მოდის და რაკი არჩევანზე მივა საქმე, მაშინ ნურც ხუთას-ექვსასი კაცი გშურთ. რას მოასწავებს ეს, თუ არ იმას, რომ ბანკის გულშემატკივარი მეტად ცოტაა, რომ თითონ ბანკს იმოდენად ყურს არ უგდებენ და თავის მხნეობას მარტო მაშინ იჩენენ, როცა „მე თუ შენ“ დადგება ხოლმე მოედანზე მთელის თავის უგემურობითა.

განა ეს ამბავი იმის მომასწავებელი არ არის, რომ ამ შემთხვევაში ხალხი მორეკილია, ასე თუ ისე განგებ მოგროვილი და მობრეზულია კერძო კაცის ოსტატობით, გაძვრენ-გამოძვრენით, და არა თითონ მოსულია საზოგადო საქმის სიყვარულით და გულისტკივილითა. რა თქმა უნდა, ამისთანა კრება ვერას დროს ვერ დადგება იმ სიმალეზედ, საცა მარტო საზოგადო საქმის სიყვარული და გულისტკივილი საქმობს და ჰმართავს თვით საქმის სვე-ბედას.

აქ, ჩვენის ფიქრით, დანაშაული ის წესი კი არ არის, რომელიც თვითეულს ცალკე წევრს ბანკისას ხმას აძლევს კრებაში, არამედ ის გაიძვერობა, ის ეშმაკური ოსტატობა, ის უკადრისი ღონისძიებაა, რომელსაც არა ჰთაკილობენ ჩვენში ისინი, ვისიც მრწამსი ის არის, რომ თუ მე არ ვიქნები, ქვა ქვაზედაც ნუ იქნებაო. ამ გაიძვერობას, ამ ეშმაკობას უნდა ეწამლოს რამე, უნდა კრიჭა შეეკრას, უნდა კარი ამოეგულოს, რომ კარში ფეხი არ გამოდგას. ამას, ჩვენის ფიქრით, მთელის საზოგადოების თვალი და ხელი უფრო შესძლებს, ვიდრე სხვა რამე.

ჩვენ არ ვიცით რამდენად გასწმენდს და გააფაქიზებს ჩვენს მოღვაწეობას საზოგადო სარბიელზე იმისთანა კრება, რომელიც შედგენილ იქნება საზოგადოების რჩეულთაგან. უწესობას და ურიგობას, არა გვეონია, ამ რჩეულთა კრებისაგან ბევრი რამ ეწამლოს. ტფილისის საკრედიტო საზოგადოება ცხადი მაგალითია იმისი, რომ ეს რჩეულთა კრებაც ვერაფერი ციხე-სიმაგრეა, ვერაფერი ფარ-ხმალია უწესობისა და ურიგობის მოსაგერებლად. ბევრს კი ჩვენში იმედი აქვთ, რომ ეს რჩეულთა კრება ერთადერთი ღონეა, რომ ჩვენს საზოგადო საქმეს ეშველოს რამე და წესიერი სვლა იქონიოს. ძნელია ხელალებით თქმა, რომ რჩეულთა კრების შემოღების სურვილს თავისი პატივსადები საბუთი არა ჰქონდეს, რაკი შესაძლო გახდა ჩვენში განგებ მორეკა წევრთა კრებაში და არა მათის საკუთარის სურვილით მოსვლა, საქმის სიყვარულით გამოწვეული. დრო და მაგალითი ქუთაისის ბანკისა დაგვანახებს, რჩეულთა კრება რამოდენად დაედება წამლად ამ ჩვენს ახლად შემოსეულს ჭირსა. დღეს კი

ქუთაისის ბანკის შესახებ მეტია იმაზე ლაპარაკი, – აწ არსებული წესი სჯობია, თუ ახლად განზრახული. ქუთაისის გუბერნიის თავად-აზნაურთა წინამძღოლის განცხადებამა სჩანს, რომ ახლად განზრახულის წესის დადგენა გადაწყვეტილი საქმეა და მხოლოდ საჭიროა იმის პროექტის შედგენა, თუ როგორ და რა გზით მოხდეს ეს რჩეულთა არჩევანი.

ყველაზე უწინარეს გამოსადიებელი აქ ის არის, რომ ამ პროექტის შესადგენად ბანკის საზოგადო კრებაა მოწვეული თუ თავად-აზნაურთა? სჩანს, თავად-აზნაურთა კრებაა, თორემ თუ ბანკისა ყოფილიყო, ბანკის მოსახლეობას უნდა მოეწვია კრება და არა გუბერნიის თავად-აზნაურთა წინამძღოლს. თუ ესეა, მაშინ თავად-აზნაურთა კრება როგორ შესცვლის წესდებას ბანკისას, ესე იგი იმისთანა დაწესებულებისას, რომელიც სულ სხვა კრებას ექვემდებარება? არ ვიცით, ამ მხარეს საქმისას როგორ აუქცევს გზას მოწვეული კრება თავად-აზნაურთა, ხოლო უნდა ვიგულისხმოდ, რომ რაკი მიწვეულია, სჩანს საბუთი რამ იქმნება.

ესეა თუ ისე, აწ მიწვეულმა თავად-აზნაურობამ უნდა შეადგინოს პროექტი რჩეულთა კრების დასაწესებლად, სამაგიეროდ აწ არსებულ წევრთა კრებისა. რაკი გადაწყვეტილია, რომ არჩეულთა კრება უნდა უსათუოდ იქმნეს, ეხლა მარტო ისლა დაგვრჩენია, ჩვენ ჩვენი აზრი ვსთქვათ იმის შესახებ, თუ როგორ და რა გზით მოხდეს რჩეულთა არჩევანი. ჩვენ აქ, რასაკვირველია, არ გამოვუდგებით ყოველს წვლილს ამ საქმისას, ჩვენ მხოლოდ, ჩვენის შეძლებისამებრ, აღვნიშნავთ უმთავრესს საგნებს.

ჯერ ყველაზე უწინარეს უნდა გამოირკვას, რამდენი რჩეულია საჭირო, რომ წარმომადგენლობა საკმაოდ ვრცელი იყოს. ჩვენ გვგონია, საკმაო იქნება ორასი რჩეული. ეს ორასი კაცი უნდა განაწილდეს თანაწილად თვითეულ მაზრისათვის, ასე არც მეტი სხვა და არც ნაკლები. თუმცა შესაძლოა, რომ თვითეულმა მაზრამ ცალკე ამოირჩიოს თავისი წარმომადგენელი, მაგრამ უკეთესი იქმნება, რომ არჩევანი (რჩეულთა) მოახდინოს ხოლმე საზოგადო წევრთა კრებამ ქუთაისში იმ კანდიდატთაგან, რომელსაც თვითეული

ცალკე მაზრა წარმოადგენს. რჩეულნი უნდა არჩეულ იქმნენ სამის წლის ვადით და, მაშასადამე, ამ არჩევნებისათვის სამს წელიწადში ერთხელ უნდა მოხდეს ქუთაისის საერთო წევრთა კრება. ყოველს ცალკე წევრს ბანკისას ნება უნდა ჰქონდეს დაესწრას რჩეულთა კრებას, მიიღოს მონაწილეობა საქმეთა განსჯისა და განხილვის დროს, თავისი აზრი სთქვას, ერთის სიტყვით, ეგრედ წოდებული „სარჩიელის ხმა“\* იქონიოს.

ეს ჩვენი აზრი იქნება ვერ მოუხდეს ადგილობრივს გარემოებას და, რა თქმა უნდა, ადგილის კაცნი უკედ მოაწყობენ და უკედ შეუფერებენ ამ ახალს წესს საქმისა ვითარებას და იმ მიზეზს, რომელმაც ამ ახალის წესის შემოღება საჭიროდ გახადა. ჩვენი სურვილი მარტო ეს არის, რომ ახალმა წესმა მეტად არ შეჭხუთოს სისრულე საერთო გუბერნიის წარმომადგენლობისა ბანკის საქმეში და ამ გზით ცოტაოდნად მაინც შეურჩინოს ბანკის კრებას ის საზოგადო მნიშვნელობა საერთო კრებულისა, რომელიც დღეს-აქამოდე ჰქონდა და რომელიც სასურველია კვლავაცა ჰქონდეს.

[1894 წ.]

---

\* (Совещательный голос)





## „კახეთის მემკვიდრეობის საზოგადოების“ დაარსება

ტფილისი, 28 იანვარს

მოგესხნებათ, კახეთის მემამულეთა შორის დიდი ხანია მუშაობს ის აზრი, რომ საჭიროა დაარსდეს კახეთის მკვიდრთაგანვე ისეთი საზოგადოება, რომელმაც უნდა იტვირთოს და იზრუნოს, რათა კახეთის დიდსა და უხვს სიმდიდრეს – კახურს ღვინოს მოუაროს, მუშტარი ბლომად აუჩინოს და ბაზარი გაუხსნას, გაუფართოვოს. მოგესხნებათ ისიც, რომ დღეს უკვე შეძგარია წესდება ასეთის საზოგადოებისა ამ სახელწოდებით: „Общество Кахетинских Садовладельцев для сбыта своих вин.“

წესდების შემდგენელთა ამასთანავე ცალკე წერილითაც განუმარტავთ, რა მიზეზმა და გარემოებამაც გამოიწვია ასეთის საზოგადოების დაარსების სურვილი. წესდებაცა და ეს განმარტების წერილიც დღე-ღამეზე უნდა იქმნას წარდგენილი, სადაც ჯერ არს, დასამტკიცებლად.

მართლაც, ქვეყანამ იცის კახურ ღვინოების ღირსება. ეს ღვინოები ისეთის თვისებისაა, რომ ადვილად შეუძლიან მოცილობა გაუწიონ რუსეთში უცხო ქვეყნების ღვინოებს, რომელზედაც მეტის სიძვირის გამო უმრავლესობას ხელი არ მიუწვდება, თუ მართლა ნამდვილი ღვინოებია და არა შეთითხნილი სხვადასხვა მასალისაგან ყურძნის წვენის გარდა. ხოლო თუ კახური ღვინოები ნაკლებად მოიპოვება რუსეთის ბაზარში, ამის მიზეზი ის კი არ არის, ვითომ ან ღვინოსა ჰქონდეს წუნი, ან ნაკლებად მოჰყავდეთ, ან კიდევ

სხვა ქვეყნის ღვინოებზედ ძვირი იყოს, არამედ ის, რომ დღეს-აქამოდვე კახურის ღვინის მომყვანთა და დამყენებელთა ძალაუფლებურად მარტო ჩვენებური მუშტარი ჰყვანდათ სახეში, მარტო ჩვენის ქვეყნის ბაზარს შესცქეროდნენ. წინად კიდევ შეიძლებოდა ასე წარმოება საქმისა. მაშინ ღვინო ამიერკავკასიის სხვა ადგილებისა ვერ მოდიოდა ტფილისში, რომელიც არის აქაური უმთავრესი ბაზარი. ვერ მოდიოდა, იმიტომ რომ ის ადგილები შორს იყო ქალაქზე და გზებიც არ ვარგოდა. იმ ადგილებიდან ღვინის მოტანას დიდი ხარჯი აწვა, რადგანაც გზაც შორს იყო და დიდხანსაც უნდებოდნენ ზიდვას. ამ დიდხანს დარჩენას გზაში სხვა ზარალიც მოსდევდა, რადგანაც იმ ადგილების ღვინოები, როგორც უფრო სუსტნი, ადვილად ფუჭდებოდა და ვერ იტანდა ხანგრძლივს და დიდს გზას. ცხადია, რომ ამისთანა გარემოებაში კახური ღვინო ბატონობდა ტფილისში და წინ იდგა ყველა სხვაგვარ ღვინოზე ჯერ ღირსებითა და მერე მით, რომ ახლო იყო ბაზარზე იმოდენად, რომ იტანდა გზის ხარჯსა. სალდებოდა კიდევ ქალაქში კახური ღვინო, ჯერ იმიტომ რომ ბაზარი ერთხელ შეჩვეულ და დაჩემებულ კახურის გემოს ეტანებოდა, და მერე აქაური ბაზარი არა საჭიროებდა, რომ ღვინო გამძლე ყოფილიყო. იგი ბაზარი სჯერდებოდა, მეორე მოსავლამდე გაედლო ღვინოს, რადგანაც ამ ხნის განმავლობაში ღვინო სრულიად სალდებოდა და ამ სახით ბაზარი იტევდა მთელის წლის მოსავალს კახეთისას. გარდა ამისა, სიმაგრე და სიკეთე კახურისა იმოდენაა ეხლაც, რომ, იშვიათ შემთხვევას გარდა, ადვილად ინახება ერთი წლის განმავლობაში. ამისათვის არც ხარჯია საჭირო, არც ბორჯი და არც განსაკუთრებულის სიფრთხილით დაყენება და მოვლა ღვინისა. ტფილისსაცა და საზოგადოდ კახურის ღვინის აქაურს მუშტარსაც ამაზე მეტიც არა უნდოდა რა. ცხადია, ღვინის მოყვანასაც და დაყენებასაც ამ ორის გარემოებისათვის უნდა გაესწორებინა ანგარიში და შეჰფერებოდა თავის მუშტარის გემოვნებას და საჭიროებას. ამიტომაც, ოღონდ ღვინოს გამძლეობა მოსავლიდან მოსავლამდე ჰქონოდა და სხვა ჭეშმარიტ სიკეთესთან ცოტადენი

სიმწკლარტეც, ურომლისოდაც აქაური მუშტარი ღვი-  
ნოს ღვინოდ არა ჰხადიდა, და აქაურ ბაზარში მუშ-  
ტარი არ დააკლდებოდა.

ეხლა გარემოება სულ სხვაფრივ შეიცვალა და  
კახურ ღვინოს თითქმის ხელიდამ გამოეცალა აქაური  
ახლომასლო ბაზარი და მუშტარი. გაყვანილ იქმნა  
რკინის გზა ბათუმიდამ ბაქომდე და ამ მიზეზით ღვინის  
გადატან-გადმოტანა გაადვილდა, გაიფუდა სხვა ამიერ-  
კავკასიის ღვინის ადგილებიდან, რომელთაცა ხვდება  
რკინის გზა.

ამის გამო არაკახურ ღვინოებით აივსო ჩვენებური  
ბაზრები და, თუმცა ეს ღვინოები კახურზე გაცილებით  
მდარე ღირსებისაა, მაინც, რადგან იაფია, ისყიდება და  
მერე ხშირად კახურის სახელითაც. ამ სახით კახური  
ღვინო შეცოტავდა ბაზარში და მისი ადგილი  
არაკახურმა ღვინოებმა დაიჭირა. თუ ეხლა ჰყიდულობს  
აქაური ბაზარი კახურს ღვინოს, ჰყიდულობს მარტო  
იმისათვის, რომ დაბალ და უხეირო ღვინოში აურიონ  
და ისე გაჰყიდონ, როგორც კახური. ეს არის მიზეზი,  
რომ ძალიან ძნელია ეხლა ტფილისში ნამდვილის  
კახურის ღვინის შოვნა თითო-ოროლა ადგილ გარდა.

ასე შევიწროვდა დღეს კახური ღვინო. შევიწროვდა  
იმდენად, რომ ასეთს გარემოებაში, არა თუ ძნელია  
გაძლიერდეს ვენახების გამრავლება და ღვინის მოყვანა  
კახეთში, არამედ საფიქრებელია, რომ უფრო მეტად არ  
შემცირდეს და არ დაეცეს. თუ საიდგანმე შემწეობა არ  
აღმოუჩნდა ამ საქმეს კახეთში, მეტი რა ღონე იქმნება,  
ვენახების რაოდენობა და სივრცე, რომელიც საკმაოდ  
გადიდდა დროთა მიმავლობაში, ისევ უნდა შემცირდეს  
და შეცოტავდეს საზარალოდ მთელის კახეთისა და  
ქიზიყის კეთილდღეობისა.

როგორ უნდა ეშველოს მამ ამ საქმეს? ამაზედ  
შემდეგ მოვილაპარაკებთ.

ტფილისი, 29 იანვარს

გუშინ ჩვენ აღვნიშნეთ გაჭირებული და უნუგემო  
მდგომარეობა კახეთის ვენახის პატრონთა და კახურ  
ღვინოს მომყვანთა, რომელთაც სხვადასხვა ჩვენ მიერ  
დასახელებულ მიზეზთა გამო ხელიდამ გამოეცალათ

აქაური ბაზარი და კახურ ღვინოს დღეს იმდენად ნაკ-  
ლებად ჰყავს მუშტარი, რომ შემამულეთა აღარ იცინან,  
რა უყონ ან თავიანთ ვენახებს და ან მშვენიერს  
კახურს, როგორ ეშველება მათ საქმეს?

ღიად, კახეთში ვენახები ბევრია, ღვინო უხვად  
მოდის. თუ ცდა და შემწეობა იქნება და ამ ვენახების  
შემუშავება, აგრედვე დაყენება და მოვლა ღვინისა განკ-  
არგდება, უკეთესად, უფრო მეტის ცოდნით მოეწყობა,  
კახურ ღვინოებს არ გაუჭირდებათ თავისი რაოდენო-  
ბითა და ღირსებით რუსეთის ბაზრებში უცხო ქვეყნე-  
ბის ღვინოების მაგიერობა გასწიოს რამდენადმე და  
მუშტარსაც გული მოუგოს მით, რომ ნამდვილი  
ყურძნის წვენი იქმნება და შიგ არა ერევა რა. თუ  
ასეა, ცხადია, მთავრობა არას დაჰკარგავს, უკეთუ იზ-  
რუნებს და ხელს შეუწყობს ღვინის მოყვანას კახეთში.  
ამ ზრუნვით, ჯერ ერთი, რომ რუსეთს დაეზოგება  
დიდძალი ფული, რომელსაც ეხლა იხდის სამზღვარგა-  
რეთის ღვინოებში და მეორეც – ერის ჯანმრთელობაც  
ეჭვქვეშ არ იქნება და ქვეყანა თავს დაანებებს იმ შინ  
და სამზღვარგარედ მომზადებულს ღვინოებს, რომელიც  
სწამლავს და ვნებს ხალხს.

ერთადერთი ხსნა კახეთის ვენახის პატრონთა, თუ  
არ უნდათ სულ უმუშტროდ დარჩნენ, ის არის, რომ  
ახალი ბაზარი მოეპოვოს კახურ ღვინოს საქართველოს  
გარედ, უფრო კი რუსეთის დიდ ქვეყანაში, რუსეთი  
სავსეა ისეთის შინ მოხერხებულ, ნაკეთებ და მონათ-  
ლულ ღვინოებით, რომელშიაც ძალიან ნაკლებად არის  
საკუთარის ყურძნის წვენი და ხან სულაც არ არის.  
კახურის ღვინის გატანა რუსეთის ბაზრებში საკეთი-  
ლოდ შესცვლის დღევანდელს უნუგემო ყოფას მით,  
რომ ღვინის მუშტარსაც მისცემს კარგს და მარგებელს  
სასმელს და ღვინის მწარმოებელსაც ხალისი ექმნება,  
ბაზარია, საცა მუდამ შემოძლიან გავასალო, რამდენიც  
უნდა ღვინო მომივიდესო.

ხოლო იმისთვის, რომ კახური ღვინო გავრცელდეს  
და საღებოდღეს რუსეთში, საჭიროა ვიქონიოთ სახეში  
პირველად, რომ კახური ღვინო შეეფერებოდეს ახალ  
მუშტართა გემოვნებას, მოჰმორდეს სიმწკლარტე, რო-  
მელსაც ერიდება რუსეთის მუშტარი, ხოლო ყველა

სხვა თვისი ღირსება ხელუხლებლად შერჩეს; მეორედ, ღვინოს, თავის თვითეულ და ცალკე ხარისხისამებრ, ერთგვარი გემო, სურნელება და ფერი ჰქონდეს მარტო იმ თვისებათა შემწეობით, რომელიც ბუნებითვე აქვს; მესამედ, გაძლიერდეს მისი ბუნებრივი ღონე დიდხანს გაძლებისა, რათა არ წახდეს, საუარესოდ არ შეიცვალოს კარგა ხნის განმავლობაში და შეეძლოს ატანა ცოტად თუ ბევრად შორს მანძილზე წალების და ხანგრძლივად შენახვის, ერთის სიტყვით, შეიძინოს იგი თვისება, რომელიც მას შეჰქმნის ვაჭრობის საიმედო საგნად.

რაკი კახური ღვინო ბუნებით კარგია, ვენახის მოვლისა და ღვინის დაყენების წესები ახლა ბევრად განკარგებულია ეხლანდელის მეცნიერების მიერ, ეჭვი არ უნდა იყოს, ჩვენის აზრით, რომ მარტო თავის ბუნებურ თვისებათა წყალობით და სწავლა-ცოდნის მიშველებით შემზადდეს, კახური ღვინოები ადვილად დადგება იმ ღონეზე, იმ თვისებაზე, რომელიც ზემოთ მოვიხსენეთ და რომელთა წყალობით არის მხოლოდ შესაძლო დღევანდელი ცვალებადი ღვინო მტკიცე და საიმედო სავაჭრო საქონელი შეიქმნას და რუსეთის, თუ გარედ სადმე ბაზარში საკმაო და ღირსეული ადგილი დაიჭიროს. აი კახურ ღვინოების ამ ღონეზე დაყენება საფუძვლად დაუდვია ხსენებულ საზოგადოებას, რომელსაც ჰქვია „Общество Кахетинских Садовладельцев“. რა გზით და ღონისძიებით განუზრახავთ ამისი მიღწევა და შესრულება, ამაზე შემდეგ მოვილაპარაკებთ.

ტფილისი, 30 იანვარს

„კახეთის ვენახების პატრონთა საზოგადოების“ აზრით, დღევანდელი აქაური ღვინის წარმოება მარტო ერთს საგანზეა დამყარებული და ის საგანი ღვინოა, რომელიც ამის გამო ერთადერთი წყაროა შემოსავლისა ძვირად შესამუშავებელ და საკეთებ ვენახებისაგან. მაშინ, როდესაც ღვინისაგან ნარჩენი მასალა, დღეს თითქმის გადასაყრელად გამზადებული, როგორც უვარგისი რამ, შესაძლოა კაცმა გამოიყენოს და გადა-

აკეთოს ღირებულ სააღმშენებლო საგნად. ღვინის მარილი, კრემორტარტარი და მწვანე წამალი /Ап - медянка/ ღვინის წარმოების გამონარჩენ მასალისაგან გამოსაღები, საკმაოდ გააძლიერებს შემოსავალს ვენახისას, თუ ამისათვის კაცი ხელს გასძრავს და ამ საქმეს ცოდნით მოეკიდებაო.

თუმცა ამ საგანზედ მიმართული წარმოება სულ სხვა საქმეს შეადგენს, განსხვავებულს ღვინის კეთებისაგან, მაგრამ თუ იგი აღორძინდა ჩვენში, ახალს წყაროს შემოსავლისას ხელთ მისცემს ვენახის პატრონთა იმით მაინც, რომ ღვინის კეთებისაგან ნარჩენ მასალას, დღეს გამოუსადეგს და მაშასადამე უფასოს, ფასს დასდებს და სავაჭრო საგნად შეჰქმნისო. ამით გაუჩენს ვენახის პატრონს ახალს წყაროსა, რომელიც გააძლიერებს შემოსავალს ვენახისას, რადგანაც ეს ახალი საქმე, რომლისათვის საჭიროა ღვინისაგან ნარჩენი მასალა, მოითხოვს ამ მასალასაო.

ამ სახით ვენახის შემოსავალი საერთოდ იმატებს და, მაშასადამე, შესაძლოა ამ ახალ წყაროს გაჩენით ღვინოსაც უფრო ზომიერი და ხელმისაწვდენი ფასი დაედოსო. დღეს მთელს ხარჯს ვენახისას მარტო ღვინო უნდა გაუძღვეს, ღვინომ უნდა დაფაროს შემუშავება ვენახისა, იხადოს ზარალის შიში და თვით ვენახის პატრონსაც საკმაო მოგება მისცესო. ყოველივე ეს საკმაოდ ადიდებს ღვინის ფასსა და ამ განდიდებისაგან არც ვენახის პატრონი ხეირობს და არც ღვინის მუმტარიო.

კარგა ბლომა ფული, რომელიც რუსეთიდან გადის ღვინის მარილის, კრემორტარტარის და მწვანე წამალის სამზღვარგარეთიდან მოზიდვისათვის, რატომ შინ, რუსეთშივე არ უნდა ჰრჩებოდეს, მაშინ, როდესაც ყოველივე ეს შესაძლოა კახეთში ვაკეთდეს და იმოდენად საკმაოდ, რომ რუსეთის შინა ბაზრები თითქმის სავსებით დააკმაყოფილოსო.

ამ სახით „კახეთის ვენახების პატრონთა საზოგადოებას“ თავის საგნად დაუდვია: ღვინის საქმე კახეთში იმ ხარისხზე დააყენოს, რომელიც მარტოდ-მარტოა თავმდები, რომ კახური ღვინო შეიქმნას მტკიცე და საიმედო საგნად აღმშენებლობისა გარედ

ბაზრებისათვის და ნამეტნავად რუსეთისათვის და აალორძინოს იგი ახალი დარგი წარმოებისა, რომელთა ძალით ღვინისაგან ნარჩენი მასალა შესაძლოა გადაკეთდეს საფასურ საგნად ვაჭრობისათვის და მით ვენახის პატრონთ გაუნრდეთ ახალი წყარო ვენახის შემოსავლისა.

ხოლო ყოველივე ესე თვითეულ ცალკე კაცთა ღონისათვის მიუწვდომელია და რაც თვითეულისათვის შეუძლებელია, იმას შესძლებს შეერთებული ღონე ბევრისაო, მთელის კრებულისაო. ესა გვეჩონდა სახეში წესდების პროექტის შემადგენელთაო, ამბობენ დამწყებნი ამა საქმისა. მისახწევად იმ აზრისა, რომელიც საზოგადოებას თავის მოქმედების საგნად მიუღია, დაუღვიათ, 1/ რომ წევრთაგან მოგროვილ ღვინოს თვითონ საზოგადოებამ მოუაროს, შეუფეროს გარედაბაზრის მოთხოვნილებას ისე კი, რომ კახური ყურძნის წვენში არა რა გაურიოს და მარტო მის ბუნებურ თვისებას ხელი შეუწყოს და ბუნებური წმინდა კახური ღვინო გაიტანოს ბაზარში, კარგად მოვლილი საგამძლეოდ და საგემოდ; 2/ რომ შემწეობა აღმოუჩინოს ვენახების უკედ კეთებისა, ღვინის დაყენებისა და მოვლისათვის და ღვინის ნარჩენი მასალა ახალის წარმოების საგნად გახადოს და 3/ შუამავალი შეექმნას ღვინის მსმელთა და ღვინის პატრონთა ისე, რომ ორივესათვის უზარალო იყოს.

ყოველი მუხლი წესდებისა ამ სამს საგანზეა მიმართული და მოწყობილი, ასე კი, რომ თვითონ “საზოგადოებას” საკუთრივ არავითარი აზრი გამორჩენისა არა აქვს და ამ სახით სრულად ზურგი შეუქცევია იმგვარ წყობისათვის, საცა თვითონ დამწყები თავის ხეირს დაეძებს. მთელი მოგება თვითეულ იმ ღვინის პატრონისათვის არის გადადებული, რომელიც წევრად შესულია და თუ საზოგადოება იღებს რასმე შუამავლობისათვის, მარტო იმოდენას, რაც საკმაოა მიუცილებელ ხარჯისათვის, რომელსაც თვით კრება საზოგადოებისა ამტკიცებს.

განვმარტეთ რა ზოგადის ნიშნებით საგანი „კახეთის ვენახების პატრონთა საზოგადოებისა“ და ისიც, რომ თვით „საზოგადოებას“ უარუყვია ყოველივე


აზრი გამორჩენისა საკუთრად თავისთვის, ყოველს წვლილს ვერ გამოვუდგებოდით, რადგანაც ეს მოითხოვდა თითქმის მთელის წესდების გადმოწერას და ახსნას. ეს კი სათქმელია, რომ ამ „საზოგადოების“ დამფუძნებელთ იმედი აქვთ, მთავრობა თანაგრძნობით მიიღებს მათ მიერ შედგენილს წესდებს. იგინი ამბობენ, რომ ამ „საზოგადოების“ დადგენა არამც თუ ააცილებს კახეთს ღვინის საქმის დაცემას, არამედ გააძლიერებს შესაძლო საზღვრებამდე.

ეს გარემოება არ უნდა დავიწყებულ იქმნას თვით სახელმწიფოს ინტერესების მხრითაც, რადგანაც მთელი ორი მაზრა კახეთისა /თელავის და სიღნაღის/ და ნაწილი მესამისაც /თიონეთისა/ შეჰყურებს ღვინოს, როგორც ერთადერთს წყაროს ცხოვრებისას და სახელმწიფო ხარჯის ხდისას. ცოტად თუ ბევრად შეწყვეტა ამ წყაროსი ღონეს მოაკლებს იქაურ მკვიდრთა და მეტისმეტად გაუჭირებს ცხოვრებას და ხარჯის ხდასა მაშინ, როდესაც ბუნება კახეთისა ხელს უწყობს ადამიანს ღვინის საქმის გაძლიერებისათვის. გაძლიერებული კახეთის ღვინის საქმე, კარგად და ეხლანდელ მეცნიერების შემწეობით რიგიანად წარმართული, შემძლებელია რუსეთს შეუმოკლოს საჭიროება სამზღვარგარეთიდან ღვინის ზიდვისა და იგი დიდძალი ფული რუსეთისა, რომელიც დღეს სამზღვარგარედ გადის, შინვე რუსეთში დატრიალდება მისთა მკვიდრთა საკეთილდღეოდ. გარდა ამისა ხელშეწყობა, რომ ნამდვილი, შეურევნელი კახური ღვინო შეტანილ იქმნას რუსეთის ბაზარში, სასურველია საერო ჯანმრთელობის მხრითაც, რადგანაც დღეს რუსეთში საღდება წამლებით მოწამლული ღვინო, შინაური თუ გარეული, და ეს, რა თქმა უნდა, უვნებლად არ ჩაუვლის ხოლმე ერსაო.

ყოველივე ეს მით სასურველიაო, ამბობენ დამფუძნებელნი, რომ კახური ღვინის ბუნებრივი სიკეთე ყველასაგან ცნობილია და, თუ ბაზარი გაეხსნა, ამის მიხედვით განკარგდება ვენახების კეთება, გაიმატებს ვენახების მოედანი და გაძლიერდება ღვინის საქმე და ამ გზით რუსეთის ბაზარი შეიძენს მარგებელს სასმელს იმოდენად ბევრს, რომ დიდძალს ღვინოს სამზღვარგა-

რეთისას განდევნის და დიდად შეაფერხებს, თუ სულ არ მოსპობს იმ მოწამლულ სასმელთა ბაზარში სვლას, რომელიც დღეს ღვინის სახელით სალდება და იყიდება.

[1894 წ.]



### <„სამთა კავშირი“>

ტფილისი, 24 აგვისტო

როგორც წინააღმდეგობა, ისეც დღეს ეგრეთ წოდებული „სამთა კავშირი“ გერმანიისა, ავსტრია-ვენეციისა და იტალიისა დედაბოძია საურთიერთობო პოლიტიკისა. აშლა და გარიგება ევროპის აწეწილ საქმეებისა დღესაც, როგორც წინააღმდეგობა, იმაზეა დამოკიდებული თუ რა შინაგან სიმაგრეს და სიმტკიცეს წარმოადგენს ეგ „სამთა კავშირი“ დღეს, ან მახლობელ საგაისოდ.

თუ ყური დაუვადებთ ამ საგნის შესახებ მომხდარ ამბებს და გაზრების მითქმა-მოთქმას, ამ დედაბოძს ეხლანდელის საპოლიტიკო მდგომარეობისას, ცოტად თუ ბევრად ძირი უღებება და ლამის გადაიქცეს. ეს კი აშკარად სჩანს დიდი ხანია, რომ მაგ დედაბოძს ჭია გასჩენია და გულ-ღვიძლს უფხვნის. ესეა თუ ისე, საქმე დღეს ისეთს ყოფაშია, რომ თვით მოკავშირეებს გული როგორღაც უტოკთ და ერთმანეთს ყურაც-ქვეტილები თვალს ადევნებენ. თვითეულს სამთაგანს ჰკონია თუ ჰშიშობს, ორნი სხვანი მალაატობენ და არიქა, ხელიდამ ისე არ გამისხლტნენ, რომ მე რიყეზე მარტო არ დავრჩეო.

ჯერ, როგორც მოგეხსენებათ, იტალია როგორღაც გაუგორდ-გამოუგორდა საფრანგეთს, ეგებ ფული მოუგოვო. თუ ესეაო, ახლა ავსტრიამ დაუდო რაღაც თანხები იმავე საფრანგეთს და იქამდე მოუტკბილდა, რომ ერთს დროს ავსტრიის იმპერატორმაც კი მოიწადინა სწვევოდა სტუმრად საფრანგეთსა. ამ ბოლო დროს ხომ გერმანიამაც, ყოველ ამის მნახავმა, იფიქრა, - ეს ჩემი გულითადი მეგობრები რაღასაც ცუდლუტო-

ბენ და ეშმაკობენ, – და ამანაც გაუთამამ-გამოუთამამა საფრანგეთს, თუ ასეა, ისა სჯობია, მე დავასწრო.

რომ გერმანიას ძალიან უნდა საფრანგეთის გულის მოგება, ეს ყველასათვის ცხადია და ყველამ დიდი ხანია იცის. თავმოყვარეობა, პოლიტიკა თუ აბრუს გატეხის ფიქრი ნებას არ აძლევს გერმანიას, რომ ამ გზაზე გულახდილად ფეხი გადგას, საფრანგეთი როგორმე მოიმადლიეროს და მით ეს აუარებელი საომარი ხარჯი, რომელიც აგრე ემძიმება გერმანიის ერს, შეიმსუბუქოს. გერმანია საფრანგეთისავით მდიდარი არ არის, რომ ეს ამოდენა ჯარების თოფიარაღქვეშ დგომამ კარგად და შეუმჩნევლად ჩაუაროს. როცა იქნება, საცა წვრილია, იქ გაუწყდება ძაფი მოთმინებისა ხარჯით ძალზე დატვირთულს ერს გერმანიისას და მაშინ იქნება შინაურმა აწეწილობამ ხელფეხი საგარეო მოქმედებისათვის სრულად შეუკრას და აღარ მოაცალოს გერმანიის მთავრობა საგარეო საქმეთათვის. ამრიგად, შესაძლოა გერმანია უომრადაც დამარცხდეს, თუ დღევანდელი შეთოფიარაღებულნი მდგომარეობა მისი კიდევ დიდხანს გასწევს.

მდიდარმა საფრანგეთმა ეს კარგად იცის და იმიტომ ჯერხანად ყურსაც არ იბერტყამს, როცა კანტი-კუნტად აქედ-იქიდან მოისმის ხოლმე ხმა, მოდი ჯარები შევიცოტავოთ და ტყუილუბრალოდ ნუ ვეთელინებით ამ შეიარაღებულ მშვიდობიანობასაო.

უფრო დიდ გაჭირებაში არიან ორნი სხვა ამხანაგნი გერმანიისა – ავსტრია და იტალია. ამათ ლამის სული ამოხდეთ იმ დიდ ხარჯის გამო, რომელსაც მათგან „სამთა კავშირობა“ ითხოვს. იტალია დღეს ხომ ისეთ მდგომარეობაშია, რომ ლამის გაკუტრდეს, ისე ყელთამდეა ვალში ჩაფლული, რომ არც კი იცის, როგორ ამოვიდეს. ამისთანა მდგომარეობის ძალმომრეობით „სამთა კავშირის“ წინააღმდეგნი დღედაღლე მრავლდებიან იტალიაში, რადგანაც ამ შეუძლებლობის და უღონობის მიზეზად სთვლიან „სამთა კავშირს“. არ არის უიმისო, რომ პარლამენტში, თუ გარედ ჟურნალ-გაზეთობაში უფრო არ განხილდებოდეს ხმა სამთა კავშირის სამღურავისა, მაგ კავშირმა შემოგვაწყრომა საფრანგეთიო და ამ დღეში ჩაგვაგლო.

ვინ იცის, ამ გაჭირვებას და სამთა კავშირის ასე თუ ისე ტოკვას სადამდე მიეყვანა საქმე, რომ დღეს ევროპას სხვა შინაური ტკივილები არ ასჩენოდა და თითოეული სახელმწიფო, რომელთ ხელშიაც არის ბედ-ილბალი მთელის ქვეყნის პოლიტიკისა, ამ ტკივილს არ გაეჩერებინა შინაურს ყოფა-ცხოვრებაზე. ეს ტკივილი ანარხისტების გაძლიერებაა ამ ბოლოს ხანებში და ყველგან, თითქმის ყოველ გამოჩენილს სახელმწიფოში ამ ანარხისტების საქმემ შეიპყრა მთელი მზრუნველობა და ყურადღება სახელმწიფო კაცთა და ამის გამო დღეს საგარეო საქმეთათვის აღარავის არა სცალიან.

ახლა ეს ჩინეთის და იაპონიის ომმა მიიზიდა კიდევ ყურადღება ევროპისა. საფრანგეთს, რუსეთს და ინგლისს, ნამეტნავად ამ ორს უკანასკნელს სახელმწიფოს, დიდი ინტერესები აქვთ ამ შორეულ აღმოსავლეთის ქვეყნებში.


ამ სახელმწიფოებისათვის სულ ერთი არ არის, როგორ გათავდება საქმე ჩინეთისა და იაპონიის შორის. თითოეული მათგანი ცდილობს წილმიუღებლად არ დარჩეს ამ საქმეში, ერთი გაიმარჯვებს თუ მეორე.

აქ საქმე იმაშია, რომ ჩინეთს უნდა გაუბატონდეს კორეიას, და იაპონიას ჯერ ამ მხრით გაძლიერება ჩინეთისა, როგორც მეზობლისა, არ უნდა და მერე თავისთვის სახეიროდ მიაჩნია, რომ კორეია დამოუკიდებელ სახელმწიფოდ მაინც დარჩეს, რომ, როგორც უძღური მეზობელი, თავის გავლენის ქვეშ იყოლიოს. ესლახან, კორეის მეფემ, ამბობენ გაზეთები, კორეია დამოუკიდებელ სახელმწიფოდ გამოაცხადაო.

უნდა მოგეხსენებოდეთ, რომ კორეია დღეს-აქამოდვე ჩინეთის პროტექტორობის ქვეშ იყო და ესლა ეს გამოცხადება კორეის მეფისა, თუ მართალია, ჩინეთის წინააღმდეგობასა ჰნიშნავს და იაპონიის მომხრეობას. ამით იაპონიას, რასაკვირველია, აბრუც მოემატება და ღონეც, რადგანაც კორეია მისი მემკვიდრე იქნება შინა და გარედ და მით იაპონიას გაუადვილდება ომი და ჩინეთს კი გაუძნელდება ჯარების მოძრაობა კორეიაში.

ეხლა ევროპის სახელმწიფონი გაჩუმებულნი არიან და ელიან, საქმე ომისა როგორ გათავდება. ეს იმისთანა საქმე კია, რომ შესაძლოა ევროპის სახელმწიფონი ერთმანეთს შეახალოს და ერთი ალიაქოთი მოხდეს, თუ შიგ ევროპაში არა, იმ შორეულ აღმოსავლეთ ქვეყნებში მაინც.

[1894 წ.]



### **<საფრანგეთსა და გერმანიას შორის მშვიდობიანი ურთიერთობის დასაწყისი>**

ტფილისი, 26 აგვისტო

ჩვენ გუშინწინ /„ივერია“ № 182/ ჩამოვაგდეთ ლაპარაკი „სამთა კავშირის“ გამო განგებ, რომ აგვენიშნა ერთი გარემოება, რომელსაც ამ ბოლო ხანებში ხშირად იხსენებენ ხოლმე გაზეთები და რომელსაც დიდი შედეგი უნდა მოჰყვეს, თუ აღსრულებაში მოვა და თუნდაც არ მოვიდეს აღსრულებაში, მაინც დიდმნიშვნელობიანია დღევანდელ დღის პოლიტიკისათვის, რადგანაც თავისთავადაც ბევრს რასმეს მოასწავებს, ჩვენის ფიქრით, და ასე თუ ისე იმოქმედებს „სამთა კავშირის“ შინაგან ძალ-ღონეზე.

ჩვენ აქ სახეში გვაქვს ის გარემოება, რომ საფრანგეთსა და გერმანიას შორის მტრედმა მშვიდობიანობისამ და დაახლოებისამ ფრენა დაიწყო. ეს ამბავი მით უფრო საგულისხმეოა, რომ ამ გზაზე ფეხი პირველად გამოსდგა გერმანიამ იმისთანა გაზეთის პირითა, რომელიც ყველასაგან მიჩნეულია, ვითარცა დაახლოებული ორგანო გერმანიის მთავრობისა.

ამ ამბავს, ერთის გაზეთის თქმას და სჯავს სხვა გაზეთებმაც გერმანიისამ ბანი მისცა და ერთობ შემჩნეულ იქმნა, რომ ეხლა გერმანელები უფრო ხმადაბლა ლაპარაკობენ საფრანგეთზე და უფრო ტკბილად იხსენიებენ მის ავ-კარგსა, როცა კი შემთხვევა ეძლევათ. ამისთანა ამბავი, ამ გზაზე პირველად ფეხის გამოდგმა გერმანიისა, რომელსაც წინ უძღვის იმისთანა თავმომწონე და ძლევაშოსილობით გაზეთადებული იმპერატორი, როგორიც ვილჰელმია, ძნელი მოსალოდნელი

იყო, რადგანაც ეს ამისთანა საქციელი, ცოტა არ იყოს, თითის მოკაკვავა საფრანგეთის წინაშე.

თუმცა გერმანიის ახალგაზრდა იმპერატორი ჟამთა ვითარების ამყობილი კაცია, თავის გულითადაც რწმენას და წყურვილს ხშირად დაადუმებს ხოლმე წინაშე აუცილებელ საჭიროებისა და ხშირად ჟამთა ვითარებას და მოთხოვნილებას უმორჩილებს ხოლმე თავის გულის ნადებსა და სურვილს, მაგრამ მაინც ბევრს უკვირს, - რად მოიწადინა, რამ აიძულა, რომ ასეთს გზაზე დააყენა გერმანიამ თავისი პოლიტიკა საფრანგეთის მიმართო.

მართლაც, ფრიად საჭირო და ძნელი გამოსაცნობია, მით უფრო, რომ აშკარა მიზეზი არა სჩანს და ფარული კი დიპლომატიების ცხრაკლიტულშია ჩაკეტილი, ჯერ ხანად მაინც. შეიძლება ვიფიქროთ, რომ გერმანიის იმპერატორი ჰხედავს, რარივად ემძიმება ევროპას ეხლანდელი მდგომარეობა, სარჩოსაბადებელს გამრჯელების ერისას სჭამს და ინელებს აუარებელ ჯარების თოფ-იარაღქვეშ დგომა, ჰხედავს ამას და ამასთანაც იცის, რომ ამ მართლაცა მძიმე ტვირთის მომავლინებელი მიზეზი საფრანგეთის და გერმანიის შორის დაბუდებული მტრობაა. ყოველ ამის გამო, შესაძლოა, ვამბობთ, ვიფიქროთ, რომ ახალგაზრდა იმპერატორი გერმანიისა თავის თავმოწონებას მსხვერპლად აძლევს კეთილშობილურს და პატიოსნურს წყურვილს მთელის ევროპის კეთილდღეობისა და ამისათვის არა ჰრიდობს პირველმა ხელი გაუწოდოს შერიგებისა საფრანგეთსა და მით მოსპოს ეს შეთოფიარალებული უომრობა, რომელიც ომზე უარესად ნელ-ნელა სწოვს მთელს ევროპასა.

რა თქმა უნდა, ბევრი რამ არის დამოკიდებული გერმანიის იმპერატორზე, რომელსაც ვით ძლევა-მოსილს და კარგად გამართულს, ყველანი დღეს თვალწარბში შეჰყურებენ. არც იმისთანა გულის კაცია იგი, კაცად-კაცური სულგრძელობა და კაცად-კაცური პატივმოყვარეობა და თავმოწონება მის გულისაგან შორს იყოს. ამასთან იმდენად გულწმინდაა და გონებაგახსნილი, რომ ამ დიდს საქმეს - ჭეშმარიტ და მართალ მშვიდობიანობის ჩამოგდებისას, თავს მოუხრის

მთელის თავის ახალგაზრდობის მხურვალეებითა, რადგანაც გონებითი თუ ზნეობითი უნარი აქვს მისწვდეს, რომ ამ გზით სახელის შოვნა უფრო სასახელოა და სადიდებელი, ვიდრე ხმლით და სისხლის ფრქვევით გამარჯვება და განადგურება ვისიმე. ვილჰელმ II იმისთანა ხასიათის კაცია, რომ შეიძლება ამ დიდმა საგანმა აიყოლიოს და გულთათქმანი ცალკე კაცისა დაუმორჩილოს დიდს მოვალეობას ქვეყნის გამაბედნიერებელ კაცისას.

მეტისმეტი იმედი იქნება ვიფიქროთ, რომ გამწვავებული მტრობა და გულნატკენობა საფრანგეთისა ეგრე მალე დაამდეს და ყოველსავე შიშს ევროპის აშლილობისას მით ბოლო მოეღოს. მაგრამ, ისიც კარგია, რომ - გაზეთების სიტყვით, საფრანგეთის და გერმანიის ურთიერთობას უკეთესობა დაეტყვო და ცხადი შეიქმნა მათი ერთმანეთთან მოტკბილება. დღესაქამომდე საფრანგეთი ჰთაკილობდა, როცა გერმანია მოიწადინებდა ხოლმე რამე ამოს და დღეს კი ყოველს ამისთანას თვითონ საფრანგეთი, თუმცა თავდაჭერილად და წინდახედულად კი, აღარ უარობს და კეთილის სიტყვით ინსენიებს.

არ ვიცი, ეს ახლად გაჩეხილი გზა საფრანგეთის და გერმანიის შორის რამოდენად გაიტკეპნება და სად მიიყვანს საქმეს, მაგრამ ეს კი დასამალავი არ არის, რომ ეს ამბავი ნიშანია ჟამთა ვითარებისა და სამთა კავშირის ტოკვისა.

[1894 წ.]





## **<სოფლის მეურნეობა რუსეთში>**

ტფილისი, 28 აგვისტო

გაჭვივრებულმა მდგომარეობამ სოფლის მეურნეობისამ და მიწათმოქმედებისამ მეტად ხმამაღლა ღაღადი დაიწყო რუსეთში. დიდი ხანია უჩივიან, რომ მიწის მოჭირნახულე კაცი რუსეთში უმწეოდ არის დარჩენილი და არავითარი ღონისძიება არა აქვს, თავის საკუთარის ძალ-ღონით გაჭვივრებისაგან თავი იხსნას.

მართალიც არის: სოფლის კაცს, მიწის მოჭირნახულეს არ მოუვა მოსავალი, შიმშილის შიშს უნდა მიეცეს და მოუვა ცოტაოდნად ბარაქიანად, არსად იმისთანა ბაზარი არა აქვს, რომ გასასყიდს ჭირნახულს კუთვნილი ფასი ამოაღებინოს. ამის გამო სოფლის ნაწარმოების საქონელი ძლივძლივად შოულობს მუშტარს და იძულებულია ჩალის ფასად გაიციოს ხოლმე. ამრიგად სოფლის მეურნე ორსავე შემთხვევაში ზარალშია.

ბევრ სხვადასხვა მიზეზს ასახელებენ იმისას, რომ მიწის მოსავალს თავისი შესაფერი ფასი არა აქვს ბაზარში. სხვათა შორის დანახულია ის მიზეზი, რომ სოფლის მოჭირნახულეს საქმეში სამუშაო და სატრიალებელი ფული ხელთ არა აქვს ხოლმე და იძულებულია მოსული ჭირნახული ჩალის ფასად გადაჰყაროს, რომ ამ გზით თითო-ოროლა გროში იშოვნოს ათასნაირ ხარჯის გასაძღოლად და გასასტუმრებლად. ამ ყოფაში მამულის განკარგება, მიწის გაღონიერება, მეურნეობის წინ წაწევა და გაძლიერება ხომ ყოვლად შეუძლებელია და შეუძლებელი.

მთავრობამ მიაქცია ამ უნუგემოდ ყოფნას სოფელში მოჭირნახულეს ყურადღება და წამლად დანახულ იქმნა, რომ სოფლის მეურნეს და მოჭირნახულეს ფულის შოვნისას ადვილი და იეფი სახსარი აღმოუჩინოს. ამისათვის ფინანსთა სამინისტრომ ამ ბოლოს ხანებში საკმაოდ ფართოდ გაუღო სოფლის მეურნეობას და სხვადასხვა წარმოებას სახელმწიფო ბანკის კარები და გამოაცხადა წესები, როგორ, რა გზით და რამდენად უნდა გაუმართოს ხელი კრედიტის შემწევობით სოფლის მოჭირნახულეს.

წინანდელი წესი ეგრედ წოდებულ სოლოვექსელებისა სოფლის მეურნეთათვის, რომელიც ამ რამდენისამე წლის წინად შემოღებულ იქმნა სოფლის მოჭირნახულეთა ხელის გასამართავად, უფრო შეაგვს და უფრო შეუწონეს გარემოებას და საჭიროებას სოფლის კაცისას და 22 ივლისს ამ წლისას გამოაცხადეს იმპერიაში სამოქმედოდ.

დღეის ამას იქით სოფლის მეურნეს, რომელსაც კი ძალ-ღონე და სურვილი შესწევს რითიმე წინ წასწიოს თავისი მამულის საქმე, გააძლიეროს, ასე თუ ისე, თავის მიწის მოქმედება და საქმიანობა, სახსარი აქვს, ფული იშოვოს სახელმწიფო ბანკის შემწევობით ადვილად და იეფად და ამით თავის საქმეს დაუბრკოლებლად გაუძღვეს. წესდებაში მოხსენებულია, რომ შესაძლოა სოფლის მეურნემ ფული ისესხოს სახელმწიფო ბანკიდან, როგორც მამულის განკარგების და კეთების სახარჯოდ, ისეც სასყიდლად იმისთანა საქონლისა, მანქანებისა და საჭირო საგნებისა, რაც-კი დანიშნულ იქმნება სოფლის მეურნეობისათვის.

რა თქმა უნდა, ფულის აღება სესხად სახელმწიფო ბანკიდან ისეა მოწყობილი, იმ წესებით შეზღუდული, რომ ბანკს გასესხებული ფული არ დაეკარგოს. ამ მხრით სახელმწიფო ბანკს კარგი, მაგარი ზღუდე აქვს შემოვლებული და რიგაინად აღნუსხული, - თუ როგორ, ვის, რაში და რამდენი მიეცეს და რა უნდა უთავდებობდეს ნასესხის ფულის დაბრუნებას.


ჩვენ ვეცდებით, როცა გარემოება ხელს მოგვცემს, ვაუწყოთ ყველა ეს წესები ჩვენს მკითხველს და ეხლა კი ამას ვიტყვით, რომ სახელმწიფო ბანკის

კრედიტი სოფლის მეურნეობის და სხვა მრეწველ-  
თათვის ჩვენშიაც იმოქმედებს. უკვე არჩეულია ჩვენშიაც  
ევრედ წოდებული „მიმღები კომიტეტი“, საცა მიწვეულ  
არიან, სხვათა შორის, ჩვენებური მამულის პატრონე-  
ბიც. ამ კომიტეტის მოვალეობაა თვითეულ მთხოვ-  
ნელის ქონებრივს შეძლებისა მიხედვით აღრიცხოს,  
რაოდენი ფული ენდობა მთხოვნელს სესხად და უშიშ-  
რად.

თუ ეს საქმე პირველშივე კარგად დაეწყო და არ-  
ჩეულმა კომიტეტმა საკმაო სიფრთხილე და წინ-  
დახედულობა გამოიჩინა, იმედია, ეს ახლად გამოცხა-  
დებული კრედიტი ჩვენში რიგიანად ფეხს მოიკიდებს  
და მართალს გამრჯელს დიდს შელავათს მისცემს  
არსებობისათვის ბრძოლაში და ხელს მოუმართავს,  
თავისი ოჯახი და მამული ფეხზე დააყენოს და წელში  
გამართოს. რამდენიმე მაგალითი გასესხებულის თავის  
დროზე არდაბრუნებისა ან დაკარგვისა საკმაო იქნება,  
რომ ეს საკეთილოდ განზრახული საქმე ჩვენ, აქაურებს  
გავვიუქმონ და თვითონ კრედიტი, დაუმრეტელი და  
იეფი, მოგვისპონ სახელმწიფო ბანკში.

ჩვენმა კაცებმა, რომელნი მიწვეულნი არიან სახ-  
ელმწიფო ბანკის კომიტეტში, ეს შიში მუდამ უნდა  
სახეში იქონიონ და განზრახული კრედიტი დიდის  
სიფრთხილით და წინდახედულობით მიანიჭონ არა  
მფლანგველებს და ბედოვლათებს, არამედ იმათ, ვისიც  
უეჭველი იმედია, რომ კრედიტით ნაშოვნს ფულს  
საქმესა და მამულს მოახმარებენ და დაბრუნების დროს  
არ იტყვიან: არა გვაქვს და რა დავაბრუნოთო. აკი ვამ-  
ბობთ, რამდენიმე ამისი მაგალითი საკმაო იქნება, რომ  
ჩვენ, აქაურებს სახელმწიფო ბანკის კარი ცხვირწინ  
დაგვიკეტონ და ამით ბედოვლათთან ერთად ისინიც  
დაიღუპნენ, ვისაც საქმის კეთება და ქონების  
გაძლიერება შეუძლიან იეფად მოწვდილ კრედიტის  
შემწეობით.

[1894 წ.]



## **<მამულების გამიჯვნის თაობაზე>**

ტფილისი, 2 სექტემბერი

განეთები იუწყებიან, რომ სექტემბერში ტფილისში  
მოვა სამიჯნო უწყებათა გამგებელი და მმართველი ბ-ნი  
გორემიკინი, რომელსაც საგნადა აქვს აქვე, ადგილო-  
ბრივ შეიტყოს, რა მდგომარეობაშია ამჟამად გამიჯვნის  
საქმე საქართველოში.

არა გვგონია, ამ გამიჯვნის საქმემ ჩვენში თავი  
რითიმე ისახელოს და მოაწონოს ბ-ნ გორემიკინს. ყვე-  
ლაზე დიდი ნაკლულუგანება ამ საქმის ის არის, რომ  
იგი მეტად მძიმედ დადის და ბოლო აღარა აქვს. ეს  
წინადაც შენიშნულ იყო და მიზეზად ის იპოვეს, რომ  
ამ საქმის მოხელენი მეტად ცოტანი არიან და ვერ ას-  
დიან აუარებელ რიცხვს დავიდარაბისასაო.

ცოტად თუ ბევრად, ამ მიზეზსაც თავის საბუთი  
ჰქონდა. ხოლო ეს მოხელენიც მოემატნენ, თვითონ  
განსამართლებას გამიჯვნის საქმეებისას სახსარი მიეცა  
ვითამდა უფრო სწრაფად სვლისა, მაგრამ მაინც არა  
ემეველა რა საქმეთა სწრაფად სვლას. სჩანს, ამისი  
მიზეზი სხვა რამ უნდა იყოს, უფრო არსებითი და  
ძვალ-რბილში გამჯდარი. ერთს ამისთანა მიზეზს ჩვენ  
ვხედავთ თვით გამიჯვნის სამართლის აგებულებაში.

ყველამ იცის, რომ გამიჯვნის სამართლის წესით,  
ყველას ნება აქვს დავა გამოაცხადოს, თუნდ მამული  
თავის ღლეში მის ხელთ არ ყოფილიყოს და არა რაიმე  
სამართალი და საბუთი არ მიუძღოდეს. რა თქმა  
უნდა, სამართლის კარი არავის არ უნდა გამოეგულოს  
და ყოველთვის და ყველასათვის ღია უნდა იყოს, მა-  
გრამ ამ შემთხვევაში კი მეტად ბოროტად ჰხმარობენ

ამ თავისუფლებას დავის გამოცხადებისას და თითქმის ყოველად დაუსჯელად.

ჩვენ ვამბობთ, ყოველად დაუსჯელად იმიტომ, რომ ტყუილუბრალო მოდავე, ტყუილუბრალოდ ახირებული კაცი, მარტო ან მტრობით, ან ჯიბრით ხმალამოწვდილი მიესევა ხოლმე მართალს მფლობელს და პატრონს მამულისას და დავიდარაბას აუტეხს, რა არის, ვითომდა საქმე გაუძნელოს, მალე არ გაათავებინოს და მით ამოიყაროს ჯავრი.

ვისაც თვალ-ყური უდევნებია გამიჯვნის საქმისათვის, ის შენიშნავდა, რომ საცა მიწათმზომელი ფეხს შესდგამს ხოლმე გასამიჯვნავად, იქ იმისთანა მოდავენი წამოდგებიან, რომელნიც ფიქრადაც არავეს გაუტარებია თავის დღეში. ამის გამო მამა-პაპიდან უდავო მამულსაც კი დავა გამოუჩნდება ხოლმე, ხშირად სრულიად უსაბუთო და უსაფუძვლო.

კიდევ ვიტყვით, თუმცა ერთის მხრით თავისუფლება დავის გამოცხადებისა არ უნდა იყოს შეზღუდულ, რადგანაც აქ ყოველივე შეზღუდვა გზას უღობავს კაცს დარღვეულის უფლების აღდგენისას, და შეუწყნარებელია კეთილად განწყობილ სახელმწიფოსათვის, მაგრამ მეორეს მხრით ის ამბავი, რომ ჭეშმარიტის უფლების პატრონი, ნამდვილის საბუთების მქონებელი, არ არის მოსვენებული და გულდადინჯებული თავის მამულში და, რაკი გამიჯვნაა, ათასი მოულოდნელი ტყუილუბრალო დავა შესაძლოა აეკვიატოს და მანამდე მშვიდობიანი მფლობელობა ეხლა თავსაცემად და სადავიდარაბოდ გაუხდეს, — არც ეს ამბავია იმისთანა რამ, რომ ღირსი არ იყოს ყურადღებისა. ამ შემთხვევაში ტანჯულად და წამებულად გამოდის მართალი და მტყუანს კი, ტყუილუბრალო მოდავეს არა აკლდება რა, რომ უდავო სადავოდ განადა და მით მართალი ზარალში შეიყვანა, მერე იმისთანა ზარალში, რომელსაც თვით არა ჰზღავს.

აი რა აბრკოლებს გამიჯვნის საქმეებს, რომ უკვე დაწყებულს ბოლო აღარა აქვს. ჩვენ არ ვიცით, ამ შემთხვევაში რა ეშველება საქმეთა სწრაფად მსვლელობას და როგორ უნდა მოესპოს კერძო კაცს უსაბუთოდ დავის ატეხა და მით გამიჯვნის საქმის

დაყოვნება და დაგვიანება. შემოღებულ რომ იქმნას ზარალის ზღვევა, იქნება ამან ცოტად თუ ბევრად ალაგმოს ტყუილუბრალო სიხარბით ან მტრობით და ჯიბრით გამოწვეული დავა. იტყვიან, ეგეც შეზღუდვაა სამართლის კარისაო, მაგრამ იგი წესი, რომ მტყუანმა მართალს ზარალი უზლოს, ჯერ ათასჯერ ჩააფიქრებს მტყუანს და მერე ასე თუ ისე ამოქმედებს. აქ მარტო მართალი იქნება მოგებაში და სამართალს სხვა რა აქვს საგნად, თუ არ მართალის მფარველობა.

კერძო კაცის ავკარგიანობას ამ შემთხვევაში კიდევ ასე თუ ისე მონიელებს ადამიანი, რაკი სხვა გზა და წამალი არა მოიპოვება რა. ხოლო ქვეყანამ არ იცის, — როგორ გაუძღვეს ხაზინის დავებსა. სახელმწიფო ქონების მოხელენი, რომელთ, რასაკვირველია, არ შეეწყამება არც მტრობა და არც ჯიბრი ვისიმე, ისეთ მდგომარეობაში არიან, რომ ამათაც, საცა გინდა და არ გინდა, დავა უნდა გამოაცხადონ, თუ ჰსურთ საყვედური არ მიიღონ სახელმწიფო ქონებათა მიმართ გულგრილობისა და დაუდევრობისათვის. ამის შიშით და იქნება ზოგჯერ მოწონების წყურვილითაც, იგინი ყველგან, საცა გასამიჯვნავად ფეხს შესდგმენ, თავს ამოჰყოფენ და დავას აცხადებენ.

ეს მით უფრო ეხერხება სახელმწიფო ქონებათა მართველობას, რომ წესნი სამართლისანი მისკენ არიან გადახრილნი, მას ხელს უმართვენ და შემწეობენ. ავიღოთ თუნდ ის შემთხვევა, რომ ხაზინა თუნდ გამტყუნდეს, ჯარიმასაც კი არ იხდის, არამც თუ უზლოს რამე მართალს პატრონს მამულისას, რომელიც საქმის დაყოვნების გამო აუარებელ ზარალშია. რიგინი სამართალი მარტო მაშინ არის, როცა ყველასათვის თანასწორია და თუ ცალკე კაცი სახელმწიფოს სასარგებლოდ ჯარიმას იხდის — როცა გამტყუნდება, რატომ ამისთანავე შემთხვევაში ხაზინა არ იხდის თუნდ იმავე ჯარიმას სასარგებლოდ კერძო კაცისა. რაც უნდა იყოს, ცოტაოდენი მიში ჯარიმის გადახდისა თვითონ ხაზინას ჯერ ჩააფიქრებდა, გადაასინჯვინებდა თავის საბუთებს დავისას და ისე გამოაცხადებინებდა დავას, თუ გამოსაცხადებელი იქნებოდა. ამ გზით მრავალი უსაბუთო დავა ხაზინის მხრით თავისთავად მომორღებოდა თავიდან სამართალსა და მამულებისა

ტრონებსა და გამიჯვნის საქმეს სისწრაფე მოემატებოდა.

აკი ვამბობთ, თუ კერძო კაცისაგან ტყუილუბრალოდ დავების ატეხას არა ეშველება რა, სახელმწიფო ქონებათა მართველობას ათასი სახსარი აქვს, უთავბოლო დავები მოსპოს და იქ სადავოდ არ ჩაერიოს, საცა წინადვე დანახული და გამორკვეული საბუთი არ მიუძღვის. გამოცხადება სახელმწიფოსაგან დავისა, რასაკვირველია, ძნელია მიენდოს ერთს რომელსამე მოხელეს, თუ ნამეტნავად შემოღებულ იქმნება ჯარიმა ხაზინისათვისაც, თუ იგი გამტყუნდა. აქ საჭიროა კოლლეგია, რომელსაც მიხლობილი უნდა ჰქონდეს, ჯერ მინამ დავას გამოაცხადებდეს სადმე, საქმეს საბუთები მოუჩხრიკოს, ასწონ-დასწონოს ღირსება საბუთებისა, მათი სიმტკიცე და სიმკვიდრე და განაჩენით დაადგინოს, სად გამოაცხადოს მისმა მოხელემ დავა და სად არა. ეს კოლლეგია თავმდები იქნება იმისი, რომ უსაბუთო დავა ხაზინისა არსად არ გამოცხადდება და ის მრავალი საქმე, რომელიც დღეს ბრკოლდება მართო მით, რომ სახელმწიფო დავა, ხშირად უმიზეზო და უსაბუთო, შიგ ურევია, ბევრად შეცოტავდება და მით გამიჯვნის საქმეს ჩვენში ერთი მძიმე და შემფერხებელი უღელი აეხსნება.

ჩვენ გვანსოვს, რომ თავადაზნაურობამ ყოფილს სახელმწიფო ქონებათა მინისტრს ბ-ნ ასტროვსკის ქალაქი წარუდგინა ამ საგანზე და სთხოვა იგი, რაც ჩვენ ზემოთ მოკლედ მოვიხსენიეთ ხაზინისაგან დავების ატეხის გამო. ჩვენა გვგონია, მეტი არ იქნება ბ-ნს გორემიკინს აუწყონ, სხვათა შორის, ეს ერთი მიზეზიც საქმეების დაბრკოლებისა და სთხოვონ, ამ მხრით წამალი რამ დასდოს მთავრობამ ჩვენში გამიჯვნის საქმეს. ჩვენში არა ერთი და ორი მაგალითი ყოფილა, რომ გადაჭარბებულ გულმოდგინებას სახელმწიფო ქონებათა მოხელისას სადავოდ გაუხდია არამც თუ გარეთი მამულები, არამედ თვითონ სახლებიც და სახლ-კარის ადგილებიც იქ, საცა ხსოვნაც არის, რა ხნიდამ სახლ-კარის პატრონი უდავიდარაბოდ და მშვიდობიანად მდგარა და ღვას. აბა საცა შესაძლოა ამისთანა ამბავი, იქ გამიჯვნის საქმემ, რასაკვირველია, ფეხ-მუხლი უნდა მოიჭრას სწრაფად სიარულისა.

[1894 წ.]



## «მინისტრის მოლოდინში»

ტფილისი, 3 სექტემბერი

ჩვენმა მკითხველებმა უკვე იციან, რომ ჩვენში მოდის სახელმწიფო ქონებათა და მიწათმოქმედების მინისტრი. ბ-ნს მინისტრს უნებებია თავისი თვალთინახულოს, სხვათა შორის, ჩვენი ქვეყანაცა, შეიტყოს მისი ავი და კარგი და, რაც ეშველება, უშველოს.

მცირეოდენი დრო, რომელსაც ბ-ნი მინისტრი ჩვენში დაჰყოფს, მეტად მოკლე ხანია და ძნელია კაცმა იფიქროს, რომ ამ მოკლე ხანში მან შეიტყოს იგი არსებითი ვითარება ქვეყნისა, რომლის ცოდნა აუცილებელ საჭიროებას შეადგენს რაიმე რიგიან დადგენილებისათვის და ნაყოფის მომცემ ცვლილებისათვის. იმისთანა თანამდებობის კაცს, როგორც მთელის იმპერიის მინისტრია, ძნელად მოეთხოვება ერთს ადგილას სადმე დიდხანს დაყოვნება, რადგანაც სხვა ათასი საქმე კარს ადგა და ჰლაღადებს დაწყებას და გათავებას.

ეჭვი არ უნდა გვქონდეს მისი, რომ ბ-ნი ერმოლოვი გულმოდგინე კაცია და აღსავსეა სურვილით, რომ საცა მიდის, იმ ქვეყნის ტკივილი შეიტყოს და წამალი მოუპოვოს. იგი ერთი იმისთანა მინისტრია, რომელზეც მთელის რუსეთის განათლებულმა საზოგადოებამ დაამყარა თავისი სასოება და იმედი ვაჭირვებისაგან ხსნისა და თითქმის ლაღ-ჰყო მის მინისტრად მიწვევაც კი. მაშასადამე, მისს მოსვლას ჩვენს ქვეყანაში არ უნდა ჰქონდეს საგნად მართო გავლა-გამოვლა აქა-იქ და მერე წასვლა მართო იმ აზრით, რომ სთქვას, ლამაზი ქვეყანა ყოფილაო, და სხვა ამისთანა.

რაკი ესეა და რაკი ვერ ვიმედოვნებთ, რომ ბ-ნმა მინისტრმა ჩვენს ქვეყანას იმოღეუნა დრო შესწიროს, რამოდენაც საჭიროა ქვეყნის აკარგვიანობის ზედმიწევნით საცოდნელად, ჩვენ თვითონ აქაურები უნდა ვეცადნეთ, ბ-ნს მინისტრს გავაგებინოთ ყოველივე ის, რაცა გვტკივა და რა გვაბრკოლებს ჩვენს ეკონომიურ ცხოვრების გზაზე.

ამ მხრით, ვისაც კი ჩვენში საზოგადო გაჭირვებული მდგომარეობა აწუხებს, ყველანი სცდილობენ მოიფიქრონ, გამოარკვიონ საჭიროებანი და წამალიც შევლისა ამცნონ. ამ მზადებასა და მოფიქრებაშია მოთავენი ტფილისის, ქუთაისის ქალაქებისა და აქაური სამეურნეო საზოგადოება და მხოლოდ მარტო ერთი ჩვენებური თავადაზნაურობა მიჩუმებულია და ბუხსაც არ იფრენს, თითქო მისი გარეშემო სოფლად ყველაფერი ვარდებით იყოს მოფენილი და არაფერი არ ეჭირვებოდეს არც სოფელს, არც მეურნეობას, არც თავად-აზნაურს, არც გლეხსა. ეს ამისთანა გულგრილობა მაშინ, როდესაც აქ მოდის იმასთანა მინისტრი, რომელიც გულმოდგინედ მცდელია ნახულს ქვეყანას დანახული სატკივარი გაუგოს და გზა ხსნისა მისცეს შეძლებისამებრ, ჩვენა გვეონია შეუნდობელი ცოდვაა წინაშე ქვეყნისა საერთოდ და საკუთარის თავისა ცალკედ.

მინამ დროა ბ-ნ მინისტრის მოსვლამდე, ჩვენ ვურჩევთ ჩვენებურ თავადაზნაურობას ამიერ თუ იმიერ საქართველოსას საგანგებო კრება მოახდინონ, ან სხვა რამ ღონე იღონონ იმის მოსაფიქრებლად საერთოდ, რომ უშველონ ბ-ნ მინისტრს გამორკვევა ჩვენის ქვეყნის ვითარებისა, აღნიშნონ იგი საგნები, რომელზედაც უნდა მიიქცეს ბ-ნ მინისტრის ყურადღება, და თავის მხრით უჩვენონ გზა გაჭირვებისაგან ხსნისა.

ყველანი იმახიან, რომ ღმერთს ჩვენთვის მდიდარი ქვეყანა მოუცია და მასზე მცხოვრები ერი კი სიღარიბიდამ ვერ გამოსულა. რად უნდა იყოს ესე, თუ ერთი დიდი იარა და ნაკლი არა აქვს ჩვენს ქვეყანას თვით ცხოვრების აგებულებაში და წესთწყობაში, რომელიც ამოქმედებს ერს საეკონომიო სარბიელზე? ან ვინ უნდა იცოდეს ეს ნაკლი ისე ზედმიწევნით, ისე

მართლად, თუ არ ქვეყნის მკვიდრთავე, რომელთ გარშემო დღე ყოველ ისმის ღალადი ქვეყნისა და მდინარებს მისი ვაი-ვაგლახი.

ჩვენდა სმწუნაროდ, გლენს მინისტრამდე ხმა ძნელად მიუწვდება. დაგვრჩა მარტო ერთი თავადაზნაურობა, რომელსაც გზა აქვს მისვლა-მოსვლაც იქონიოს ბ-ნ მინისტრთან და მოილაპარაკოს კიდევ მასზედ, რაც ეჭირვება ქვეყანას და რაში შესაძლოა საქმის შეველა და წარმართვა, აქ საჭიროა მხოლოდ კარგად მოფიქრებული სიტყვა, დასაბუთებული ნაკლი ქვეყნისა, კარგად და ნათლად გამორკვეული ჭეშმარიტი საჭიროება საქვეყნო თვისებისა და არა კერძო რამ ცალკე თითო-ოროლა კაცისა.

იმედია, ჩვენებური თავადაზნაურობა არ დაჰკარგავს ამ იშვიათს შემთხვევას ბ-ნ მინისტრის მოსვლისას, ამ შემთხვევას ღირსეულად დახვდება და გაუძღვება და მით რაიმე შეღავათს და შეველას მისცემს ჩვენს ქვეყანასა. კიდევ ვიტყვით, შეუნდობელი ცოდვა იქნება, რომ ამ შემთხვევაში თავადაზნაურობამ მის საკადრისად თავი არ იჩინოს და ხმამაღულელები დარჩეს.

[1894 წ.]



## **<ჩვენი სარჩიელი სოფლის მეურნეობის კვირვას ღარგებზე>**

ტფილისი, 18 სექტემბერი.

ბ-ნი მინისტრი სახელმწიფო ქონებათა და მიწათმოქმედებისა მოდის და ჩვენს საზოგადოებაში დიდი ლაპარაკია, რა ვუთხრათ და რა ვთხოვოთ. ამის მითქმამოთქმაში მრავალი სხვადასხვანაირი სათქმელი აღმოჩნდა და უფრო მრავალი სხვადასხვაგვარი სათხოვარი.

ჩვენა გვგონია, რომ ყველაზე უწინარეს თავდაპირველ საგნად უნდა წარუდგეს ბ-ნი მინისტრს ერთი ყველასაგან ადვილად დასანახი გარემოება და ყველასაგანვე თითქო დავიწყებული. ჩვენ ვამბობთ დავიწყებული, იმიტომ, რომ როცა ლაპარაკია ჩვენში აქაურ მიწათმოქმედების ავკარგიანობაზე და უნუგემობაზე, იგი გარემოება, რომელიც, ჩვენის ფიქრით, თავი და თავი მიზეზია ჩვენის მიწათმოქმედების უნუგემობისა და უკან დარჩენისა, არავისაგან არ არის ხოლმე სახეში მიღებული. და ამიტომაც გაჭირვების და სატკივარის წამალს იქ ვადებთ, საცა სატკივარის ბოლოა და არა სათავე, საცა შედეგია და არა მიზეზი. ეს იმასა ჰგავს, რომ კაცმა მღვრიედ მდინარე ნაკადული წყალისა ბოლოდამ ეცადოს დასწმინდოს ხოლმე და არა სათავედამვე, თუ მაინცდამაინც დაწმენდა უნდა.

ხსენებული გარემოება იმაში მდგომარეობს, რომ ჩვენის მიწათმოქმედების გარს ყველაფერი გამოიცვალა და ამ ცვლილებას თავისდაგვარად უნდა შეეცვალა თვითონ მიწათმოქმედების გზა და მიმართულება ჩვენში. ეს არ მოხდა. მიწათმოქმედების სვლა ჩვენში ისევ

ძველს საჭიროებას და მოთხოვნილებასა აქვს შეწონილი და შეფერებული და თუ ამას უწინ თავის პატივისცემები საბუთი ჰქონდა, ეხლა ცარიელის ზარალის მეტი არა მოაქვს რა და მიწათმოქმედება, მამულის ასე თუ ისე კეთება, ხელს არ აძლევს მოჭირნახულეს იმოდენად, რამოდენადაც საჭიროა დღეს და შესაძლებელი ჩვენის ქვეყნის ჰავისა და მიწის მიხედვით.

მაშინ, როცა საქართველოს და ერთობ ამიერკავკასიას გარს მტრები ეხვია, როცა სამეზობლოდ მდგომარე ხალხი სამტროდ იყო დამოკიდებული, როცა საქართველო მტერთაგან შინ ჩაკეტილი იყო, გასვლა-გამოსვლის გზები ან სრულიად შეკრული ჰქონდა, ან იმისთანა, რომ დიდის გაჭირვებით, ხარჯით და დროს დაკარგვით, საქართველო, არამც თუ სხვა ქვეყნებს, თავისს საკუთარ ნაწილებსაც კი თვალს და ხმას ძლივ მიაწვდიდა ხოლმე. — მაშინ, რასაკვირველია, ჩვენი მიწათმოქმედება უნდა ძალაუხებურად მიქცეულ ყოფილიყო მასზე, რომ ყველაფერი თავისი საკუთარი ჰქონიყო. მაშინ ჩვენი ქვეყანა საალებმცემოდ ჭირნახულის გაჩენას ფიქრადაც ვერ გაიტარებდა, რადგანაც ალებმცემობა თხოულობს მშვიდობიანს, იეფს და მსწრაფლ გზასა და საქონლის გადასატან-გადმოსატანად.

ამ გარემოების ძალმომრეობით ჩვენი მართლა-და მდიდრად შემკული ქვეყანა იძულებულ იყო, რაც საცხოვრებლად ადამიანისათვის საჭიროა, შინ თვითონვე ეკეთებინა და მიწისაგან ამოეღო, თუ არა და, მშვიერი და შიშველი დარჩებოდა. მაშინ არა თუ საჭირო იყო ჩვენი საკუთარი პური გვქონოდა და სხვა საჭირო მარცვლეულობა, არამედ სამოსელიც კი. გავინსენოთ მარტო ის ამბავი, რომ ამ ოც, ოცდაათ წლის წინად ერთს სოფელს ისე არ გაივლიდით, რომ ქსელი და მაქო ფეიქრისა არ დაგენახათ, მატყლის საჩეჩელი საშალე ძაფისათვის არ ყოფილიყო გამართული თითქმის თითოეულის მცხოვრების დერეფანში, ხშირად არ შეგხვედროდათ სამღებროები ნაქსოვის, თუ ნაკეთების საღებავად, და სხვა ამისთანა წვრილმანი საოჯახო, საშინაო მრეწველობა იმაზე მიქცეული, რომ ქვეყანამ შინ იქონიოს ყველაფერი.

აღებშიცემობის მოწყალეობით ეს წვრილმანი საოჯახო და საშინაო მრეწველობანი გაუქმდა, რადგანაც დამშვიდებამ ჩვენის ქვეყნისამ, კარგმა გზებმა სამეზობლოდ მისვლა-მოსვლისამ, აღებშიცემობას სახსარი მისცა უფრო იეფის, უფრო კარგის საქონლის მოტანისა, და შინაურმა წვრილმანმა მრეწველობამ მოტანილს საქონელს ვერც ფასში და ვერც სიკეთეში ცილობა ვერ გაუწია. დაანება ჩვენმა ქვეყანამ ამ წვრილმანს მრეწველობას თავი და ირჩია ნაწარმოებთა ყიდვა სხვისაგან, იმიტომ რომ საეკონომიო სფეროში წინამძღვრობს მარტო სიიეფე და სიკეთე სასყიდელ საქონლისა და სხვა არა-რა.

ამ გარემოებამ და ამასთან იმანაც, რომ სახელმწიფო ხარჯს წინად მიწის მოსავლით იხდიდა ხალხი და ეს ეხლა ფულად სახდელი გაუხდა, ის მოიტანა, რომ ფულის შოვნა მეტად გაძლიერებულ საჭიროებად შეიქნა ჯერ ხსენებულ მრეწველობათა ნაწარმოების სასყიდელად და მერე სახელმწიფო ხარჯის სახდელად. ფულის საჭიროებას, რასაკვირველია, სულ სხვა გზა უნდა მიეცა ჩვენებურ მიწათმოქმედებისათვის, რომელიც დღეს ერთადერთი სახსარია, ერთადერთი წყაროა, ერთადერთი საეკონომიო მოქმედება ცხოვრების გასაძლელად ჩვენში.

შემდეგ ვეცდებით გამოვარკვიოთ, ჩვენმა მიწათმოქმედებამ შეუფერა თავისი გზა ამ საჭიროებას თუ არა.

ტფილისი, 21 სექტემბერი,

ჩვენ წინა წერილში („ივერია“, №198) მოვიხსენიეთ, რომ ფულის შოვნის საჭიროება გაგვიძლიერდა ცალკე იმ მიზეზით, რომ, რაც უწინ შინვე ჩვენში კეთდებოდა, ის ეხლა სასყიდელი გაგვიხდა, და ცალკე მით, რომ სახელმწიფო ხარჯი ფულით მოსაშორებელი შეგვექნა.

რადგანაც ჩვენის შეძლების და ეკონომიურ ღონისძიების ერთადერთი სახსარი მიწათმოქმედებაა, ამიტომაც იგი უნდა მიქცეულიყო იმისთანა საგნებზე, რომელთაც აღებშიცემობის ბაზარში, შინა თუ გარეთ, კარგი გასავალი ჰქონებოდა. ეს მით უფრო შესაძლებელი და მოსახერხებელი იყო ჩვენის ქვეყნისათვის,

რომ აქაური მაღლიანი ჰავა და ნოყიერი მიწა ბევრ იმისთანა ჭირნახულს ხელს უწყობს, რომელსაც დღევანდელ ბაზარში დიდი მუშტარი ჰყავს და დიდი ფასი აქვს და რომელიც ამ ორის გარემოების შემწეობით უფრო მეტად ახეირებს მოჭირნახულეს, ვიდრე იგი ჭირნახული, რომელიც დღეს მოგვყავს და გაგვაქვს ბაზარში.

სადაც ჩაი, სორგო, ალისარჩული, აბრეშუმი მოდის, საცა ბამბა ხეირობს, საცა ყოველგვარი ხეხილია შესაძლებელი, საცა ყურძენი მოდის, ღვინო ღებება, საცა შესაძლოა გაჩენა თითქმის ყოველგვარ სახეთე, სამღებრო და სააფთექო მცენარეებისა, იქ მიწისა და ხელის მოცდენა იმისთანა ფასმოკლე ჭირნახულსათვის, როგორც, მაგალითებრ, პურია, ჩვენის ფიქრით, დიდი შეცდომაა. პურს, თუ უწინ, როცა კარჩაკეტილები ვიყავით, თავისი საბუთი ჰქონდა, ეხლა მისი მოყვანა ჩვენთვის არავითარი ანგარიშია. დღეს, როცა საქვეყნოდ კარი გაგვეღო, როცა ამისთანა სწრაფი გზებია, როგორც რკინისგზა და ზღვისა, როცა შესაძლოა თითქმის ორის კვირის განმავლობაში თუნდა ამერიკიდან მოვიტანოთ ჩვენი სამყოფი პური, – რუსეთს აღარ ვიტყვით, – უფრო იეფად და უფრო კარგიც, ნუ თუ სახეიროა ჩვენი მარჯვენა, მშვენიერი ჰავა და მიწა პურზე მოვაცდინოთ, მაშინ როდესაც ჩვენის ქვეყნის ბუნება ნებას გვაძლევს უფრო ძვირფასი ჭირნახული მოვიყვანოთ იმავე შრომით, გარჯით, იმავე ჰავითა და მიწით.

ჩვენ რომ ამ გზას დავდგომოდით, ან დღეის იქით დავადგეთ, ჩვენ საქვეყნო თუ სამეზობლო ბაზარში ჩვენს ძვირფასს ჭირნახულს გავიტანდით და იქიდან იმ საჭირო ჭირნახულს შემოვიტანდით, რომელიც ამ გზით უფრო იეფად დაგვიჯდებოდა, ვიდრე ეხლა გვიჯდება, როცა ჩვენვე მოგვყავს შინ. მაგალითებრ, წელს ოდესაში პური ფუთი თითქმის 26 კაპიკად იყიდებოდა, ნუთუ ოდესსიდან პურის მოტანა ამ ფასად უფრო სახეირო არ იქნებოდა ჩვენის ქვეყნისათვის, რომელსაც, თუ რივიანად ვიანგარიშებთ, შინაური პური ერთი ორად ამაზე მეტი უჯდება, რაც ვინდ ნაკლები ვიანგარიშით: თუმცა იშვიათი ამბავია ჩვენში, რომ ჩვენი

შინაური პური ფუთი სამ-ოთხ აბაზზე ნაკლები იყოს, მაგრამ მაინც მოჭირნახულეს ბევრს არას აძლევს გამოსარჩენსა და ამ გზით მის ჯიბეს ბევრი არა ემატება-რა.

სულ სხვა იქნებოდა, რომ ჩვენ რუსეთში შეგვეტანა იგი ჭირნახული, რომელიც, რუსეთის ჰავისა და მიწის მიზეზით, იქ არ მოდის და სხვა ქვეყნებიდან შემოაქვთ, და რუსეთიდან პური გვეზიდნა; ამ შემთხვევაში გამორჩენა დიდი იქნებოდა: ჯერ ერთი ესა, რომ ჩვენი სასყიდელი უფრო იეფად დაგვიჯდებოდა და მერე ჩვენი გასასყიდი უფრო მეტს ხეირს მოგვცემდა, უფრო მეტს ამოიღებდა, ანუ, უკეთ ვსთქვათ, ის გარჯა, ის ჰავა და მიწა, რასაც ეხლა იეფად სასყიდ ჭირნახულს ვახმარებთ, რომ უფრო ძვირფასს რასმე მოვანხმართ, ორგზით მოგებაში ვიქნებით.

ამ ეკონომიურ გზაზე ჩვენი საქართველო რომ დადგეს, ჩვენმა მიწათმოქმედებამ რომ ეს ახალი გზა და მიმართულება ირჩიოს, რუსეთისათვის ის ამზადოს, რაც რუსეთს არა აქვს, და იქიდან ის ჰზიდოს, რაც რუსეთს ვერც კი გაუსაღებია, – სახელმწიფო ინტერესის თვალთაყვირად კი მეტად სახეიროა თვით რუსეთისათვისაც, რომელიც თავის ნამეტანის პურისათვის ბევრგან სხვაგან ეძებს ბაზარსა მაშინ, როდესაც ერთი ამისთანა ბაზარი, სხვათა შორის, საქართველოც შეიქმნება, და თვით საქართველოც მატებაში შევა, რადგანაც ამ გზით აქაურ მკვიდრთა ქონება გაუძლიერდება.


ვიდრე მთავრობა საქართველოს და ერთობ ამიერკავკასიას არ შეხედავს იმ თვალთ, რომ აქ მიწათმოქმედებას სხვა გზა და მიმართულება უნდა მიეცეს მისი ჰავისა და მიწის შესაფერი, ვიდრე თავის მეცადინეობას იმაზე არ მიაქცევს, რომ ახალი საჭირნახულო საგანი გაუჩინოს აქაურ მიწათმოქმედებას, იმ დრომდე ყველაფერი ფეხზე დადებული მალამო იქნება, მაშინ როდესაც სატკივარი თავზეა.

ბ-ნი მინისტრი მიწათმოქმედებისა და სახელმწიფო ქონებათა მობრძანდება აქ ქვეყნის ვითარების შესატყობად და მეტად სანატრელია, რომ ჩვენზე უფრო მცოდნე კაცთა ეს განსხვავებული გარემოება აქაურ ქვეყნისა უფრო მეტის საბუთით წარუდგინოს და ამის

საშველის სარჩიელი გამოურკვიოს. აქაური სამეურნეო საზოგადოება, როგორცა სჩანს მის განაჩენიდან, ჩვენდა სასიამოვნოდ, ამ საშველის სარჩიელზე დამდგარა. სჩანს ამ პატივცემულს საზოგადოებასაც იგი საჭიროება დაუნახავს, რაც ჩვენ აქ მოკლედ მოვიხსენიეთ.

[1894 წ.]





## **<მიწათმოქმედების სწორად წარმართვისათვის>**

ტფილისი, 25 სექტემბერი

ჩვენმა მიწათმოქმედებამ რომ მიმართულება შეიცვალოს და იგი ჭირნახული მოიყვანოს, რომლის შეძლებასაც იძლევა აქაური ჰავა და მიწა, და რომელსაც დიდი ფასი აქვს, დიდი მუშტარი ჰყავს და ადვილად გადასატან-გადმოსატანია („ივერია“ №200), ამას, რასაკვირველია, კარგა ხანი და დრო უნდა.

იმ სისტემას მიწათმოქმედებისას, რომელიც დღეს ჩვენში არსებობს და რომელსაც საგნათა აქვს ყველაფერი თავისი იქონიოს, დიდი ხანია მიჩვეულია აქაური მოჭირნახულე და დიდის ხნის ჩვეულებას ეგრე ადვილად ზურგს ვერ შეუქცევს მიწათმოქმედი არამც თუ ჩვენში, არამედ სხვაგანაც. აქაურს მკვიდრს რომ უთხრათ, — დაანებე თავი პურის მოყვანას, რადგანაც სხვიდამ უფრო იეფად მოიტან, და მოიყვანე ის, რაც სხვაგან ან სულ არ მოდის, ან ძალიან ნაკლებია, რასაც სხვაგან, სამეზობლო ბაზრებში კარგი ფასი აქვს და პურზე მეტი გამოსარჩენია, იქნება სასაცილოდაც ავიგდოთ: პურზე ხელი როგორ ავიღოვო.

ის კი არ ვიცით, რომ რაც პურისათვის გარჯა და შრომა უნდა, რამოდენა მიწებსაც პურზე ვაცდენთ, ყოველივე ის რომ, საცა შეიძლება სხვა უფრო ფასიან ჭირნახულს მოვახმაროთ, ფულსაც უფრო ბლომად ვიშოვიოთ და კუჭსაც უფრო ადვილად და გაუჭირებლად გავიძლოთ. ეს მით უფრო შესაძლებელია და მოსახერხებელი ჩვენში, რომ აქაური ჰავა და მიწა, როგორცა ვსთქვით ზემოდ, ამის ღონეს და სახსარს

გვაძლევს. რა გნებავთ, რომ აქაურმა ჰავამ არ გამოზარდოს და აქაურმა მიწამ არ მოიყვანოს? ყოველგვარი მცენარე, რაც ერთის პოლუსიდან მეორემდე მოდის ქვეყნიერობაზედ, თითქმის ყველა იგი შესაძლებელია მოსაყვანად და გასაზრდელად ჩვენში.

რადგანაც ჩვენი ქვეყანა დღეს მარტო მიწათმოქმედებით ჰმოულობს თავის სარჩო-საბადებელს და მარტო მიწათმოქმედებით სცხოვრობს, აქ უნდა ვეცადნეთ გავამრავალგვართ საგნები მიწათმოქმედებისა და იგი არ მოვაცდინოთ იმაზე, რაც სხვიდამ ადვილად მოსატანია და იეფად სასყიდი. გამრავალგვარებას მიწათმოქმედების საგნებისა, მერე იმისთანებისა, რომელთაც კარგი ფასი აქვთ სამეზობლო, თუ საქვეყნო ბაზრებში, ცოდნა და შეძლება უნდა. უამათოდ შეუძლებელია ცვლილებისა რისამე მოხდენა და მიწათმოქმედების იმ გზაზე დაყენება, რომელსაც ჩვენ ვამბობთ.

ცოდნისათვის ყველაზე უწინარეს სამეურნეო სკოლებია საჭირო და მათ შორის ერთი მანც იმისთანა, რომელსაც უმაღლესს სკოლას ეძახიან. დღესაც ყველა მცოდნე კაცს ეოცება, რომ ამისთანა მდიდარ ქვეყანაში ერთი ამისთანა უმაღლესი სკოლა არ არის. სკოლები, რასაკვირველია, თავისს სარგებლობას მოიტანენ თავის დროს, მაგრამ ამას ჟამი და ხანი უნდა, დრო კი თავისას არ იშლის და ჩვენ უკან-უკან მივდივართ. ამისათვის, გარდა სკოლისა, აქაურ მკვიდრთათვის დიდი რამ იქნება სამაგალითო ფერმები, საცა ყოველი კაცი თავისის თვალთ დაინახავს აკარგიანობას იმ ახალს ჭირნახულისას, რომელსაც იგი ფერმები მოიყვანენ, აქაურ ჰავასა და მიწასთან შეფერებულად, ჰნახვენ და ისწავლიან იმ ახალ ჭირნახულის ხელს, მოვლას და პატრონობას. სამაგალითო ფერმა ორგვარია: ერთი სამეცნიერო, რომელსაც საგნად უფრო ისა აქვს, რომ გამოსცადოს, რა ჰხეირობს, როგორ ჰხეირობს, ერთი სიტყვით, თეორია საქმედ როგორ გადიქცეს. ამისთანა ფერმაში ხარჯი ყოველთვის ადემატება ხოლმე შემოსავალს. არის მეორეგვარი ფერმა, რომელსაც განსაკუთრებით ალებშიცემობის ხასიათი აქვს და რომელიც იმაზეა აგებული, რომ ჭირნახულმა მოჭირნახულეს რაც შეიძლება მეტი გამორჩენა მისცეს

და ამიტომაც საგნად უფრო ისა აქვს, რომ ხალხს დაანახვოს, რა მცენარე უფრო სახეიროა გასაჩენად და გასამრავლებლად და რა მოქმედება უფრო მეტს იძლევა. არც ამისთანა ფერმაა უიმიოდ, რომ სამეცნიერო ცდაც საგნად არა ჰქონდეს, მაგრამ ამ ცდას ფერმაში მცირე ადგილი აქვს დათმობილი, თავი და თავი საგანი კი ის არის, რომ მსურველს აჩვენოს, ასწავლოს, რა და რა ჭირნახულია მოსაყვანი, რაგვარად არის მოსავლელი, ხელშესაწყობი, რომ გამოჩინა ბლომა და ბარაქიანი იყოს. აი ეს მეორეგვარი სამაგალითო ფერმაა საჭირო ჩვენში გასამართავად ყველგან, საცა-კი სხვადასხვაობა ჰავისა და მიწისა სხვადასხვაობას ჭირნახულისას ხელს უწყობს.

ყოველ ამასთან ისიც უნდა ვიქონიოთ სახეში, რომ არ არის იმისთანა უკან დაწეული ქვეყანა, საცა თითო-ოროლა კაცი, აქა-იქ, კანტიკუნტად არ გამოვიდეს და არ შეეჭიდოს თავისს საკუთარის ღონით რომელსამე ახალს საქმეს თავისს ქონების გასაძლიერებლად. არც ჩვენი მიწათმოქმედებაა უიმიოდ, რომ თითო-ოროლა ცალკე კაცი არ გამოდიოდეს და ამისათვის წელებზე, როგორც იტყვიან, ფუნს არ იდგამდეს, ახალს რაიმე საგანს არ შესჭიდებოდეს, რომ როგორმე სვე გაიტანოს. ხშირად ამისთანა კაცს მხნეობაც დიდი აქვს, გარჯილობაც, მაგრამ ვერასა ჰხდება და თავისს ტვირთქვეშ ითელება. ამისთანა მეცადინე კაცს, მის მიერ ახლად დაწყებულ საქმეს რომ მთავრობა მიემველოს, შემწეობა და საჭირო შეღავათი მისცეს, ამ მხრითაც ქვეყანას ცოტად თუ ბევრად ემველებოდა და ახლად დაწყებული, მაგრამ უმწეობით წამხდარი საქმე აბრუს არ გაიტენდა ხალხში, აი იმან კი არ დაიწყოს, მაგრამ ვერას განდო, ამას მაინც არ იტვიან.

ამასთან ფრიად საჭიროა, სხვადასხვა თესლეულობა სასყიდლად საშოვი იყოს აქავ ჩვენში. ამ მხრით დიდს შემწეობას მოგვცემდა თესლეულობის საწყობი, რომელსაც ჯერ ხანად ცალკე კაცი ვერ გაბედავს იქონიოს ზარალისა და უმუშტრობის მიშითა. მთავრობისათვის კი, თუნდ მართლა ზარალიც იყოს, არაფრად საფიქრებელია, ჯერ იმიტომ, რომ მაგოდენი ზარალი არა იქნება-რა და მერე იმიტომ, აქ

ნაზარალევი მკვიდრთა ქონების გაძლიერებით სხვა სახით დაუბრუნდება მთავრობასვე თავისს დროზე.

აი, ჩვენის ფიქრით, უმთავრესნი საჭიროებანი, რომელსაც ჩვენებურებმა ყურადღება უნდა მიაქციევიონ ბნის მინისტრს, რომელიც ჩვენში მობრძანდა, როგორც ამბობენ, აქაურის ქვეყნის საჭიროების შესატყობლად და წამლის დასადებად.

[1894 წ.]



### **<იმპერატორ ალექსანდრე III-ის ბარდაცვალების ბამო>**

ტფილისი, 22 ოქტომბერი.

მიცვალება აწ ღვთის მიერ განსვენებულის იმპერატორის ალექსანდრე III-ისა – ეს დიდი სამგლოვიარო და სამწუხარო ამბავი – უიძისოდ არ ჩაივლის, რომ დიდი ზედმოქმედება არ იქონიოს მთელს ქვეყნიერობაზე საერთოდ და რუსეთის იმპერიაზედ საკუთრივ იმ მხრით, რომ ერთს ძლიერს სახელმწიფოს გარდაეცვალა ხელმწიფე, მოყვარე მართლისა, გულმტკიცე, მშვიდობისმყოფელი და გულითადი მსურველი თავის ქვეყნისა და ერის ბედნიერებისა.

აწ ღვთის მიერ განსვენებული გვირგვინოსანი პატრონი და ხელთმძღვანელი რუსეთისა დაიბადა 26 თებერვალს 1845 წ. და მამა-პაპათა ტახტზე აბძანდა 2-ს მარტს 1881 წ., მაშასადამე, მისი ხელმწიფობა ცამეტ წელიწადზე ცოტა მეტია. ძნელი და მძიმე დრო შეხვდა განსვენებულსა. საგარეო საქმეთა გარემოებანი, ცალკე, ვითარცა ნაშთნი რუსეთ-ოსმალის ომებისა, ცალკე, ვითარცა შედეგნი ფიცხელის ომისა საფრანგეთისა და გერმანიის შორის, იმოდენად გამწვავებულნი იყვნენ, იმოდენად არეულ-დარეულნი და აწეწილნი, რომ მკირეოდენი მიზეზი საკმაო იყო, სადმე აფეთქებულყო ომი, რომლის მოლოდინითა და საშინელებითა თრთოდა მთელი კაცობრიობა ყოველ ცისმარა დღეს. სისხლის-ღვრა, აოხრება ევროპისა და განადგურება მისის სიმდიდრისა, რომელიც აუცილებლად მოჰყვებოდა ომს, შიშითა და ზარით თვალწინ ეხატებოდა მშვიდობის

მნატვრელს კაცობრიობას. ვამბობთ კაცობრიობას, იმიტომ, რომ დედაძარღვი კაცობრიობისა დღეს ევროპაა და ევროპის მკვიდრნი სხვას არას ჰნატვრობდნენ მშვიდობიანობის გარდა, როგორც ესლა, ისეც მაშინ.

რუსეთს, როგორც ერთს უდიდეს სამპყრობელოს, უნდა ანგარიში გაეწია ამ რთულ და საშიშარ გარემოებათათვის გარედ და თვისი მოქმედება შეეწონა დროთა მოთხოვნისათვის. გარდა ამ საგარეო საქმეთა, შინაური საქმენიც ითხოვდნენ განსაკუთრებულს ყურადღებას, შველას და წარმართვასა. აქ, ამ სფერაში, განსვენებულმა იმპერატორმა თითქმის განუღმწიფების უმაღლვე აღიარა, რომ იგი საგნად თავის უმაღლეს მზრუნველობისას სდებს გაძლიერებას თვითმპყრობელობისას, მტკიცედ დაცვას წესისას და უფლებებისას, ერის ოფლისა და ქონების ზოგვას, სამართლიანობისა და კანონიერობის გავრცელებას.

ჩვენ აქ ვერ ჩამოვვლით მოკლე გაზეთის წერილში ყოველს იმ სფერას სახელმწიფოს რთულის გამგეობისას შინად თუ გარედ, საცა განსვენებულმა იმპერატორმა თვისის ხელმწიფების კვალი დააჩნია საისტორიოდ. ჩვენ მხოლოდ ვეცდებით იგი ღვაწლი განსვენებულისა გამოვარკვიოთ, რომელიც, ჩვენის ფიქრით, განსაკუთრებულსა და განსხვავებულს მნიშვნელობას აძლევს მისს ხელმწიფებას გარედ თუ შინა.

საგარეო საქმეთა პოლიტიკაში განსვენებული მპყრობელი რუსეთისა ცნობილია, ვითარცა მშვიდობის მყოფელი კაცთმოყვარე ხელმწიფე, მტკიცე სიტყვისა და მტკიცე მიმართულებისა. თითქმის მთელის ევროპის ჟურნალ-გაზეთობამ და უპირატესთა სახელმწიფო კაცთა ერთხმად აღიარეს, რომ მშვიდობისმოყვარეობამ და კაცთმოყვარეობამ ღვთის მიერ განსვენებულ იმპერატორისამ დაიხსნა ევროპა საშინელის სისხლის-ღვრისაგან და აოხრებისაგან ამ ცამეტის წლის განმავლობაში, თუმცა ამისათვის დღე ყოველ მრავალი სხვადასხვა მიზეზი იყო. კაცობრიობაო, ამბობენ ივინი, მადლობელი უნდა იყოს ხელმწიფე იმპერატორის ალექსანდრე III-ისა, რომ ამ ცამეტ წელიწადში ევროპა

არ შეადრწუნა საშინელმა ზოცვა-ჟღერამ, სრვამ და სისხლთა ღენამ.

მართლა და, ხელმწიფე იმპერატორი ალექსანდრე III ბრძანდებოდა მიზეზი, რომ ზოგიერთთა სახელმწიფოთა შორის გამწვავებულმა საქმეებმა ომამდე, სისხლისღვრამდე არ მიაღწია. ვინ არ იცის, რარიგად ხმალამოწვდილნი ედგნენ ერთმანეთს პირისპირ გერმანია და საფრანგეთი, რომელთა ომი და ჩხუბი ჩაიყოლიებდა თითქმის მთელს ევროპას. ეგრეთ წოდებულს „სამთა კავშირს“, ომისათვის თითქმის ხმალამოწვდილს, მან შეაჭრა ფრთები მით, რომ გერმანიისაგან დაჩაგრულსა და დაბრეყებულს საფრანგეთს თავისი ძლიერი ხელი სამეგობროდ გაუწოდა. კრონშტატის და ტულონის სადღესასწაულო ამბებმა „სამთა კავშირს“ თვალი აუხილა და ქარქაშიდამ ამოდებული ხმალი უკანვე ჩააგებინა მით, რომ თუ ვინიცობაა საომრად გაიწევ, იცოდეო, მარტო განცალკევებულ საფრანგეთთან კი არ გექნება ომიო, იმასთან ერთად დიდ და ძლიერ რუსეთთანაცაო.

ამ თავდაჭერილმა და მშვიდობიანმა მუქარამ თავისი ჰქმნა: „სამთა კავშირს“ წინ დაუყენა მისი სწორი ძალღონე საფრანგეთისა და რუსეთისა და მით შეუმუსრა გაბედულობა. ასეთივე მშვიდობისმოყვარეობა გამოიჩინა განსვენებულმა აღმოსავლეთის საქმეშიაც: მარტო ერთი ბოლგარეთის ამბები რომ გავიხსენოთ, კაცი გაოცდება, რაოდენი სულგრძელი მოთმინება იყო საჭირო ძლიერის ხელმწიფისა, რომ ამ ამბებს უომრად, სისხლდაუღვრელად ჩაეგლო. ამისთანავე მიზეზიანი ამბავი მოხდა 1885 წელს კუშკაზე ავღანელებთან. აქ უეცარმა და მოულოდნელმა შეჯახებამ რუსეთისა და ავღანელების ჯარებისამ კინალამ ინგლისთან ომი არ გამოიწვია და თუმცა რუსეთმა მას შემდეგ ერთი უშველებელი მხარე შემოიერთა და მით თავისი მიჯნები ავღანისტანს მიაბჯინა, მაგრამ წინდახედულმა პოლიტიკამ ომი ააცილა ქვეყნიერობას და ამ ამბავმა უსისხლოდ ჩაიარა.

ამ კაცთმოყვარეობამ და მშვიდობისმყოფელობამ, რომლითაც აღსავსე იყო გული იმპერატორის ალექსანდრე III-ისა, რამდენი ასი ათასი გამრჯელი

კაცი შეარჩინა ევროპას, რამდენი ასი ათასი კაცი გადაარჩინა უდროო სიკვდილს! ნულარ ვიტყვი იმას, თუ რამდენი ქონება, რამდენი სიმდიდრე და, მაშასადამე, რამდენი ეკონომიური ძალღონე და სახსარი ცხოვრებისა შეურჩინა კაცობრიობას და არ შეამუსვრინა იმ ვეშაპს, რომელსაც ომს ეძახიან! ამ მხრით ღვაწლი ქვეყნიერობის წინაშე დიდია და დიდიც არის სახელი მშვიდობისმყოფელისა.

იმედია, რომ მადლობელი კაცობრიობა ამ ღვაწლს განსვენებულისას არ დაივიწყებს და იმპერატორის ალექსანდრე III-ის სახელს „მშვიდობის მყოფელობითაც“ მოიხსენიებს.

შინაურ საქმეებშიაც დიდი კვალი დააჩნია განსვენებულის იმპერატორის ხელმწიფებამ და ხელმძღვანელობამ. ჩვენ არ ვიტყვით, უადგილობის გამო, რა ცვლილება მოხდა იმის ხელმწიფობის დროს საფინანსო, საერო სწავლა-განათლებისა, სამოსამართლო, საადმინისტრაციო და სამხედრო საქმეებში. ჩვენ მარტო ამას ვიტყვით, რომ მისი ძლიერი ხელი თითქმის ყოველს სფერას სახელმწიფო გამგეობისას, ასე თუ ისე, შეეხო, ხოლო ყველაზე შესანიშნავი მოქმედება, ჩვენის ფიქრით, გამოჩნდა შინაურ საეკონომიო პოლიტიკაში.

მის დრომდე საეკონომიო პოლიტიკას რუსეთში წინ მიუძღვებოდა ის აზრი, რომ ეკონომიური კეთილდღეობა სახელმწიფოსი და ერისა მარტო ალებმცილობისა და ვაჭრობის გაძლიერებაზეა დამოკიდებულიო. ამისათვის ყოველივე მოღვაწეობა და მოქმედება სახელმწიფოსი მიქცეული იყო თითქმის მარტო ალებმცილობისა და ვაჭრობაზე. საშველად ალებმცილობისა და ვაჭრობისა არაფერს ჰზოგავდნენ, რაც კი შესაძლებელი იყო. კანონმდებლობა იყო, სულ იმას ჰმცადინებოდა, რომ გაეძლიერებინა ეს გვარი მოქმედება, ფული იყო, ფულით მხარს აძლევენ, კრედიტი იყო, სახელმწიფო ბანკის ზანდუკი მარტო ვაჭრობისა და ალებმცილობისათვის იყო ღია. განსვენებულის ხელმწიფებამ შეავსო და შეასწორა ეს ცალკერძოდ მიმართული მზრუნველობა სახელმწიფოსი. ცნობილ და აღიარებულ იქმნა, რომ მარტო ერთი ალებმცილობა და ვაჭრობა

ვერას უშველის ქვეყანას, თუ სხვა საეკონომიო მოქმედებანიც მასთან ერთად ფეხს მაგრად არ მოიკიდებენ და წინ არ წაიწევიან; რომ თვით ვაჭრობა და ალემბიცემობა უხელ-ფეხოა, შეუძლებელია, უღონოა თუ სხვა მოქმედებანიც, რომლის ძალითაც მკვიდრი უნდა ჰყოლოდეს თავის სახსარს ცხოვრებისას, არ არის ვაჭრობასთან ერთად ფეხადგმული, დაღონიერებული და წარმატებული.

საეკონომიო პოლიტიკას იმპერატორმა ალექსანდრე III-მ ეს აზრი დაუდვა საფუძვლად და მზრუნველობა სახელმწიფოსი სხვა საეკონომიო მოქმედებთაც მოჰყვინა. მიწათმფლობელობას და მიწათმოქმედებას აღმოუჩინა შემწეობა სახელმწიფოსი, აგრეთვე საფაბრიკო და საქარხნო წარმოებასაც. მუშათა საქმეს დაუდო კანონები, მიმართული მასზე, რომ საქმის პატრონის თვითნებობა დაუმორჩილოს რიგსა და წესსა და მუშას უკანონოდ არ მოექცნენ და გარჯა გადამეტებული არ გააწევიონ. თავადაზნაურობას, გლეხობას გაუმართა საადგილმამულო ბანკები, გაულო კარი სახელმწიფო ბანკისა მიწათმფლობელს და მიწათმოქმედს; საცა საჭიროა და შესაძლებელი, ყველას და ყველგან მიაშველა კანონი, ფული და კრედიტი, შეუქმნა მიწათმოქმედებას ცალკე სამინისტრო, რომ უფრო ვრცლად, უფრო განსაკუთრებით ამგვარს მოქმედებას შემწეობა, შველა და დახმარება აღმოუჩინოს.

ამ სახით ეკონომიურს პოლიტიკას რუსეთისას უფრო მართალი, უფრო ვრცელი, უფრო ზედმიწევნელი და შემძლებელი მიმართულება მიანიჭა ქვეყნის აღორძინებისა წარმატებისათვის ეკონომიურს გზაზე. ვისაც თვალყური უდევნებია, რაც მოხდა განსვენებულის ხელმწიფობის დროს რუსეთის საეკონომიო სფერაში, ის უჩვენოდაც შეჭნიშნავდა, ნამეტნავად ამ ბოლოს ხანებში, რა დიდი მზრუნველობა გამოიჩინა ამ მხრით რუსეთის კანონმდებლობამ და რა დიდად სანუგეშო მიმართულება მიეცა ამ მზრუნველობას საყოველთაოდ, წოდებათა განურჩევლად.

ამ სფერაში ყოველივე, რაც დამოკიდებული არ იყო საგარეო პოლიტიკაზე, მაგალითებრ, “დამოუჩნის” ბაჟი და სხვა ამისთანა სულ მკვიდრთა სასარგებლოდ იყო

მიმართულ და დადგენილ სასახელოდ განსვენებულის იმპერატორის ხელმწიფობისა.

კიდევ ვიმეორებთ, რომ ჩვენ საგაზეთო წერილში ვერ გამოვარკვევით მთელს მნიშვნელობას აწ წარსულის ხელმწიფობისას. ისტორია იტყვის თავის უტყუარს სიტყვას უფრო მცოდნე და ზედმიწევნელ კაცის პირითა. ჩვენ მარტო ის გვინდოდა გვეთქვა, რომ განსვენებულს ხელმწიფე იმპერატორს, სხვათა შორის, ორი დიდი ღვაწლი მიუძღვის ქვეყნის წინაშე: ერთი ისა, რომ მისმა მშვიდობისმყოფელობამ და კაცთმოყვარეობამ ევროპა და რუსეთი გადაარჩინა სისხლისღვრას, და მეორე ისა, რომ რუსეთის ეკონომიურს ცხოვრებას ფართო გზა გაუხსნა განკარგებისა და წარმატებისათვის. ერთიცა და მეორეც ისეთი დიდი ღვაწლია, რომ როგორც მსოფლიო ისტორია, ისეც რუსეთისა მაღლობით მოიხსენიებს მშვიდობისმყოფელს გვირგვინოსანს, აწ ღვთის მიერ განსვენებულს....

[1894 წ.]



## **<ინგლისმა პირი იბრუნა რუსეთისაკენ სამეგობროდ>**

ტფილისი, 25 ნოემბერი

ერთი უდიდესი საქმე სამსოფლიო პოლიტიკისათვის გამოძვლავნდა ამ ბოლოს ხანებში, საქმე იმისთანა, რომელიც დიდს ამბებს მოასწავებს ქვეყნიერობისათვის საერთოდ, წვრილთა ერთათვის საკუთრივ, თუ თავი დაიჭირა და ფეხი მოიმაგრა სახანგრძლიოდ იმ საფუძვლზე, რომლის ქვაკუთხედი დღეს აშკარად გათვალისწინებულია ყოველის კაცის წინაშე.

ეს საქმე იგია, რომ ინგლისმა დღეს პირი და გული იბრუნა რუსეთისაკენ დასაახლოებლად და სამეგობროდ. ეს ამბავი მით უფრო ღირსშესანიშნავია, რომ დიდი ნაპოლიონის დამარცხების შემდეგ თითქმის მთელი ოთხმოცი წელიწადი გავიდა და ამ ხანგრძლივ დროთა განმავლობაში ერთი იმისთანა წუთიც არა ყოფილა, რომ ინგლისი სამტროდ წინ არ დასდგომოდეს რუსეთს ყველგან და ყველაფერში.

ეს მტრობა დაუძინებელი იყო, თუმცა ზოგჯერ დროთა მიხედვისამებრ, იგი მტრობა მეტნაკლებობით იჩენდა ხოლმე თავსა: ხან ძლიერ გაიწევდა თავში, ხან ნაკლებ. დღეს სულ სხვასა ვხედავთ. ჟურნალ-გაზეთობა ინგლისისა თითქმის ერთხმად იძახის დღეს, წარსული დავიწყებას უნდა მივცეთო და დღეის ამას იქით ხელიხელგადაჭდობილი რუსეთთან ერთად უნდა ვისაქმთო. ჟურნალ-გაზეთობა ინგლისისა მით საყურადღებოა, რომ იგი ისე ნათლად და უტყუარად არსად არ აღიბეჭდავს ხოლმე საზოგადო აზრს ერისას,

როგორც ინგლისში, იმიტომ რომ სრულად დამოუკიდებელი და თავისუფალია.

სხვა ქვეყნის გაზეთები და მათ შორის რუსეთისანი ამბობენ, რომ თითქმის მთელი ჟურნალ-გაზეთები ინგლისისა, სიტყვანი პოლიტიკოსებისა, ეკკლესიაში მქადაგებლებისა და კერძო კაცებისა სულ ამ ინგლისით სამეგობროდ გამოწვდილს რუსეთისაკენ ხელს შეჰხანტრიანო. რუსეთისათვის სამტროდ ცნობილნი გაზეთნიც კი, – თუ პოლიტიკოსნი, თუ ცალკე კაცნი, – სულ ამ მეგობრობას შეჰხანტრიანო გულით და სულით მოწადინებულნი არიანო, რომ დღეის ამას იქით რუსეთმა და ინგლისმა ერთად იარონ სამსოფლიო პოლიტიკის გზაზედაო.

მახლობელი მიზეზი, რომ ინგლისმა საჭიროდ დაინახა ამ მხრით თავი ეჩინა, იყო ჯერ უიმედო ავადმყოფობა განსვენებულის იმპერატორისა და მერე მისი უდროოდ გარდაცვალება. ჯერ მინამ განსვენებული ხელმწიფე ავად ბრძანდებოდა, ინგლისის სურათიანი სატირული გაზეთები, რომელთაც დიდი ზედმოქმედება აქვთ ინგლისში, ერთიმეორეს ეცილებოდნენ უპირატესობას და პირველობას იმაში, რომ უფრო ძლიერ და სავსებით გამოესახათ საშიშარი მოლოდინი საქვეყნო უბედურობისა. მაგალითებრ, გაზეთს „Tudy“ დანატულია ქალი, რომელიც წარმოადგენს სახეს „მშვიდობისას“. იგი ქალი მიჰყუდება კარს, მორთულს ორთავიანი არწივითა და მწუნარებით აღსავსე ყურს უდგებს. ამ სურათს ზედ აწერია „საშიშარნი დრონი“. გაზეთ „Pall Mall Budget“-ში გამოუსახავს ევროპა, რომელსაც თითქმის თვალში ცრემლით უპყრია ცისაკენ ხელნი ვედრებით, რომ განსაცდელისაგან დახსნილ იქმნას.

შემდეგ იმ უბედურის დღისა, როცა ხელმწიფე იმპერატორი განსვენებას მიეცა, გაზ. „Fun“-ში გამოსახულია „მშვიდობა“, რომელიც დასტირის კუბოს და ქვეშ აწერია: „მე დავკარგე მეგობარი“. ყველაზე უკეთესია თურმე სახე „მშვიდობისა“ გამოყვანილი გაზეთს „პუნში“. „მშვიდობა“ დიდად მწუნარე ჰსდგას ხელმწიფე იმპერატორის კუბოს წინაშე და ქვეშ აწერია: „უპირველესი ჭირისუფალი“. ამ სურათს უფრო

აცხოველებს ზედ დართული ლექსი, საცა გამოთქმულია ღვაწლი განსვენებულის იმპერატორისა და სხვათა შორის სწერია: „აი რისთვის, დილო თვითმპყრობელო, გულნი თავისუფლების მოყვარეთა აღინთო შენდამი სიყვარულითა და „მშვიდობას“, ვითარცა უპირველესს ჭირისუფალს, კრძალულის ხელით ზეთისხილის შტო მოაქვს შენს გოლიათს გულზე დასადებად“.

ყოველთვის რუსეთის მიმართ სამტროდ მიმართული გაზეთი „Pall Mall Gazette“ და მეგობრად ცნობილი „Daili News“ ერთმანეთს ეთანხმებიან, რომ იმპერატორი ალექსანდრე III ევროპას უფრო მეტად დააკლდა, ვიდრე რუსეთსაო... „Deili Cronicle“-ს მოჰყავს შემდეგი სიტყვები განსვენებულისა: „მე მსურდა მშვიდობა – ეგ დიდი მადლი, რომელსაც კი ღმერთი უწყალობებს ხოლმე სააქაოს. ვაი იმათ, ვინც მას დაარღვევს“. სხვა გაზეთებს, რომელთა ჩამოთვლა, ვფიქრობთ, მეტიღაა, უხარიანთ, რომ რუსეთის ჟურნალ-გაზეთობამ თანაგრძნობით მიიღო ეს ჩვენი მეგობრული სურვილი და ეს ცხადად ამტკიცებს, რომ ამ ერთა შორის ცოტად თუ ბევრად დაახლოებამ გზა გაიკეთაო. ეს იმპერატორის ალექსანდრე III-ს უკანასკნელი სამსახურია, რომელიც მან მშვიდობას გაუწიაო. ჩვენი სურვილიაო, რომ მისმა სულმა დაინახოს, რა დიდად გვაწყურებს და გვაიძულებს ძლიერება და დიდებულება მისის მაგალითისა, რომ მისი ამაღლებული და განათლებული პოლიტიკა სამუდამოდ დამკვიდრებულ იყოს და უფრო მეტად წარმატებულ.


თითქმის ამავე გრძნობით და აზრით წარმოსთქვებს საქვეყნოდ თავისი სიტყვანი ლორდმა როზბერიმ და სალუსბერიმ. თუ არ დავივიწყებთ, რომ ერთი დღეს პირველი მინისტრია და ლიბერალების მოთავე ინგლისში და მეორე პირველ მინისტრადვე ნამყოფი და მოთავე კონსერვატორებისა, მაინც ცხადი იქნება, რა ძლიერ ფეხადგმულია ინგლისში სურვილი რუსეთთან დაახლოებისა და ხელიხელ სვლისა. თუ ეს ორი ბანაკი, ყოველთვის ერთმანეთის წინააღმდეგნი, ერთმანეთში მოაშველა და მოარიგა ამ ახლად აღძრულმა სურვილმა, სჩანს, თვით სურვილი საერთოა და მით უფრო შესანიშნავი და საყურადღებოა შემდეგისათვის.

საკვირველი ყოველ ამაში ის გარემოებაა, რომ ინგლისმა ეგრე უეცრად და მოულოდნელად პირი და გული იბრუნა. მართალია, დიდი დანაკლისია, რომ ქვეყნიერობას დედაბოძი მშვიდობიანობისა წაექცა და ამისთვის გლოვა და წუხილი სამართლიანია ყველგან და ყველასათვის. მაგრამ იგი ინტერესები, რომელიც ინგლისს ამ ოთხმოც წელიწადში ასე თუ ისე ამოქმედებდნენ ზოგისთვის სამტროდ და ზოგისთვის სამეგობროდ ევროპაში, ხომ ისევ იმას ჰკლავდებენ, რაც წინად, ისევ იმ ტაფაში იწვის და იგივე ცეცხლი უკიდია (ხომ ამ მხრით არავითარი ცვლილება არ მომხდარა, ტაფა არ განელეებულა, ცეცხლი არ ჩამქრალა).

ხომ მეტისმეტი მტრეული უგუნურება იქნება, კაცმა ეს ამბავი ამ მწუხარებას მიაწეროს, რომელმაც ასე შეიპყრო მთელი ევროპა ნეტარხსენებულ იმპერატორის განსვენების დღიდან. პოლიტიკა ერთი უგულო რამ არის და იმ ბუნებისა, რომ მარტო სარფა და გამორჩენა ასულდგმარებს. ამ სარფასა და გამორჩენას იგი ვერ მოსჭრის ყურსა და მტლად ვერ დაუდებს მას, რასაც გრძნობა მოითხოვს, თუნდაც დიდად ამაღლებული და დიდად საპატიო.

მაშ რა უჩინარმა მიზეზმა მოჰკრიჯა რუსეთისაკენ სამეგობროდ ამოდენა ხნის მტრული პოლიტიკა ინგლისისა ეგრე სასწრაფოდ, ეგრე უეცრად? ამის პასუხის გამორკვევა ვგონებთ შესაძლებელია, თუ გულში ჩავხედავთ დღევანდელის დღის ბოროტსა, დროთა გარემოებისაგან წინადვე მოგროვილსა და აწ გასაცხრილად თუ გასანიავებლად მოვლენილსა.

[1894 წ.]



## **<მართლმსაჯულება ქვეყნისა და ერის სამსახურში>**

ტფილისი, 26 ნოემბერი

მართლმსაჯულება, სამართლის ქმნა ერთი იმისთანა არსებითი საჭიროებაა, ურომლისოდაც ერთი დღეც არ შეუძლიან იცხოვროს ქვეყანამ და ერმა. ვერა ურთიერთობა ადამიანისა, ვერა კრებული მისი ერთს დღესაც ვერ გასძლებს უიმისოდ. ან როგორ უნდა გასძლოს, როცა სამართლის ქმნა ერთი იმისთანა აუცილებელი, ყოვლად ძლიერი მოქმედებაა, რომელზედაც დამყარებულია მთელი სასოება და იმედი მშვიდობით მყოფობისა, ადამიანის ღირსების, სახელის, ოჯახის და სარჩლისა და მფარველობისა.

როცა მართლმსაჯულება, სამართლის ქმნა ცუდად არის აგებული და მოწყობილი, იქ ჩვენის ფიქრით, იმედი უნდა გადაწყვეტილი ჰქონდეს კაცს, რომ მისი მუდამი წყურვილი საკეთილდღეოდ წარმატებისა ვერას იზამს, რაც გინდა გაისარჯოს და დიდი მხნეობა გამოიჩინოს. იქ ყველაფერი უქმია, ყველაფერი უღონო და უძლური. ცხოვრება ადამიანისა რთულია და საჭიროება ცხოვრებისა ათასს სხვადასხვა გზაზე იწვევს ადამიანს სამოქმედოდ. მაგრამ არც ერთი ამ გზებისა სანატრელ საგანმდე ვერ მიიყვანს კაცს და კაცთა კრებულს, თუ სამართლის ქმნა, ეს უძლიერესი და ყოვლად მხსნელი ფარ-ხმალი დაბრკოლებულია და ღონეგამოცლილი.

ამიტომაც სამართლის ქმნა მარტო სამართლის ქმნისათვის უნდა იყოს და სხვა ამის მეტი არა აკიდლოს-რა. თუ სამართლის ქმნას სხვა საგანიც რამე აკ-

კიდეთ ზურგზე, იგი ჰკარგავს თვისს არსებითს მნიშვნელობას, თვისს ბუნებას, თვისს მაცხოვრობას, თვის საპატიო მიზეზს არსებობისას.

„ქმნა მართლისა სამართლისა ხესა შეიქმს ხმელსა ნელლად“-ო, სთქვა ჩვენმა რუსთაველმა და მართალიც არის. სწორედ ასეთია ძლიერება და შემძლებელობა სიმართლისა და ამიტომაც კიდევ ვიტყვით: სამართლის ქმნა მარტო სამართლის ქმნისათვის უნდა და არარამ სხვა არ უნდა აბრკოლოს მისი ყველასათვის სანუგეშო მოქმედება.

სამწუნაროდ ჩვენდა, ეს ძირითადი და არსებითი მოთხოვნილება სამართლის ქმნისა ხშირად ავიწყდებათ ხოლმე ქვეყნის საქმეთა დამწყობთა და გამრიგებელთა. ეს სამწუნარო ამბავი ეხლახან შექნიშნა რუსეთის გაზეთმა „Русская жинзнь“-მა და ის საბუთიანი აზრი წარმოთქვა, რომ საჭიროა ამ მხრით ჩვენს წესწყობილებას სამართლისას ყურადღება მიექციოსო და მოვაშოროთო თავიდან იგი დიდი ნაკლულოვანება, რომ სამართლისათვის დავალებული რუსული ენა ამოქმედლოს იქაც კი, საცა რუსული არ იციან. მართლა რომ დიდი ნაკლულოვანებაა, იმისთანა ნაკლულოვანება, რომლის მოწყალეობით სამართალი, ჰკარგავს რა თავისს მადლს მეტყველებისას, ხელიდამ უშვებს ერთადერთს ძლიერს ღონეს მართლის აღმოჩენისას. ზოგჯერ ერთი გულუბრყვილო სიტყვა უფრო ჰშველის ხოლმე მართლის აღმოჩენას, ვიდრე მთელი კაზუისტობა საბუთებისა. სიტყვა, პირდაპირ თქმული და პირდაპირ სამართლის ყურამდე მიხწეული, დიდი საშველი ღონეა სამართლის ქმნისათვის. საცა ამ სიტყვას გზა შეკრული აქვს, იქ ნურავინ იტყვის, რომ სიმართლის გზა გასხნილიაო.

ამ გზაზე დგომა სამართლისა მაშინ უფროა სამწუნარო, როცა თვითონ სამართლის მქმნელმა არ იცის ენა იმ ერისა, რომელსაც უსამართლებს და იძულებულია ამ შემთხვევაში მიენდოს უვიცს მთარგმნელსა და რასაც ამ უკანასკნელის უვიცობა ამცნებს, იმაზე დაამყაროს თავისი განაჩენი. ან რა საიმედო სურათს წარმოადგენს ერთის მხრით მოსამართლე, რომელსაც მოჩივართა ენა არ ესმის და მეორეს მხრით მოჩივარი,



რომელსაც ენა მოსამართლისა არ გაეგება. ამ ყოფაში შესაძლოა ყოველისფერი, გარდა მართალის სამართლის ქმნისა.

სხვა ქვეყნებში, მაგალითებრ გერმანიაში ეს ამბავი დიდ ნაკლულოვანებად ცნობილია სამართლისა და ქვეყნისათვის და იქ დადებულია პოლონელთა გამო, რომ მოსამართლემ უსათუოდ უნდა იცოდეს ენა იმ ერისა, საცა ჰსამართლობს. უამისოდ პოზნანში მოსამართლის ადგილს ვერავინ მიიღებს. თუმცა გერმანია ძალიან მოწადინებულია, რომ პოლონელთ დაავიწყებინონ მათი ენა და გერმანელებად გადაჰქმნან, მაგრამ სამართლის წმინდა დანიშნულებამ და მისდამი პატივისცემამ იძულებულ-ჰყო ეგ წადილი შეეწირა იმ აუცილებელ და შეურყეველ აზრისათვის, რომ სამართლის ქმნა სამართლისა ქმნისათვის უნდა იყოს და არარას სხვას არ უნდა ემორჩილებოდეს.

არსად, იქნება, არ იყოს საჭირო ამ აზრის განხორციელება ისე, როგორც საქართველოში და ერთობ ამიერკავკასიაში. რუსული გაზეთი „Русская ЖИЗНЬ“ ამბობს, რომ საჭიროაო სამართალს ამ მხრით ყურადღება მიექციოსო და თუ შესაძლო არ არის იგი წესი იქმნას შემოღებულ, რაც ამ შემთხვევისათვის გერმანიაშია, ის მაინც ვიზრუნოთო, რომ ამიერკავკასიის მომრიგებელ მოსამართლეებს კარგი და მცოდნე მთარგმნელები ჰყვანდესო. რა თქმა უნდა, უარარაობას ისევ ცალი უღელი ხარი სჯობია, მაგრამ სამართალი ისეთი მძიმე საზიდარია, რომ ცალი უღელი ხარი დიდს სამსახურს ვერ გაუწევს. ან რატომ არ უნდა იყოს შესაძლებელი, რომ ჩვენშიაც ხსენებული წესი იყოს დანიშნული და აქაურ მომრიგებელ მოსამართლეს ის მოეთხოვოს, რასაც გერმანიაში სთხოვენ?

[1894 წ.]



## **<ინგლისის პოლიტიკის ახალი მიმართულება>**

ტფილისი, 2 დეკემბერი

ჩვენ ამას წინად დავიწყეთ საუბარი იმაზე, რომ ინგლისი დღეს საჭიროდ ჰხედავს რუსეთს დაუახლოვდეს და ვიკითხეთ — რა აიძულებს ამ ეგრედ წოდებულს “გაუტანელ ალბიონს” მთელის თითქმის ოთხმოცის წლის მტრობის დავიწყებას და მის მაგიერ მეგობრობის ხალისის და სურვილის გამოძევავენას. თუმცა ზოგიერთი გაზეთები ამ შემთხვევაში დიდს ადგილს აძლევენ გრძნობას, გაღვიძებულს განსვენებულ იმპერატორის ალექსანდრე III სამშვიდობო პოლიტიკის დიდ მაგალითისაგან, მაგრამ ჩვენ უარყვავით აქ თვით-მოქმედება გრძნობისა, რომელსაც პოლიტიკაში, საცა ყველაფრის გადამწყვეტია ბევრი მე და ცოტა სხვას, ადგილი არა აქვს და რომელიც, თუ ოდესმე თავს იჩენს ხოლმე, წარმოადგენს მარტო საფარავს დამალულის ანგარიშისას — თუ მე არ ვიქნები, ქვა ქვაზედაც ნუ იქნებაო.

რომ თვალნათლად გამოირკვეს ნამდვილი მიზეზი ინგლისის პოლიტიკის ახალ მიმართულებისა, საჭიროა გამოვარკვიოთ ჯერ ის, რას დაახარბებს ინგლისი რუსეთს და რას მიანიჭებს რუსეთი ინგლისსა, თუ ვინიცობაა დამეგობრების სურვილმა მართლა თავი დაიჭირა და გზა გაიტანა.

ყველასაგან ცნობილია, რომ რუსეთს დიდი ანგარიში აქვს ევროპაში ბალკანეთის კუნძულის გამო. აქ დიდი ცილობაა მასზე, თუ რომელი დიდი სახელმწიფო — ნამეტნავად ავსტრია თუ რუსეთი — იქონიებს უპი-

რატესს ვაკლენას. ეს საგანი რუსეთისათვის მეტად ძვირფასი რამ არის და მთელი მისი პოლიტიკა ეგრედ წოდებულ „აღმოსავლეთის საქმეში“ მარტო ამაზეა მიმართული და ამისათვის მრავალი ომი გადაუხდია, მრავალი ჯარი და ფული გაუწირავს. მას აქედ, რაც პარიუის ხელშეკრულობამ უფლება რუსეთისა შავ ზღვაში შესვლა-გამოსვლისა შეზღუდა, „აღმოსავლეთის საქმე“ უფრო გაუმწვავდა რუსეთს და ბალკანეთის კუნძულზე მაგრად ფეხის მოკიდება დაუძინებელს სურვილად გადუქცია. შავ ზღვაში დარღვევის გზით შესვლა, ხმელთაშუა ზღვაში იქიდანამ გამოსვლა გაუხდა რუსეთს ერთს უსაჭიროესს საგნად, ურომლისოდაც იგი თავის თავს შავ ზღვაში დამწყვდეულად უნდა ჰხადოდე. ამას ხელს უშლიდა მუდამ ინგლისი და ეს ხელის შეშლა მით უფრო საყურადღებო და გამჭრელი იყო და არის, რომ ამაში მომხრეობა ინგლისს არ აკლდებოდა ცალკე საფრანგეთისაგან უწინ და ცალკე ამ ბოლოს ხანებში გერმანიისა და ნამეტნავად ავსტრიისაგან. რომელიც აქ პირისპირ უდგას რუსეთს, ნამეტნავად მას შემდეგ, რაც გამოძევებულ იქმნა გერმანიიდან. ევროპაში რუსეთს ამაზე მეტი მწვავე საგანი არა აქვს თავისს პოლიტიკისათვის, გარდა ამისა, რომ უღელი თანასწორობის სასწორისა ცალკერდ არ გადაიხაროს. ამ უკანასკნელმა საჭიროებამ გამოიწვია დამეგობრება რუსეთისა და საფრანგეთის და ამ დამეგობრებამ შეუძლებელ გახდა მოქმედებითი პოლიტიკა „სამთა კავშირისა“ და, ცოტა არ იქმნა, ძირი შეურყია.

აზიაშიც რუსეთს იძულებულს ჰხდოდა სხვადასხვა ქვეყნების დაპყრობად ჯერ ის საბუთიანი სურვილი, რომ თავისი განუზომელი სამზღვრები ადვილად გასამაგრებელი გახადოს და მერე ის, რომ ეზა გაიხსნას ოკეანისაკენ. აქაც ინგლისი ელობებოდა წინ რუსეთს და იძულებულს ჰხდოდა ამ უკანასკნელს თავისი სამზღვრები მიეწვდინა ინდოეთამდე, რომელიც უჭირავს ინგლისს და შეადგენს მის სუსტ მხარეს ღონისას. რადგანაც ინგლისს უფრო ადვილად ევენება ინდოეთის მხრივ და რუსეთის ინდოეთამდე გაწვევა და მიჯნების მიბჯენა ამის გამო და აქ მეტად

საფრთხილოა, ამიტომაც ადვილად მისახვედრია, რა საბუთი იძულებდა ინგლისს ურჩობა გაეწია რუსეთისათვის აზიაში საერთოდ და ავღანისტანში საკუთრივ. იგივე შიში ინდოეთამდე ხელის მიწვდენისა ამოქმედებს ინგლისის პოლიტიკას ეგვიპტეშიაც, საცა სუეცის არხი მახლობელ და საადვილო გზად არის ცნობილი ევროპიდან ინდოეთისაკენ და სადაც თვითვეული ცალკე დიდი სახელმწიფო ევროპისა საერთოდ – და საფრანგეთი საკუთრად – ყოველთვის მზად არის უპირატესობას შეეცილოს ინგლისს.

დღეს რუსეთის და ინგლისის ინდოეთის შუა ერთი დამოუკიდებელი სამეფოა ავღანისტანისა. ამ ბოლოს ხანებში ეს ავღანისტანი გაუხდა რუსეთს და ინგლისს საკამათოდ აზიაში. ბევრს სადიაპლომატო კალამს მოუტყდა წვერი, ზოგჯერ ცოტაოდენი სისხლიც დაიღვარა, კინაღამ ერთხელ საქმემ ომამდენაც არ მიახწია – ვის არ ახსოვს კუმკაში მომხდარი ამბები! იმის გამო თუ, – ეს თავისთავად სუსტი და ადვილად დასაპყრობი სახელმწიფო ვინ ჩაივდოს ხელში ან იმისათვის, რომ თავისს ნებაზე ატრიალოს, ან იმისათვის, რომ საკუთრებად დაინარჩუნოს. ეს საქმე უნდა ასე თუ ისე გადაწყვეტილიყო მარტო რუსეთსა და ინგლისს შორის ჯერხანად მაინც. დიდის ალებ-დალების და ერთმანეთის მუქარის შემდეგ აქ დღეს საქმე მორიგებით გათავდა, უსისხლოდ და მშვიდობიანად. მორიგება იმაში მდგომარეობს, რომ ავღანისტანის და რუსეთის მიჯნების შუა ერთი იმისთანა ადგილი დანიშნეს, რომელიც ვერც რუსეთმა უნდა გადალაზოს, ვერც ინგლისმა და ამით მითამ გადაუბოძებელი ზღუდე დასდეს.

რამოდენად აასრულებს თავის დანიშნულებას ეს მითამ-და მაგარი ზღუდე, ამას დრო გამოაჩენს, ჩვენ კი არა გვწამს მისი ხანგრძლივობა და სიმაგრე. მუდამ ხარბს პოლიტიკაში ხელშეკრულობა სძლებს იმ დრომდე, ვიდრე ერთ-ერთი მხარე ძალ-ღონეს არ შემოიკრებს მისდა დარღვევისათვის. ჯერ კიდევ ბევრი დრო დაეხარჯება კაცობრიობას, ბევრი სისხლი დაიღვრება, ბევრი ქონება განადგურება, ვიდრე პოლიტიკა იმ საპატიო სიმაღლეზე დადგება, რომ წინ წაიმძვაროს სამართლიანი ერთხელ დადგენილი განა-

ჩენი. აქ პუშკინის არ იყოს – „Всё моё, – сказан  
булат“.

ასეა თუ ისე, დღეს კი ჭეშმარიტ ამბად უნდა ვირწმუნოთ მორიგება ინგლისსა და რუსეთ შორის ავლანისტანის გამო. ეს ჩვენის საუბრის საგნისათვის დიდმნიშვნელობიანი ამბავია. ინგლისმა, არ ვიცით, ამ ამბავს განგებ მოუხუჭა თვალი და მოუყრუა ყური, თუ რამ სხვა ანგარიში დაიხვია ხელზე, ხოლო ეს კი ნამდვილია, რომ ეს მორიგების ამბავი მიიჩნია საბუთად ეთქვა, რომ რუსეთმა ამით დაგვიმტკიცაო თვისი მშვიდობისმოყვარეობა და სრულიად დაგვიწვია მწვავე შიში ხელის გაწვდენისა ინდოეთისაკენაო. ეხლანდელმა პირველმა მინისტრმა ინგლისისამ ლორდმა როზბერიმ და ყოფილმა მინისტრმა სალუსბერიმ ესეთი აზრი საქვეყნოდ გამოსთქვეს. ერთის მხრით, იქნება ინგლისი გულწრფელადაც ამბობდეს ამას, იმიტომ, რომ ამ მორიგებით, როგორც სჩანს, რუსეთმა იგი დაუთმო ინგლისს, რისთვისაც ეს უკანასკნელი თავს იტკიებდა ამდენს ხანს: რუსეთს ავლანისტანისაკენ გზა შეეკრა და ინგლისის მიერ მოპოებული ზედგავლენა ავლანისტანზე ხელშეუხებლად შერჩა ინგლისს.

მაინც და მაინც მერმისს მივანდოთ გამოჩნრეკა იმისი, თუ რამოდენად გულწრფელია ასეთი მეტყველება ინგლისისა, ეხლა კი საჭიროა ვსთქვათ, რომ ინგლისმა ეს ამბავი დაიხვია ხელზე, ვითარცა ამისთანა საბუთიანი მაგალითი, რომელმაც ვალად დასდო სამეგობროდ გაეწვდინა ხელი რუსეთისათვის და ამით საჭირო ფერუმარილი წაესო ამისთანა ანგარიშებისათვის, რომელთაც მოითხოვენ არსებითი გარემოებანი მისის დღევანდელის პოლიტიკისა და რომელნიც არიან სახარბიელნი მარტო ინგლისისათვის. აი აქ არის შიგნეული მიზეზი, რომ ინგლისი ცდილობს დაუახლოვდეს რუსეთს და მორიგების გამო აღძრული გრძნობა მითამდა მადლობისა მარტო ვარაყია გულში დამარხულ ანგარიშებისა. ვისაც ეგ ანგარიშები გაუთვალისწინებია და სწამს მათი ძალმომრეობა, იგი ვერასდროს ვერ დაიჯერებს, რომ დაახლოებამ და მეგობრობამ რუს-ინგლისისამ დიდხანს თავი დაიჭიროს, თუნდაც დღეს კიდევ მოხდეს და განხორციელდეს.

ამაზე საუბარი შემდეგისათვის უნდა გადაიდოს, რადგანაც უიმისოდაც გაგებლად დღევანდელი ჩვენი წერილი.

[1894 წ.]



## ინგლისის ფლოტის ბატონობა საზღვაო-სავაჭრო საქმიანობაში

ტფილისი, 4 დეკემბერი

ინგლისი ერთი იმისთანა ქვეყანაა, რომელსაც გარს არტყია ზღვები და ეს გარემოება დიდს უპირატესობას აძლევს ცოტად თუ ბევრად უზრუნველყოფისას ევროპაში. შიში მტრის შემოსევისა და თავზე დაცემისა ამ მიზეზით აცილებული აქვს ამ ზღვათა შორის მდებარე სახელმწიფოს. ამ მიზეზსავე უნდა მიეწეროს ის პირველ შეხედვით საოცარი გარემოება, რომ ინგლისი დღეს-აქამომდე დიდად საჭიროდ არა ჰხედავს საერთო სამხედრო დებულება შემოიღოს და იგი დიდი ტვირთი სამხედრო ბეგარისა დაადოს თავისს ერსა, რომელიც სხვა ხმელეთის სახელმწიფოებში დიდი ხანია შემოღებულია და რომელიც დღეს ვერე ძლიერ აკვნესებს ყოველ ქვეშევრდომს ხმელეთის სახელმწიფოსას. ეს მით უფრო საოცარია, რაკი ამ თითქმის ქუდზე კაცის გამოსვლამ საომრად ფეხი მოიკიდა ერთგან, ყოველ სხვა სახელმწიფოებისათვის საერთო სამხედრო ბეგარა აუცილებელ საჭიროებად შეიქმნა მტრის წინაშე გულდაგულ დადგომისათვის. გარემორტყმული ზღვები ინგლისისათვის იმისთანა ზღუდეა, რომლის იქით ძნელად გადუწვდება ხელი ხმელეთიდან საომრად გამოლაშქრებულ მტერსა და ინგლისს ჯერხანად თითქმის აინუნშიაც არ მოსდის შეუცვალოს წესი და აგებულება ძველებურად მოწყობილ თავისს სახმელეთო მხედრობასა.

ეს გეოგრაფიული გარემოება ინგლისის მდებარეობისა სულ სხვა გარჯას ჰთხოვლობს შესახებ ზღვათა

მხედრობისა. ამიტომაც მთელი ისტორია ინგლისისა თითქმის იმაზეა მიქცეული, რომ რაც შეიძლება მეტი ძალ-ღონე იქონიოს ზღვაში შეჭიდებისათვის, თუ ოდესმე ვინმე გაუბედავს თავზე დასხმას. ამ საჭიროებად შეაქმნევინა ინგლისს ისეთი ფლოტი, რომელსაც ადრე მთელი ერთად შეკრებილი ღონე სხვა სახელმწიფოებისა და ეხლა ვერა სახელმწიფო თითოეულად ცალკე ომს ვერ გაუსწორებს ზღვაში ვერც ფლოტის სიკეთით, ვერც სიმრავლითა.

თუმცა თვით ინგლისი მაღლიერი არ არის თავისის ფლოტისა, თუმცა ზოგიერთი გაზეთები ბუკითა და ნაღარით სიკეთესაც უწუნებენ, მაგრამ ეს კიდევ იმას არა ჰნიშნავს, რომ მაინც ძალ-ღონით სხვაზე მეტი არ იყოს. თუ ინგლისი დღეს ემდურება თავისს ფლოტს მარტო იმისთვის, რომ უფრო გააძლიეროს, უფრო გააძლიეროს, რადგანაც ამ ბოლოს ხანებში თითოეული ცალკე სახელმწიფოებიც ხმელეთისა გულხელდაკრებილი არ იყვნენ ამ საქმისათვის. თითქმის დღეს აქამომდე უფლოტო გერმანიამ ცოტად თუ ბევრად მოზრდილი ფლოტი გაიჩინა, არც რუსეთმა ამ მხრით დააკლო რამ, საფრანგეთმა ხომ ასეთი საქმე მოახდინა, რომ საკმაოა ერთი ვინმე ფლოტის მქონე კიდევ მიიმხროს და მაშინ ვინ იცის, ვინ წინა და ვინ უკან. აი რა გარემოების წინაშე დღეს ჰფრთხილობს ინგლისი, როცა თავისს ფლოტის აკარგიანობას ამ გარემოების შიშით თვალს უსწორებს. ეს არის მიზეზი, რომ ინგლისი შინ იმ გზაზე სდგას, რომ ფლოტი უფრო გაიმრავლოს და გაიძლიეროს.

ინგლისი ანგარიშის ქვეყანაა და დიდი მზრუნველი თავისის ერისათვის. იგი მარტო ცარიელ სახელისათვის იმოდენა ხარჯს არ გააწევინებს თავისს ერს, რამოდენასაც მისი ძლიერი და დიდი ფლოტი ჰთხოვლობს. მართალია, მისი ძალღონიერი ფლოტი მუქარაა ომების დროს, მაგრამ, ღვთის მაღლით, ომები ხომ ყოველდღე არ არის. აი თითქმის მთელი ორმოცი წელიწადია ინგლისს თვალსაჩინო ომი არსად და არავისთან არა ჰქონია. აქ არაფრად მოსატანია ინდოეთის არეულობა, საცა ინგლისის მხრითაც სისიხლი დაიღვარა, აგრეთვე ზულუსებთან, მახდისტებთან, და სხვა

ამისთანაებთან თითო-ორიოლა თოფისა და ზარბაზნის დაცლა ომებად არ ჩაითვლება. ეს ამისთანა ომები იმოდენად საგრძობელია ინგლისისათვის, რამოდენადაც ნესტარი სპილოსათვის.

მაინც და მაინც, ჩვენდა სასინარულოდ, დრო მშვიდობიანობისა გაცილებით სჭარბობს ომიანობის დროსა კაცობრიობის ისტორიაში და ამისთანა ხანგრძლიობა მშვიდობიანობის ხანასი ბევრს ქონებას ინგლისისას შეიწირავდა სახარჯოდ ფლოტისა, თუ რომ ფლოტი უსაქმოდ ჰყოლოდა დატოვებული ომების მოლოდინის შიშითა. ჩვენ დღეს ვხედავთ, რომ სწორედ ამ ტაფაში იწვის დღეს ყოველი ერი ხმელეთის სახელმწიფოსი, რადგანაც იძულებულია თოფქვეშ იყოლიოს უსაქმოდ მრავალი ჯარისკაცი და ამისათვის აუარებელი ზარჯი აძლიოს. ბრძნების ქვეყანა ინგლისი ეგრე არ მოექცა თავისს ფლოტს. საომრად აგებულ ხომალდებსაც კი საქმე გაუჩინა, რომ ქვეყანას თავისის ზარჯის ფასი მაინც აუყენოს. საქმე იგი იყო და არის აუარებელი საქონლის ზიდვა ზღვებსა და ოკეანეებზე, იმ საქონლისა რომელსაც თვითონ ამზადებდა თავისს ფაბრიკებში და რომელიც სხვიდამ შემოჰქონდა ან შინ სახმარად, ან გადასაკეთებლად საგარეოდვე აღებ-მიცემობისათვის.

რა თქმა უნდა, ფლოტი ამ უკანასკნელ სამსახურს ვერ გაუწევდა ინგლისის ერს, თუ რომ ზღვებსა და ოკეანეებზე თავისუფალი გზა არ ექმნებოდა. ჭკუიანმა და შორმხედველმა ინგლისმა იმ დროსვე დაიჭირა ამ მხრით თავისი საქმე და გაიჩარხა, ჯერ როცა ამაზე ფიქრი ჩამიჩუმადაც არავის სხვა სახელმწიფოს გულშიც არ გაუტარებია. როცა სხვებს ეძინათ. მაშინ მღვიმარე ალბიონმა ზღვებსა და ოკეანეებზედაც გზები გაიხსნა და ყველგან ასეთი სადგურები გაიკეთა ნაპირებზე, რომ დღეს ყველანი სინარბით შეჰნატრიან. კარგად წინ დანახულმა და კარგად გაგებულმა ვითარებამ თავისის ქვეყნისამ ინგლისი ამ ისტორიულ გზაზე დააყენა იმოდენის გამარჯვებით, რომ იგი შეიქმნა ზღვათა მფლობელად და დღეს-აქამომდე გულ-ღვიძლი მისის პოლიტიკისა იგია, რომ ეს გზა უფრო გაიხსნათოს, გაივანეროს და სადგურები მოიმატოს ყველგან, საცა

ყველასაგან ცნობილი მხნეობა და მოხერხება აღებ-მიცემობისა ხელსა და სურვილს მიაწვდენს. ამის გარე ინგლისს სხვა არავითარი ტკივილი, სხვა არავითარი სურვილი არ ამოქმედებს პოლიტიკაში. რუსეთსაც ამისთვის უშლიდა შავ ზღვიდამ გამოსვლას ხმელთაშუა ზღვაში და ერთობ გაწევ-გამოწევას ზღვებისა და ნამეტნავად ინდოეთის ოკეანესაკენ. საფრანგეთსაც დღეს ამისათვის ეკამათება სამტროდ ეგვიპტეში, მადაგასკარში, ამისათვისვე ჰლალატობდა და ჰლალატობს ტონკინში, რომლის დაჭერითაც საფრანგეთმა გაიძლიერა ზედმოქმედება და გავლენა ჩინეთის სამხრეთის ნაწილსა და ინდოეთის ოკეანეზე და, ცოტა არ იყო, შეჰხუთა ინგლისის მოქმედება სიამ-ბირმანში. გერმანიასაც სწორედ ამისთვის აემზარა ამ ბოლოს ხანებში, რადგანაც აფრიკაში გერმანიამ დიდი ცილობა დაუწყო ინგლისს და ამ ცილებაში გამარჯვებისათვის საფრანგეთს მოუტკბილდა საკოლონიო პოლიტიკაში ინგლისის წინააღმდეგ. გარდა ყოველ ამისა, თვით ინდოეთში ინგლისის საქმეები ისე დალაგებული არ არის, რომ ამ მხრით მოსვენებული იყოს. ინდოეთი თავისის ორას მილიონის მცხოვრებლებით ინგლისის შესახებ წარმოადგენს ერთს უშველებელს ძირს თივისას, რომლის აბრიალებისათვის საკმაოა ერთი ნაპერწკალი. ინდოეთის ახლომახლო ცეცხლის გაჩენა, როგორც დღეს, მაგალითებრ, ჩინეთ-იაპონიის ომია, დიდად საფრთხობელია ინგლისათვის. გარდა ამისა, ინდოეთი სამხრეთით უღვეს ჩინეთსა და დასავლეთით ნაწილით სწვდება ინგლისის ბირმანს, ბირმანი მომიჯნავეა სიამისა და სიამი საფრანგეთის ტონკინისა, და ეს ქვეყნები სულ ინდოეთის ოკეანის სანაპიროები არიან და ამასთან ტონკინი ჩინეთის ზღვას ერჩის ქვევადამ მთელის თავისის სიგრძით სამხრეთით ჩრდილოეთისაკენ გაწვდილით, და ზემოდამ ჩინეთი და იაპონია. ამის გამო ინგლისისათვის სულ ერთი არ არის, როგორ დაეწყოთ საქმე ამ დამარცხებულ ჩინეთისა და გამარჯვებულ იაპონიის შორის. ამიტომაც ადვილი მისახვედრია, რომ ჩინეთ-იაპონიის ომმა აქამდე უტკივარი თავი აუტკივა დღეს ინგლისსა აქაც. აი პოლიტიკური გაჭირება დღევანდელი ინგლისისა ამ

მრავალგვარ აწეწილ საქმეებშია და შიში, რომ მარცხი ან აქ, ან იქ არა წაეკიდოს-რა, იძულებულ ჰყოფს აქედ-იქით მიიხედ-მოიხედოს და სამეგობროდ ხელი გაიწვინოს. მართოდ დარჩენა ამ დროს, როცა ამდენის მხრით ქარი ჰქრის და ბუქი მოაქვს, საშიშია.

მართალია, ყველაზე უწინ თვალი აახილა საფრანგეთმა და დაინახა, რომ ინგლისს დიდი ხანია ზღვასა და ოკეანებზე გზა გაუხსნია და უკეთესი სადგურები და ქვეყნები ალებ-მიცემობისათვის უკვე დაუჭერია, მაგრამ დღესაც ბევრსა ჰნანობს, რომ თავის დროზე ამაზე არ უზრუნვია და ეს დიდი სახსარი გამდიდრებისა ხელიდამ გაუშვია. მით უფრო ჰნანობს, რომ ინგლისს ფეხი ყველგან მაგრად მოუკიდებია და დღეს ძნელია ფეხი ვინმემ მოასხლეტინოს. ფარული ფიქრი ფლოტის გაძლიერებისა და განდიდებისა საფრანგეთში, სხვათა შორის, ამ მხრით არის გამორკვეული დღეს ინგლისისათვის და აი მიზეზი, რომ დღეს-აქამომდე საფრანგეთსა და ინგლისს შორის რაღაც შუღლია და მიუნდობლობა.

მართო საფრანგეთს, რასაკვირველია, დღეს ინგლისი არ შეუშინდება, მაგრამ რაკი ასე აწეწილი აქვს ყველგან საქმე და ამ აწეწვისაგან ასე გაჭირვებულია, რომ შესაძლოა ინგლისის მომდურავთ ერთად მოიყარონ თავი და ინგლისს შეუტონ, დღეს ინგლისი დიდ საგონებელშია ჩავარდნილი – როგორ გავძვრე-გამოვძვრე ამდენს ბარდებშია, რომ საგრძნობელად არ დავიკაწრო და არ დავიჭრაო. ეს დღეს მით უფრო საფიქრებელია ინგლისისათვის, რომ საფრანგეთის გარდა სხვა სახელმწიფოებმაც თვალი აახილეს მასზედ, თუ რა დაჰკარგეს, რომ აქამომდე ეძინათ. თითოეული ცალკე სახელმწიფო, დიდი თუ პატარა, რომელსაც კი ზღვის სანაპიროდ მდებარეობა სახსარს აძლევს ზღვაში მიმოსვლისას, სულ ყველანი სცდილობენ, თუ დაკარგული არ დაიბრუნონ, ახალი მაინც თვითონ დაინარჩუნონ. ისპანიის პოლიტიკა მარროკოში და პორტუგალიისა აფრიკაში სწორედ ამითია საწყენი ინგლისისათვის და იმოდენადაც, რომ ერთს დროს საწყალს პატარა პორტუგალიას ინგლისის მუქარამ ენა მუცელში ჩაუგდო. იტალიისა და გერმანიის

მოქმედება აფრიკაში იმის მომასწავებელია, რომ წარვიდნენ დრონი ინგლისისათვის ნაქებნი მტკბარად და ესლა ინგლისს შიში უნდა ჰქონდეს ცილებისა, არამც თუ იქ, საცა ახალი რამ არის შესაძინებელი, არამად, იქნება, იქაც, საცა უკვე შეძინებული რამ აქვს. გაუთავებელი შური და ხარბობა პოლიტიკაში და ის გარემოება, რომ ევროპა დღეს ისე გაჭვდილია მცხოვრებლებით, რომ ზოგიერთი სახელმწიფო ველარც კი იტევს, საკმაო საბუთია ამ შიშისა ინგლისისათვის.

ჩინეთ-იაპონიის ომმა ხომ უფრო გაამწვავა ეს გაჭირებული მდგომარეობა ინგლისისა. კორრეა, რომლის გამოც ატეხილია ეს ომი, იმისთანა ლუკმაა, რომ აქ ერთმანეთს შეეხალნენ ინტერესები რუსეთისა, ინგლისისა, საფრანგეთისა, ჩრდილო-ამერიკის შტატებისა და გერმანიისა კი. ჩვენ აქ არ ჩამოვთვლით, რაში მდგომარეობს ეს ინტერესები და ეს კი სათქმელია, რომ შესაძლოა ამ ჩინეთ-იაპონიის ომმა ერთობ საკოლონიო პოლიტიკა ევროპისა გაუთვალისწინოს ქვეყანას და, რასაკვირველია, ნატვრის თვალი ინგლისზე გააჩერებინოს. ეს რომ ასე არ იყოს, გერმანიას, რომელსაც ერთი მტკაველი მიწაც არ უჭირავს აზიაში და ჩინეთ-იაპონია დიდ მანძილზეა მისგან შორს, რა უნდა, რომ აქ ეჩხირება და ჰლამის თითქმის საფრანგეთთან ერთად წინ გადაეღობოს ინგლისსა?

აი ეს ბევრგან აჯიჯგნილი საქმე იძულებულ ქმნის დღეს ინგლისს, მინამ დროა, დაიძვებროს ვინმე იმისთანა, რომელსაც ღონეც შესწევს, თუ ვინიცობაა საქმე ღონეზე მიდგა, და ადვილადაც მოსარიგებელია. ამისთანა სახელმწიფოდ იცნო დღეს ინგლისმა რუსეთი და თავისს თავილს თითქმის ხვეწნისას იმით იგერიებს, რომ მე მოვალე ვარ პამირის საქმის მშვიდობიანად გათავების სამაგიერო რუსეთს გადავუხადოვო. საქმე კი იმაშია, რომ დღეს-აქამომდე ამის იმედს ვერ იქონიებდა ინგლისი და დღეს კი, როცა ხელმწიფე იმპერატორი დაუმოყვრდა ინგლისის სამეფო გვარეულობას, ამ იმედს ცოტაოდენი ფერი დაედო და ღონე მიეცა.

რა უნდა დაახარბოს რუსეთს ამ მეგობრობის სამაგიეროდ? ამის პასუხს იძლევიან ინგლისის გაზეთები ვერსტმინსტერისა და სტანდარტი. რუსეთს უნდა გზა

გავუხსნათ ზღვისა და მზისაკენაო, მინამ ინგლისი დღევანდელ საფრთხესაგან თავს დაიძვრენს, ამის ძახილს არ შესწყვეტს. არც კი ეს არის საკვირველი, ვიფიქროთ, რომ ყველა ეს მითქმა-მოთქმა რუსეთთან დაახლოებისა იმისათვის არის გამომცხვარი, რომ საფრთხობელა გაუკეთოს გერმანიას, რომელმაც მეტად ძლიერ დაუხლართა ინგლისს საქმეები აფრიკაში და, გარდა ამისა, ამ ბოლოს დროს საკოლონიო პოლიტიკაში გადიწია საფრანგეთისაკენ. ჩვენ კი ასე გვგონია, რომ ამ გზით გერმანია შეუშინდება ინგლისს და თავისს მწკავს მოქმედებას ინგლისის წინააღმდეგ ცოტად თუ ბევრად დაანელებს და მაშინ ინგლისი სულ სხვა ჰანგზედ დაიწყებს თავისს პოლიტიკურ გალობას, და სულ სხვა ჰარალალოს დაიძახებს.

[1894 წ.]



### <კრედიტი საქართველოს მემენახეთაჲს>

ტფილისი, 15 დეკემბერი

ფინანსთა სამინისტროში დღეს აღძრულია გადასაწყვეტად ერთი საგანი, რომლის ასე თუ ისე გადაწყვეტა ჩვენთვის და ამიერკავკასიისათვის დიდ მნიშვნელობიანად უნდა ჩაითვალოს. სამხრეთ გუბერნიებს რუსეთისას, სახელდობრ იმ ადგილებს, საცა ვაზი ჰხეირობს, უთხოვნიათ სამინისტოსათვის, რომ ვენახებზედაც ხანგძლივ ვადიანი სესხი ეძლიოს. სამინისტოს, როგორც სჩანს მის მიწერ-მოწერისაგან, ეს ორიოდ ადგილის თხოვნა საერთო საგნად გადაუქცევა და საერთოდ წესის შემოღებისათვის ვენახების დაგირავების თაობაზე შესდგომია საქმის განხილვასა. ამას ვამბობთ იმ საბუთით, რომ ფინანსთა სამინისტრო შეჰკითხებია სამეურნეო სამინისტროს, როგორ და რა გზით შესაძლოა ვენახები გირაოდ მიღებულ იქმნას ხანგრძლივის სესხის სათავდებოდ.

ჩვენმა მკითხველებმა უკვე იციან, რომ სამეურნეო სამინისტროს აქაურ მის ხელქვეითა მოხელეთათვის მოუწერია, ამ საგანზე თავისი აზრი წარმოსთქვან და სამინისტროს გაუგზავნონ. აქაურმა უფროსმა მოხელემ სამინისტროსამ ამ საგნის გამოსარკვევად მიიწვია სანელმწიფო ქონებათა სადგურში აქაური აგრონომები და ტფილისის სათავადაზნაურო ბანკის ზოგიერთი წევრნი და ამ კრებულმა უკვე შეადგინა თავისი გადაწყვეტილება, რომელიც საკმაოდ ვრცლად მოხსენებული იყო „ივერიაში“.

ჩვენ დღეს სრულებითაც არა გვაქვს აზრად გავარჩიოთ, რაში მდგომარეობს ეს გადაწყვეტილება. ჩვენ

გვსურს მხოლოდ გამოვარკვიოთ მნიშვნელობა ალბ-რულის საქმისა ჩვენის ქვეყნისათვის.

ჯერ, როცა საადგილმამულო ბანკის წესდება წარ-მოდგენილ იყო დასამტკიცებლად, მაშინ ყურადღება მიქცეულ იყო სამინისტროსი იმ მუხლზე, რომელიც ვე-ნახებსა ჰხადიდა სათავებოდ ხანგრძლივის სესხისა. სამინისტრომ მაშინ ძალიან იუარა ეს მუხლი და თავისი უარი იმითი დაასაბუთა, რომ ვენახი იმისთანა ქონებაა, რომლის ღირებულება იმოდენად სავენახე ადგილზე არ არის დაფუძნებული, რამოდენადაც პა-ტრონის გარჯასა და მხნეობაზეო; გირაოდ მიღების დროს შესაძლოა ვენახი ისე იყოს მოვლილი და ნაკეთები, რომ კარგს და ღირებულ ფასად დაფასდეს, რადგანაც კარგად ნაკეთი ვენახი ერთობ ძვირფასი ქონებაა, ხოლო ვინ გვითავლებებს, რომ ხანგრძლივ დროთა განმავლობაში ვენახის მოვლა-პატრონობაში რაიმე ცვლილება არ მოხდეს და მოუვლელობით არ ამოვარდესო; მაშინ ბანკი უსათუოდ ზარალში ჩავარდება, რადგანაც კარგ ყოფაში დაფასებული ვე-ნახი, ცუდ ყოფაში მოუვლელობით ჩავარდნილი, იმოდენას ვეღარ მისცემს პატრონს, რომ სესხის სიმძიმეს გაუძლოს და ძალაუნებურად გასასყიდად უნდა ბანკს თავზე მოახვიოსო; ბანკი კიდევ კარგ ყო-ფაში დაფასებულს ვენახს, მოუვლელობით ცუდ ყო-ფაში ჩავარდნილს, ვეღარ ამოაღებინებს ვერც თავნსა და ვერც სარგებელს და უეჭველად იზარალებსო.

რასაკვირველია, ამ აზრს თავისი საბუთი აქვს: ვე-ნახი ძვირფასი ქონებაა მხოლოდ მაშინ, როცა მართლა ვენახია. საკმარისია სამ-ოთხ წელიწადს პატრონმა ხელი არ შეუწყოს, ვენახი აბერჩხარდება და ვაზის ნაშენობით ძვირფასი ქონება ცარიელ მიწის ღირე-ბულებაზეა ჩამოვარდება და ამ შემთხვევაში ზარალი ბანკისა უეჭველია. ამიტომაც სამინისტრომ ვენახი მარტო მოკლევადიან სესხის თავლებად იცნო და ვადად სამი წელიწადი დასდო, რადგანაც, რაც გინდ იყოს, სამი წელიწადი ისეთი მოკლე დროა, რომ ჯერ საიმე-დოა მოვლა-პატრონობაში რაიმე ცვლილება არ მოხდეს და მერე ვენახი ისე არ წახდეს, რომ ვენახის ნიშან-წყალი მაინც არ შერჩეს. ჩვენის წესდების ძალით,

შესაძლოა ამ სამს წელიწადს კიდევ სხვა ხუთიც მიე-მატოს, მხოლოდ იმ პირობით კი, რომ ყოველ ვადის მომატებაზე ვენახი ბანკის მიერ გასინჯულ და შემოწ-მებულ იყოს. ვადას კიდევ როგორმე გაუძლებდა ვე-ნახის პატრონი, მაგრამ აქ საქმე მარტო ვადა არ არის. საქმე ის არის, რომ ბანკმა მოკლევადიანი სესხი უნდა აძლიოს ნაღდ ფულითა და ამ მხრით საადგილმამულო ბანკები ერთობ დიდ დაბრკოლებაში არიან, რადგანაც უმთავრესი მათი ღონისძიება გირავნობის ფურცლებია და ნაღდი ფული, რაც აქვთ, მარტო ამ გირავნობის ფურცლის თავლებობაშია თითქმის დახაფრებული და ამის გარეთ ხელთ არა აქვთ ნაღდი იმოდენად, რა-მოდენადაც სესხის მთხოვნელები არიან.

ამ ნაღდ ფულის ხელმოკლეობას ის მოსდევს, რომ ბანკები ღონისძიებას მოკლებულნი არიან მოკლე-ვადიანის სესხის მთხოვნელები სავსებით დააკმაყო-ფილონ, ესე იგი იმოდენა აიძულონ, რამოდენასაც მათის მამულების ღირებულება გასწვდება. ბანკები ამ შემთხვევაში იმასა ჰრჩეობენ, რომ ნაღდი ფული გამო-იზოგონ, რათა ბევრს გაჭირებულს ცოტაცოტაობით მაინც გასწვდნენ, თორემ მამულის ღირებულებაზე რომ წავიდნენ, ათში ერთ-ორს თუ ეყოფა ნაღდი ფული ბანკისა. ამიტომაც ჩვენს ბანკს წესადა აქვს, რომ რაც გინდ დიდფასიანი მამული იყოს, ორას თუმანზე მეტი არ მიეცეს, ისიც ერთს ხელში.

ხანგრძლივი სესხი კი ღონისძიებას აძლევს ბანკს გაასესხოს ფული გირავნობის ფურცლებითა იმდენი, რამდენსაც მამულის ღირებულობა შესძლებს და აი-ტანს. აი ამამია დიდი მნიშვნელობა ხანგრძლივის სესხისა ვენახებზე ჩვენში. ეხლა ვენახი რომ ათას თუმანადაც ჰღირდეს, ორას თუმანზედ მეტს ვერ მიიღებს სესხად პატრონი და ეს დიდი დანაკლისია პატრონისათვის, რომელსაც ქონება დიდფასიანი აქვს და გაჭირებაში კი სავსებით ვერ გამოუყენებია საკ-რედიტოდ, მამასადამე, ამ მხრით ქონება მისი უქმია. გარდა ამისა, მოკლევადიანი სესხი, რომლის ბუნება ის არის, რომ ვადის განმავლობაში სარგებელი უნდა იღოს და ვადის შემდეგ თავნი ერთბამად და სრულად დაიბრუნოს, მეტად სამძიმოა სესხის აძლებისათვის ჯერ



იმ მხრით, რომ ვერა უძრავი მამული მოკლე ხანს ვერ გაუსწორებს პატრონს თავნსა და სარგებელს სესხისას, მამულისათვის აღებულიას. რაკი ესეა, პატრონმა სხვა ღონე უნდა იღონოს ვალის გასასტუმრებლად და მისთვის სწორედ ეს არის ძნელი და გასაჭირი. გრძელვადიანი სესხი კი, გირავნობის ფურცლებით აღებული, შესაძლოა მოშორებულ იქმნას ყოველწლივ ნაწილ-ნაწილად და თანდათანობით გაუჭირებლივ, თუ პატრონი მუყაითია და ვალს ვალად ჰხადის. გაუჭირებლივ ვამბობთ იმიტომ, რომ გრძელვადიანი სესხი, მამულის სარგოდ მამულზედ მიქცეული, აძლიერებს მამულის შემოსავალს და გაძლიერებული შემოსავალი გაუჭირებლივ გადის ვალსა.

ეს აზრები რომ წავიმძღვართ წინ, დავინახავთ, რა დიდი მნიშვნელობა ექნება ჩვენთვის, თუ სამინისტრომ შესაძლოდ დაინახა ვენახების დაგირავებით ხანგრძლივის სესხის აღება. ჯერ ერთი ისა, რომ სესხის სიდიდე შეზღუდული არ იქნება ნაღდის ფულის მეტ-ნაკლებობისაგან და ვენახის პატრონს კარი გაეღება სესხი მიიღოს იმოდენი, რამოდენსაც მოითხოვს ღირებულება ვენახისა, მეორე ისა, რომ სესხის ამღებს ნება მიეცემა თუნდ ერთბამად დაუბრუნოს ბანკს აღებული ვალი, თუნდ ცოტ-ცოტად და თანდათანობით იხადოს ვადის კვალობაზე, მესამე ისა, რომ ხანგრძლივი სესხი, ცოტ-ცოტაობით, ნაწილ-ნაწილ და თანდათანობით სახდელი, ნებას აძლევს პატრონს კრედიტით მოშველებულ ფულით განაკარგოს გირაო მამული, გაუძლიეროს მოსაცემი მოსავალი და მით თითონაც გაღონიერდეს და ვალსაც გაუჭირებლივ გაუძღვეს.

მოკლევადიანი სესხი, 3-ის წლით აღებული, ამ უკანასკნელს შემწეობას არ მისცემს მამულის პატრონს, იმიტომ რომ შემოსავლის გაძლიერებისათვის მამულის განკარგებაა საჭირო და მამულის განკარგება კიდევ დიდის ხნით ფულის დახაფრებას თხოულობს. უძრავი ქონება, ვენახი იქნება თუ სხვა რამ, იმისთანა ბუნებისაა, რომ მასზე მიქცეული ფული პატრონს გვიან, დიდის ხნის განმავლობაში უბრუნდება თავისის სარგებლით, ისიც ერთბამად არა, ცოტ-ცოტაობით, ნაწილ-ნაწილ და თანდათანობით. ამიტომაც თვითონ

საადგილმამულო კრედიტი, რომელიც დაფუძნებულია მარტო უძრავ ქონებაზე, ამ უძრავ ქონების ბუნებაზევა ზედგამოჭრილი: იგიც ჰთხოულობს სესხის დაბრუნებას ერთბამად კი არა, ცოტ-ცოტაობით, ნაწილ-ნაწილ და თანდათანობით.

ვენახები კი მოზრდილ ლუკმას ქონებისას წარმოადგენს ჩვენში, და თუ კანონი გრძელვადიან საკრედიტო საგნად გაჰხდის ამ დიდფასიან მამულს, მაშინ ვენახი, ვითარცა ამ მხრითაც გამოსაყენებელი ქონება, თავისს სრულს ეკონომიურს მნიშვნელობას მიიღებს და ეს გარემოება, ცოტა არ იყოს, ფასს მოუმატებს.

[1894 წ.]

1895 წელი



**<პრეზიდენტისა და მთავრობის შეცვლა  
საფრანგეთში  
და მისი საზოგადოებრივი მიზნები>**

ტფილისი, 13 იანვარი,

ყველაზე უდიდესი ამბავი ამ ბოლო ხანებისა ის არის, რომ პრეზიდენტი საფრანგეთის რესპუბლიკისა კაზიმირ პერიე სამსახურიდან გადადგა. ამ მოულოდნელმა ამბავმა ელვასავით მოიბრინა მთელი ქვეყანა და ბევრგან ჩააფიქრა სხვადასხვა სახელმწიფოების ბედის გამგებლნი და, რა თქმა უნდა, ყველგან ჰკითხოვდნენ, რამ აიძულა ეს თავი საფრანგეთის ერისა, რომ ასე მოიქცაო. მიზეზი გადადგომისა თვითონ კაზიმირ პერიემ ახსნა. პრეზიდენტის სახელს საკმაო პატივისცემით არ ექცევიანო, უპატიურად ეკიდებიან ჟურნალ-გაზეთები და ცალკე პირნიო. მე რადგანაც საფრანგეთის ერის თავი ვარ, ეს უდიდესი ადგილი და თანამდებობა ნებას არ მაძლევს ჩემი ღირსება მევე დავიცვაო და ისინი კი, ვინც მე პრეზიდენტად, ჩემდა უნებურად, ამირჩიეს, არავითარს სარჩელს არ მიწვევენო.

ესეთი საბუთი სამსახურიდან გადადგომისა არავინ მოუწონა კაზიმირ პერიეს და ყოველგან, საფრანგეთს აიღებთ, თუ სხვა ქვეყნებს, გადადგომილს პრეზიდენტს ამისათვის ჰკიცხვენ: შეშინდა ვითარცა მხდალი და გაიქცაო. კარგად მოიქცა კაზიმირ პერიე თუ ცუდად, ჩვენ ამის გარჩევას არ გამოვუდგებით. ჩვენა გვგონია, დაუდგრომლობას და ხანმოკლეობას ერთობ საფრანგეთის საქმეთა მმართველობისას სხვა, სულ სხვა მიზეზი უნდა ჰქონდეს, და იმისთანა საბუთები, როგორც კაზი-

მირ პერიე ამბობს, ან იმისთანა, რომლის გამოც მთელი სამინისტრო მისი სამსახურს დაეთხოვა, ისარია, რომლის მშვილდი კი დამალულია საფრანგეთის დღევანდელ შინაურ საქმეთა ავკარგიანობაში.

რომელიც გნებავთ სახელმწიფოს ცხოვრება აიღეთ, ყველგან ერთს აუცილებელს ამბავს შეხვდებით. ხან სახელმწიფოს იმისთანა ხანა დაუდგება, რომ სარწმუნოების საგნები უპირატესს ადგილს იჭერენ ერის და სახელმწიფოს ცხოვრებაში და ეს საგნები შეიქმნება ხოლმე მიზეზად ერის განხეთქილებისა, დასებად დაყოფვისა და დასების ერთმანეთთან ბრძოლისა: მაშინ ჭკუა და გონება ერისა უპირატესად ამ საგნების წრეში ტრიალებს და მოქმედობს. ხან იმისთანა დრო და ჟამი მოდის, რომ სახელმწიფო და საქვეყნო საქმეთა გამგეობისათვის ერი მეტს მონაწილეობას ჰთხოვლობს, პოლიტიკურ უფლებათა განფართოება უსაჭიროებს საგნად კეთდება და მაშინ იგი თავისის ჭკუის, გონების ძალ-ღონეს უპირატესად ამაზე ჰხმარობს. ხან იმისთანა ხანა დადგება ხოლმე, რომ გარემოება ცხოვრებისა ჰლაღაღებს ეკონომიურ ცვლილებათათვის და მაშინ საგნები ეკონომიური მიიზიდვენ ხოლმე მთელს ძალ-ღონეს ერისას და ამ საგნების მოედანზე ბანაკებად დაეწყობიან ხოლმე საქმეთა მოქმედნი კაცნი, იბრძვიან და კამათობენ, ვიდრე უღონიერესი თავისას გაიტანს, ან სხვა უფრო მწვავე საგანი გაჩნდება საბრძოლველად.

დღეს თითქმის მთელს ევროპაში და განსაკუთრებით საფრანგეთში სწორედ ეკონომიურ წესწყობილების ცვლილებათა საჭიროების ხანაა. აი იგი მშვილდი, რომლის ისარის ტყორცნას ვერ უძლებს ხოლმე ვერც ერთი სამინისტრო საფრანგეთში და რომელსაც საქმე ზოგჯერ იქამდე მიჰყავს, რომ სამინისტროს დაცემას პრეზიდენტის დაცემაც თან მოსდევს. დღეს ტყუილად კი არ ჰქაღულობს გამარჯვებას საფრანგეთში ეგრედწოდებული დასი სოციალისტებისა პრეზიდენტის გადადგომის გამო. იტყვიო, ამ დასის წარმომადგენლნი საფრანგეთის პარლამენტში ცოტანი არიანო და როგორ დაგიჯეროთ, რომ ძლევამოსილობა ამათ დარჩენოლდესო.

საქმე იმაშია, რომ დღეს საჭიროება ეკონომიურ ცვლილებისა საკმაოდ გავრცელებულია საფრანგეთში.

ნულარ ვიტყვით, თვით ოპორტუნისტების, მონარქისტების და კლერიკალების შორისაც კი დღეს იპოვებით იმისთანა კაცებს, რომელნიც ამ ცვლილებას ჰქადაგებენ და სხვას ეცილებიან, რომ მშრომელს და გამრჯელს ხალხს უკეთესი დღე მიანიჭონ, მის საჭიროებას და კეთილდღეობას როგორმე მიეშველნენ, და არა შემთხვევას არა ჰკარგვენ, რომ თავისის მოქმედების საგნად არ აღუთქვან ერს რაიმე ეკონომიური ცვლილება მისდა საკეთილდღეოდ. უნუგემოდ ყოფნა და ძალზე გაჭირვებული ცხოვრება მშრომელის და გამრჯელის ხალხისა ამ ცვლილებას ჰღალატებს იმოდენად ხმამაღლა, რომ თვით დაწინაურებულნი წარმომადგენელნი ეგრედწოდებულ ბურჟუაზიისა – მონარქისტებია, თუ რესპუბლიკელნი – ჰკრძნობენ, – რა ჭეჭა-ქუხილის ღრუბელი იკრიბება ამ მხრით საფრანგეთის თავზე საერთოდ და ბურჟუაზიაზე საკუთრივ.

ეს უნუგემოდ დარჩენილი მშრომელი და გამრჯელი ხალხი გულმოდგინე მომხრეა რესპუბლიკისა, მაგრამ ამასთან გულნატკენიცა, რომ ამ რესპუბლიკამ არ გაუმართლა იმედები. ამათის ფიქრით, პირველი და უაღრესი საგანი რესპუბლიკის მმართველობისა უნდა ყოფილიყო კეთილდღეობა ერისა, უნდა მშრომელისათვის საშრომი გაეჩინა და ამით მუშაკაცისათვის სახსარი მიეცა – ჯეროვანი გასამრჯელო მიეღო, რომ ადამიანურად ეცხოვრა; თვითონ რესპუბლიკას უნდა გაეჩინა ფაბრიკები და ქარხნები ან სხვა რაიმე, რომ მოჭარბებულ რიცხვს მუშაკაცისას სამუშაო ჰქონოდა, კარგად მოეწყო იქ მუშაკაცის ბედი, რომ სხვებისათვის მაგალითი ჰყოფილიყო; უნდა სამუშაოდ დღე შემოკლებინა და გაეჩინა, რაზეც ნაკლებ არ უნდა მისცემოდა ფასი მუშაობისა, მოხუცნი, დაშავებულნი, საპყარნი, ქვრივ-ობოლნი შეევეროდოდა, და მუშაკაცის მოზარდის თაობისათვის კარი გაეხსნა სწავლისა, გონების გახსნისა და რაიმე ხელობის ცოდნისა. ეს თითქმის დიდსა და პატარას ენაზე აკერია დღეს საფრანგეთში, მაგრამ ამას ეურჩება დიდი უმრავლესობა ბურჟუაზიისა, რომელის ხელიდამ დღეს აქამომდე მართველობა საფრანგეთისა ვერ გამოსულა,

და რომელსაც მუშაკაცის ყელის საბელისა ხელიდამ გაშვება ზარალის მომასწავებლად მიაჩნია. ბურჟუაზია, როგორც შემძლებელი ნაწილი ერისა, დიდძალოვანია არჩევანებში. რესპუბლიკის დაარსების დღიდან დღევანდლამდე არც ერთი არჩევანი პარლამენტის დებუტატებისა ისე არ გათავებულა, რომ უფროსერთობა ბურჟუაზიას არ დარჩენოდა პარლამენტსა და სენატში.

რადგანაც პარლამენტის უფროს-ერთობის დაგვარად შედგება ხოლმე ჩვეულებისამებრ სამინისტრო, – ადვილად მისახვედრია, რად მოხდება ხოლმე ისე, რომ მმართველობას საფრანგეთისას ყოველთვის ბურჟუაზიის მომხრეობა ეტყობა და ეკონომიური ცვლილება მუშაკაცთა სასარგებლოდ ბრკოლდება.

პარლამენტი უფროსერთად ბურჟუაზიისაგან შემდგარი, ჰმველის ხოლმე თავის მომხრე სამინისტროს, მაგრამ როცა ჰხედავს, რომ საჭიროება ერისა ხმამაღლა ჰღალატებს, და ამ ღალატებს შიში მოსდევს, – მაშინ იძულებულ ჰხდის სამინისტრო გადასდგეს და სხვა კაცებს დაუთმოს მმართველობა ქვეყნისა. რასაკვირველია, ისევ უფრო ბურჟუაზიის მომხრენი არიან ხოლმე ამ შემთხვევაშიც, მაგრამ, რაც უნდა იყოს, ცვლა კაცებისა ცოტა ხნობით მაინც დააამებს ხოლმე ტკივილს ერისას იმ იმედით, რომ იქნება ახალ კაცთა ახალი რამ მოგვიტანონო. ამ ცდასა და ლოდინში ცოტა თუ ბევრი დრო გადის, და ბოლოს, როცა ერი ჰხედავს, რომ ამათგანაც არა გამოდნა რა, ისევ ხელახლად ჰღალატებს. ამ ღალადს მოჰყვება ხოლმე ისევ ის ცვლა მინისტრებისა, ისევ ის იმედების გამტყუვნება, ისევ ის ღალადი, ჩივილი და ტკივილი. აი, ჩვენის ფიქრით, მიზეზი იმისი, რომ საფრანგეთში არც ერთი სამინისტრო დიდხანს ვერა სძლებს, რადგანაც ცვლა მინისტრებისა არ მოასწავებს ხოლმე ცვლას სამმართველო სისტემისა, როგორც, მაგალითებრ, ინგლისში, და თითქმის წარმოადგენს ხოლმე საქმის გადადებას შემდეგისათვის.

კაზიმირ პერიე, მისი პირველი მინისტრი, და უფროსერთი სხვა მისი მინისტრებიც შეწამებულ არიან, რომ ბურჟუაზიის მხარე უჭირავთ და ეკონომიური ცვლილებას ეურჩებიანო. ბურჟუაზიის პარლამენტმა,

მათმა მომხრემ, იგრძნო აწ ლაღადება ერისა და ძველს ჩვეულებას თავისას დაადგა: პრეზიდენტს და სამინისტროს მიზეზი მისცა გადადგომისა, როგორც სჩანს, იმ იმედით, რომ თუმცა ესნა ამათ მაგიერ სხვანი დადგებიანო, მაგრამ ის სხვანიც ჩვენები იქნებიანო, ხალხს ეს მართველობის გამოცვლა დააწყნარებს რამდენსამე ხანსა და მერე რაც იქნება, ის იყოსო.

ეგრე სვლა სახელმწიფო საქმეთა შეუძლებელია, თუ საფრანგეთის სამინისტრო და რესპუბლიკის პრეზიდენტი გულახდილად და მედგრად არ დაადგა ეკონომიურ ცვლილებათა გზას და ამ მხრით გამწვავებული ტკივილი საფრანგეთისა არ განჰკურნა, იგი დიდხანს თავს ვერ დაიჭერს და მისი ბედი და ხანგრძლივობა ყოველთვის ბეწვზე ეკიდება. ესეც კი საფიქრებელია, რომ ვაი თუ ძაფი მოთმინებისა გაუწყდეს თითონ ერსა და ერთი ასეთი ალიაქოთი ასტეხოს, რომ თავბედისა ველარა გაიგონ რა.

[1895 წ.]

ტფილისი, 17 იანვარი,

ჩვენს წინა მეთაურში\* გამოვთქვით, რომ პრეზიდენტის და უფრო ხშირად სამინისტროების დაუდგრომლობას და ხანმოკლეობას საფრანგეთში მიზეზად ისა აქვს, რომ პარლამენტი და სენატი – ეს უმთავრესნი გამგებელნი საქმისანი – იძულებულ არიან წაჯექ-უკუჯექობით იმოქმედონ, ერთი ფეხი რომ წინ გადადგან, მეორე უსათუოდ უკან. ეს წაჯექ-უკუჯექობა ძალაუნებურად თავს იჩენს ხოლმე ყველგან – პრეზიდენტს ირჩევენ თუ სამინისტროს.

პარლამენტი და სენატი დღეს იმისთანა ელემენტებისაგან არის შემდგარი, რომ ვერსად წაუვა ორწყალშუა დგომას, გულით რომ ერთი უნდოდეს – პირი მეორე მხრისაკენ უნდა ეჭიროს. დღევანდელს საბრძოლველს მოედანზე ცალმხრივ ბურჟუაზია დგას, რომელსაც შესწევს დღევანდელი ეკონომიური წესწყობილება, – და მეორეს მხრივ ამ წესწყობილების მომდურავნი და ეკონომიურ ცვლილებათა მომხრენი. პარ-

ლამენტი და სენატი ამათ შუა ჰტოკავს და ვერ გაუბენია ან მთლად ერთისაკენ გაიწიოს, ან მეორისაკენ. პარლამენტის და სენატის სული და გული დღეს უფრო ბურჟუაზიისაკენ არის, მაგრამ ამასთან ისიც იციან, რომ ერის ცხოვრების ლაღადებასაც ანგარიში უნდა გაეწიოს. პირველნი გულით ვერ გაუმეტნიათ და მეორეს შიშით ყურს ვერ უყრუებენ.

ეს გარემოება ატოკებს მთელს ეხლანდელს ყოფას მმართველობისას საფრანგეთში და ამიტომაც იგი საფუძველი, რომელზედაც სხვაგან საზოგადოდ ფეხი უნდა მოიკიდოს ხოლმე მმართველობამ, აქ, საფრანგეთში, მოლიპულია და უბრალო საბაბია საკმაო – ფეხი მოასხლეტინონ პრეზიდენტსაც და სამინისტროსაც. ესევე გარემოება წაჯექ-უკუჯექობისა და ორწყალშუა დგომისა მიზეზია იმისი, რომ პარლამენტმა და სენატმა, როგორც ვთქვით, ერთი ფეხი რომ ერთისაკენ გადადგას, იმავე წამს მეორისაკენ მეორე უნდა გადააბოტოს ხოლმე.

სწორედ ამისთანა მაგალითს დღესა ვხედავთ საფრანგეთში. პარლამენტმა თავისს პრეზიდენტად ამოირჩია ბრისსონი, კაცი რადიკალთა დასისა და მომხრე ეკონომიურ ცვლილებათა. გარდა ამისა, სამინისტროს დუპუისას, რომელიც თავით ფეხამდე ბურჟუაზიას ეკუთვნის, სარმა გამოჰკრა და ძირს დასცა. ამასთანავე საჭიროდ არ დაინახა საკმაოდ გამოსარჩლებოდა თვით რესპუბლიკის პრეზიდენტს კაზიმირ პერიეს, რომელიც იგივე ბურჟუაზიის კაცია და ურჩი ეკონომიურ ცვლილებისა და რომელიც ამის გამო გადადგა სამსახურიდან.

ყოველივე ამით დიდად აამა პარლამენტმა ერთს მხარეს, სასოება გაუძლიერა, იმედები გაუღვიძა და ლაღადება მისი დაადგა. ხოლო იმ ფიქრმა, რომ აგრე გასისწვრიება საქმისა ცუდს დღეს დაჰმართებს ბურჟუაზიას, რომელსაც უფროს-ერთობა პარლამენტისა ეკუთვნის სულით და გულით, იძულებული გაჰხანდა პარლამენტი ამათკენაც მოეხედნა და ერთი ფეხი ამათკენაც გადაედგა: ზოგი რომ იმათ, ზოგიც ჩვენაო. ამ სურვილმა, თუ წყურვილმა, თავი გაიტანა რესპუბლიკის პრეზიდენტის არჩევანში. კონგრესმა, რომელიც

\* იხ. „ივერია“, № 9

შესდგება ხოლმე პარლამენტისა და სენატის შეერთებულ კრებულისაგან, ამოირჩია ფელიქს ფორი.

თუ სახეში მივიღეთ, რომ ფელიქს ფორი ეხლანდელი წესწყოილებით გამდიდრებული კაცია, ნამინისტრალია აწ გადადგომოლის სამინისტროსი და თავისის საპოლიტიკო აზრებით ეკუთვნის ეგრედ წოდებულ ზომიერ რესპუბლიკელთა დასსა, ადვილად მივხვდებით, რომ ეკონომიურ ცვლილებათათვის ერთის ფეხით წინ წადგომას ზედ მოჰყვა მეორე ფეხით უკუდგმა. ამ სახით ხელახლად გამოცხადდა, რომ ეხლანდელ საფრანგეთის საქმეთა გამგებელთ ერთსა და იმავე დროს ჰოც უნდა და არაც, როგორც აქამომდე.

იმ გარემოებაში, რომ რესპუბლიკის პრეზიდენტად ამორჩეულ იქმნა ფელიქს ფორი, ცხადად გამოიხატა, რომ საფრანგეთის საქმეთა გამგებელთ – პარლამენტს და სენატს – სულ არ ჰსურვებიათ, რომ ორწყალშუა დგომისაგან დაეხსნათ საფრანგეთის მმართველობა და ერთს რასამე გარკვეულს გზას დასდგომოდნენ, ან სულ ბურჟუაზიისაკენ გადასულიყვნენ, ან ეკონომიურ ცვლილებათა მომხრეებისკენ. სამს შესაძლებელ საპრეზიდენტო კანდიდატთა შორის ერთი იყო ვალდეკ რუსსო, მეორე ფელიქს ფორი და მესამე ბრისსონი. ვალდეკ რუსსო გულისთადი მომხრეა კაზიმირ პერიესი, მაშასადამე, მის ბურჟუაზიულ პოლიტიკისა, და ცნობილია კონსერვატორად რეაქციონურ ფერისა. ბრისსონი რადიკალია და გულისთადი მომხრე ყოველგვარ ცვლილებისა, და ფელიქს ფორი, როგორც ზომიერი კაცი, ამათ შუა არის, არც ფლაგია, არც ჩლაგია, არც ჰოა და არც არა. რადგანაც ბურთი და მოედანი ამ შემთხვევაში ფელიქს ფორს დარჩა, კაცს, რომელიც არც საკმაოდ წინსვლას უქადის საფრანგეთს, როგორც, მაგალითებრ, ბრისსონი, არც ძალიან უკან დახევას, როგორც ვალდეკ რუსსო, ცხადია, აქაც იგივე წაჯექ-უკუჯექობა გამოიჩინა პარლამენტმა და სენატმა, რასაც აქამდე იჩენდა. ფელიქს ფორი სწორედ იმისთანა კაცია, როგორის გუნებისაც დღეს პარლამენტი და სენატია საფრანგეთში. ამაზე ნათქვამი: ყოველი მზგავსი მზგავსსა ჰშობსო.

რადგანაც ხსენებულ მიზეზთა გამო საფრანგეთის შინაურ საქმეთა გარემოება ნებას არ იძლევა ერთი გარკვეული პოლიტიკა იქონიოს საფრანგეთის მმართველობამ, ერთს რომელსამე გზას დაადგეს, ერთი განსაზღვრული მოედანი ამოირჩიოს სამოქმედოდ, ამიტომაც დიდად ძნელია ახალის სამინისტროს შედგენა ახალის პრეზიდენტისათვის. კაზიმირ პერიე სულ იმასა სცდილობდა, რომ რადიკალებისაკენ ერთი ფეხიც არ გადაედგა და უნდოდა ეს დასი მჩვარში როგორმე გაეხვია. ამაზე მოისხლიტა მან ფეხი, ამაზე წაიბორძიკა თვით მისმა სამინისტრომ. ახალმა პრეზიდენტმა ფელიქს ფორმა მითომ-და გაუწოდა ხელი რადიკალებს და მისი წვერი ლეონ ბურჟუა მიიწვია და სთხოვა – სამინისტრო შეადგინე შენის მეთაურობითაო. ლეონ ბურჟუამ ამის პასუხისათვის ვადა სთხოვა.

დღეს დეპუტებით ვიცით, რომ ლეონ ბურჟუამ გამოუცხადა ახალს პრეზიდენტს, არ შემძლიან და უარს ვამბობო. ესეც იმის ნიშანია, რომ ეხლანდელი ელემენტები პარლამენტისა არ წარმოადგენს შემძლებლობას, რომ რამოდენადმე ერთგვარი სამინისტრო შეედგინა ლეონ ბურჟუას, ერთის გამორკვეულის პროგრამისა. აშკარაა, წინდახედული კაცი არ ჩაიბამდა თავს იმისთანა სამინისტროში, რომელსაც სხვა არა დარჩენია რა, რომ ორწყალშუა დგომასა და წაჯექ-უკუჯექობაში სახელი და თავი გაიფუჭოს.

ჩვენის ფიქრით, ახალი პრეზიდენტი რესპუბლიკისა იძულებულ უნდა იქმნას ან პარლამენტი დაითხოვოს, ახალი არჩევანები მის დეპუტატებისა დანიშნოს და ამ გზით დაეკითხოს საფრანგეთის ერს, ან იმისთანა საშუალები კაცნი მიიწვიოს სამინისტროში, რომელთაგანაც არც ჰოს იმედი იქმნება, არც არასი, და რომელთა დღევრძელობაც დღეებით იქმნება დასათვლელი, თუ ამ უკანასკნელს გზას დაადგა ახალი პრეზიდენტი ან ნებით, ან უნებურად, საეჭვოა, რომ საფრანგეთის ერმა დიდხანს ითმინოს ამისთანა ამბები.

[1895 წ.]



**<სიტყვა ქართული საადგილგამო  
ბანკის წლიურ კრებაზე>**


მე, ბატონებო, გუშინ და გუშინწინ ვერ დავესწარი კრებას ბანკისავე საჭირო საქმის გამო. გაზეთებიდან და კრების ოქმიდან შევიტყე, რომ გუშინწინ ჩემი ქება-დიდება მოგისმენიათ ერთის ორატორისაგან. რაც ამ ორატორს უნებებია ჩემი უკადრისად ხსენება, მე იმას ყურადღებას არ ვაქცევ. ხოლო თქმულა ერთი რამ ისეთი, რომელმაც შეადრწუნა ჩემი მამულიშვილური გრძნობა და ეს არ შემძლიან აღუნიშნავად დავტოვო. აქ ერთს ორატორს მეორეზედ უთქვამს: ეგ მოსული არისო და ჩვენთან არავითარი კავშირი არა აქვსო. მე არ ვახსენებ, ვის უთქვამს ეს. მე მთქმელთან საქმე არა მაქვს რა. მე ვებრძვი აზრს და ამ აზრის გამოსარკვევად მარტო საჭიროა ვიცოდეთ ის კი არა, ვინა სთქვა, არამედ ის, ვის უთხრეს. ეს უთხრეს იმიერ ქართველს. როგორ? იმიერ ქართველი აქ, ჩვენს კრებაში, ამ ჩვენს საქართველოში – მოსულია, უცხოა და არა სახლიკაცი, არა სისხლ-ხორცი იმ დიდ ოჯახისა, რომელსაც საქართველო ჰქვია! არა, ბატონებო!.. ყოველს ქართველს საქართველოს ნაწილისას, – გურული იქნება, მეგრელი, იმერელი, კახელი, თუ ქართლელი, – ჩვენის ერთიანი ოჯახის კარი ღია აქვს, რომ ჩვენს საერთო ჭირსა და ღზინში ძმური მონაწილეობა მიიღოს. ეს არამც თუ უფლებაა თვითეულის ჩვენგანისა, უუწმინდეესი მოვალეობაა. ძმობა და ერთობა ამაშია. ეგ ძმობა და ერთობა არის იგი კლდე, რომელზედაც უნდა აშენდეს დიდი სასახლე ჩვენის ცხოვრებისა.

ეს თითქმის ექვსი საუკუნეა მას აქედ, რაც საქართველო დაირღვა, დანაწილდა. ეს ექვსი საუკუნეა მას აქედ, რაც ჩვენნი მამა-პაპანი, ჩვენნი უკეთესნი და უდიდესი მამულისშვილნი, ჩვენნი გენიოსები, ჩვენნი ვაჟკაცნი და მეომარნი, ჩვენნი მსწავლულნი და მეცნიერნი, სისხლის ღვრით იღვწოდნენ, რომ მკვდრეთით აღედგინათ ჟამთა ვითარებისაგან დარღვეული და დამზობილი ძმობა და ერთობა. ამას შესწირეს თავისი სახელოვანი სიცოცხლე, თავისი სისხლით და ღვაწლით შემოსეს და აკურთხეს.

მთელმა თაობამ მეცხრამეტე საუკუნისამ ამას შეაღია თავისი პატიოსანი ძალღონე, თავისი სისხლი და ხორცი, თავისი ნიჭი საქმისა და მეტყველებისა. აწ განსვენებულმა ჩვენმა მწერალმა ვახტანგ ორბელიანმა მთელის თავისის მხურვალე გულისძგერით აღთქმად დასდვა, ანდერძად დაგვიტოვა, რომ ძმობა და ერთობა კლდეა და ამაზედ ააშენეთ თქვენი ბედნიერებაო. ამაშია ჩვენი იმედი, ჩვენი სასოება.

დღეს სხვას გვეუბნებიან. დღეს უნდათ, ერთმა ნაწილმა საქართველოსამ მეორეს უთხრას: შენ ჩვენ შორის მოსული ხარო! სამართლიანი გულისწყრომა მამულისშვილობისა ამ აზრს ვერ მიიკარებს. მე ამით ვაცხადებ ჩემ მაგიერ და ჩემთა თანამოაზრეთა სახელით, რომ მამულისშვილურ გრძნობის წყველა-კრულვით ჩვენ ზურგი შეგვიქცევია ამ უკეთურ აზრისათვის. თქვენც მოგიწვევთ, ასე მოიქეცით. დეე ამ უკეთურმა აზრმა იქვე გაითხაროს თავისი საკადრისი სამარე და დაიმარხოს, სადაც დაიბადა და აკვანი დაიდვა.

[1895 წ.]



## ნარკვევი ჟურნალ-გაზეთებიდან

(სახალხო სკოლების უფლებათა შესახებ)

ფრიად საყურადღებო წერილი დაბეჭდა წარსულისთვის მეორე ნახევარში (№ 6961) სუვორინის გაზეთმა „ნოვოე ვრემია“-მ ამ სათაურით: „Русская народная школа в Финляндий“. ჰკითხულობ ამ წერილსა და ჰკითხავ შენს თავსა: „ნუთუ ფინლიანდია და საქართველო შეადგენენ ნაწილს ერთისა და იმავე სახელმწიფოისას? უფლებანი ფინლიანდიის სახალხო სკოლებისა იმდენადვე განირჩევიან ჩვენის სკოლების უფლებიდგან, როგორც დღე და ღამე. ყველა დირექტორები და ინსპექტორები სკოლებისა გამოუკლებლად არიან მხოლოდ ფინლიანდიელები, მთელი სწავლა მიდის მხოლოდ ფინლიანდიის ენაზედ და, ასე გასინჯეთ, რუსულს ენას როგორც საგანსაც კი არა აქვს ადგილი ამ სკოლების პროგრამაში“. „Просим помнить, - ამბობს გაზეთი, - что по господствующему в народно-училищном деле принципу, русский язык вовсе нельзя преподавать в низших школах Финляндий“. ფინების აზრით დაბალ სახალხო სკოლას შეუძლიან მხოლოდ დედაენა ასწავლოს რიგიანად, მისცეს ბავშვს პირველდაწყებითი ცნობანი თავისს ენაზედ და გაავრცელოს ფინურის წიგნის ცოდნა ხალხში. რომელიმე უცხო ენის სწავლება ამისთანა სკოლებისათვის აუტანელი ტვირთიაო, ფიქრობენ ფინები და თავის აზრს ადგანან და ახორციელებენ. რუსული ენა ფინლიანდიაში სავალდებულო საგანს შეადგენს მხოლოდ საშუალო და მაღალ სასწავლებლებში. ამ მოწყობილების მეოხებით ფინლიან-

დია ისე დაწინაურდა ხალხის განათლებით, ისე გაამდიდრა თავისი სახალხო ლიტერატურა და ისე უხვად მოჰფინა პირველდაწყებითი ცოდნა დაბად და სოფლად, რომ დაეწია ევროპის დაწინაურებულს სახელმწიფოებსა.

როგორ გგონიათ, კატკოვის თავყანისმცემელი სუვორინი რას ჰფიქრობს ამ მოწყობილების შესახებ? იქნება სჭექს და ქუხს მის წინააღმდეგ და სწადიან მისი ჩაშლა, ჩაფუშვა და სხვანაირად მოწყობა? სრულიადაც არა. იგი კრინტსაც არა სძრავს ამ მხრით.მას სრულიად სხვა დარდი აწუხებს: საქმე ის განხლავთ, რომ ფინლიანდიაში რუსებიცა ცცხოვრობენ და მათთვის ისე ცოტაა რუსული სკოლა დაარსებული, რომ ბევრი რუსი იძულებულია ან უსწავლელად დაანარჩუნოს თავისი შვილები და ან მისცეს ფინურ სკოლაში და იგინი გააფინნოს. ამ რუსულ სკოლებს აქამდის განაგებდა რუსეთის განათლების სამინისტრო, ახლა კი თურმე ფინლიანდიის თვითმართველობას სურს ეს სკოლები ხელთ იგდოს. აი ამ პროექტის წინააღმდეგ დალაღებს სუვორინი და ევედრება სამინისტროს, ხელიდგან ნუ გაუშვებ რუსული სკოლების მართვის უფლებასა, თორემ ფინლიანდიელები არამც თუ არ ამრავლებენ მათ მცირე რიცხვსა, არამედ არსებულებსაც დაჰკეტენო.

მაგრამ ამასთან ეშინიან გააჯავროს ფინლიანდიელები და ამიტომ უმატებს: ეს რუსული სკოლები სამინისტრომ შეინახოს თავისს ხარჯით და არა ფინლიანდიის ხარჯითაო. გაზეთი უფრო მეტს, მისგან მოულოდნელს თავაზიანობას იჩენს ფინლიანდიის შესახებ, როდესაც ამბობს, რომ ჩვენ აზრადაც არა გვაქვს ფინების გარუსებაო. „Здесь нет речи о русификации края, здесь имеются в виду только интересы тех русских, которых судьба забросила в Финляндию, русских, родных по плоти и духу,“- ამბობს გაზეთი.

გაიხსენეთ, თუ ამას წინედ რა თავაზიანი და სამართლიანი მსჯელობა წარმოსთქვა მეორე რუსულმა გაზეთმა, „Московские Ведомости“-მ პოლონიის სახალხო სკოლების შესახებ და დარწმუნდებით, რომ ახლა მაღალს სფერაში უბერავს იმისთანა ქარი, რომ



გარუსებაზე გადარეულს გაზეთებსაც კი სხვა ლექსს ათქმევინებს, სხვა მიმართულებისათვის აკმევინებს.

ჩვენში? ჩვენში ქმუტუნებს დაუცხრომლად იგივე უკუღმართი ქარი ხალხის განათლების შესახებ და არამცთუ არა სუსტდება, პირიქით თანდათან ძლიერდება. ორივე საქართველოს ღირექციაში გაქრა ქართველების სინსილა და მათი ადგილი დაიჭირეს სხვა ტომის პირებმა, რომელთაც არ იციან არც ხალხის ენა, არც მისი ყოფა-ცხოვრება და მოკლებულნი არიან ძმურსა და მშობლიურს თანაგრძნობასა მისდამი. ქართული ენა პირველი ადგილიდან სულ ბოლოს მოექცა და თითქმის დაჰკარგა უფლება სავალდებულო საგნისა. სწავლა მიდის არა დედაენაზედ, არამედ გაუგებარზედ. გამეფდა იქითს საქართველოში მუნჯი მეთოდი, წყარო სიცილისა და ტირილისა, და ძოარულისავეთ ლამის აქეთს საქართველოსაც შეეყაროს. სახალხო სკოლა გარდაიქცა გონების დარეტიანებისა და დაჩლუნგების კერად. ჩვენ არამც თუ გაუზომელს მანძილზედ ძირს ჩამოვედით შედარებით ფინლიანდიასთან, კავკასიის სხვა ხალხებიც კი მეტის უფლებით სარგებლობენ. მაგალითად: „ღირექციები თათრულს სკოლებს უგზავნიან პირველს და მეორე საკითხავს წიგნსა, სომხურს სკოლებს – მესამესაც, ჩვენში სკოლებისათვის კი პირველი წიგნიც შურთ და თხოულობენ, რომ იგი დაპატარავდეს და დაემზგავსოს ოსურს ანუ მეგრულს ანბანსა“.

რა დავაშავეთ, ვის რა ვირი მოვპარეთ, პოეტისა არ იყოს?


აქ უნდა აღვნიშნოთ, რომ საქართველო ნებაყოფლობით შეუერთდა რუსეთსა.

მაშ რად გადავიქციეთ დაბალ, უმდაბლეს ღობედ?

უფრო ჩვენივე უმზგავსობის გამო. იმის მაგიერ, რომ ყოველი ჩვენი უფლება, მონიჭებული კანონისა და ხელმწიფის მიერ, მხნედ, დაუცხრომელად და მტკიცედ დაგვეცვა, დავემზგავსენით მონებსა, რომელნიც ერთმანეთს ედიდგულებიან, სძულთ ერთმანეთი, სჭამენ ერთმანეთსა და სხვებს კი ებრიყვებიან და მხოლოდ ოთხს კედელს შუა ჩურჩულს ბედავენ იმისას, რაც უნდა წარმოითქვას ხმამაღლა, საქვეყნოდ, რადგანაც ეს

წარმოსათქმელი სრულიად კანონიერია, სასარგებლო ჩვენთვის და სახელმწიფოსათვის.

[1895 წ. 5 აგვისტომდე]



## ნარკვევი (შურნალ-გაზეთიდან)

(„ნოვოე ვრემიას“ კორესპონდენტი ცილს სწამებს ქართველებს)

სოხუმიდან გაზეთ „ნოვოე ვრემიას“ სწერენ:

„ქართველები განგებ ავრცელებენ ხმებს, ვითომც სოხუმის ოლქში ციებ-ცხელება იცის მუდამ, რათა ამით დააშინონ რუსები, რომელთაც სურთ აქ მამულების შექმნა. ბოლოს დროს მეტად მტრულად უყურებენ რუსებს ადგილობრივი მკვიდრნი. სოხუმის მხარე ახლა იღვიძებს, მალე რკინისგზა გაივლის ამ ადგილებზე და აქამდის მიძინებულმა მცხოვრებლებმაც გაიღვიძეს: მათ ძალიან ეშინიათ — რუსებმა არ დაიპყრან ადგილები ამ მშვენიერ ქვეყანაში. ამგვარის შემთხვევის თავიდან ასაცილებლად სოხუმში არსდება საზოგადოება ქართველების, აბხაზების და ბერძენთა, რომელთაც განუზრახავთ, თვალ-ყური ადევნონ მამულებს და თუ სადმე ან სოხუმში, ან სოხუმის მიდამოში გამოჩნდება გასასყიდი მამული, მაშინვე შეიძინონ ისინი. ამრიგად, უმთავრესი საგანი ახალის საზოგადოებისა არის: ხელიდან არ გაუშვან აქაური მიწა-წყალი. მაგრამ საბუთი გვაქვს ვიფიქროთ, რომ განზრახულს საზოგადოებას, გარდა აღნიშნულ საგნისა, აზრად აქვს ეცადოს, რომ უმიწაყლო მკვიდრთა და რუსებს შორის სიძულვილი არ მოისპოს.“

სწორედ არ მოველოდით „ნოვოე ვრემიაში“ ამგვარ წერილს! ამისთანა შემთხვევის გამო „ნოვოე ვრემიამ“ ისე მოხერხებულის წერილების შეთხზვა იცის, ძნელია კაცმა გაარჩიოს, სად თავდება სიმართლე და სად იწყება სიცრუე, ცილისწამება, ჭორი და ინსინუაცია. ახლა კი საკვირველის მოუხერხებლობით მოუჭორავს სუვორინის გაზეთს... კორესპონდენტი წერილს იმით

\* კურსივი ჩვენია. რასაკვირველია, მეტია იმის განმარტება, თუ რა მავნებელია ეს საზოგადოება რუსების დასახლებისათვის ამ მდიდარს ქვეყანაში, სადაც ლიმონისა და ზეთის ხილის ხე ქუჩებში ყვავის, სადაც ოლეანდრებია და წნორით არის მოფენილი მდინარეთა და წყაროთა ნაპირები

იწყებს, რომ ქართველებმა განგებ დაჰყარეს ხმები სოხუმის ციებ-ცხელების შესახებ, რათა რუსები დააფრთხონო. მოდი და ნუ გაგვიცინება, ასეთს ბრალდებას რომ წაიკითხავ! ქართველები სრულიად წინააღმდეგის სენით არიან შეპყრობილნი: ქართველს კაცს ისე გადამეტებით უყვარს თავისი სამშობლო, რომ სამშობლოს შესახებ ცუდის გაგონებას პირად შეურაცხყოფადა სთვლის და მძაგებელს არ შეარჩენს ცუდს სიტყვას. „ნოვოე ვრემიას“ კორესპონდენტი კი გვარწმუნებს ქართველები თვითონ ავრცელებენ სამშობლოს შესახებ ცუდს ხმებსაო... თუ სოხუმის მიდამოების ციების ამბავი სიცრუეა, ეს ისევ სუვორინის თანამემამულეთა მოჭორილი განლაგვთ, რადგანაც მათ, — არვინ იცის, რა მიზეზებისა გამო, — ხშირად უყვართ ხოლმე ძაგება ჩვენის ქვეყნის ბუნებისა და უაზრო გინება მისის მცხოვრებლებისა. მაგრამ ვიკითხოთ ერთი: როდის შეიქმნა სოხუმის მიდამოების ციების ამბავი სიცრუევით? განა რუსებისავე ექიმებს, სწავლულებს და მწერლებს ბევრჯერ არ შეუმოწმებიათ, რომ იმ ადგილების ჰავა მავნებელია უცხოთათვისაო?! განა მართლა არ ამოუწყვეტია აქაურს ციებ-ცხელებას უცხო ახალშენები?! დიად, სოხუმის მხარის ჰავის ცუდი გავლენა უცხოელებზედ დღემდის სიმართლე იყო, მაგრამ დღეს, რაკი ქართველებს განუზრახავთ აქ ადგილ-მამულის შექმნა, ციებ-ცხელების ამბავი სიცრუედ უნდა იქნას აღიარებული!.. შემდეგ, წერილში ვკითხულობთ, რომ იქაურ მცხოვრებ ქართველთ, ბერძენთ, აბხაზებს და სხვათ განუზრახავთ საზოგადოების შედგენაო ადგილ-მამულების შესაძენად. კარგი და კეთილი, თუ ეს მართალია! სწორედ მოსაწონი და სასარგებლო საქმე განუზრახავთ სოხუმელთ და ღმერთმა ხელი მოუმართოთ. ამ განზრახვის წინააღმდეგ არა ითქმის რა. თვით „ნოვოე ვრემია“-ც ვერას იტყვის წინააღმდეგს პირდაპირ, მაგრამ სამაგიეროდ მას ისეთი ცილისწამება ჩაურთავს, რომ გაზეთს ნება ეძლევა ახალის „საზოგადოების“ წინააღმდეგ გამოილაშქროს. კორესპონდენტი სწერს, ვითომც მას საბუთი აქვს სიტყვას, რომ ახალს საზოგადოებას სურს სიძულვილი დასთესოს მკვიდრთა და რუსთა შორის!

განა დამტკიცება სჭირია, რომ ეს სრულიად მტკნარი სიცრუეა და ნამდვილი ცილის წამება? ეს რომ მართალი იყოს, განა კორესპონდენტი აგრე ყრულ მოიხსენებდა რაღაც საიდუმლო „საბუთს“? განა „ნოვოე ვრემია“ ბუკსა და ნალარას არ დასცემდა, მართლა რომ გაჩენილიყო რუსეთში ამგვარი მავნე საზოგადოება? განა ასე მელანხოლიურად დაიწყებდა წუწუნს ცნობილი „ნოვოე ვრემია“, რომ მართლა საპატიო საბუთი ჰქონდეს ხელში ამგვარ მავნე საზოგადოების წინააღმდეგ?!.. რასაკვირველია, არავითარი საბუთი არა აქვს და არც შეიძლება ექნეს, რადგანაც არავის ფიქრადაც არ მოუვა ამგვარ უაზრო საგნების დასახვა... ეს ცილისწამება გაზეთს დასჭირდა მხოლოდ იმიტომ, რომ სასარგებლო საზოგადოება, რომელსაც ადგილ-მამულების შექმნა განუზრახავს, მავნედ ჩაეთვალა... საზოგადოებას განუზრახავს ბოგანო ხალხის დასახლება და ადგილ-მამულის შერჩენა – ეს სახელმწიფოსა და საზოგადოებისათვის სასარგებლო საქმეა, მაგრამ, რადგანაც ეს საზოგადოება მკვიდრთაგან შესდგება, მამასადამე, მავნებელიაო და აი „ნოვოე ვრემია“-ს ლოლიკა!.. „ნოვოე ვრემია“ წინად უფრო ხერხიანად ავრცელებდა ხოლმე ცილისწამებასა და სიცრუეს, დღეს რა მოუვიდა ნეტავი?

[1895 წ. 23 აგვისტომდე]



### **<კრწანისის გმირთა მოსახსენებლად>**

ტფილისი, 11 სექტემბერი

ხვალ, 11 სექტემბერს, კრწანისის მინდორზე პანაშვიდია დანიშნული საოხად და სახსენებლად იმ საოცარ გმირებისა, რომელთაც ამ ასის წლის წინად სწორედ ამ დღეს თავი შესწირეს თავისს საყვარელს ქვეყანას, თავისს რჯულ-სარწმუნოებას, თავისს ვინაობის ხსნას, თავისს ისტორიის ანდერძს, თავისს ერის სახელსა და დიდებას და ერთობ თავისის ქვეყნის მერმისსა. ვინც კი მოასწრო ქურდულად მოსეულის მტრის გულდაგულ დასახვედრად და თავისის წმინდა სისხლით მორწყო კრწანისის მინდორი, ყველამ იცოდა, რომ იგი საშინელი დღე დღეა დიდის განსაცდელისა: დღეა, როცა ბედი ქართლისა უნდა გადასწყდეს: როცა ჰო თუ არა საქართველოს არსებობისა თვალწინ დაუდგა თავგადადებულ ვაჟკაც მამულიშვილებს, როგორც ხმალმოდერებული სულთამხუთავი და ყველა ელოდდა ვაჟკაცურის გულისცემით უკანასკნელს სიტყვას ჩვენის ბედის განაჩენისას, ხმლის ტარზე ხელმოკიდებული და სასიკვდილოდ გაფიცული.

ყველა იქ მყოფი ჰგრძნობდა, რომ იმდღეინდელი გამარჯვება თუ დამარცხება უქმად არ ჩაუვლიდა სამშობლო ქვეყანას. ყველა ჰხედავდა, რომ იმ დღის გამარჯვება მართო მოგებას ომისას არ მოასწავებდა ვაჟკაცთა თავმოსაწონებლად, არამედ ხსნას ქვეყნისას წაწყმედისა და დამხობისაგან და ამ მამულიშვილურ გრძნობით გამსჭვალულთ

„მრავალ ყმაწვილთ კაცთ, ნუგეშთა ქართლის,

დასდეს აქ თავი მამულისათვის“.<sup>1/</sup>

ამიტომაც ასე ალაპარაკებს ჩვენი პოეტი ნ. ბარათაშვილი იმ დიდებულ მეფეს, რომელთანაც „ერთად მარხია სამარეს დიდება ივერიისა“ და რომელსაც მეორე პოეტის სიტყვით,

„მთელი სიტურფე ქართლისა  
ესვენა ძლიერ მხრებზედა,  
როგორაც შუქი მთვარისა  
იალბუზისა ქედზედა“.<sup>2/</sup>

და რომელიც ასე თურმე ეუბნებოდა ჯარს, კრწანისის მინდორზე საომრად გამზადებულს:

„საქართველოს დღეს გარდაუწყდება  
თავისი ბედი და უბედობა!..  
დღეს ეჭირვება მამულს მხნეობა!..  
დღეს მეცა თქვენში ვარ მეომარი,  
ვითა თქვენგანი ერთი მხედარი,  
დღეს გამოჩნდება, ვინ არს ერთგული,  
ვის უფრო უყვარს, ძმანო, მამული!...“

რასაკვირველია, ამ ამბის შემდეგ, რომ სამასი არაგველი იქავ მეფე ერეკლეს წინ გაიფიცნენ და მერე ომიდამ ერთი ცოცხალი არ გამოვიდა:

„თუ გაგვიწყრება ღმერთი და  
ვერა განვდევნეთ მტრის ძალი,  
იყოს შერცხვენილ, ვინც ჩვენგან  
შინლა წავიდეს ცოცხალი!“  
და გარდიწერეს პირჯვარი,  
ვაჟკაცებრ ხმალი იშიშვლეს  
და შავარდენებრ მივარდნენ  
სპარსთა ურიცხვთა სიმრავლეს!..  
შესძრეს... გაფანტეს... მარამა

1/ ნ. ბარათაშვილი  
2/ ვაჟა-ფშაველა

ზედ თავიც თვისი დააკლეს!..  
ფიცი ვაჟკაცთა წმინდა არს!  
მათცა სიკვდილით შეჰპოწმეს!..<sup>1/</sup>

რასაკვირველია, ვამბობთ, ყოველ ამის შემდეგ, რომ ერთი მუჭა ჯარი საქართველოსი არ შეუშინდა ერთი ათად მეტს მტერსა და მინამ ფეხზე ღვომა შესძლებიათ, მტრისათვის ზურგი არ უჩვენებიათ, ხმალი ქარქაშში არ ჩაუვიათ, ერთიერთმანეთი უმხნევებიათ ამ სიტყვებით:

„ქუდი ნუ ჰხურავს თავზედა,  
ვინც არ იჩინოს გმირობა!..  
ვინაც ცოცხალი მტერს დარჩეს  
ყმადა და სასაცილოდა,  
ღვთისაგან წყეული იყოს  
გვართ საშვილიშვილოდა,  
თუ ვერ შევიძლოთ საცადი,  
გაგვწირონ სასიკვდილოდა,  
მოვკვდეთ,-გვეხუროს მიწისა  
ნაბადი მოსათბილოდა.“<sup>2/</sup>

გაიწირნენ კიდევ სასიკვდილოდ, შავი მიწა ერგოთ ქვეშ ლოგინად და ზემოდამ მოსათბილობელ ნაბდად. დაიხოცნენ, მაგრამ დიდი მაგალითი გვაჩვენებს იმისი, თუ რა შეუძლიან მამულის შვილს, როცა გულში აბჯრად აქვს ხსნა ქვეყნისა და ხელში ხმალი სახსრად. შვიდი ათასმა კაცმა სამოცდაათი ათასი მტერი შეაყენა, შეაბრკოლა და ყოფილა წუთი, როცა ადგილიდამ დასძრა კიდევცაო, და პირი აბრუნებინაო.

ჩვენ აქ ამ ჩვენის ბედისწერის ისტორიას არა ვწერთ. ჩვენი სურვილია ხვალ ყველა დამსწრემ პანამვიდზე ცხოვლად აღიბეჭდოს იგი საოცარი სურათი ვაჟკაცურ მამულიშვილობისა, რომ შვიდი ათასი თავგანწირული ქართველი უშიშრად და უდრტვინველად გულდაგულ დასჯახებია სამოცდაათი ათასს ზედ-

1/ გრ. ორბელიანი.  
2/ ვაჟა-ფშაველა

მოსეულს მტერს და თვითვეული ლომად ქცეულა იმ წმინდა და დიდებულ აზრით აღფრთოვანებული, რომ თავდადებას და თავგანწირვას ითხოვს დიდი საქმე ქვეყნის ხსნისა. აი ის ცხოველი სურათიც იმ საშინელ ომისა, რომელიც დღეს აქამომდე შვენიის, ერის სულსა და გულშია დამარხული და იქილამ ამოღებულია პოეტის მაღლცნებულ ზედმიწევნის ნიჭითა:

„ქალაქით კრწანისს გავედით.  
ველოდებოდით მტერსაო,  
შორს მოდიოდნენ წყეულნი,  
ცაში აღენდნენ მტვერსაო,  
დაჰკრეს ნალარას, საყვირსა,  
აქოთდა გიჟი ბუკები –  
ჩვენი – აქ, იქით – თათრისა,  
ღვინოსებ სისხლის მღულები.  
ცა მოიღრუბლა, მიწამა  
ასტეხა გლოვა-ზარია,  
სისხლისამ მორწყო წვიმამა  
ქართველთა მთა და ბარია.  
როგორც ღრუბელი მოვიდა  
მრისხანედ თათრის ჯარია,  
ისეთი ვსჩანდით იმასთან,  
ვით ზღვასთან წვიმის ცვარია...  
მაგრამ ვინ იტყვის იმასა,  
მტერი გვაჭარბებს რიცხვითა?  
ბევრჯელ უტეხავ ქართველსა,  
კლდეები გულის ფიცრითა!  
„შემოკალთულნი ჩონებში  
მტერს უცდის ქართველებიო,  
და გველისპირულს ფრანგულებს  
აღნება ქარქაშებიო.  
“რა ვნახეთ, მტერი, მივცვივდით  
ხმალმოწვდით გამალ-ულები  
და დავინთქენით სპარსებში,  
გარს მტრისგან შემორტყმულები.  
ხმალთ სტვენას, ცხენთა ჭიხვინსა  
ბანს აძლევის სისხლის ჩხრიალი,  
და თავმოძვონე დროშებსა

ჰაერში გააქვთ ფრიალი.  
აბრეშუმზედა ნაკერი  
ბრწყინვალებს ჩვენზე ჯვარია,  
იმისი შემაცქერალი  
იბრძვის ქართველთა ჯარია.  
იბრძვიან გამწარებულნი  
თითო ოც-ოცის მკვლელია...  
მაგრამ დავმარცხდით სიმრავლით,  
გაცუდდა ვაჟკაცთ ხელია;  
გაწყდნენ სამშობლოს ერთგულნი  
მტრისა სისხლითა მთვრალნია,  
დაიგეს მიწის ლოგინი,  
დაჰხუჭეს მუდმივ თვალია...  
“იმათ ადგება ნათელი,  
დასტირის ღამ-ღამ მთვარეო,  
მათ სიმამაცის მნახველი  
დღესაც ჰკვნესს არემარეო“.<sup>1/</sup>

არემარე ჰკვნესს და ხვალ დაიკვნესებს მთელის საქართველოს გულიცა, როცა პანაშვიდზე ლოცვით და კურთხევით შეავდრებენ ღმერთს იმ საკვირველ ვაჟკაცთა სულსა, რომელთაც ქვეყნის ხსნისათვის კრწანისის მინდორზე „დაიგეს მიწის ლოგინი და სამუდამოდ დაჰხუჭეს თვალი“.


„აწ საფლავიცა არსად სჩანს მათთვის!..  
ჰაერში განჰქრა მათი სახელი,  
და არსად ჟამთა მოწამე ძეგლი  
არ გვიქადაგებს მათთა საქმეთა!..  
დუმილნი ჰფარვენ ერთგულთა ძეთა!..<sup>2/</sup>

ნუთუ მართლა ხვალინდელმა დღემაც ისე უნდა ჩაიაროს, რომ ჩვენთვის თავგანწირულ და თავდადებულ მამულიშვილებს არ ეღირსოთ ჩვენგან ღირსსაწსოვარი ძეგლი იმ ადგილს, საცა იგინი დაიხოცნენ ქვეყნისათვის... სირცხვილი იქნება ჩვენთვის, რომ ხვალინდელი

<sup>1/</sup> ვაჟა-ფშაველა  
<sup>2/</sup> ნ. ბარათაშვილი

დღე ასე კვალდაუჩნევლად გავატაროთ და ძეგლის დადგმისათვის არა ვიფიქროთ რა. ნუთუ ღირსნი არ არიან! ნუთუ ჩვენ, იმათი სისხლ-ხორცი, იმოდენად უმაღლური ვართ, იმოდენად გულმოკლულნი, რომ თითო-ორი გროს ვერ გავიმეტებთ მათთვის, ვინც ჩვენთვის, ჩვენის ქვეყნისათვის გაიმეტა თავისი თავი, თავისი სიცოცხლე და კრწანისის მინდორზედ დააფრქვია თავისი სისხლი, მტლად დაედო თავისს საყვარელს ქვეყანას და თავის მშობელს ერსა?..

[1895 წ.]



### <კახეთის სოფლის მეურნეთა კავშირი>

ტფილისი, 4 ნოემბერი

გუშინდელმა კორესპონდენციამ თელავიდან ფრიად სასიამოვნო ამბავი გვაუწყა. ამ კორესპონდენციიდან სჩანს, რომ იქაურ თავადაზნაურობას მიუგნია და ხელი ჩაუჭიდნია იმისთანა საგნებისათვის, რომელიც დღეს პირველ საჭირობოტო საქმედ უნდა ჩაითვალოს ჩვენში.

ჩვენი ეგრედწოდებული ეკონომიური ყოფა-ცხოვრება ერთი იმისთანა საგანია ჩვენში, რომელიც ყველაზედ ნაკლებ ხელხლებულია ჩვენ მიერ, ყველაზედ მეტად ყურადღების და ზრუნვის გარეშად დარჩენილია, თითქო სხვა ყოველთა საჭიროებათა შორის ამ ეკონომიურ ყოფა-ცხოვრებას დღეს უპირველესი ადგილი არ ეჭიროს ყველგან, და ჩვენში ხომ რაღა თქმა უნდა. დღეს ყველამ იცის, რომ თავი და ბოლო წინ წაწევისა, წარმატებისა, გაძლიერებისა, შინა და გარეშად დამოუკიდებლობისა, მამძრობისა, სიმდიდრეა, ეკონომიური ძალღონიერებაა ერისა. აქ ხელცარიელად დარჩენილი, როგორც ჩვენა ვართ, დღეს ერთს ბიჯსაც წინ ვერ გადასდგამს, რაც გინდ სავსე ჰქონდეს გული დიდებულ აზრთა და გრძნობათათვის. ან თვით დიდებულნი აზრნი და გრძნობანი მოივლინებიან კი იქ, საცა ადამიანი მშვიერ-მწყურვალი, შიშველ-ტიტველი, მგელსავით პირღია დაიარება და ერთი წუთი ვერ გადურჩენია, რომ ჭამა-სმის გარეშად სხვა რაზედმე იფიქროს, სხვა უმაღლესს საგანს ადამიანის წყურვილისას თავი და გული მოანდომოს? ეს თუ შეუძლებელი არ არის, დღად საეჭვოა მანც იქ, საცა ერი ლატაკია, უძლური

და მარტო დღიურ ლუკმის საშოვნელად გაწირული. ღვთის მადლით, ჩვენ ჯერ ამ განწირულებამდე არ მივსულვართ, მაგრამ ჩვენდა სამწუნაროდ უნდა ვთქვათ, რომ დღესა თუ ხვალე ამ დღეში ჩაცვივით, თუ მინამ დროა თავს არ ვუშველეთ, ჩვენ მოედანი ჩვენის ეკონომიურის ცხოვრებისა სხვას დავეთმეთ. ამას მრავალი მიზეზი ჰქონდა და ამ მიზეზთა შორის უმთავრესი ის არის, რომ ჩვენ საშუალსაუკუნეთა რაინდობის ანდერძებით გულს ვიფხანდით, თავს ვიწონებდით: ხმალი, თოფი, ცხენი, რახტი, ლამაზი ქულაჯა და სხვა ამგვარი შეადგენდა საგანს ჩვენის ნატურისას და წყურვილისას; და როცა ჩვენ გატაცებულები ვიყავით ამ ნატურითა და წყურვილით, ჩრჩილი შემოგვეპარა, ჩვენის ერის ნაშრომ-ნაღვაწი ჩვენგან დაწუნებულ ვაჭრობით ხელთ იგდო, ამ გზით საქმით გაგვიბატონდა, ყმად დაგვიჭირა და სიტყვით კი თავს გვიქონავდა და გვემახდა, – ბარაქალო, კაცებიც თქვენა ხართ და ქუდიც თქვენა გზურავთო. ჩვენც ეს ბარაქალა დავიჯერეთ, ამით მოვტყუვდით და ჩვენი ნაშრომ-ნაღვაწი კერძი ცხოვრებისა დღეს იმათ უდგიათ, და ჩვენ კი შორილამ ვუყურებთ და ცარიელს თითს ვილოკავთ. დღეს ბარაქალა და მართალი ბარაქალა ჩვენგან იმათ ეკუთვნის, იმიტომ რომ ისინი მიუხვდნენ ახალთა ქართა ბერვას, დროთა ძარღვს, აწინდელს აუცილებელს ღაღადს და მოთხოვნილებას, თავისი ძალ-ღონე ჭკუისა თუ ხელისა ამ ღაღადს, ამ მოთხოვნილებას შეუფერეს, შეუყენეს, გაღონიერდნენ ჯიბით, გაღონიერდნენ ყველაფრით, ხელთ იგდეს ამ საუკუნის ძლიერი ღონე – ფული და, მაშასადამე, ხელთ იგდეს დიდი სახსარი ყოველგვარის წარმატებისა. როცა ჩვენ ვისხედით და შუბლზედ ქუდშეკეცილები და მხრებზედ ყურთმაჯგადაყრილები „მრავალჟამიერს“ ვიძახდით, ისინი თავმოკატუნებულნი იდგნენ ჩვენ წინაშე და სიცილად არა გვეფიქნებდნენ და, ვინ იცის, იქნება გულშიც ამბობდნენ: ის იცინის კარგად, ვინც ბოლოს გაიცინებსო. აი ბოლოს სიცილსაც შევესწარიო: ბურთი და მოედანი ეკონომიურ ცხოვრებისა გამოგვეცალა ხელიდამ და დაინარჩუნა იმან, ვინც უფრო მალე მიუხვდა დროთა ბრუნვას, დროთა ჭირ-

ბოროტს, ვინც დროთა ძარღვს მარჯვედ მიაგნო და დროთა ღაღადს შეაღია ძალ-ღონე არსებობისათვის ბრძოლითა.

ჩვენ კი, ვისის ქონებით, ვისის ნაჯაფევით, ვისის ნაღვაწით სხვანი კეთდებოდნენ, გავირიყენით, ცარიელ-ზედ დავრჩით და დღეს შორს არა ვართ იქამდე, რომ ჩვენ ჩვენს სახლში სტუმრებად შევიქმნებით და სხვანი გაგვიმასპინძლდნენ, თუ თავს არა ვუშველეთ-რა, ვიდრე კიდევ შესაძლოა ბედს თავი ჩვენსკენ მოვუღრიჯოთ. თელავის თავადაზნაურობა, მისდა სასახელოდ, მიმხვდარა ამ გაჭირვებას და შესდგომია საშველის ძებნას. რამოდენად სამკურნალოა და უებარი ამ ჭირისა იგი წამალი, რომელიც მას მოუპოვია, – ეგ სხვა საქმეა, ამაზედ ბევრი ჰოც ითქმის და ბევრი არაც. ხოლო საწინააღმდეგო ის არის, რომ ჩვენის დღევანდელის ტკივილსათვის მიუგნია ზედმიწევნილად და ეგ ტკივილი მთელის თავის სიგრძე-სიგანით თვალწინ დაუყენებია ასე თუ ისე მოსარჩენად და საწამლებლად. საცა მიზეზი ჭირისა ზედმიწევნილად მიგნებულია, იქ მკურნალობა ერთიორად გაადვილებულია.

ტფილისი, 9 ნოემბერი,

ჩვენს მეთაურში ამ რამდენისამე დღის წინად ის აზრი აღვნიშნეთ, რომ ეკონომიური მოედანი ჩვენში ჩვენ, მიწის-მშრომელთ, ხელიდამ გამოგვეცალა და სხვამ დაისაკუთრა და დაინარჩუნა. ეს იქნება გადაჭარბებული აზრი იყოს, მაგრამ, თუ სახეში მივიღებთ იმას, რომ ჩვენის ნაამაგარისაგან გამორჩენა და მოგება სხვასა ჰრჩება და ჩვენ ჩვენს სახლში, ჩვენს მიწა-წყალზე, მარტო დღიური მუშები ვართ სხვისა, მაშინ ჩვენ მიერ გამოთქმულს აზრს თავისი ადგილი აქვს და საბუთი.

ვიმეორებთ: გარემოში ყველაფერი შეგვეცვალა, ამ ცვლილებამ მრავალგვარი ახალი საჭიროება აგვიჩინა, ცხოვრება გაგვიძვირდა, გაგვიძნელდა, ველარ ავუღივართ აუცილებელს ჭირბოროტს დღისას. ამ უნუგემო მდგომარეობის სისწვრივ ვხვდავთ, რომ მტერი აღარ გვაცდენს მუშაობისაგან, მშვიდობიანობა ჩამოვარდა, სახლობას აღარავინ გვიწიოკებს, ნაშრომ-ნაღვაწს

არავინ გვიოხრებს, რკინისგზებისა და ზღვაზე სიარულის წყალობით ჩვენს ნაამაგარს კარი ფართოდ გაეღო, ცოტად თუ ბევრად ბაზარი გაუდიდდა, მუშტარი მოემატა, ალარა ვართ გარშემო მტრებისაგან და უგზობისაგან იძულებულნი შინ კარჩაკეტილები ვისხდეთ, ჩვენი ვერა მივაწოდოთ რა სხვას, ან სხვისა არა მოვიწოდოთ რა. სულ ყოველს ამასა ვხედავთ და მაინც ვჩივით და ვტირით ჩვენს სიღარიბეს, ჩვენს უილაჯობას. ეს ჩივილი და ტირილი მით უფრო საოცარია, რომ ჩვენი ქვეყანა ჰავით, მდებარებით, მიწით მდიდარია და შემძლებელია გაგვამდიდროს, ქონებით გაგვამდიდროს, გაგვალონიეროს. ამ მდიდარს და მომცემს ქვეყანაში რაღა ვართ ღარიბნი და ლატაკნი? მაღა, რომ ჯერ მაინც კიდევ ვტრიალებთ იმ აზრთა წრეში, იმ სურვილთა და წყურვილთა მზიან-ჩრდილში, რომელიც იყო გამოსადეგი ამ მეცხრამეტე საუკუნის წინად.

დღესაც ვიძახით თავმოწონებით: „სხვა საქართველო სად არის, რომელი კუთხე ქვეყნისა? ერი პურადი, გულადი, იგივე მხნე, იგივე მღერელი“. მართალია, ბევრი არ არის სხვაგან ჩვენი ქვეყნისთანა ქვეყანა. ისიც მართალია, რომ პურადობა და გულადობა ფრიად მოსაწონი და ტკბილად მისაჩნევი ღირსებაა ადამიანისა, მაგრამ ჭირი ის არის, რომ დღევანდელი უკუღმართი დღე მაგაებს ალარა ჰკმარობს, მაგაებიდამ ბევრს ვერას გამოჩნება.

დღევანდელი ფარ-ხმალი ცხოვრებისა ქონებაა. კარგია თუ ცუდი ეს ასეთი ყოფა, ჩვენ ამაზედ თვალი უნდა ავახილოთ, ამაზედ ვიფიქროთ. საქმე ის არის, რომ დღევანდელმა დღემ კაცობრიობა იქამდე მიიყვანა, რომ თუ ერს ქონება შეძენილი არა აქვს და მის გაძლიერების გზაზედ არა სდგას, იგი ღონემიზდილი ღონია, უხორთუმო სპილოა იმ მწვავს და დაუნდობელ ომში, რომელსაც არსებობისათვის ბრძოლას ეძახიან. ამ ბრძოლაში „ყურთმაჯთ ბრიალი, ხმალთა ტრიალი, ცხენიდამ ხტომა და კვლავ შეხტომა“ ვერაფერი თამასუქია გამარჯვებისა, ვერაფერი ღონეა.

ერთადერთი ღონე ჩვენის ქონების გაძლიერებისა ჯერხანად მარტო მიწათმოქმედებაა ჩვენში. საფაბრიკო

და საქარხნო წარმოების მოედანი, თუმცა დღეს ჩვენში საგრძობელად ხელთ არავის ჩაუგდია, მაგრამ ამათვის ჩვენ არამც თუ ქონება არა გვაქვს, არამცთუ საჭირო ცოდნა და გამოცდილება, — აზრადაც არავის მოსვლია ამაებისაკენ მიიხედოს და ეს დღეს მოცლილი და სხვებისაგან დაუჭერელი ადგილი მაინც დაიჭიროს. ამას ვინა სჩივის? ის ერთადერთი მოქმედებაც, რომელიც დღეს ჩვენ ასე თუ ისე პურს გვაჭმევს, ისეთს მდგომარეობაშია, რომ, თუ გზა და საფუძველი არ გამოეცვალა, ისიც ხელიდამ წაგვივა და ჩაუვარდება სხვას, ჩვენზე უფრო მხნეს, ჩვენზე უფრო მცდელს, მცოდნეს და გამჭრიახ კაცს. ეკონომიური ბუნება ქონებისა ის არის, — უძრავი ქონებაა თუ მოძრავი, — რომ უხერხო და უმცდელ კაცისაგან ხეირიან და მცდელ კაცის ხელში გადადის. ამ კანონს ეკონომიურ ბუნებისას წინ ვერავინ დაუდგება, როგორც საერთოდ ბუნებურ კანონსა.

თავი და თავი მიზეზი იმ უეჭველ ამბისა, რომ მიწათმოქმედება ჩვენში მატებას და გაძლიერებას მოკლებულია; რომ დღეს არ იძლევა იგი იმოდენას, რომ არამცთუ სახვალად რაიმე გადავინარჩუნოთ, სადღეისოდაც არ გვეყოფნის; რომ ჩვენს საკუთარ მიწაზედ ჩვენის უმხნეობით და დაუდევრობით სხვის დღიურ მუშად გავიხადეთ თავი, და ვინ არ იცის, რომ დღიურ მუშის კერძი მსოფლიო სუფრაზედ იმოდენია, რაც მხოლოდ საკმარისია კაცს შიმშილით სული არ ამოხდეს, — ყოველ ამისი თავი და თავი მიზეზი იგია, რომ დღეს ჩვენებურს მიწათმოქმედებას იგივე საგანი აქვს, იმავე საქმეს ეტანება და ზედ ალევს თავისს ძალსა და ღონეს, რაც მეჩვიდმეტე და მეთვრამეტე საუკუნეში და კიდევ წინადაც უნდა გასძლიოლოდა ასე თუ ისე მაშინდელთა მკვიდრთა საჭიროებას, და ამ სანით, მაშინ, როცა ჩვენს გარეშემო ყველაფერი შეიცვალა, ჩვენი ერთადერთი ეკონომიური სახსარი არც ზნეს იცვლის, არც ფერსა.

კიდევ ვიტყვით: მტერთაგან და უგზობისაგან შინ ჩაკეტილი ქართველობა იძულებულ იყო ის მოეყვანა, ის ემუშავნა თავის მიწაზე, რასაც დღეს უფრო იეფად სხვაგან ვიყიდით, სხვიდამ მოვიტანთ. იგი ძვირფასი



ჭირნახული, რომლის მოყვანასაც ასე ხელს უწყობს ჩვენებური დალოცვილი ჰავა და მიწა, მაშინ ფიქრადაც მოსასვლელი არ იყო. ეხლა სულ სხვაა. დღეს რა გვიშლის, მაგალითებ, ჩვენს მიწათმოქმედებას ის ნაყოფი გამოვალბინოთ, რაც რუსეთში არ მოდის ბუნებურ გარემოებათა გამო და იქიდან ის ვეზიდოთ, რაც იქ ბევრი მოდის და უფრო იეფიც არის. ის აუარებელი შრომა და ხარჯი რაც, მაგალითად, მარტო პურის მოყვანაზე მოდის ჩვენში და ასე ძვირად გვიჯდება, სხვა უფრო ძვირფასს საგანს რომ მოვანძვროთ რუსეთში გასატანად და იქიდან პური ვეზიდოთ, მითამ წაგებაში ვიქნებით და არა მოგებაში? ამას წინად ერთს გაზეთში დაბეჭდილი იყო, რომ თრიმლს დიდი მუშტარი ჰყავს რუსეთში და კაი ფასადაც გავაო. აბა ჯერ თრიმლი რა არის, ჩვენებური ტყეები სავსეა მაგითი, და გამოდის, რომ მაგასაც კი შესძლება ქონების ღონე მოგვცეს, თუ ხელს მოვკიდებთ. სხვას ნულარ ვიტყვით, რის მოცემაც შეუძლიან ჩვენს მდიდარს ქვეყანას, საცა ჰავა და მიწა ასე ხელს უმართავს კაცს, რომ რაც სულსა და გულს უნდა, კაცმა გაიჩინოს, გამოიღოს ბაზარში გასატანად.

თელავის თავადაზნაურობას ეს საჭიროება უგრძნია და საგნად შემდგარ ამხანაგობისა დაუღვია განკარგება და გაძლიერება მიწათმოქმედებისა. განკარგება და გაძლიერება სწორედ იმ მხარეს უნდა მიექცეს, რომ მიწათმოქმედებას ჩვენში სხვა გზა და მიმართულება აუჩინონ, გაუმრავალგვარონ კულტურა ჰავისა და მიწის შესაფერად, ყოველივე ახლად შემოსაღები საჭირნახულო შეუწონონ საშინაო და საგარეო ბაზრის მოთხოვნილებას, ძვირფასი რამ ჭირნახული დაუღვან საგნად მიწისმოქმედს და იეფის ფასის ჭირნახულზე ხელი ააღებინონ, ან გაუადვილონ ხარჯი და მუშაობა. რასაკვირველია, ყოველს მას სურვილისა და წყურვილის გარდა, ცოდნა და მოხერხება უნდა, და როგორც ეტყობა, არც ეს აუცილებელი მხარე საქმისა

\* დღეს რომ ჩვენში პური ამბრებში ჰლაპება და თუ არ ჩალის ფასად, მუშტარი არა ჰყავს, განა იმით არ აიხსნება, რომ აქაური ბაზარი სავსეა რუსეთიდან მოტანილ პურითა, რომელიც ბაზარს უფრო იეფად უჯდება, ვიდრე ჩვენი შინაური პური?

დაუღვია უყურადღებოდ თელავის თავადაზნაურობას: სხვათა მისალწევ საგანთა შორის ცოდნისა და ხერხის გავრცელებაც დაუვალებია განზრახულის ამხანაგობისათვის.

მართალია, დიდი მოედანი დაუნიშნავს თელავის თავადაზნაურობას მის მიერ განზრახულს ამხანაგობის მოქმედებისათვის, მაგრამ აქ სიდიდეს კაცი არ უნდა შეუშინდეს. რაც ცალკე კაცისათვის დიდია და მძიმე, ის ადვილი საზიდა ბევრისათვის. ეხლანდელს დროში კრებული ძალა სასწაულთმოქმედობს. მართალია, გულგამლილი ქართველი ჩვეულს არის, რომ თუ მოსახვეტია რამე, კაბდოთი მოხვეტოს, და თუ არ ასე, მცირეზე ხელს არ წაიწვდენს, მაგრამ პატარა ნიჩბითაც ბევრი რამ გაკეთდება და ძალიან შესაძლოა ცოტცოტაობისაგან დიდი საქმე გამოვიდეს. აქ საჭიროა მოთმინება და ამაზედ ცოტა უკაცრავად გახლავს გულჩქარი ქართველი, რომელიც სწივის და ჰყვირის ხოლმე, როცა განზრახული იმავ დღესვე სავსებით არ ეძლევა, ის კი ავიწყდება, რომ ღმერთი ყოლადშემძლებელია და იმანაც კი ექვსი დღე მოანდომა ქვეყნის აშენებას.

ჩვენ, როცა დაწვრილებით შევიტყობთ, თელავის თავადაზნაურთ როგორც დაუწყვიათ ხსენებული საქმე, კიდევ, ვიტყვით რასმე ამ საგანზედ, სადამდინაც ჭკუა და გონება გაგვიწვდება. ეხლა კი ფრიად სასიამოვნო და სანუგეშო ამბად უნდა ჩაითვალოს თელავის თავადაზნაურთა იმ გზაზედ ფეხის მოკიდება, რომელიც დღევანდელი საჭირბოროტო და საღალაღებელია.

ტფილისი, 16 ნოემბერი,

ჩვენ ამას წინად ორს მეთაურს წერილში მოვიხსენიეთ, რომ თელავის თავადაზნაურობამ განიზრახა საეკონომიო გზაზე გამოსვლა და ამისათვის განაჩინა, საზოგადოება შეედგინა. ეხლა პროექტი წესდებისა უკვე შეუდგენიათ, დაუბეჭდიათ და აპირობენ წარადგინონ, საცა ჯერ არს, დასამტკიცებლად.

იგი პროექტი, რომელსაც სათაურში აწერია — Проект устава „Союз сельских хозяйев Кахетии“ ჩვენ მივიღეთ და მით ღონისძიება მოგვეცა ზოგიერთს

მხარეს ამ ახალის საქმისას შევეხოთ. რა თქმა უნდა, ჩვენ თვითვეულს მუხლს ამ პროექტისას ვერ გამოვუდგებით, მეტად შორს წავა და ვგონებთ, არც საჭიროა. საქმე დედააზრის გამორკვევა და იმ მუხლების აწონ-დაწონვა, რომელთაც უნდა გაიტანონ ეს დედააზრი. სხვა წვრილმანი ადვილად მოსავლელია და გასასწორებელი.

დედააზრი პროექტისა, ანუ მისაღწევი საგანი დასაარსებელ „კავშირისა“, ცხადად გამოთქმულია წესდების პირველ მუხლშივე და პირველი არის შემდეგი: სოფლის მეურნეობის ჭირნახულს მოუპოვონ იმისთანა მუშტარი, რომელიც ჭირნახულს ჰსაჭიროებს თავისთვის შინ სახმარად და არა გასასყიდად, და ამ გზით მწარმოებელი მხმარებელს შეახვედროს პირდაპირ უშუაგოდ, სახელდობრ ისე, რომ ჩარჩსა და ვაჭარს მოესპოს გზა სყიდვისა და გასყიდვისა, გამსყიდველად იყოს თვით მოჭირნახულე და მყიდველად მხმარებელი და ამათ შუა ჩარჩი და ვაჭარი არ ჩასდგეს.

ეხლანდელი მდგომარეობა ჩვენი ისეთია, რომ ჩარჩი ან ვაჭარი იბულებულჰყოფს მოჭირნახულეს იეფად ჰყიდოს, რაც შეიძლება, თვისი ნაჭირნახულევი და მხმარებელმა, რაც შეიძლება ძვირად იყიდოს. ერთიც ჰკარგავს რომ იეფად ჰყიდოს და მეორეც, რომ იეფად ნაყიდს ძვირად ჰყიდულობს, ორივენი ზარალში არიან და მოგებაშია მარტო ჩარჩი ანუ ვაჭარი. ჩარჩი და ვაჭარი რომ ალებმიცემობას თავიდაც მოაშორონ, მოჭირნახულე და მხმარებელი პირდაპირ შეახვედრონ ერთმანეთს და ამ გზით იგი დიდი ლუკმა მოგებისა, რომელიც ჩარჩსა და ვაჭარსა ჰრჩება, მოჭირნახულემ და მხმარებელმა შუა გაიყონ, სხვა რომ არა ვთქვათ რა, ესეც კი საკმარისია, რომ პირველს მეტი ერგოს თავის ნაჭირნახულისაგან და მეორეს ნაკლებ დაუჯდეს სახმარად საჭირო საგანი. ვთქვათ, როცა პურს ათ შაურად ფუთსა ჰყიდულობენ მოჭირნახულისაგან, ხუთ-მეტ შაურად ჰყიდონ მხმარებელზედ, თაბაუთი აქ ხუთი შაურია. ეს ხუთი შაური შუაზე რომ გაიყონ მოჭირნახულემ და მხმარებელმა, მოჭირნახულეს ფუთზე ერგება ათ შაურის მაგიერ სამი აბაზი და ხუთი გროში და მხმარებელსაც ფუთი დაუჯდება ხუთ-

მეტ შაურის მაგიერ იგივე სამი აბაზი და ხუთი გროში. ამ სახით, ამათ შუა რომ ჩარჩი და ვაჭარი არ ჰაჭანებდეს, ორივენი მოგებაში იქნებიან. ხსენებულს პროექტს საგნად დაუდვია, რომ სწორედ ამ გზით მოეშველოს მოჭირნახულეს და მხმარებელსა და ჩარჩი და ვაჭარი, რამოდენადაც შეიძლება, არ გააჭაჭანოს შუამავლად ამ ორთა ერთმანეთის სიკეთეზე დამოკიდებულ მკვიდრთა შორის. რასაკვირველია, ამისათვის აუცილებლად საჭიროა, რომ მოჭირნახულემ პირდაპირ მიაწვდინოს თავისი ნაჭირნახულევი მხმარებელსა და მხმარებელი პირდაპირ შეხვედეს მოჭირნახულესა. როგორ და რა გზით არის შესაძლო ეს საქმე მოხდეს?

რა თქმა უნდა, თვითვეული ცალკე მოჭირნახულე და თვითვეული ცალკე მხმარებელი ვერ დაიწყებენ ერთმანეთის ძებნას. ამისათვის არც ღონისძიება აქვთ, არც მოცალეობა. აქ უნდა იმისთანა ადგილები აჩნდეს, საცა მოჭირნახულე თავის ჭირნახულს დააწყობს გასასყიდად და საცა თვითვეული მხმარებელი იპოვის სასყიდად თავის საჭიროსა. ხსენებულს პროექტს, მიუღია რა ეს სახეში, დადგენილი აქვს გამართოს თვალსაჩინო ადგილებში მაღაზიები, ღუქნები, სარდაფები, საწყობები, საცა ყოველს მოჭირნახულეს, წვერსა თუ არაწვერს „კავშირისას“, შეუძლიან თავისი ჭირნახული მიიტანოს გასასყიდად. ამ დახმარებისათვის „კავშირი“ დაიქს იღებს იმოდენს, რამოდენასაც განაწესებს საზოგადო კრება „კავშირისა“.

თუ ეს დაწყობილება მოხერხდა და განხორციელდა, უეჭველია, ეშველება რამ ჩვენს აწინდელს მდგომარეობას, რომლის წყალობითაც ორ გზით, როგორც გამყიდველს და მყიდველს, გვწოვენ და გვთლიან, და დღეს საკითხი მხოლოდ ეს არის: მოხერხდება და განხორციელდება თუ არა, ჩვენ ამის პასუხის თქმას ვეცდებით მაშინ, როცა აღვნიშნავთ სხვა ორს საგანსაც, რომელიც მისაღწევად დაუნიშნავს ხსენებულს „კავშირსა“ და რომელსაც შემდეგ მოვიხსენიებთ.

\* Комиссионная плата

მეორე საგანი „კახეთის მეურნეთა კავშირისა“ იგია, რომ რაც სოფლის კაცისათვის საშინაოდ სახმარია და სასყიდელი, ყოველი იგი, შეძლებისამებრ, პირდაპირ მწარმოებელთაგან იყიდონ, რადგანაც იეფად დაუჯდებათ, და ამის გამო იეფადაც შეეძლებათ გაჰყიდონ და სოფლის კაცს მიაწოდონ.

სოფლის კაცს თუ ხელს შეუწყობენ, ღირებულ ფასად გაასალოს თავისი ნაჭირნახულები და ამით ღირს სამსახურს გაუწევენ, არა ნაკლები სამსახურია, რომ რაც შეიძლება იეფად მიაწოდონ ის, რაც მას სახმარად სჭირია და არა აქვს. აქაც საფუძვლად დადებულია ის აზრი, რომ მხმარებელი მოჭირნახულეს პირდაპირ შეახვედრონ და ჩარჩი და ვაჭარი დაითხოვონ შუამავლობისაგან. მხოლოდ განსხვავება ის არის, რომ ამ შემთხვევაში მოჭირნახულე სოფლის კაცი მხმარებელად არის დასახული და მისის ჭირნახულის მხმარებელი მოჭირნახულედ იმისა, რაც არა აქვს სოფლის კაცს და რაც მისთვის სასყიდელია. ამის აღსასრულებლად „კავშირს“ დაუდგენია იქონიოს საწყობები იარაღისა, თესლეულობისა და სხვა ყოველისა, რაც კი საჭიროა სოფლის მეურნისათვის, აგრეთვე ყოველ იმისა, რაც ადგილის მკვიდრთათვის საშინაოდ სასყიდელია.

მესამე საგანი „მეურნეთა კავშირისა“ არის განკარგება და წარმატება სოფლის მეურნეობისა კახეთში, რა თქმა უნდა, რომ ამ მხრით არამც თუ კახეთი, მთელი საქართველო უკან ჩამორჩენილია იმოდენად, რომ ლამის მიწაზედ ხელი ავილოთ, რადგანაც იგი ჭირნახული, რომელსაც დღეს შეეჩერებივართ და მოგვყავს და რომელზედაც ამოდენა შრომა და ხარჯი მივკვიდის, მეტად გაიეფდა და თითქმის ზარალის მეტს არას იძლევა. ამ გაიეფებას იმისთანა მიზეზი აქვს, რომელსაც არამც თუ ოდესმე ბოლო მოეღება, არამედ დღედადლე გაძლიერდება და გადიდება. დღეს პურზე, ქერზე და სხვა ამისთანა მარცვლეულობაზე შელეული ამაგი და ხარჯი მიწათმოქმედს ხელს არ მისცემს, რადგანაც იშვიათს შემთხვევათა გარე, ეგ მარცვლეულობა, სხვიდამ შემოტანილი, უფრო იეფად უჯდება

აქაურს მხმარებელსა, ვიდრე ჩვენი ჩვენ გვიჯდება, და ამის გამო ჩვენ იძულებულნი ვართ, ან ზარალით ვყიდოთ ჩვენი ნაამაგარი, ან ორმოებში დავალპოთ. რუსეთის პური ბევრად იეფია, ვიდრე ჩვენი, ჩვენის შრომისა და გარჯის კვალობაზე, და აქ ცილობა სწორედ წყლის ნაყვა იქნება, ვიდრე არ ვისწავლით ერთისა და იმავე შრომით და ხარჯით ახლანდელზე ბევრად მეტი გამოვალბინოთ მიწას, ან არ ვისწავლით სხვა უფრო ძვირფასი რამ მოსავალი გამოვალბინოთ იმისთანა, რომლის შეძლებასაც უხვად გვაძლევს აქაური ჰავა და მიწა, და რომელსაც ყოველთვის მუშტარი ჰყავს რუსეთში და სამზღვარგარედაც. კიდევ ვიტყვი: იმას, რასაც რუსეთი სხვა თბილ ქვეყნებში ეზიდება და რასაც ზედ ალევს არა ერთსა და ორს მილიონს მანეთსა, ის ყოველისფერი თუ არა, ბევრი მაინც ჩვენში ადვილად მოვა, ოღონდ ამისი ხელი ვიცოდეთ, ამისი ცოდნა გვქონდეს.

ამ ცოდნის მოსაფენად და გასავრცელებლად „კავშირს“ საგნადა აქვს ჰბეჭდოს წიგნები, ბროშურები აგრეთვე იქონიოს დროგამომშვებითი ჟურნალი ან გაზეთი, თავისის მოღვაწეობის შესაფერი. წიგნით ცოდნის გავრცელებას არა ჰკმარობს „კავშირი“ და საბუთიანადაც. წიგნი ამ შემთხვევაში ისე მალე მისაწვდომი და შესათვისებელი არ არის, როგორც მაგალითი, როგორც ის, რასაც კაცი თვალთ ჰხედავს, რასაც გამოცდა აჩვენებს, ნამეტნავად თუ სახეში ვიქონიებთ იმ უმეტესობას ერისას, რომლის ფეხზე დაყენება ასე სანატრელია ჩვენთვის და რომელიც მკვიდრი ბურჯია ქვეყნისა.

რადგანაც მარტო წიგნი ვერ გაუწევს საკმაო სამსახურს დიდს საქმეს ცოდნის გავრცელებისას, „კავშირს“ განუზრახავს საქმე ისე მოაწყოს, რომ მსურველმა თავისის საკუთარის თვალთ დაინახოს, რა უფრო სასარგებლოა კაცმა გამოვალბინოს მიწას, რა სასურველი მოსაყვანად, რარიგად უნდა აკეთოს, რარიგად მოუაროს, რავგარად უნდა შეუწყოს ხელი და იწარმოვოს.

რომ ყოველივე ეს აჩვენოს მსურველს და დააჯეროს, რომ ამა თუ იმ ჭირნახულისაგან უფრო ღიდი

გამორჩენა ექმნება, „კავშირი“ კახეთში იქონიებს მიწებს, საცა ყოველ ამის მაგალითს და საბუთს თვალთ დაანახვებს, რომ სხვა გზითაც შემწეობა აღმოუჩინოს სოფლად მოქმედს მოჭირნახულეს, „კავშირი“ გაიჩენს ხალხში გასავრცელებლად რაც საუკეთესო ხილია, ან საბოსტნე რამ, ან მცენარე, და იყოლიებს საუკეთესო ჯიშის პირუტყვსა, რომ ამით პირუტყვთმენება განკარგდეს ჩვენში და კაი ჯიშის პირუტყვი გამრავლდეს.

აი ეს სამი საგანია მოხსენებული წესდების §1-ში, რომელიც „კახეთის სოფლის მეურნეთა კავშირს“ მისაღწევად დაუნიშნავს. შემდეგ §-შია დასახელებული სხვა საგნებიცა, მაგალითებრ, ქარხნებისა და ფაბრიკების გამართვა, იეფ კრედიტის დაარსება სოფლის მეურნეობის ტეხნიკის განკარგებისათვის და მკვიდრთა ხელის გამართვისათვის.

საქმე დიდ ფარგალშია მოქცეული, როგორცა სჩანს, და სანატრელია, რომ აღსრულებაში მოვიდეს. ეხლა იკითხავთ: რა ღონე, რა შემდეგა უნდა გასწვდეს ამოდენა საქმესაო? ამის პასუხს თვითონ წესდება „კავშირისა“ გვაძლევს და საჭიროა ამ მხრითაც ჯერ წესდება ვალაპარაკოთ.

ტფილისი, 29 ნოემბერი

ჩვენ ამას წინად მოკლედ აღვნიშნეთ ის საგნები, რომელიც წინ დაუდვია მისაღწევად „კახეთის სოფლის მეურნეთა კავშირსა“ და ყოველივე ეს იმით გავათავეთ, რომ საჭიროა გავიგოთ, რა ღონისძიებით დაუპირებით ამ დიდის საქმის განხორციელება. ამის შესახებ პროექტი წესდებისა გვაუწყებს, რომ ღონისძიებას „კავშირისას“ შეადგენს საქმეში სატრიალებელი ფული და ზარალის მზღვევი თანხა.

საქმეში სატრიალებელი ფული უნდა შესდგესო:

ა) ერთხანად წევრთაგან შეტანილ ფულისაგან. აქ თვითვეულ წევრზე, მისის შემოსავლის მიხედვით, დანიშნულია სხვადასხვა ზომით შემოსატანი. ვისაც 500 მანეთზე ნაკლები წმინდა შემოსავალი აქვს, იმან უნდა შეიტანოს ხუთი მანეთი და ვისაც 500 –ზე მეტი, – ერთი თუმანი და ვისაც 100 მანეთზე ნაკლები

შემოსავალი აქვს, ის განთავისუფლებულია ერთხანად შესატანისაგან;

ბ) ყოველწლივ შესატანის საწევრო ფულისაგან. აქ დანიშნულია წმინდა შემოსავლის კვალობაზე ასის თავზე ერთი;

გ) დაიაქისაგან, რომელსაც „კავშირი“ აიღებს მის შემწეობით გაყიდულ საქონლის კვალობაზედ იმ ზომით, რომელიც დადგენილ იქმნება საზოგადო კრებისაგან;

დ) დაიაქისაგან, რომელსაც გადინდიან მყიდველნი, თუ ამას საზოგადო კრება დაადგენს;

ე) იმ ფულისაგან, რომელიც „კავშირს“ შემოუვა საკუთარ სააღებშიცემო საქმისაგან და იმ ჭირნახულის გასყიდვისაგან, რომელსაც თვით „კავშირი“ მოიამაგებს, და

ვ) იმ სარგებლისაგან, რასაც მისდა კუთვნილი ფული შემოიტანს.

ზარალის მზღვევ თანხას ორი წყარო აქვს დანიშნული: ერთი ის, რომ რაც რამ ზემოდასახელებული ფული იქმნება, იქიდან ასის თავზე ერთი ამ თანხისთვის უნდა გადიდვას ყოველწლივ, და გარდა ამისა წმინდა მოგებისაგან ყოველწლივე წესდებაში დანიშნული წილი უნდა ეძლეოდეს.

ჩვენა გვეგონია, და არა-უსაბუთოდ გვეგონია, რომ პირველ ორ მუხლში მოხსენებული სახსარი თავდაპირველი ღონეა, რომ „კავშირმა“ საქმე გაიმართოს და მოქმედება დაიწყოს; სხვა დანარჩენი შემოსავალი საგულვებელია მაშინ, როცა „კავშირის“ საქმე გაიწეოს და ფეხს გასდგამს გარედ ცოტად თუ ბევრად თვალსაჩინოდ და მოიპოვებს საკმაო ნდობას.

მაშასადამე, გამოსაკვლევად ჰრჩება მართო ხსენებული პირველი ორი მუხლი იმ მხრით, მისცემს თუ არა „კავშირს“ იმოდენა ღონისძიებას, რომ პირველშივე „კავშირი“ არ დაბრკოლდეს და მკვდრად დაბადებულს არ დაემსგავსოს. რა თქმა უნდა, იმ მრავალ საგნების გასაძლიერად, რომელიც „კავშირს“ განუზრახავს, დიდი ფულია საჭირო, და ის ფული კი, რომელსაც ხსენებული პირველი ორი მუხლი შემოატანინებს წევრთ, წვეთი იქნება ზღვაში. ხოლო ჩვენ წინადაცა ვთქვით,

რომ მხნე და გამრჯელი კაცი არ უნდა შეუშინდეს სიდიდეს საქმისას და, მამასადაძმე, გაძლოლისასაც. განზრახული „კავშირისაგან“ საქმე იმოდენად მრავალშტოიანია, რომ შესაძლოა პირველ ხანებში მარტო ერთს რომელსაძმე შტოს შეუწონოს „კავშირმა“ თავისი შეძლება, იგი ამოქმედოს და მეტე, შეძლების გაძლიერების მიხედვით, თანდათან და თვითო-თვითოდ სხვა შტოებსაც მოჰკიდოს ხელი.

საფიქრებელი ეს არის, რომ ამისთანა საქმეში თანდათანობასაც თავისი საზღვარი აქვს. ეს საზღვარი დამოკიდებულია იმ საგანზე, რომელიც პირველ ხანშივე საჭიროა ამოქმედდეს, რომ „კავშირმა“ პირველშივე თავი იჩინოს თავისის აგებულებითა, გამჭრიახობითა და სიმარჯვითა და ამით ნდობა მოიპოვოს. თუ ამისთანა საქმეს ნდობა არ დაედვა ქვაკუთხედ, ყოველივე მეცადინეობა უქმია და გზაგაუტანელი. თუ ამ თვალთ ამოირჩევა პირველ ხანის სამოქმედო საგანი, მაშინ თვით საგნის სიგრძე-სიგანე გვაშინებს, – რაოდენი ღონეა საფიქრებელი, რაოდენი შეძლება უნდა მზად იყოს, რომ არჩეულს საგანს გასწვდეს უკლებლივ. ეს ერთი მხარეა საქმისა, რომელიც სახარჯავს თხოულობს და აქ იქნება მეტნაკლებობას საჭირო ფულისას და შეძლებისას როგორმე მოვეუბოდეს. ეს თვით „კავშირის“ მოთავეთათვის მიგვინდვია.

ხოლო ამ საქმეს აქვს მეორე მხარეცა, რომელსაც არაგზით არ ელაღატება და რომელიც პირველ ხანშივე მთელს თავისს საზღვრებში სავსებით უნდა დატეულ იქმნას და, მამასადაძმე, უკლებლივ და სავსებით სახარჯოც უნდა საგულებელ იყოს. ეს ხარჯი ჯამაგირებია და გასამრჯელო იმ კაცთათვის, რომელნიც მოწვეულ უნდა იქმნან პირველშივე საქმის ფეხთაადგმისათვის, საქმის დაწყება-აგებისათვის: ცოტა იქნება პირველში სამუშაო, თუ ბევრი, ამაზე კი არ უნდა იყოს დამოკიდებული რიცხვი საჭირო კაცთა, არამედ იმაზე, რომ საქმე სამერმისოდაც პირველშივე მკვიდრად დალაგდეს, ძირი მაგრად გაუკეთდეს, სათავე განზრახულს ბოლოს პირველშივე შეუფერონ, დღევანდელი დღე, დღევანდელი საგანი, ხვალის მშობლად გაჰხადონ

და საქმე თანდათან მატებაში შეიყვანონ და მატების გზაზე დააყენონ.

აქ ყოველივე ხელნაკლებობა ხარჯისა მომაკვდინებელი შეცდომაა. საჭირო კაცთა სავსებით მოწვევისათვის „კავშირმა“ არ უნდა დაზოგოს რა პირველშივე, თუნდაც ხელთათვის საქმე არა იყოს რა ჯერ, იმიტომ რომ თავიდათავი საჭიროება საქმის აგებაა, მისი დალაგებაა სამოქმედოდ, რადგანაც მარტო ეს აგება და დალაგება გამოიწვევს იმ ნდობას, ურომლისოდაც „კავშირი“ და სხვა ყოველი ამისთანა ერთს ბიჯსაც წინ ვერ წასდგამს, ერთს წუთსაც ვერ იხეირებს. ამ კაცთა მოწვევას და საქმეში ჩაბმას კარგა ბლომა ხარჯი მოუწდება.

იქნება ვიფიქროთ, რომ აქაც თანდათანობა სამსახურს გაგვიწვედეს და იმას დავებჯინოთ, რომ საქმეთა მატების მიხედვით, კაცებსაც მოვიმატებთო. რასაკვირველია, ზოგში იქნება ესეც მოსახერხებელი იყოს, მაგრამ უფროს-ერთში კი მაგით ფონს ვერ ვავალთ იმისთანა საქმეში, რომელიც „კავშირს“ განუზრახავს. ბევრი კაცია საჭირო პირველშივე. სათავის გაჭრა და გამაგრება იმოდენა ზღვა საქმისათვის, როგორც „კავშირის“ საქმეა, სახუმარი არ არის, პირველშივე დიდს მისვლა-მოსვლას ნდომულობს, დიდს გარჯას, დიდს თვალის ტრიალს და გონების გაშლას.

თუ მართლა ასე აუცილებელია პირველშივე საჭირო კაცთა სავსებით მოწვევა, რა ფული უნდა გაუძღვეს იმათს ჯამაგირს და გასამრჯელოს? საიდან და როგორ უნდა მონაცვლოს ხელი „კავშირმა“ ამისათვის? საკმაოა ის წევრთა შემოსატანი, რომელიც პირველ ორ მუხლშია დანიშნული?

ჩვენ ამაზე შემდეგ მოვილაპარაკებთ.

ტფილისი, 3 დეკემბერი

მართალია ბევრი ლაპარაკი იმისთანა საქმეზე, როგორც „კახეთის მეურნეთა კავშირის“ საქმეა, ზოგს არ იამება და იქნება სამღურავიც შემოგვითვალონ, მაგრამ ჩვენ ვერ შეუშინდებით ამ სამღურავს, რადგანაც იგი საქმე მეტად საყურადღებო საგნად მიგვაჩნია. ბევრს ვერ იპოვით ჩვენში იმისთანა ბიჯს, იმისთანა

დაწვობილებას, იმისთანა სამოქმედოს რასმე, რომ ისე უკლებლივ, ისე ნიშნობლივ, ისე უკანდაუხეველად და პირდაპირ გატარებული იყოს წყურვილი თვითმოქმედებისა, როგორც „კავშირის“ წესდებაშია. აქ ნაგრძობია და ჰო-უაროდ აღიარებული, რომ სხვის ხელში ყურება, სხვისაგან მანანას ლოდინი, სხვისი ხეწნა და მუდარა, სხვაზე ჩივილი – გეჭამს და გეყვლეფავსო, არიქა გვიშველეთ, ვილუბებითო, – ვერაფერი ხდია ჭირიდან გამოსვლისათვის, ნამეტნავად მაშინ, როცა ჩვენ თვითონ ხელი გულს დაგვიკრებია, არას ვნაღვლობთ, არას ვდარდობთ და მარტო ჩივილ-ყვირილის მეტს არას ვაკეთებთ. ეს ერთი სანუგეშო მხარეა ხსენებულ „კავშირისა“ და ფრიად სასიხარულოც მით, რომ აღძრულია აზრი თვითმოქმედებისა და მისის აუცილებელ საჭიროებისა გაჭირვებიდან ხსნისათვის.

მეორე მხარე არანაკლებ სანუგეშო და სასიამოვნო ის არის, რომ „კავშირის“ დაუნახავს ის ჩვენს მიერ დიდი ხნის დავიწყებული და ჩვენგან დატოვებული ადგილი, საცა დღევანდელის დღის ვითარებისაგან ასე ცხარე ბრძოლაა არსებობისათვის და საცა ჩვენ ძლეულნი ვართ და სხვანი გამარჯვებულნი. სარბიელი ამისი დღევანდელი ეკონომიური ავკარგიანობაა და აი რა სარბიელზე საჭიდაოდ იწვევს „კავშირი“ თვითმოქმედების ძალ-ღონეს საზოგადოებისას. აღმოშობა, ფეხზე წამოყენება, თუნდ მარტო დასახელებაც იმისი, რომ თვითმოქმედებაა ჩვენი მხსნელი ჭირბოროტისაგან, როგორც შეძღვეში, ისეც დღევანდელ დღეს, სასიხარულო ნიშანია ჩვენის გამოფხიზლებისა, ჩვენის დაძინებულის აზრის დაძვრისა და მოქმედებისა, მით უფრო, რომ ეს თვითმოქმედების წყურვილი ხსენებულ სარბიელზე თვით საზოგადოებას გასჩენია და არა ორიოდ მწიგნობარსა, რომელთა ხმა ხშირად უდაბნოში მღალადებელ ხმადა ჰრჩება ხოლმე, რაც გინდ მართალი და სახეირო იყოს.

ეს სანუგეშო მხარენი „კავშირის“ მიერ წამოყენებულ საქმისა მეტად საკეთილოდ საგრძობნი არიან და ამიტომაც გძლად საუბარს ამაზე არ უნდა მოვერიდნეთ იმის შიშით, რომ ზოგი ჩვეული არ არის

ამისთანა მშრალის საუბარის მოსმენისა და სამღურავს შემოგვითვლის, – რას აჭიანურებთ, მოვებზრდითო.

ჩვენ წინა წერილში ვიკითხეთ: რადგანაც აუცილებელია პირველშივე საჭირო კაცთა სავსებით მოწვევა, რა ფული უნდა გაუძღვეს იმათს ჯამაგირს და გასამჯელოს და როგორ უნდა მონაცვლოს ხელი „კავშირმა“, რომ ამის ხარჯს გასწვდეს? ჩვენ ისიც ვთქვით ამასთან, რომ თუ წესდებას „კავშირისას“ მივხედავთ, ამისათვის მარტო ორი წყაროა განზრახული. ერთი – წევრთა ერთხანად შემოსატანი და მეორე – ყოველწლობითი. ძალიან ვეჭვობთ, რომ ამ ორმა წყარომ „კავშირის“ ღონე მისცეს სამოქმედოდ გამოსვლისა. წესდება ამბობს, რომ რაკი „კავშირის“ 50 წევრი ეყოლება, მოქმედება უნდა დაიწყოსო. რა უნდა განდეს ამ 50 წევრის შემოსატანი საქმის დაწყებისათვის?

ერთხანად შემოსატანი დანიშნულია იმაზე, ვისაც ორმოცდაათ თუმანზე ნაკლებ წმინდა შემოსავალი აქვს – ხუთი მანეთი, და ვისაც მეტი წმინდა შემოსავალი აქვს – ერთი თუმანი, მერე ყოველწლივ ასზე ერთი მთელის შემოსავლიდამ.

ავილოთ, – თუმცა დაუჯერებელია კი, – რომ პირველშივე ასი წევრი ჩაიწერა. ერთხანად შემოსატანი შეადგენს ასს თუმანს, ყველასი შემოსავალი ორმოცდაათს თუმანზე მეტი რომ ვიანგარიშოთ, თუმცა არც ეს არის დიდი საიმედო. სამწუხაროდ ჩვენდა, ყოველწლობითს შემოსატანს წესდებაში განსაზღვრული არა აქვს რა, რომ ანგარიში იქიდან დავიჭიროთ! იქა სწერია, ყოველწლივ თვითვეულმა წევრმა ასზე ერთი უნდა შემოიტანოს წმინდა შემოსავლიდამაო. ამის გამო არ ვიცით, ნორმად ისევ ის ორმოცდაათი თუმანის მეტნაკლებობაა მიღებული, თუ ნამდვილი ზედმიწევნილი შემოსავალი.

უნდა ვიგულისხმოთ, რომ ნამდვილი, ზედმიწევნილი შემოსავალია, თორემ ისე, როგორც ერთხანად შემოსატანია დანიშნული, შეუძლებელია ანგარიში, რადგანაც ორმოცდაათს თუმანზე მეტობა თუ ნაკლებობა, განუსაზღვრელი რამ არის და განუსაზღვრელი ანგარიშის სათავედ შეუძლებელია რომ დაიდვას. მაშასადამე,


უნდა ვიფიქროთ, რომ ყოველწლობით შემოსატანი ზედმიწევნილ შემოსავალზე უნდა იყოს გაანგარიშებული, ესე იგი. თვითვეულ წევრს ცალკე უნდა აუნუსხონ შემოსავალი და ისე დააწერონ შემოსატანი ფული, დავანებოთ ჯერ იმას თავი, რაგვარად შესაძლებელია ამისთანა ანუსხვა შემოსავლისა, რომ არც მწვადი დაიწვას, არც შამფური, – მარტო ის ვიგულისხმობთ, რომ იმ ასს წევრს ორთაშუა რიცხვით ას-ასი თუმანი წმინდა შემოსავალი აღმოუჩნდა. ვგონებთ, ეს მეტიც არის საგულვეტლად და არა ნაკლები. აქედამ „კავშირს“ შეუდგა ასი თუმანი. ამ სახით პირველ ხანში საქმის დაწყებისათვის „კავშირს“ ხელთ ექმნება მხოლოდ ორასი თუმანი. ამ ფულით ძნელად თუ რასმე განდება „კავშირი“, იმიტომ რომ სხვა განზრახული შემოსავლები „კავშირისა“ იმისთანანი არიან, რომელნიც საქმის გამართვას და წარმოებას მოსდევს. ჩვენ ამ ორასი თუმნის ანგარიშისათვის კი იმისთანა მაგალითები ავიღეთ, რომელიც პირველ ხანში მოულოდნელია და მაინც ორას თუმანზე მეტი არ დავვიდგა, და რა უნდა ჰქმნას „კავშირმა“ თუნდ ამ ორას თუმნითა? ეს ხომ საჭირო კაცებსაც ჯამაგირად არ გასწვდება და საქმეს რითლა მიაწვდინოს ხელი? ჩვენ, რასაკვირველია, დიდად გვიაძება, რომ „კავშირმა“ ამ სიძნელეს გზა როგორმა აუქციოს და რითიმე ან როგორმე გაუძღვეს თვისდა განზრახულს საქმეს, მაგრამ ვშიშობთ კი, რომ იმედი პირველშივე არ გაუძტყუნდეს.

გარდა ამისა, რა ღონისძიება აქვს „კავშირს“, რომ ზედმიწევნილი წმინდა შემოსავალი აუნუსხოს საკმაო ზედმიწევნილობით წევრსა? ჯერ იმ სახელმწიფოებში, საცა გადასახადი შემოსავალზეა დადებული, თვით სახელმწიფოს, რომელსაც აუარებელი მოხელენი ჰყვანან და იმოდენა ღონისძიება აქვთ, ვერ მოუწყვიათ ამისთანა საქმე ისე, რომ ნამდვილი შეიტყონ, და „კავშირი“ როგორ მოახერხებს? ან რა საჭირო იყო ამისთანა ყინულზე წერა შემოსატანისა, როგორიც თვალისათვის უჩინარი შემოსავალია? განა ჩვენში ბევრმა კი იცის, რა შემოსავალი აქვს, და ან გადაწყვეტით შეუძლიან ამისი თქმა? შემოსავალი ხომ დიდად სამიზეზო და

მიზეზიანი საგანია და სად, როგორ აუვა „კავშირი“ ათანაირს სამღურავს იმას ცოტას ახდევინებენ და მე ბევრსაო, და სხვას ამისთანებს. თუნდ ეგეც არ იყოს, იმისთანა ქვეყანაში, საცა მამულში დატრიალებულს კაცს ვერ გაუგია, წელს რა შემოუვა და ხვალ რა, ხომ საჭირო იქნება ყოველწლივ ხელახლადი ანუსხვა შემოსავლისა და „კავშირმა“ ხომ თავისი დღე ამას უნდა შეალიოს?

ასე თუ ისე, წესდება „კავშირისა“ ამ მხრით მეტად შეუძუმავებელია, მეტად განუსაზღვრელი და ბუნდი. სხვა ნაკლებობა რომ არა სჭირდეს რა, მარტო ეს ბუნდიანობა საკმაოა, წესდება არ იქმნას შეწყნარებულ, ვისგანაც ჯერ არს, თუ ესე წარსდგა დასამტკიცებლად. ჩვენ კი იმოდენად დიდი და კარგი გვგონია თვით დედააზრი, რომ ვისურვებთ ამ „კავშირის“ მიერ დაწყებულ საქმისათვის ყოველსავე სიკეთეს და გამარჯვებას.

[1895 წ.]



## «ახლო აღმოსავლეთი და ინგლისის დღევანდელი პოლიტიკა»

ტფილისი, 14 ნოემბერი

შუაგული, შუანასკვი ეგრედწოდებულ აღმოსავლეთის საქმისა – ოსმალეთია, სხვა ყოველი წვრილმანი ძაფია, ამ დიდ ნასკვში მოქცეული და ჩართული. ეს ყველამ კარგად იცის. დღევანდელის პოლიტიკის ტკივილიც დღეს სწორედ ეგ არის.

ყველამ ისიც იცის, რომ ოსმალეთი ერთს იმისთანა საჭმელსა ჰკავს, რომელიც მეტად გემრიელია და ამასთანავე მეტად მაწყინარიც. ამიტომაც ერთის მხრით იგი სანდოა და მეორეს მხრით საშიშარი. ყველას მოეხსენება, რომ თვითვეული დიდი სახელმწიფო ევროპისა, და იმისთანა პატარაებიც, როგორც საბერძნეთია და ბალკანეთის სამეფონი, ამ გემრიელს კერძს დიდი ხანია თავს დასტრიალებენ, როგორც სვაენი მძორს, და ყველას კლანჭი გაწვდილი აქვს – კარგი ნაჭერი ხელთ იგდოს, და თუ დღეს-აქამომდე მსუნაგობას და ხარბობას პოლიტიკისას კლანჭი არ გამოუკრავს, ეგ იმას უნდა მივაწეროთ, რომ ყველა უფროთხის ამ გზით გაბედოს რამე. საკმარისია ერთმა რომელმამე ხელი გაიწვდინოს მსუქანი ნაჭერის ხელში ჩასაგდებად, მაშინვე აირევა მონასტერი, დიდი-პატარა ერთმანეთს დაეჯახება და მაშინ, ვინ იცის, ვინ წინა და ვინ უკან. აი საშიშარი მხარე ამ ეგრედწოდებულ აღმოსავლეთის საქმისა. ეს მხარეა მისი ღონეც და უღონობაც.

ყველანი დარწმუნებულნი არიან და საბუთიანის შიშით შეპყრობილნი, რომ თუ ერთი რამ დაინძრა იმ

შენობისა, რომელსაც აღმოსავლეთის საქმეს ეძახიან, არამცთუ თმა ყალხზე შეუდგება ევროპის პოლიტიკას, არამედ ხმაღზედ ხელს წაივლებს და ტყვია-წამალიდა, თოფ-ზარბაზანიდა შეიქმნება მოციქულად ერთმანეთზედ სასიკვდილოდ მისეულ სახელმწიფოთა შორის. ამიტომაც დღეს ყველას ენაზედ მართო ეს აკერია: შეტოკდა იგი შენობა თუ არა? საშიშარი აღმოსავლეთის საქმე წამოდგა ფეხზე და მთელის თავის ტანით გამოეჭიმა ქვეყანას თუ არა? მოვიდა დრო ოსმალეთის დარღვევისა და ევროპილამ განდევნისა თუ არა?

დიპლომატია ამის პასუხს ჯერ სამალავში ჰმალავს. ყური კი რომ დაუუგდოთ ამ ყბედად ცნობილს დიპლომატიას, აქედამ ჰოც გამოდის და არაცა. არც საკვირველია ეს ორჭოფი, ეს ორპირი მოქმედება დიპლომატიისა. იგი, მართალია, დაუზარებელი ყბედია, მაგრამ იმისთანა ყბედია, რომელიც დიდიდამ საღამომდე უნდა ჰლაქლაქებდეს და მაინც არა სთქვას რა და, რაც შეიძლება, სათქმელი ღრმად დაიმალოს გულში. ამისთანა უნარი დიპლომატიისა შემთხვევას აძლევს ჟურნალ-გაზეთობას კალმები აწრიპინოს და თავისებური ბილიკები დაჰქნას იმ სამალავის კარის გასაღებად, საცა დიპლომატია თავის გულისნადებს ინახავს.

ამ ჟურნალ-გაზეთობას რომ ვკითხოთ, ინგლისი ტყუილად ფახიფუხობსო, ტყუილად შვრება, რომ აღმოსავლეთის საქმე აშალოს და აწეწოსო. დიდ შეცდომად და ცოდვად უთვლიან ინგლისს, რომ ამ გზაზედ გამოვიდა და გაბედულად იძახის: დროა ეს ძირგამოთხრილი შენობა დაირღვას, დაიქცესო, დროა ეს მძოვრი – ოსმალეთი – ევროპილამ განიღვენოს და სხვა ამისთანაო.

ჩვენის ფიქრით, ტყუილადა სცემენ კიჟინას ინგლისსა. ინგლისს თავის სვე-ბედის თავში იმისთანა კაცები ჰყოლია და დღესაც ჰყავს, რომ ისინი ისე ადვილად არ შესცდებიან, რომ ჩვენისთანა კაცებმა შეცდომა გაუსწორონ. ინგლისმა კარგად იცის, რას მოქმედობს და რას ეტანება. იგი ისე არ წაადგება სახტომს, რომ ჯერ ათასჯერ არ გადაზომოს და სახტომი თავისს ღონეს არ შეუწონოს. ინგლისმა კარგად იცის, რა ლუკმაა ოსმალეთი, და რა ხარბი და მსუნავია



ყოველი სახელმწიფო, როცა ამისთანა ლუკმაზე მივარდება ხოლმე საქმე. ეს დაუძინებელი სიხარბე და მსუნაგობა იმისთანა ძალმომრევე თვისებისა და ბუნებისა არის, რომ რაკი ალვირი დაბლუჯა და გაიწია, არ მოერიდება, რომ გუშინდელი მტერი დღეს კაცმა მოყვრად გაიხადოს და გუშინდელი მოყვარე – მტრად.

ამისი მაგალითი ბევრია და, სხვათა შორის, ავსტრო-უნგრეთია. განა დიდი ხანია მას აქედ, რაც ინგლისმა ავსტრო-უნგრეთს მწყრალად და გაბედულად შესძახა: ხელები შორსო! და დღეს, როცა აღმოსავლეთის საქმე ცოტად თუ ბევრად აიშალა, რას ვხედავთ? ავსტრია მიეკედლა თითქმის ინგლისს და ინგლისმაც თითქმის გულში ჩაიკრა. ან დასაჯერებელი იყო ამ ცოტა ხნის წინედ, რომ იტალია და ავსტრია სადმე ფეხს ერთად გადასდგამდნენ? მართალია, ორნივე ესენი წევრნი იყვნენ სამთა კავშირისა, მაგრამ ერთმანეთზე დიდი ხანია გული აყრილი ჰქონდათ, და თუ ამათ აერთებდა რამ, ეს გამარჯვებულის და გაძლიერებული გერმანიის ძალმომრეობა იყო. მაინცდამაინც სამთა კავშირს საკუთარ საქმის გარეთად, სხვაგან ყოველგან ეს ორნივე სახელმწიფონი ერთმანეთს მტრულის თვალთ უყურებდნენ. და ეხლა რას ვხედავთ დღევანდელ აწეწილ აღმოსავლეთის საქმის გამო? ორნივე ერთად იღვწიან ინგლისის სამხროდ. ან თვითონ გერმანია აიღეთ. დღეს აქომამდე იფიქრებდა განა ვინმე, რომ ავსტრიას და იტალიას იგი ხელს გაუხსნიდა ცალკე მოქმედებისათვის, როგორც ამას დღეს ვხედავთ? სადღაა დღეს ის ძალ-ღონე სამთა კავშირისა, როცა გერმანია ორს თავისს მოკავშირეს ეუბნება აღმოსავლეთის საქმის გამო, თქვენ როგორც გნებავთ, ისე მოიქეცით და მე კი დრომდე არც იქით გავიწევ, არც აქედ. მოვუცდი, დრო და ჟამი რას იტყვისო და ისე მოვიქცევიო.

ამაების მაცურებლისათვის განა საკმაო არ არის ეს ხელდახელი მაგალითები დასარწმუნებლად, რომ ინგლისს კარგად გამოხატული აქვს თვალწინ იგი გზა, რომელზედაც ასე გაბედულად ამ ბოლოს დროს გამოვიდა, და იგი საგანი, რომელსაც ეტანება მისალწევად და რომელსაც ინგლისი ჯერ კარგა დიდ ხანს

გულიდამ ვერ ამოიღებს უიმისოდ, რომ დიდს საფრთხესა და განსაცდელში არ ჩაავდოს თავისი ძალ-ღონე და ძლიერება როგორც შინ, ისე გარედ.

ჯერ მინამ საქმე ისე მიდის, როგორც ხსენებული მაგალითები ნიშნობლივ გვისახავენ, ვერავისგან ვერ ითქმის, რომ ინგლისი ამაოდ ირჯება. არავის საბუთი არა აქვს სთქვას, რომ დიდ ბრიტანიას დავთრები აერია და კოჭი ალჩუხედ არ უჯდება. ჯერ კი ალჩუა და მერე ვნახოთ, რა იქნება. ტყუილად იტყვიან ზოგიერთი გაზეთები და ამტკიცებენ, რომ ინგლისს მარცხი მოსდისო, ლამის მარტოდმარტო დარჩეს პოლიტიკის მოედანზედაო და მაშინ უღონობისაგან ხმას ჩაიწყვეტსო. არავინ იცის, როგორ გავა და გამოვა ერთმანეთში ევროპა, ვინ ვის მიეკედლება, ვინ ვის გაუწვდის ხელსა და საშველად მოიწვევს, თუ ოსმალეთის საქმე აიშალა. ეს კი იცის ინგლისმა და სხვათა, რომ აღმოსავლეთის, ანუ უკედ ვსთქვათ, საქმე ოსმალეთისა, – იმისთანა რამ არის, რომ თუ აიშალა, ყველას თავისი საკუთარი ტკივილი, ცალკე თავში საცემი საქმე აუჩნდება და ეს უეჭველი გარემოება ბევრს მეგობარს ერთმანეთში გაჰყრის და ბევრს მტრებს ერთმანეთში დაამოყვრებს, დაამეგობრებს.

დღეს აღმოსავლეთის საქმე იმ ხანაშია, რომ ზოგი, ვინც მზად არ არის, ან თავის თავს უღონოდა სცნობს, სცდილობს ეს მწვავე და მრავალ სატკივარის ამშლელი საქმე როგორმე დრომდე ჩააფუჩქროს, დაადინოს, და ზოგი კი, ვისაც იმედი აქვს მოედინდამ ბურთის გატანისა, იღწვის, რომ ამ საქმემ ფეხი აიღვას და მით იძულებულ ჰყოს ევროპა – თვისი სახელმწიფოები ერთმანეთში სხვარივად შეჰკრას და სხვაგვარი დამოკიდებულება აუჩინოს. ამ უკანასკნელს გზას ადგია ინგლისი.

[1895 წ.]



## «ოსმალეთის არეულობა და ევროპა»

ტფილისი, 19 ნოემბერი

საოცარი მდგომარეობაა დღევანდელის პოლიტიკისა ევროპაში. ვინც გუშინ ოსმალეთის განდევნას ევროპი-დამ და მის დანაწილებას ნდომულობდა და ამისათვის არც ჯარს და არცა ფულს არა ჰზოგავდა, დღეს იგი მაგრად სდგას იმაზე, რომ ამ მხრით ოსმალეთს ხელი არავინ შეახოს, და ვინც გუშინ ესარჩლებოდა ოს-მალს და თავგამოდებული იბრძოდა და სისხლსა ჰღვრიდა, იგი დღეს სულ სხვა საგალობელსა ჰგალობს. გარდა ამისა, საითაც კი მიიხედავთ, ყველგან იმახიან, — ეს ოსმალეთის არეულობა არავითარს შიშს არ მოასწავებსო. იტალიის მეფე ჰუმბერტი, ინგლისის, საფრანგეთის და ავსტრო-უნგრეთის მინისტრებიმ საცა კი შემთხვევა აქვთ, სულ იმას ჰლაღებენ, რომ გულს წინადვე ნუ გაიხეთქთ, ყველაფერი მშვიდობიანად და უტყვიანად, უთოფზარბაზნოდ ჩაივლისო. ღმერთმა ჰქმნას, ეგრე მოხდეს, ყველა კაცთმოყვარე ადამიანი ამას ინატრებს.

ხოლო ამ მშვიდობიანობის ღაღადებასთან ერთად არც ის ამბები იმაღავს თავს, რომ ოსმალეთში ზოცვა-ჟღერება და უფრო უარესს მოეღიან. ეს მოლოდინია მიზეზი, თუ დიპლომატები შვილდსა ჰმალვენ და ისარს კი ისვრიან, — ყოველის მხრით ისმის, რომ ყველგან დიდს მზადებაში არიან, ხმალსა ჰლესვენ და მშვიდობიანობას-კი გვარწმუნებენ. ინგლისი, იტალია, ავსტრო-უნგრეთი და იქნება სხვანიცა იმას ჰცდილობენ — თავიანთი ფლოტები იმ ფეხზე დააყენონ, რომ საცა და როცა დასჭირდეს, თოფ-ზარბაზანსაც ხმა ამოაღებინონ.


მართალია, დიპლომატიკაში და პოლიტიკაში ტყუილს ფახიფუხს და მუქარას ხშირად თავისი ადგილი აქვს ხოლმე სხვის გულის გასახეთქთ, ხოლო აქ საკითხავი ის არის: საომარს ხომალდებს რომ აძლიერებენ, ფლოტს რომ საომარ ფეხზე აყენებენ, ვინ ვის უხეთქავს გულსა? ნიშანში ვინ არის ამოღებული? არა გვგონია, რომ ნიშანში ოსმალს იყოს ამოღებული, რადგანაც იგი უამისოდაც გულგახეთქილია დღევანდელის ამბების გამო და უძლური — ვისმე აურზაური გაუწიოს. ერთი მკვანედ და გადაწყვეტილად შეთვლილი სარჩიელი და იმისი ჯანი! იგი კრინტსაც არ დაძრავს და ყურმოჭრილ ყმასავით დაემორჩილება რიხიან სიტყვას ევროპისას. ხოლო სად არის და რად გვიანდება ეს რიხიანი სიტყვა?

აქაც იგივე უცნაური ამბავია. არ არის დღეს ევროპაში ისეთი დიდი სახელმწიფო, რომ თავმოწონებით არ იძახოდეს თავისის დიპლომატების პირითა, ევროპის სახელმწიფოთა შორის სრული თანხმობა არისო; თვითვეული დიდი სახელმწიფო იმ აზრზე სდგასო, რომ ურთიერთის თანხმობით და ყველამ ერთად იმოქმედოსო ოსმალეთის შესახებო. ამას ჰფიცებენ ყველანი, მაგრამ ფიცი გვწამს და ბოლო გვაკვირებს. თუ ეგრეა, მაშ საქმე რაღაზეა? რაღად იფლიტება ამოღენა ქრისტიანე სული და არა ქრისტიანე? რაღას ელიან? საქმე დღედადღე მწკავდება, სისხლის ღვრა ძლიერდება, არეულობა ჰმატულობს, აღრევა და ერთმანეთზე წევა ამოღებულის ხმლით, დღეს თუ ერთმანეთის დამოუკიდებლად, დაქსაქსულად, ცალ-ცალკე მოქმედობს, — ხვალ, ხვალზევით მოსალოდნელია ერთს უშველებელ, გაერთებულ ცეცხლად გადაიქცეს და მოეკიდოს მთელს ოსმალეთსა, და მაშინ ხომ ძალი პატრონს ვეღარ იცნობს. სად არის ეგ თანხმობა ევროპისა? სად არის ის კაცთმოყვარეობა, რომელზედაც ასე უყვართ ხოლმე დაბჯინება პოლიტიკოსებს და დიპლომატებს და რომელიც მართლა რომ დედაბოძია იმისთანა ჩაგრულ ერისათვის, როგორიც საწყალი სომხები არიან ოსმალეთში? ნუთუ ერთი ერი — სომხები მეორეს — ოსმალს უნდა მიეცეს შესაჭმელად, აქაო და თქვენ ცოტანი ხართ და ჩვენ ბევრნიო,

და განათლებული ევროპა კი უყურებდეს ამ უსამართლობას და იმით იწონებდეს თავს, რომ ჩვენ ყოჩაღად ვართ, ერთს პირზე ვდგევართ, საერთოდ და განუყოფელად გვსურს ვიმოქმედოთო. თქმა და ქმნა ერთი და იგივე არ არის, შუა დიდი მანძილია.

სად არის ეგ საერთო და განუყოფელი მოქმედება? მაძლარი მშვიერს წვრილად უფხვნიდაო, სწორედ ეს არის. საქმე ის არის, რომ ეგ თანხმობა და ერთობილად მოქმედება ყინულზე დაწერილი თამასუქია, ჯერხანად ხელიხელთ საგოგმანებელი. ოსმალეთის საქმე რთულ ინტერესების ამბავია. ზოგს დიდს სახელმწიფოს იმისთანა საკუთარი ინტერესები აქვს აქა, რომ არასგზით სხვა სახელმწიფონი ამას არ დაჰყვებიან და სხვა სახელმწიფოებს იგი არ დაეთანხმება. აი სად არის ჭირი დღევანდელის პოლიტიკისა. აი სად არის მისი ნასკვი, ჯერ ძნელად გამოსახსნელი. თუმცა ევროპა გვეფიცება, მაგრამ უეჭველია, ჯერ იგი ერთს აზრზე არ დამდგარა. უეჭველია, გარედ ერთს ჰლაპარაკობს და შინ კი, ფარდებს უკან, სულ სხვას ჰფიქრობს და სხვარივად არის საქმე. ესე რომ არ იყოს, განა დასაჯერებელია, რომ მთელი ევროპა ერთს აზრზე იდგეს, – როგორც გვარწმუნებენ, – ერთსა და იმავეს ეტანებოდეს, და ოსმალთ კი გაუუფიათდეს და ლობე-ყორეს ედებოდეს. ევროპა მართლა რომ ერთის რისამე მოწადინებული იყოს, განა ოსმალთ გაუძლებდა, განა იგი ასე გააჭიანურებდა საქმეს და თვალის დახამხამების უმაღლ არ აუსრულებდა ერთობით გაძლიერებულს სურვილს? ოსმალეთს რა შეუძლიან მთელის ევროპის წინაშე? აკი ვამბობთ: ერთი რიხიანი სიტყვა ევროპისა და მაშინვე ენა მუცელში ჩაუვარდება ოსმალეთს შიშითა. საქმე ის არის, რომ დიდთა სახელმწიფოთა შორის არც ერთობილი აზრია და არც ერთობილი სურვილი. აქ ზოგიერთს ეჩო უჭირავს ხელში და ჰლაპამის თავისაკენ მოითალოს.

[1895 წ.]



## <იქნება ომი თუ არა?>

ტფილისი, 23 ნოემბერი

იქნება ომი თუ არა? სულ ყველანი დღეს ამას ჰკითხულობენ და არავის ვერ გაუბედნია სთქვას ან ჰო, ან არა. ევროპაში დღეს ამის საპასუხოდ საკმაო არ არის ოსმალეთის არეულობა და აღმოსავლეთის საქმის აწეწილობა. თუნდა ეს საქმე ასე თუ ისე უომრად გათავდეს, მაინც, იქნება ომი თუ არა – ეს საკითხი თავის მიზეზს არ დაჰკარგავს და არ მოშორდება ადამიანის ენას, ვიდრე სხვა უფრო ხანიერი გარემოება ევროპისა, სულთამხუთავსავით ატუზული, არ გაქარწყლდება. ეს გარემოება ის არის, რომ ევროპაში ერთის მხრით „სამთა კავშირია“ და მეორეს მხრით „ორთა კავშირი“.

გერმანიის დაუცხრომელი ბეჯითობა ჯარების გამრავლებისათვის, თოფ-იარაღის მზადებისათვის და ერთობ სამხედრო აგებულების (организация) რაც შეიძლება მალე სისრულეში მოყვანისათვის ხომ ყველასათვის ცხადია. არც ის არის დამალული, რომ მისნი მოკავშირენი – ავსტრია და იტალიაც ამისათვის ბეჯითობენ, ამ გზაზედვე იღწვიან და ირჯებიან, რაც კი ღონე და ძალა შესწევთ. ყოველივე ეს ბევრისათვის ვერაფერი საიმედო ნიშანია იმისი, რომ მშვიდობიანობის მომასწავებელი იყოს. ამნაირმა მოქმედებამ „სამთა კავშირისამ“ გამოიწვია სამხედრო ღონის განდიდება და გაძლიერება რუსეთისა და საფრანგეთის მხრითაც. ამ ამბავმა დიდი ხანია შეაჩვია მთელი კაცობრიობა იმ აზრს, რომ დღესა თუ ხვალ ზარბაზანმა უნდა წამოიქუსოს სადმე და მთელი ევროპა ერთმანეთს დაა-

ჯახოს ადამიანთა საულებრად, ქონების ასაკლებად და გასანადგურებლად.

ეს მოლოდინი ჯერ აქამომდე ღვთის მადლით არ ასრულებულა და ვინატროთ, რომ არც ასრულდეს. ხოლო სამწუხარო ის არის, რომ, რაც ხანი გადის, ომის შიშს ცეცხლი ემატება. ყველას მოეხსენება, რომ ერთიერთმანეთის მიხედვით ყოველმა სახელმწიფომ ევროპაში თავთავისი წესი შემოიღო თავისის მხედრობის გასაძლიერებლად და გარდა ამისა იმისთვისაც, რომ ჯარები მარდად მოიკრიბოს, სწრაფად დააყენოს საომარ ფეხზე, სწრაფად გამოიყვანოს საომარზე და სხვა ამისთანა. რომ ახალმა კანონმა თუ წესმა სამხედროსამ თავისი ქმნას და დანიშნულება გაამართლოს, ამას დრო უნდა. ხოლო დრო დამოკიდებულია ამ შემთხვევაში არა მარტო ადამიანის სურვილზე, არამედ ბევრს იმისთანა შინაურ და ბუნებურ გარემოებაზე, რომელიც ასე თუ ისე ხელს უწყობს ან აბრკოლებს თვითვეულს ცალკე სახელმწიფოს.

აქ შინაური წესწყობილება, სივრცე და სიდიდე სახელმწიფოსი, ადგილმდებარეობა, ქონება, ავკარგვიანობა გზებისა ჯარების გადასაყვან-გადმოსაყვანად, გამოცდილება, ცოდნა, ბეჯითობა მოხელეთა, რიცხვი და თვისება მკვიდრთა, თვითონ ავკარგვიანობა სამხედრო წესისა და ბევრი სხვა ამისთანა იძულებულჰყოფს ყოველს სახელმწიფოს სამხედრო წესწყობილება ამ მრავალკეცს გარემოებას შეუფეროს, შეუწონოს. ამაზეა დამოკიდებული თვითონ დროც, რომლის განმავლობაშიაც შესაძლოა ახალმა წესმა თავისი შეასრულოს.

ამ მხრით არც ერთი სახელმწიფო ისე არ არის დაწინაურებული, როგორც გერმანია. მცოდნე კაცთაგან გამორკვეულია, რომ 1896-1897 წლებში ახალი სამხედრო წესი გერმანიისა სრულ სისრულეში მოიყვანს გერმანიის მხედრობას. ამავე წლებში იტალია, ეს მოკავშირე გერმანიისა, სისრულეშივე მოიყვანს აღჭურვას ძალებისას ახალის თოფ-იარაღითა. ავსტრიაც, მესამე მოკავშირეც, მზად არის საშველად. გარდა ამისა, მცოდნე კაცნივე ამბობენ, რომ გერმანია სამს-ოთხს დღეზე ჯარს საომრად გამოიყვანსო, იტალიასა და


ავსტრიასაც შეუძლიანთ, თუმცა არა ესე სწრაფად, მაგრამ მაინც კარგა მალე იგივე მოახდინონ.

რუსეთის სამხედრო წესწყობილება ისეა გაანგარიშებული თურმე, რომ მხედრობას დანიშნულ სისრულეში მოიყვანს მარტო 1903 წელსა და ექვსი კვირა მოუნდება თურმე, რომ შესასევად სადმე ჯარი გაიყვანოსო. 1903 წელს კი რუსეთს იძოვინა ჯარი ეყოლება, რომ არავითარი მტერი მისთვის საშიში აღარ იქნებაო. მინამდე კი რუსეთი, რომელსაც ცალკე წინ დაუდგება გერმანიის მოცლილი ჯარი და ცალკე ავსტრიისა, ვერც საფრანგეთს მიეშველებაო და ვერც გერმანიაში შესევას შეიძლებსო. ყოველივე ეს, რაცა ვთქვით, ერთმანეთს რომ დაუპირისპიდეს ერთმანეთის შესადარებლად, გამოვა, რომ თუ ომი ასატეხია, გერმანიამ ან 1896, ან 1897 წ. უნდა ასტეხოს, თორემ მერმელა მშვიდობით, იმედო გამარჯვებისა.

არავისათვის დამალული არ არის, რომ გერმანია ორმხრივ იყურება სამტროდ, – რუსეთისა და საფრანგეთისაკენ, და ეხლა ამას ჰფიქრობენ: ჯერ მინამ რუსეთს თავისი სამხედრო აგებულება სისრულეში არ მოუყვანია, გერმანია უნდა აჩქარდეს და თავს დაეცეს საფრანგეთსა და იტალიის შემწეობით ჯერ ეს ქვეყანა ცალკე დაამარცხოსო. საბუთიანი აზრი, რომ გერმანიას და იტალიას ერთად ძნელად გაუსწორებს ომს მარტოცა საფრანგეთი, მეტად დიდი რამ არის, რომ გერმანია არ წაქესდეს უეჭველის გამარჯვების იმედითა, რაკი საფრანგეთს დაამარცხებს, მაშინვე ავსტრიის შემწეობით რუსეთს შეუტევსო კიდევ იმ იმედით, რომ გერმანიას და ავსტრიას ერთად რუსეთი ძნელად თუ გაუმარდებაო. ამ გარემოებაშია დღეს გერმანია და, თუ მართლა გერმანიისათვის ომის ატეხა აუცილებელი საჭიროებაა, ძნელად საგულვებელია, რომ მან ომი არ ასტეხოს ან 1896, ან 1897 წელს, ესე იგი მაშინ, როცა ყოველივე გარემოება ასე ხელს უწყობს თითქმის უეჭველ გამარჯვებისათვის. ეს გარემოება უფროსობს დღეს ძილს ყოველს მშვიდობისმოყვარეს, ვაი თუ ახალგაზრდა იმპერატორი გერმანიისა ამ გარემოების მაცდურებას ვერ გაუმარდესო და იმის შიშით, რომ ასეთი მარჯვე შემთხვევა კვლავ აღარ მიეცემა, ხელი

ხმალს მოჰკიდოსო. ამ სახით, თუნდ ოსმალეთის საქმე მშვიდობით გათავდეს, ევროპას არა მცირედი შიში უნდა ჰქონდეს ომისა ამ მხრიდამ, როგორც ეტყობა.

[1895 წ.]



**<ციხეში ჯდომა უფრო ახშობს ზნეობას,  
ვიდრე აფხიზლებს>**

ტფილისი, 24 ნოემბერი

დიდი ხანია ევროპის მეცნიერნი და სახელმწიფოში მომქმედნი კაცნი ცდილობენ გამოარკვიონ, ციხეში ჩასმით შეიძლება თუ არა დანაშაულის ჩამდენი ადამიანი გამოსწორდეს, გამოკეთდეს. ამაზე ბევრი ჰო და ბევრი არა თქმულა, ზოგსა სწამს ამ მხრით ციხის მადლი და ზოგს არა და ამის გამო ზოგი ისე მაგრად ებლაუჭება ამგვარს სასჯელს, ვითარცა სახსარს ადამიანის კარგ ზნეობის გამოფხიზლებისას და ზოგი კი შორს იჭერს, რომ ციხე მაგის შემძლებელი იყოს, და ამტკიცებენ, რომ ციხე უფრო ჰრყვნის და აფუჭებს ადამიანსაო. ზოგიერთი ნიშნებია, რომ ეს უკანასკნელი აზრი თანდათან გულშემატკივარს და თანამგრძობს ჰპოულობს. დღეს ძნელად სადმე შეხვდებით იმისთანა გამოჩენილს მეცნიერს ანუ სახელმწიფო კაცს, რომ სწამდეს ციხეში ჩასმით ადამიანის გამოკეთება. პირიქით, დღეს ბევრნი ამტკიცებენ, რომ ციხეში ჯდომა უფრო ახშობს ზნეობას, ვიდრე აფხიზლებს და აღვიძებს და ასე მოქმედობს ნამეტნავად არასრულს წლოვანს დამნაშავეზე და იმისთანა კაცზე, რომელსაც დანაშაულობა შეემთხვა არა გულის სიბოროტითა და არა იმით, რომ იგი ხელობით ავაზაკი იყოს, ან ავსაქმის მოურიდებელი. ხშირად გულით ჯერ არწამხდარი და კიდევ საკეთილად საიმედო კაცი ციხიდამ გამოდის ზნედანშეული და მთლად სამუდამოდ ხელიდამ წასული.

ბელგია, ეს პატარა, მაგრამ კარგად განათლებული ქვეყანა, პირველი დადგა იმ აზრზე, რომ ციხე ვერაფ-

ერი ადვილია ადამიანის გამოსაკეთებლად. ამიტომაც პირველმავე შეიტანა კანონებში ეგრედ წოდებული „პირობითი სასჯელი“ წვრილმან დანაშაულობისათვის, რომელსაც მოკლე ხნით ციხეში ჯდომა მოსდევს. ეს პირობითი სასჯელი იმაში მდგომარეობს, რომ იმ დამნაშავეს, რომელსაც მცირე დანაშაულობისათვის ციხეში ჯდომა განუჩინა სამართალმა, ჯერ დრომდე ხელს ნუ ახლებენ, აცალონ დამნაშავეს თავისუფლად იყოს, თვალი ადევნონ და თუ დანიშნულ ვადამდე ჰნახეს, რომ მისი ყოფაქცევა რიგიანია და შეუმწიკვლეელი, სრულაც აპატიონ და თუ არა, მხოლოდ მაშინ სასჯელი აღსრულებაში მოიყვანონ.

გაზეთები იუწყებიან, რომ გერმანიის იმპერატორმაც ბრძანება გამოაცხადა იუსტიციის მინისტრის მიმართ იმის შესახებ, რომ იმ დანაშაულთათვის, რომელთა გამოც სამართალმა დაადგინა არა ექვს თვეზე მეტი, სასჯელის აღსრულება დააყოვნოს. ამისთანა შემთხვევაში და ნამეტნავად თუ დასასჯელი არასრული წლოვანია (18 წლისაზე ნაკლები), მინისტრს ნება ეძლევა განაჩენი სამართლისა არ მოიყვანოს აღსრულებაში; დამნაშავე თავისუფლად დასტოვოს რამდენისამე ხნით და არა უმეტეს ერთის წლით, თითქო გამოსაცდელად. თუ მისი ყოფაქცევა ამ ვადის განმავლობაში ყოვლად მართებული და მოსაწონი იქნება, მაშინ სრულადაც შენდობილ იქმნას, თუ არა და, განაჩენი აღსრულებაში მოვიდეს.

თუმცა ეს ბრძანება ჯერ კანონად არ ჩაითვლება, რადგანაც ამ შემთხვევაში საჭიროა პარლამენტის თანხმობა, მაგრამ ესეთი ბრძანება პრუსიაში, თუ არ მთელ გერმანიაში, მაინც სახელმძღვანელოდ უნდა ჰქონდეს იუსტიციის მინისტრს, რადგანაც აქ იმპერატორი მოქმედობს, ვითარცა ხელმწიფე, რომელსაც უფლება შენდობისა მინიჭებული აქვს კანონითა. აქ საქმე იმაშია, რომ იმპერატორმა ვილჰელმმა იგი ჰქმნა, რის უფლებაც კანონით ეკუთვნის და რაკი ამ მხრით იმპერატორის აზრი გამოქვეყნდა, უეჭველია, როგორც პრუსიის პარლამენტი, ისეც გერმანიისა ბეჯითს ყურადღებას მიაქცევს სასჯელთა კანონმდებლობას იმი-

სათვის, რომ ამ აზრის მიხედვით სასჯელთა აღსრულების წესი შესცვალოს და კანონებში შეიტანოს.

ვინც იცის, რა მდგომარეობა ჰყავს ციხესა და მათ შორის ჩავარდნილი მცირე დანაშაულისათვის ადამიანი რა გარყვნილობისა და ავზნეობის საფრთხეშია ხოლმე, ნამეტნავად არასრულწლოვანი, ან ჯერ გულით და გონებით არდამჯდარი, უვიცი ვინმე და ამიტომაც მზად მყოფი სხვის დარიგებას, რჩევას ადვილად აჰყვეს და ბოროტის მაცდურებას ვერ გაუმაგრდეს, — ვინც ყოველივე ეს იცის, იმისათვის მეტად სანუგეშო უნდა იყოს და თანასაგრძნობი იგი ნიშნები, რომელიც მოასწავებს, რომ ადამიანს მადლი ციხისა დამნაშავეს გამოსაკეთებლად აღარა სწამს და, პირიქით, იმის ცდაშია, რომ ავზნეობის საფრთხესაგან დაიხსნას სასჯელად დანიშნული, რამოდენადაც შესაძლებელია. ამ გზაზე კაცობრიობა რაც უფრო მეტს მანძილს გაივლის, მით უფრო სანატრელია, რადგანაც ბევრს სულს, ჯერ კიდევ გამოსაკეთებლად საიმედოს, დაიხსნის სამუდამოდ წახდენისაგან. ან აქამდე რა საფიქრებელი იყო, რომ ჯერ მთლად არდაცემული კაცი, ჩავარდნილი სხვა ავკაცთა შორის, მათთან ერთად დამწყვდეული, თუნდ ორის-სამის თთვით, გამოკეთდება. ან მითამ რა მაღალზნეობის მაგალითები ასწავლიდა ჭკუას ციხეში, საცა მათთან ერთად ქურდბაცაცანი და ბევრი სხვა ადამიანობაზე უსირცხვილოდ ხელაღებული კაცნი არიან ხოლმე დამწყვდეულნი.

[1895 წ.]



## **<ელექტრონით განათება ტფილისისა>**

ტფილისი, 26 ნოემბერი

ამ უკანასკნელ ხანებში ჩვენს ქალაქში გახშირებული მითქმა-მოთქმაა, რომ ტფილისში შემოღებულ იქმნას ელექტრონით განათება. რა თქმა უნდა, ეს აზრი ყველას მოსწონს და ამ მოწონებაზე შორს არ არის თვით ტფილისის საბჭოცა, რომელსაც ამ საგანზე ლაპარაკი ჰქონდა 18-ს ნოემბერს. ეს ისეთი საქმეა, რომ წინადაც დაეწყოთ ლაპარაკი ამაზე და რაიმე გამორკვეულ აზრზე დამდგარიყვნენ, არ იქნებოდა მეტი. რუსები იტყვიან: ისევ გვიან სჯობია, ვიდრე სულ არაო. ისიც კარგია, რომ ამ საგანს ეხლა მაინც მიაქციეს ყურადღება და თუ ამას საკმარისი გულმოდგინებაც ზედ დაატანეს, შესაძლოა გამოვიდეს რამე სახეიროდ ჩვენის თავმინებებულ დედაქალაქისად.

ხსენებულ მითქმა-მოთქმისაგან სჩანს, რომ სურვილი აღძრულია, აქა-იქ ამისათვის ფიქრიც მოქმედობს, ჰზრუნავენ და ირჯებიან და თუმცა ყოველივე ეს ჯერ მიმალულ-მიფარებულია ოთხკედელშუა, მაგრამ ზოგიერთი ხმა მაინც გარედ გამოდის და მეტი არ იქნება, ამ ხმებს ყური ვათხოვოთ. მაგალითებრ, ამბობენ, რომ ჩვენის საბჭოს მოხელენი ამ საგანის თაობაზე უკვე მიწერ-მოწერაში არიანო და მოლაპარაკება გაუძარტავთო, რა თქმა უნდა, ამისთანა დიდ საქმეში, როგორიც არის ელექტრონით განათება ტფილისისა, არამც თუ მეტია, ფრიად საჭიროა წინადაცე გამოლაპარაკება მცოდნე კაცებთან, საჭიროა სხვისის გამოცდილების შედეგი ვიცოდეთ ამ საქმეში, შეტყობილ გვქონდეს, სად და როგორ მოუხერხებიათ ასეთი საქმე,

სად და როგორ დასჯდომიათ, რა გასულა, რა შემოსულა, რის იმედი უნდა იქონიოს ქალაქმა და რის — არა და მებრვე სხვა.

ვიმეორებ, ყოველივე ამის ცოდნა და შეტყობა ერთს იმისთანა აუცილებელს საჭიროებას შეადგენს, ურომლისოდაც გაგნება გზისა ამ საქმეში შეუძლებელია და მეტისმეტად საშიშია იმ მხრით, რომ უგზო-უკვლოდ სიარულმა დიდი რამ შეცდომა არ მოგვანდენინოს და საქმე ისე არ დაგვაჭერინოს, რომ ბოლოს ვინანოთ, სახელდობრ, მაშინ, როცა გასწორება წანახედისა ძნელია იქნება, რომ ეს ასე არ მოხდეს და საჭირო ცნობანი მართლა იმ კაცთაგან მივილოთ, რომელნიც ამისთანა საქმეში სარწმუნოდ დანახულნი და ცნობილნი არიან, არ იქნება მეტი, შევიტყოთ, ვის უნდა გამოველაპარაკეთ და სად უნდა ვეძებოთ ამ საქმეში სარწმუნოდ გამოცდილნი კაცნი.

ქალაქში ხმა დადის, ვითომ მოურავს ამ საგანზე ლაპარაკი, რასაკვირველია, მიწერ-მოწერით დაუწყვია ერთის ინჟინერის ფირმასთან ოდესსაში. მართალია ეს ამბავი თუ არა, არ ვიცი. ჩვენ კი ამას ვიტყვით, რომ არ იქნება მეტი და სასურველია, რომ ამ ფირმამაც თავისი გვითხრას, თავისი აზრი გვაუწყოს. რაც ბევრი ცნობა გვექნება, მით უფრო კარგია. ხოლო ამას კი ვიტყვით, რომ მეტისმეტი წინდაუხედავობა იქნება, მარტო ამ ფირმასთან გამოლაპარაკება ვიკმაროთ, მარტო ამას მივაყულოთ ჩვენი ყავარჯენი.


ნუ დავივიწყებთ, რომ შვეიცარიის ქალაქ ჟენევაში უკვე მოქმედობს ელექტრონი იმისათვის, რისთვისაც ჩვენს ქალაქს ჰსურს მისი ძალი მოიხმაროს, ესე იგი, განათებისათვის. ჭკუიანმა ჟენეველებმა ამ განათების საქმეს ზედ დაურთეს ერთი სხვა სასარგებლო საქმეცა, რომელიც თითქმის იმოდენა შემოსავალს აძლევს ქალაქს, რამოდენასაც ელექტრონით განათება. იქ ელექტრონით განათებას ამოქმედებს მდინარე რონა და ამ მდინარის ძალითვე ელექტრონი ამუშავებს სხვადასხვა ქარხნებსა და ფაბრიკებში მანქანებს, სადაც კი პატრონების სურვილით ელექტრონი გაყვანილია. ჩვენი ტფილისი, რომელსაც შიგ ჩამოუდის ამისთანა ძლიერი წყალი, როგორიც მტკვარია, ამ შემთხვევაში

მეტად ხელშესაწყობია და აქაც ეს ძლიერი ღონე მტკვარისა, როგორც ჟენევაში რონისა, დიდად უნდა აადვილებდეს როგორც განათების საქმეს ელექტრონით, აგრედვე მანქანების მოქმედებისას ელექტრონითვე. უეჭველია, ჩვენის მტკვარის წყალობით ეს ორი საქმე ერთად უნდა შეერთებულ იქმნას, როგორც ეს არის ჟენევაში დღეს და დიდს შემოსავალსაც აძლევს ქალაქსა.

ეს მხარე იმ საგნისა, რომლის გამოც ვლახარაკობთ, მცოდნე კაცთა გამორკვევის საქმეა და თუ აქ ვახსენეთ, მარტო იმისთვის, რომ რადგანაც ჟენევაში ელექტრონით განათება და მანქანების მოქმედება უკვე გამართულია და რადგანაც ჩვენი მტკვარი აქ, როგორც იქ რონა, მეტისმეტად ხელჩასაკიდებელია და უპრიანეა საჭირო ცნობანი იქ ჟენევაში მოვიკითხოთ, იქაურ ინჟინერებს – დავეკითხოთ და საქმე ისე დავიჭიროთ. ეს მით უფრო აუცილებელია, რომ ამ შემთხვევაში ჟენევა და ტფილისი ერთსა და იმავე გარემოებაში არიან: აქაც მტკვარი იმ სამსახურს გაგვიწევს ამ საქმეში, როგორც იქ რონა. ოდესსიღამაც მოსული ცნობები, რასაკვირველია, ასე თუ ისე, გამოსადეგი იქნება ამ საქმეში. ხოლო ოდესსა უწყლო ქვეყანაა და წყლის ღონის გამართვა ელექტრონის განათებისა, არა გვგონის, იქ ისე ზედმიწევნით ნაცადი ჰქონდეთ და ზედმიწევნით ნასწავლი, როგორც ჟენევაში, რომელსაც ეს საქმე დიდი ხანია ნაცადი და ნასწავლი აქვს. აი, სად უნდა ვეძებოთ სახელმძღვანელო ამ საქმეში, აი, სად უნდა მოვიკითხოთ ყოველივე მისი ვითარება და საიღამ უნდა მოწვეულ იქმნან ინჟინერები, თუ საქმე – აღსრულებამდე მივიდა.

ჩვენა გვგონია, რომ ამ გზით შეუცდომელად და წინდანედვით გავივლით და იქნება უფრო იფადაც დაგვიჯდეს განზრახული საქმე ელექტრონით განათებისა.

[1895 წ.]



## <წყალდიდობა საქართველოში>

ტფილისი, 5 დეკემბერი

ყოველ მხრიდამ სწორედ შესაძრწუნებელი ამბები მოდის, რომ ღვინობის თთვეში ყოფილმა წყალდიდობამო აუარებელი ზარალი მიაყენაო მკვიდრთა სულდგმულს და არასულდგმულს ქონებასა. ბევრგან თვით ადამიანიც შეიწირა და დასტოვა ოჯახები უპატრონოდ და ობლად. აოტება და აოხრება მეტი აღარ შეიძლება. ბევრგან არამც თუ სარჩო-საბადებელი, წლევანდელი მოსავალიც არ შერჩათ, ზოგს ბინაც და სადგურიც მოუშალა და ამ ზამთრობით უქადის ცასქვეშედ დარჩენას ზოგან ცოლ-შვილით და მთელის სახლობით.

კიდევ კარგია, თუ ამნაირად დაზარალებულს ღონისძიება აქვს, ხელი გაიმართოს სადმე, ხოლო ვაი იმას, ვინც ამასაც მოკლებულია. და ვინ არ არის ამას მოკლებული საწყალ გლეხთაგანი მაინც, რომელთა სარჩო-საბადებელი, რაც ხელთა აქვთ, დღის საჭიროებას უიმისოდაც ძლივლა სწვდება ხოლმე და სად როგორ მონაცვლის ხელს, სად და როგორ გაუძღვება ბინის მოშლას, ტიტველ-შიშველობას, შიმშილ-წყურვილსა?

ამისთანა უბედურების მსმენელთ გული სტკენიათ საქართველოს მკვიდრთა ზარალისაგან და ჩვენის ქვეყნის გარედ, მოსკოვში, ამ კაცთმოყვარულ გულმტკივნეულობას იქამდე უმოქმედნია, რომ კომიტეტიც შეუდგენიათ ფულის მოსაგროვებლად ტფილისის და ქუთაისის გუბერნიამი დაზარალებულთა შემწეობისათვის.

გუშინ „ნოვოე ობოზრენიე“-მ გამოაცხადა, რომ მოსკოვში შემდგარა კომიტეტი ამ სამადლო განზრახ-



ვითა და თავმჯდომარეობა მიუღია ქალბ-ნს უვაროვი-სას. ამისი ცნობა ჩვენც მივიღეთ მეტად სარწმუნო კაცისაგან და ეს ამბავი ეჭვგარეშე უნდა ვიგულოთ. ესლა მარტო ესლა დაგვრჩენია, ჩვენს თავს დავეკითხოთ: თუ მოსკოვმა ხელი მოჰკიდა ამ ჩვენთვის სამადლო საქმეს, თუ იქაურთა გული შეინძრა აქაურ უბედურობისაგან, თუ აქაურთა მკვიდრთა უნუგეშობამ და მწუხარებამ იქამდე მიაღწია და კაცთმოყვარული მზრუნველობა გამოიწვია, ჩვენ რად დავრჩით ასე გულგრილად? ჩვენი გული უფრო წინად არ უნდა დაძრულიყო ამ სამადლო და საჭირო საქმისათვის, რადგანაც გაუბედურებულნი და დაზარალებულნი წყალდიდობისაგან ჩვენნი სისხლ-ხორციანი არიან, ჩვენი თავისიანები, ჩვენი თანამემამულენი, ჩვენი ძმანი და მახლობელნი!

შორეულმა მოსკოვმა გვაჯობა ამაში, შორეულმა მოსკოვმა გვაჩვენა იმისი მაგალითი, რომ ძმა ძმისთვის და შავ დღისთვისაო და ჩვენ კი, ქართველებმა, ქართველი დავივიწყეთ გაჭირვებას და შავ დღეში და ყურსაც არავინ ვიბღერტავთ, როცა ასე უწყალოდ და შეუბრალებლად მოსეულმა უბედურებამ ამოღენა სული ადამიანი, დიდი და პატარა, შეიწირა და მიწასთან გაასწორა. თითო-ოროლა გროში, ბევრისაგან მოგროვილი, ვინ იცის, რამდენს სულს დაიხსნიდა წყურვილშიმშილისაგან, ტიტველ-შიშველობისაგან და ზოგან სიკვდილისაგანაც. აი სწორედ ამ თითო-ოროლა გროშის გამომეტებისათვის ჩვენთა ძმათა და მახლობელთა საოხად და სახსნელად ღონე სულისა და მადლისა არ გავვწყდა. არ უნდა გვრცხვენოდეს?! ამისთანა უღონობას არ უნდა ვგლოვობდეთ?! ღმერთო, რამ დაგვამცირა და წავგახდინა ესე სამარცხვინოდ!

თუ მადლსაც ჩვენს გულში ადგილი აღარა აქვს, თუ ჩვენში ძმის ძმის იმედი აღარ უნდა ჰქონდეს, როცა ამისთანა უეცარი ჭირი და უბედურება ეწვევა, — რითლა უნდა სულდგმულობდეს საზოგადოება, რა ფესვზედლა უნდა ამოვიდეს და იხაროს ცხოვრებამ ერისამ, რა ზამინები და თავხეებილა უშველის, რომ ერის თავშესაფარი შენობა არ წამოიქცეს და დიდი და პატარა თან არ დაიტანოს. მადლი და მისი საქებური

მტარებელი ადამიანობა თუ აღარ იქმნება, აღარც ურთიერთობაა, აღარც ძმობა და სიყვარულია, აღარც გულმტკივნეულობაა, ერთის სიტყვით, არაფერი იმისთანაა, რითაც ადამიანი პირუტყვისაგან ასეთის თავმოწონებით ირჩევა. მადლი და ადამიანობა იგი ხელთუქმნელი ბურჯია, რომელზედაც ყოველი ერი თავისის ბედნიერების და მერმისის ციხე-სიმაგრეს აშენებს ხოლმე. გამოაცალეთ ეს ბურჯი და შენობას დარღვევისაგან არა დაიხსნის რა.

მართალია, ერის არსებობისათვის დიდი რამ არის ნივთიერი ქონება, მაგრამ არის ერთნაირი სხვა ქონებაცა, ურომლისოდაც ერი თავს ვერ დაიჭერს ამ წუთის-სოფლის გზაზე. ტყუილად კი არ არის ნათქვამი, რომ ადამიანი არა მარტო პურიც ცოცხალ არს; სხვაც რამ არის საჭირო და ის სხვა — ზნეობაა და ზნეობური ქონებაც ისეთი აუცილებლობაა ერის მკვიდრთა ფეხზე დგომისათვის და ზანგრძლივ ადამიანურ ცხოვრებისათვის, როგორც არსებითი პური. გული ამომშრალი, უმადლო, უკეთილო, ერს ერად ვერ აბოვინებს. და ნუთუ დღეს გული ამოვვიშრა ჩვენ იმოდენად, რომ ჩვენთა სისხლ-ხორცთა, ჩვენთა ძმათა და მახლობელთა საშველად სხვა უნდა გვაჩვენებდეს მაგალითს.

არა გვეგონია, ასე წავწყმედილვიყოთ, ასე წამხდარვიყოთ და ამიტომ იმედი გვაქვს, ჩვენი საზოგადოება, ჩვენი დიდ-პატარაობა გააღვიძებს თავისს გულში მადლის ქმნის წყურვილსა, ასე თუ ისე შეუდგება დალუპულ და იმედგადაწყვეტილ მოძმეთათვის საშველ საქმესა და არ დაჰზოგავს თავისს წვლილსა, ვინც რის შემძლებელია, აქ ყოველი გროშიც თავისს სამადლო გზას იპოვის და მრავალთაგან თვითო წვლილი არა ერთსა და ორს კაცს სასოწარკვეთილს გულს გამოუკეთებს და ადრე და მალე წახდენისაგან დაიხსნის ცოლითა და შვილითა.

საჭიროა, ითავოს ვინმემ აქაც, ჩვენში, ამერ-იმერთა შორის კომიტეტი შეადგინოს და მოიწვიოს ჩვენი ერი ამ დიდ საქებურ სამადლო საქმისათვის. ხვეწნა და მუდარა აქ მეტია: თვითონ საქმე ჰლადადებს თავისა თვისისათვის, ოღონდ ვინმე მხნე კაცი დამწყებად გა-

მოჩნდეს. ჩვენი მარშლები არა ცოტა შემწეობას გაუწევენ ამ საქმეს, თუ მოიწადინებენ საკმაო გულმოდგინებით შედგომასა. არც ჩვენი სამღვდელეობა უნდა ჩამორჩეს სხვას და თვისი სამწყსო უნდა მოიწვიოს მოყვასთა საშველად და იმედია არც მათი ხმა დარჩება ხმად მღალაღებლისა უდაბნოში. ინტელიგენციაც, რა თქმა უნდა, არ მოიყრუებს ყურს და იგიც მოაშველებს ამ საქმეს თავისს ძალ-ღონეს, თავისს წვლილს, ოლონდ ითავოს ვინმემ, მხნემ და გამრჯელმა, და დიდი და პატარა, თავადი და გლეხი შესძრას ამ სამადლო საქმისათვის და იმედია ბევრი თუ არა, იმოდენა მაინც მოგროვდეს — თუ ყველას არა — ზოგიერთს გაუბედურებულს მაინც ნუგეში რამ მიეცეს, წამალი რამ დაედოს.

[1895 წ.]



### **<ოსმალების სომეხთა განწირვა>**

ტფილისი, 12 დეკემბერი

ყველა იძახის, რომ სომეხთა საქმე მიწყნარდა და ვითომც სამშვიდობოზედაც გავიდაო. ცალკე ხომ ამას იძახიან, ცალკე ისიც ისმის, რომ სომეხებს მაინც სდევნიან და ჟღერებენ. დღე არ გავა, რომ დეპეშა არ მოვიდეს, აი აქ თუ იქ ამდენი სომეხი დააწიოკეს, აიკლეს, ამდენი ამოხოცეს, ამდენი დაღუპეს. რა თქმა უნდა, არც მეორე მხარე რჩება უიმისოდ, რომ სომეხთაც არ შესწამონ ამისთანავე მოქმედება, მითამ და წინააღმდეგ ოსმალთა, და მით არ ამართლოს იგი უღმობელი საქმენი, რომელსაც ოსმალნი სჩადიან.

ვინ ვისა სდევნის, ვინ ვისა ჰკლავს და იკლებს, ვინ სტყუის და ვინ მართალია იქ, სადაც ერთის მხრით ძალია და მეორეს მხრით უღონობა, — ეს ყველამ კარგად იცის, ამას ყველა აშკარად ჰხედავს, მაგრამ ზოგიერთის ჟურნალ-გაზეთების კალმის წრიბინისაგან სჩანს, რომ ბევრი განგებ თვალებზე ხელეებს იფარებს, არა დავინახო რაო, ან დანახულს ჰძალავს და იმაზე აჭყეტს თვალებს, რაც ესიზმრება სხვადასხვა შინაურ მიზეზისა გამო, რომელთაც არავითარი კავშირი არა აქვთ მათთან, რაც მართალია და რაცა სძრავს აღამიანის გულს ამ შემთხვევაში.

აშკარაა, სომეხების საქმე და ერთომ ოსმალებისაც განგებ ირევა, აცა — წყალი იქნება როგორმე აიმღვრეს, რომ ბადე კარგად მოხვდესო. ამასობაში ძლიერებისაგან სუსტი იჩაგრება თუ არა, ამისი დარდი და ნაღველი არავისა აქვს, ამისთვის თავი არავისა სტკივა იმოდენად, რომ ნასკვი დღევანდელის ტკივი-

ლისა აქ გამოინასკვოს და ღვაწლი ქვეყნისა ამ ნასკვის გამოსწავლაზე დაიხარჯოს, როგორც სამართალი და კაცთმოყვარეობა ითხოვს.

ჩვენ სრულებით არა გვწამს, რომ რომელიმე სახელმწიფო აქ მარტო სომხების ბედის გასწორებას გულდადებით ეტანებოდეს და მარტო ამისთვის იღვწოდეს. სომეხთა საქმე, ასეთის ბუკითა და ნაღართ ატეხილი, აქ უნდა იგულვებოდეს, ჩვენის ფიქრით, იმოდენად, რამოდენადაც იგი სამსახურს გაუწევს თვითვეულის ცალკე სახელმწიფოს თავმოყვარეობას და ხარბს სურვილსა, რომ მე ჩემი ვირგუნოვო. ყველას თავისი ანგარიში აქვს და სომეხთა საქმე მარტო მიზეზია ანგარიშების აშლისა და დავთრების არეულარევისა.

რა თქმა უნდა, ეს აწეწილი საქმე ისე არ ჩაივლის, რომ თავგანწირულ სომხებს ოსმალეთში ცოტა რამ სიკეთე არ დაეყაროს, მაგრამ ეს ცოტა რამ ძალიან ცოტა რამ იქნება და სომხებს ნათალსაც იმ წამებისას ვერ უზღავს, რაც მათ გამოიარეს, რასაც იგინი ასე თუ ისე სამართლიანად ელოდნენ და რისთვისაც ასე საქებურად და სამაგალითოდ თავი გაიწირეს. ამას უშლის იგი მიუხდობლობა, იგი ცილობა, იგი ხარბობა, იგი დაუძინებელი მეთუშენაობა, რომელიც ასე ძლიერ მოქმედებს სახელმწიფოთა შორის ყოველს საპოლიტიკო საქმეში. ავიღოთ თუნდა მაგალითად მეორე, სტაციონერების ამბავი. რა მოხდა აქ იმისთანა, რომ კაცმა თავი იდიდოს და ამაზე ცილობა დაიწყოს, თვით საქმე დაივიწყოს და ამას გამოეკიდოს. სულთანს ნება ჩამოართვეს, რომ დარღანელის გზით მეორე წყობა ხომალდებისა შეეშვა. აქაც კი იმაზე დაიწყეს ცილობა, — არა, ეს საქმე მე მოვანერხე და არა მეო და ამიტომაც გვირგვინი გამარჯვებისა, ქება-დიდება მე მეკუთვნისო; ხოლო რა არგო ამ ხომალდებმა სომხების საქმეს და ერთობ იმ მწვავეს გარემოებას, რომელიც დღეს ასე ამძიმებს ევროპას? ამაზე არავინ დარდობს, თითქო ამ საკითხს აქ ადგილი არა აქვს, თითქო თავიდათავი საგანი ასეთის ფართიფურთობით ატეხილის ალიაქოთისა ის იყო, — ვინ ვის აჯობებდა, ვინ გაიტანდა სვეს გამარჯვებისას სულთანის წინაშე.

თუ მართლა იმაზე შესდგა ეგ სტაციონერების საქმე, რაზედაც დღეს შეუყენებიათ, იმისი ფასი გროშია. აბა, ომის მოლოდინით შეშინებული გული ევროპისა რას გამორჩება იქიდან, რომ ეს სახელმწიფო დაიდგამს გვირგვინს გამარჯვებისას ამ შემთხვევაში თუ ის. ვის რად უნდა, ან რის მაქნისია ლაპარაკი იმაზე, თუ თავმოსაწონებლად ვინ გაიხდის ამ ჩალის ფასს სტაციონერების საქმეს, მაშინ, როდესაც სისხლი ადამიანისა ორტოტად იღვრება და ამას შველა უნდა. ან რა თავმოსაწონებელია ამნაირი უქმი გამარჯვება. ეს ხომ სიტყვის ბანზე აგდებაა და სხვა არაფერი. ვინ არ იცის, რომ რაკი საქმე სიტყვის ბანზე აგდებაზე მიდგება, ვერაფერი ნუგეშია, ვერაფერი ნიშანია თვითონ საქმის ბოლოში გატანისათვის. თუ ეს სიტყვის ბანზე აგდებაა დარჩათ „სანაცვლოდ მის იმედისა დიდისა“, ვერ ითქმის, რომ ევროპის სახელმწიფოებს სომეხთა საქმეში აღჩუ უჯდებოდეთ. რასაკვირველია, უნუგეშობის მიზეზი აქ ერთმანეთის ჯიბრია და ერთმანეთის მეტოქობა. სხვაგვარი ქადილი და ღაღადება ჯერხანად მაინც ყინულზე დაწერილი თამასუქია და ვისაც საქმის დაყოვნების მიზეზი ჰსურს შეიტყოს, აქ ამ ჯიბრსა და მეტოქეობაში უნდა ეძიოს. ეს აზრი არა ერთხელ გამოგვითქვამს და გვონებთ, რომ ამ აზრს ახალი საბუთი მოეცა ამ სტაციონერების გამო ატეხილ ცილობისაგან.

განა აქედამ ამკარად არა სჩანს, რომ სახელმწიფოებს სომეხთა საქმე ისე არ ამძიმებთ, როგორც სხვა რაღაცა გულში დამალული, თორემ რა დროსია, ამ ცილობისათვის კაცმა თავისი ჭკუა და გონება მოაცდინოს და ამისათვის გაცხარებით თავი გამოიდიდოს.

[1895 წ.]



## **<სამოქალაქო სახელმწიფო სამსახურის მოკვლევითი ფუნქციონირების შეცვლის საჭიროებაზე>**

ტფილისი, 21 დეკემბერი

დიდი ხანია ცნობილია, რომ აწ მომქმედი წესწყობილება და კანონდებულება სამოქალაქო სახელმწიფო სამსახურისა აღარ შეეფერება დღევანდელს ვითარებას ცხოვრებისას და ეს შეუფერებლობა ჰლაღადებს ამ სფეროში საჭირო ცვლილებების შემოტანას და რეფორმებს. ეხლახან „პრაქტიკელ. ვესტ“-მა აუწყა მთელს რუსეთს, რომ სამოქალაქო სახელმწიფო სამსახურის დაძველებულ წესწყობილების შეცვლა საჭიროდ დანახულ იქმნა მთავრობისაგან და რადგანაც ეგ წესები თითქმის აღარაფერში არ ეთანხმებიან ეხლანდელს მოთხოვნილებას და საჭიროებას, ამიტომაც მისი ძირეული შეცვლა აუცილებელიაო.

რუსეთის გაზეთები ერთხმად იძახიან და სამართლიანადაც, რომ დიდი ხანია დრო არისო ამ საქმისათვის ყურადღება მიგვექცია და ხსენებული წესი, აღნიშნული კანონთა მესამე ტომში, ძირიანად გადასინჯულიყო და ახალ ვითარებისათვის შეეფერებინათო. პირველ შეხედვით, ამბობენ იგი გაზეთები, ეს ამბავი თითქო მარტო მოხელეებს შეეხებათო, მაგრამ კარგად კი რომ ჩაუკვირდნენ საქმეს და განზრახვა ცვლილებისა მთელის თავისს სიგრძე-სიგანით განსაზღვრული იქმნას და გათვალისწინებული, დავინახავთო, რომ ხსენებულ საქმეს დიდი საზოგადოებრივი მნიშვნელობა და ინტერესიც აქვსო.

მართალიც არის. საზოგადოების ცხოვრება, ერის ბედის ტრიალი, თვითვეულ ცალკე ადამიანის სულისა და ხორცის ავი და კარგი, ხშირად და ძალიან ხშირადაც დამოკიდებულია მოხელეობის აკარგვიანობაზე, იმაზე, თუ რამოდენად უცილობელად და ადვილად გამოსარკვევად განსაზღვრულია მოხელეობის ერთის მხრით მოვალეობა, რომელიც შეადგენს უფლებას თვითვეულის ქვეშევრდომისას და მეორეს მხრით უფლება, რომელიც სხვა არა არის რა, გარდა ქვეშევრდომის მოვალეობისა. განუსაზღვრელობა უფლებამოვალეობისა ერთადერთი მიზეზია იმ სამდურავისა და უკმაყოფილებისა, რომელიც ხშირად ისმის ხოლმე ცალკე მოხელეობის მხრით ხალხის მიმართ და ცალკე ხალხის მხრით მოხელეობის მიმართ. ადამიანის გრძნობა ღირსებისა, მისი პატიოსნება, მისი სახელი და მშვიდობით ყოფნა, მისი სარჩო-საბადებელი, მისი სულიერი და ხორციელი სვე-ბედი, ოჯახობა, სახლკარიანობა და სხვა ყოველივე ამისთანა, რომელიც საზნეო და საქონებო საუნჯეს შეადგენს ყოველის ადამიანისას – ესე ყოველი უნდა იყოს მოხელეობის მფარველობისა და სარჩელის ქვეშ, თუ ვინმეს ამ მხრით ევნო რამე. ავკაცობას თვითვეული ცალკე კაცი ვერ გაემკლავება. მოქალაქური ურთიერთობა და მშვიდობით ყოფნა შეუძლებელია იქ, საცა მოხელეობის უვარგისობა იძულებულ ხდის ადამიანს თვით შეეჭიდოს მისის ადამიანურის უფლების დამრღვევსა და თვით აღიდგინოს დარღვეული უფლება. კარგად მოწყობილ ქვეყანაში ყოველ ამისთანა საქმეში მისი ნუგეში და იმედი მოხელეობა უნდა იყოს და არა საუთარი თვითნებობა და ძალმომრეობა.

ჩვენ ამითი იმის ქადაგება კი არ გვინდა, ვითომც ეგრედ წოდებული „აპეკა“ მოხელეობისა კისრად მოვახვიოთ თვითვეულს ჩვენგანს. ღმერთმა გვიხსნას ამისთანა „აპეკისაგან“. ჩვენ მარტო იმას ვამბობთ, რომ მოქალაქურ ურთიერთობაში კარგა მოზრდილი ადგილი უჭირავს იმისთანა საქმეს, საცა მარტო სახელმწიფოს შეუძლიან ნუგეში და იმედი მშვიდობით ყოფნისა აძლიოს თვისთა ქვეშევრდომთა, განურჩევლად დიდისა და პატარისა, ღონიერისა და უღონოსი, ჩაგრულს,

დევნულს ხელი აწოდოს შველისა და ხსნისა და ყველას კანონი წაუძღვაროს წინ პირუთვნელად, პირ-მიუფერებლად, მიუდგომლად, როგორც მაშინ, როცა მოქალაქეთაგან მოვალეობის აღსრულებას ჰთხოვლობს გარემოება, ისეც მაშინ, როცა უფლება მოქალაქისა ჰლადადებს ადამიანის ხსნად უკანონოდ ხელშეხებისა-გან.

მოხელეობას ამ უწმინდეს უფლება-მოვალეობის გარე არც მიზეზი აქვს არსებობისა და არც საბუთი. აქ არის მისი მაღალი საზოგადოებური მნიშვნელობა და მისი აუცილებელი საჭიროება ქვეყნისათვის. ამიტომაც ასე სანატრელია, რომ ეს უფლება და მოვალეობა მთელის თავისის სივრცით თვალწინ დაყენებულიყოს, რაკი წესდებას მოხელეობისას შეცვლას უპირებენ. რუსეთის გაზეთები ამბობენ, რომ ამისთანა რთულ საქმეში, როგორც წესდებაა მოხელეობისა, ყველაფერი საჭირო ძნელია კაცმა ჩამოთვალოსო და იხსენიებს მარტო სამს საგანს, რომელთაც ყურადღება უნდა მაინც და მაინც მიექცესო.

პირველი დიდი ნაკლი ეხლანდელი წესდებისა ის არის, რომ უმცროსი მოხელე უფროსის წინაშე ხმაამოულებელია და ტყვედქმნილიო და მარტო იმისი აღმსრულებელი, რასაც უფროსი უბრძანებსო. ამას ის მოსდევდაო, რომ უმცროსს გრძნობა სამართლიანობისა უნდა მოეკლა, დაეხმო გონება ინიციატივისათვის, თავისი თაოსნობით არაფერი ერკვია, არაფერი ეძიებია, თავისი აზრი არა ჰქონოდა და ხმაამოულებლივ დამორ-ჩილებოდა თავისის უფროსის ბრძანებასა, ხშირად იმისთანას, ერთი ბრძანება მეორესა ჰმლიდა, მეორეს არღვევდაო. ამისთანა ყოფას ვერ უძლებდა მართლმოყ-ვარე და გონებიანი უმცროსიო და ამიტომაც ან უნდა გაჰქცეოდა სამსახურს, ან უნდა თავისი ადამიანური ვინაობა წაეწყმიდა და მოეკლაო. უმცროსი, რასაკ-ვირველია, უფროსის ხელქვეითი უნდა იყოსო, ხოლო ამ ხელქვეითობას თავისი საზღვარი უნდა დაედოსო. ეხლა სულ სხვა დრო არისო. ეხლა იშვიათია ის მკვდარი მოხელე, რომელმაც მარტო უფროსის წინ გამოჰიმვა იცოდა თრთოლით და ხმაამოულებლად და მარტო კალმის წრიპინი და მარტო „ატნაშენიების“

წერა სამსახური ეგონა. ახლა ხშირიაო უფრო ცოცხ-ალი კაცები, რომელთაც ზედმიწევნით გაეგებათ ბუნება სამსახურისა, ესმით საზოგადოებრივი ინტერესები, გან-ვითარებული გრძნობა აქვთ თავისის მოვალეობისა და საკუთარის თავის ღირსებისაო. ამის გამო საზღვარ-დაუდებელ ხელქვეითობას, რომელიც აქამომდე ადა-მიანობაზედ ხელს ალებინებდა, ადგილი აღარ უნდა ჰქონდეს ახალ წესდებაშიო. ეგრედ წოდებული „მესამე პუნქტი“, რომელის ძალითაც უფროსი უმცროსს სდევ-ნიდა სამსახურიდამ უმიზეზოდ, დაუსაბუთებლად, საჭიროა გაუქმდეს და ხელქვეით მოხელეს უნდა მიენიჭოს იგი უფლება, რომლის ძალითაც თავისს თავს უშიშრად უნდა ჰგრძნობდეს, რომ, თუ ვინიცობაა თავის საქმეს სინდისიერად ასრულებს, ვერავინ ვერც შეაწუხებს და ვერც დაითხოვს სამსახურიდამ.

მეორე ნაკლი ის არისო, რომ ცხოვრება გაძვირდა, გაჭირდა და ჯამაგირები კი იმ ზომით ეძლევა მოხ-ელესა, რაც შეეფერებოდა წინანდელ იეფობასაო. მოხ-ელე ამ ზომის ჯამაგირებით თავს ველარ ინახავს და, რასაკვირველია, რომ ქონებით ყოველად უილაჯო მოხ-ელეს ქრთამი და სხვა ამგვარი უკადრისობა წაიცდენს ხოლმეო. რომ მოხელეობა დახსნილიყო ამ გაჭირებულ მღვომარეობისაგან, საჭიროა ჯამაგირი მოემატოსო.


მესამე ნაკლი ის არისო, რომ, ერთის მხრით, მარ-თალს მშრომელს, რომელიც დღედაღამ თვალებს იწყალებს შრომითა და ჯაფითა, საკმაო გასამრჯელო არ ეძლევა ჯამაგირიდან და, მეორეს მხრით, იმისთანა მოხელენიც არიანო, რომ ცოტა საქმე აქვთ, ან სულაც არა და ჯამაგირები კი დიდი ეძლევაო. აქაც გადათვა-ლიერება უნდა და ნამეტანობის მოჭრაო.

რა თქმა უნდა, ყოველივე ეს, რასაც რუსეთის გა-ზეთები ამბობენ, ფრიად საჭიროა, რომ დავიწყებულ არ იქმნას, როცა ახალის წესდების შედგენას შეუდგებიან. ყველაფერს ამას, რაც მოვიხსენიეთ, არა მარტო მოხ-ელეებისათვის აქვს მნიშვნელობა, არამედ ყველასათვის, იმიტომ, რომ ხსენებულ ნაკლთა მოშორება განაკარგებს ცოტად თუ ბევრად მოხელეობას იმისდა მიხედვით, თუ ამ განკარგებისათვის რას გამოიმეტებენ. ჩვენის ფიქრით კი აქ დავიწყებულია ერთი უდიდესი საჭი-

როება, რომელიც მართლა რომ პირდაპირ საზოგადოებურს ინტერესს შეადგენს და თუ ეგ შეტანილ და დადგენილ იქმნა წესდებაში, დიდს შელავათს მისცემს ხალხსა და მისცემს დიდს ნუგეშს, რომ მკვიდრთა უფლება არ იქნება ხელშეხებულ მოხელეთა თვითნებობისაგან და ძალმომრეობისაგან. აწ არსებულ წესდების ძალით, თუ უკანონო მოქმედება რაიმე ზარალს მოგაყენებთ, არა გაქვთ ნება ეს ზარალი სასამართლოს ძალით აზღვევინოთ, თუ უფროსი მოხელისა ამას არ მონდომებს და საჭიროდ არ დაინახავს. სხვა ქვეყნებში, მაგალითებრ, საფრანგეთში, თუ მოხელემ თვისის მოქმედებით გაზარალათ რამ, თქვენ ნება გაქვთ პირდაპირ, სხვის დაუკითხველად და ნებისდაურთველად ზარალის მომყენებელს მოხელეს სამართალში უჩივლოთ და თქვენი ზარალი აზღვევინოთ, თუ სიმართლე მივიძღვით. ეს ამისთანა კანონი ორის მხრით სანატრელია: ჯერ იმით, რომ იგი ჰლაგმავს თვითნებობას მოხელისას და აფრთხილებს, ამ გზით არა დაამაოს რა და, მეორეს მხრით, თვითონ მკვიდრი დარაჯად უდგა თვისს უფლებას და თვითნებობას მოხელისას გზას არ აძლევს. აქედამაც და იქილამაც თვითნებობა მოხელისა ისე ხელშეკრულია, რომ იშვიათი ამბავია მოხელემ ადამიანი დასწავროს ძალმომრეობით და თვითნებობითა. მშვიდობიან და ნუგეშიან ცხოვრებისათვის განა ცოტაა, რომ მოხელის თვითნებობა ამ ორსავე მხრით ხელშეკრული იყოს და ყოველმა მკვიდრმა წინადვე იცოდეს, რომ დაუსჯელად მის უფლებას უკანონოდ ვერავენ შეეხება, ვერავენ შელახავს, არამც თუ მისივე მსგავსი მკვიდრი, არამედ თვით მოხელეც კი.

ჩვენ დიდს მნიშვნელობას ვაძლეეთ იმას, რომ ყოველს მკვიდრს მიენიჭოს უფლება პირდაპირ სამართალს მიჰმართოს ხოლმე, როცა ჰგრძნობს და ჰხედავს, რომ მოხელე უკანონოდ ექცევა და თვისი ზარალი აზღვევინოს სამართლის ძალითა. ესეთი კანონი ფეხზე დააყენებს მკვიდრს და თვით მოხელესაც გონებაში ჩაადებს და გააფრთხილებს და მაშინ, ვინ იცის, რამდენი უსამართლობა მოიხპობა და რამოდენად გახალისიანდება მკვიდრი ამისთანა ნუგეშიან კანონის მფარველობის ქვეშ.

[1895 წ.]



## «ქართული სკოლების გიმნაზიებად ბაღაკეთების თაობაზე»

ტფილისი, 30 დეკემბერი

გამგე კომიტეტი სათავადაზნაურო სკოლისა\*, და თვით საზოგადოება, რომლის წარმომადგენელი იგი კომიტეტია, ძალიანა სცდილობს, რომ დაარსებული სკოლა სრულ გიმნაზიამდე მიიყვანოს და წყარო ცხოვრებისა ამ სკოლასა საკუთარი გაუჩინოს, რომ სხვას არ შეჰყურებდეს და სხვის იმედზე არ იყოს დამოკიდებული, მერე იმისთანა იმედზე, რომლის გამართლება ყოველთვის მოსალოდნელი არ არის სხვადასხვა მიზეზთა და გარემოებათა გამო.

სკოლის სრულ გიმნაზიამდე გამატება და ერთობ ამა თუ იმ სახით არსებობა სკოლისა, სახსარზეა დამოკიდებული. ყოველი ჩვენი კეთილი სურვილი, რაც ვინდ ძალიან სანატრელიც იყოს, წავა, მოვა და ზედ მიაწყდება ხოლმე იმ „წყეულს საგანს“, რომელსაც ფული ჰქვია. თუ მართო ცარიელ სურვილზე მიდგება საქმე, ვინ იქნება ჩვენში, რომ ათასი კეთილი სურვილი არ გადავიშალოთ წინ ერთი მეორეზე უკეთესი და ყველა ერთად და ერთნაირად სანატრელი. არა გვგონია, კეთილის სურვილების ჩამოთვლაში ვინმემ სხვამ გვაჯობოს ქართველებსა. ამაში ჩვენ წინ ვერავენ წავგვივა და ვერც ხალისს დაგვიწუნებს. ხოლო ჭირი ეს არის,

\* ასე მოკლედ ვასახელებთ გამგე კომიტეტს ტფილისის გუბერნიის თავადაზნაურობის საზოგადოებისას, რომელსაც საგანდ აქვს შემწეობა გაუწიოს ღარიბთ მოსწავლეთა ჩვენში.

რომ ყოველი სურვილი აღსრულების შეძლებასაც ჰთხოვდობს, ესე იგი ფულს, ამ ერთადერთ ღონისძიებას, ურომლისოდაც სურვილი უქმი ბერვაა ტიკებისა.

მართალია, კარგად ფესვმოკიდებული ადამიანის გულში სურვილიც დიდი რომ არის და ხშირად იგი მთასაც გაარღვევს და თავს გაიტანს, გზასაც იპოვის, სახსარსაც თითქმის არარისაგან რასმეს შეკქმნის ხოლმე, ხოლო მარტო მაშინ კი, როცა ადვილიდამევე საფუძვლიანად დაიძვრება სამოქმედოდ და სურვილით გამსჭვალული ადამიანი თვით თავის საკუთარს ძალ-ღონეზე დაამყარებს იმედს გამარჯვებისას, სულ თუ არა, ბევრ წილში მაინცა. თორემ ვითხოვოთ, აცა იქნება სხვამ რამ მოგვაწოდოსო, ვერაფერი თამასუქია. ეს არის მიზეზი, რომ ხშირად ფრიად სანატრელი სურვილიც მკვდრად დაბადებულია ხოლმე, ჩალასავით აპრიალდება და ჩალასავით ჰქრება.

ჩვენ ყოველს ამას ვამბობთ იმის გამო, რომ თვით ხსენებული „საზოგადოება ღარიბთა მოსწავლეთა შემწეობისათვის“ ყურსაც არ იბღერტავს, საიდან რას გახდეს, რომ მისმა მართლა და კეთილმა სურვილმა სიტყვა საქმედ აქციოს. ბანკი ფულს მოგვცემსო და ყველა ბანკისაკენ თვალსა და ხელს იწვდის. მართალია, ბანკი არასფერს არ დაჰზოგავს, რომ, თუ რამ შეძლება აქვს, არ მოეშველოს ამ საზოგადოებას, ხოლო ბანკის შეძლებასაც საზღვარი უდევს; – ეს ერთი, მეორე ისა, ბანკის საქმე და მისის შემოსავლის მეტნაკლებობა ბევრს იმისთანა მოულოდნელ გარემოებაზე დამოკიდებული, რომელიც ცალკე ადამიანის ხელთ არ არის და რომელთ წინად დანახვა აღემატება ადამიანისათვის მინიჭებულ უნარს და ღონესა. ეს გარემოებანი, რომელთაც აქ ჩამოთვლა საჭირო არ არის, რადგანაც ყველასათვის ადვილად მისაწვდომია, დღეს ერთს ღონეზე აყენებს ბანკს და ხვალ მეორეზე, და აქედამ ბანკის შემოსავალიც დღეს ერთია, ხვალ სხვა. ამისთანა ცვალებადს ბედზე არ შეიძლება მკვიდრად დასდგეს იმისთანა მუდამი საქმე, როგორც სკოლაა. მესამე ისა, რომ ბანკს ამ ბოლოს ხანებში ბევრი იმისთანა დარდი და საზრუნავი გაუჩნდა, რომლის გაძღოლისათვის დაყოვნება და დახანება შეუძლებელია. ეს

დარდი და საზრუნავი ბევრს ფულს ითხოვს, მერე ეხლავე და დაუყოვნებლივ, და ამისთანა შემთხვევაში არა ერთი და ორი კიდეც წინ აეტუხება მერმისშიაც. ძნელია ჩვენმა ბანკმა ყოველს ამისთანა გაჭირებას ბოლო მოუღოს და მასთან იმოდენა ხარჯი გასწიოს, რასაც სკოლა სამართლიანად ჰთხოვდობს.

რა გამოდის ყოველ აქედამ? ისა, რომ დიდი და პატარა მივდგომივართ ბანკს და ბლარტებსავით პირი დაგვიღია: პური არსებისა მოგვეციო. იმას კი აღარ ვფიქრობთ, რომ ბანკი ზღვა არ არის, და თუნდ ზღვაც იყოს, ზღვა კოვზითაც დაილევს. მაშ რა უნდა ვქნათ, იტყვიან, რომ სხვა გზა არ არისო. არის ერთი-ორი გზა, თუ სხვა არავისათვის, სკოლისათვის მაინც, მაგრამ იმოდენა მამულიშვილური ვაჟკაცობა არა გვაქვს, რომ გამოვიდეთ და ვთქვათ. რატომ არ იკითხავთ: სად არის იგი ჩვენი თავადაზნაურობისათვის სასახელო და სადიდებელი განაჩენი, რომლითაც მათ თითქმის ერთხმად გაიწერეს სკოლისათვის ფონდის დასაარსებლად ფული? „საზოგადოება ღარიბთა მოსწავლეთა შემწეობისათვის“ რატომ უყრუებს ყურს ამისთანა საქმეს, რომელიც ჩვენს საქმეს განათლებისას ასეთს უშრეტს წყაროს არსებისას გაუჩენს? რატომ არ შუამდგომლობს ვისთანაც და სადაც ჯერ არს, რომ ამ საქმეს თავისი გზა მიეცეს, მთავრობისაგან შეწყნარებულ იქმნას და მერე განხორციელებულ რამოდენადაც შესაძლოა?

რად დავანებთ ამისთანა სასახელოს და სასარგებლო საქმეს თავი და რატომ არავინ არა ვკითხვობთ: სად არის იგი განაჩენი დღეს? ვინ და რომელს ზანდუკში დამარხა იგი თავგების საჭმელად? ნუთუ ამისთანა პატავის ღირსია იგი განაჩენი მთელის საგუბერნიო თავადაზნაურობისა? ჩვენ არა გვგონია, ამ მეცხრამეტე საუკუნეში სხვა იმისთანა სადიდებელი განაჩენი შეეღვიონოს თავადაზნაურობას ჩვენში თავის სასახელოდ და თავისის მამულიშვილობის სასიქადულოდ, და რას ვხედავთ დღეს? ეს რვა თუ ცხრა წელიწადია მას აქედ და ჩვენდა სამარცხვინოდ შევუშინდით იმ საქმესურს საქმეს და ეხლა დავდივართ და

ვიძახით „ვითხოვთ და ვითხოვთ“ და თვითონ საქმე კი თავგების საღრღნელად გაუშვით.

ნუთუ მაშინ, როცა სკოლის ფონდის დასაარსებლად ასე გამოიძღო თავი თავადაზნაურობამ, იმოდენა ვაი-ვაგლახი გამოიარა, დავაარსოთ ეგ ფონდი თუ არაო, იმოდენა შრომა და ჯაფა გასწია სიების შედგენისათვის, ვის რამდენი ფული შევახვედროთო, შესძრა ამისათვის დიდი და პატარა და ბოლოს თავისს სასახელოდ ერთხმად აღიარა ამ ფონდის შედგენა და სიები დაამტკიცა საცა ჯერ არს წარსადგენად – ნუთუ ყოველივე ეს ტყუილ-უბრალო ფართი-ფურთოა იყო, ჩალა იყო, აპრიალდა და ჩაქრა? ჩვენ არავითარი საბუთი არა გვაქვს ეგ ფართი-ფურთოა შევწამოთ იმისთანა პატივისცემ კრებულს. როგორც მთელის გუბერნიის თავადაზნაურობაა. ეს ამისთანა საქმე ბურთი ხომ არ არის ხელში გაითამაშ-გამოათამაშოს კაცმა და მერე კუთხეში მიაგდოს. არც ჩვენი თავადაზნაურობაა ისე დამცირებული, რომ ამისთანა მძიმე საქმე სათამაშოდ წინ გაივლოს. მაშ რა აბრკოლებს ამ საქმეს და დღეს აქამომდე რატომ არ ვიცით, რამ შეგვიყენა იგი და სად არის მიძინებული?

აი ეს ერთი გზა, რომელიც საქმეს სკოლისას კარგა მოზდილ სახსარს მისცემდა არსებობისას, მერე მუდამს სახსარს, თუკი წევრნი ხსენებულ საზოგადოებისანი ჯეროვანად და უშიშრად მოიკითხავდნენ მიძინებულს საქმეს.

მეორე გზა დღეს გამოუჩნდა ხსენებულ საზოგადოებას. ეს ის არის, რომ თავადაზნაურობას ბანკმა მიჰყიდა არწრუნისეული ქარვასლა: ეგ ქარვასლა იმოდენა შემოსავალს იძლევა, რომ თითქმის მთელის გიმნაზიის ხარჯს გასწევდა. ხოლო ამ პირველ ხანებში თავადაზნაურობას კარგა ხარჯი მოუვიდა ამის სასყიდლად და გარდა ამისა დარჩენილი ქარვასლაზე ვალიც უნდა მოიმოროს. რომ ამ ქარვასლის წმინდა შემოსავალი სულ სკოლაზე მიიქცეს უკლებლივ, საჭიროა ჯერ თავადაზნაურობამ მთელი ვალი, რაც დღეს ამ ქარვასლის გამო აუღია და რაც ხედ თვით ქარვასლას აწევს, რაც შეიძლება მალე გადაიხადოს. ამიტომაც ვინიერება და წინდახედულობა ითხოვს, რომ მთელი

ძალ-ღონე ბანკისა ამ ვალის გადახდას მიეშველოს, რომ მერე მთელი წმინდა შემოსავალი ქარვასლისა სკოლას მოხმარდეს, ვიმეორებთ, ის შემოსავალი თითქმის უმეტნაკლებოდ გასწვება მთელის გიმნაზიის ხარჯსაც კი.

აქედამ ის საჭიროება და უეჭველი საჭიროებაც გამოდის, რომ ყველამ, ვინც კი ხელს იწვდის დღეს ბანკისაკენ, სურვილი შევიმოკლოთ, დავჯერდეთ ჯერხანად მარტო იმას, რაც აუცილებლად საჭიროა და ყოველი გადანარჩენი გროში თავადაზნაურობას მივაშველოთ, რომ მალე გამოვიდეს ვალებისაგან და წმინდა შემოსავალი ქარვასლისა ჩვენის განათლების საქმეს მოახმაროს უკლებლივ. რა თქმა უნდა, გიმნაზია რომ ჩვენი გვექნდეს, კარგია, არც ის იქნება ცუდი, რომ ჩვენი უნივერსიტეტიც ვიქონიოთ, მაგრამ ამისთანა საქმეების ქვიშაზე აშენება უგუნურება იქნება. ნუ ავწეწავთ საქმეს, ნუ განვაბნევთ და გავფანტავთ სხვადასხვა საქმეზე ჩვენ დღევანდელ ფეხმოკლე შეიძლება, ნუ დაექსაქსავთ ჩვენს ძალ-ღონეს. ისა სჯობია, ერთად მოვკრიბოთ ჩვენი ავლა-დიდება და ყოველთ უწინარეს ქარვასლა მალე დავინსნათ ვალებისაგან და მით ერთი დაუშრეტელი, მუდამი წყარო არსებობისა მივცეთ ჩვენს განათლების საქმეს და ასე ყინულზე არა ვწეროთ მისი იმედები, როგორც დღესა ვწეროთ და გვიხარიათ, რომ ასე ვჩადით. ნუ დავივიწყებთ, რომ ყოველი გროში არწასული ამ საქმეზე, დაავიანებს, დააყოვნებს ქარვასლის ვალებისაგან დახსნასა.

ნუ დავივიწყებთ, რომ წინ კიდევ ერთი დიდი საქმე გვიდევს. ქალების განათლების საქმეც ჩვენი ვალია და ჩვენი თავსაცემელი. ამას შევლა სჭირია. აქაც უნდა როგორმე გზა მივცეთ კმაყოფილებისა ჩვენს უსაჭიროესს მოთხოვნილებას. ქარვასლას რომ მალე დავიხსნით ვალებისაგან, იგი თითქმის გაისტუმრებს ყოველს ხარჯს სათავადაზნაურო სკოლისას, რა სახისაც და სიდიდისაც გინდ იყოს, მაინც და მაინც დიდს შელავათს მისცემს ბანკს, კარგა დიდ ლუკმას გადავირჩენს ბანკის შემოსავლიდამ, რომ ქალთა განათლებასაც სახსარი მიეცეს დაარსებისა და არსებობისა; და



თუ ქარვასლის შემოსავალს ზედ დაერთვის შემოსავალი იმ ფონდისა, რომლის დაარსება თავადაზნაურობამ დიდი ხანია მოიწადინა და რომელიც ზევით მოვიხსენიეთ, მაშინ ხომ ჩვენს ბედს მყეფარიც ვერ დაჰყეფავს.

ჩვენი უკანასკნელი დასკვნა ეს არის: ყოველს სურვილს, რაც გინდ სანატრელი იყოს, თუ ბანკის შემოსავლის განაწილებას ჰთხოულობს, თავი უნდა დავანებოთ დღეს ჯერ ხანად. ყოველივე, რაც დღევანდელ ხარჯს სკოლისას ისე, როგორც დღეს სკოლაა, გადარჩება, მივაქციოთ იმას, რომ ქარვასლა განვუთავისუფლოთ თავადაზნაურობას ვალებისაგან და მით გავუჩინოთ სკოლას მკვიდრი, შეურყეველი საფუძველი ცხოვრებისა. გარდა ამისა ვიშუამდგომლოთ ვისთანაც ჯერ არს, რომ ზემოხსენებულს განაჩენს თავადაზნაურობისას შესახებ სკოლის ფონდისა თავისი ჯეროვანი გზა მიეცეს. იქნება ღმერთმა გვიბრალოს და სახელოვან საქმეს ჩვენის თავადაზნაურობისას სასურველი ბოლო მიენიჭოს, თორემ ასე უკან მიგდება ამ საქმისა არ გვეგონია საკადრისი იყოს თვითონ თავადაზნაურობისათვის.

[1895 წ.]

1896 წელი



## **<შინაური მიმოსილვა 1895 წლისა>**

ტფილისი, 4 იანვარი

ცხოვრება ცალკე ადამიანისა, თუ მთელის ერისა, უფრო წეწვა-გლეჯის ბაზარია. დღეს ესეა მოწყობილი და რას იზამ? ცხოვრება მარტო ალებმცემობაა ერთმანეთის ჭკუისა, თუ ხელის ნაწვა-ნადავისა, ნაამაგარ-ნაშრომისა, ნაომარ-ნარბევისა. იგი ის მოედანია, საცა ჭიანჭველასავით ირევა დიდი და პატარა, საცა მადლარი მშიერს წვრილად უფხვნის, გამარჯვებული დამარცხებულს ფეხქვეშა სთელავს, ძლიერი უძლურს ეტანება შესაჭმელად, უძლური ძლიერს გაურბის და ორნივე კი — დამწვევიც და გამქცევიც — ერთსა და იმავე ღროს ერთსა და იმავე ღმერთს ეხვეწებიან — ხელი მომიმართეო.

ჯოჯოხეთი იქნებოდა ეს ასეთი ცხოვრება, რომელსაც სხვა მიზანი არსებობისა არა აქვს, თუ არ ის, რომ ადამიანი ბედნიერი იყოს, სიამოვნებას, ღხენას და სიხარულს არ იყოს მოკლებული. ვამბობთ, ჯოჯოხეთი იქნებოდა, რომ ამ წეწვა-გლეჯის ბაზარში სხივფენილ მადლსაც არ გაჰქონდეს თავისი პატიოსანი ნაამაგარი, თავისი ნაშრომ-ნაღვაწი კაცთა სანუგეშოდ და სასიქადულოდ. დიდბუნებოვანობა ცალკე ადამიანისა, თუ მთელის ერისა, მის მიერ გატანილ მადლის მეტ-ნაკლებობაშია. ეგ მეტნაკლებობა მადლისა არის უტყუარი საწყაო ცალკე ადამიანის თუ მთელის ერის კაცურკაცობისა, მისის შინაგან სიმაგრისა, ქვაკუთხედი მისის აღმატებულობისა. მადლი არის კრებული იმა კეთილთა, რომელიც შეადგენს ზნეობურს განძს, როგორც თვითვეულ ადამიანისას, ისეც მთელის ერისა.

სას, და ეგ განძია იგი კლდე, რომელზედაც შენდება ციხე-სიმაგრე ერის ცხოვრებისა, ერის აწმყოსი, ერის მერმისისა.

ადამიანი და ნამეტნავად ერი არამარტო „პურიტა ერთითა ცოცხალ არს“. მართალია, მშიერი დიდს მანძილს ვერ გაივლის ამ მადლისა და ბოროტის ჭიდილის გზაზე, მაგრამ უმადლოდაც, როგორც ხორცი უსულოდ, არაფრის მაქნისია. ცხოვრება ერთიანი მდინარეა ორის დიდის ტოტისა: ერთს რომ ხორცისათვის მოაქვს საზრდო, მეორეს — სულისათვის. თუ ან ერთი დაშრა, ან მეორე, — გვამი ერისა მკვდარია, ვითარცა უსულოდ ხორცი და უხორცოდ სული, სააქაოსათვის მაინცა. ამიტომაც, ვინცა სჩივის და ჰღალადებს სახორციელო პურისათვის, ის ამდენადვე, თუ არ მეტად, უნდა იღვწოდეს სასულიერო პურისათვისაც. ადამიანი თუ მთელი ერი იმისათვის კი არ არის გაჩენილი, რომ პური სჭამოს, არამედ პურსა სჭამს იმითომ, რომ კაცურკაცად იცხოვროს და აცხოვროს თავისი შთამომავალი.

„ვით მამა ზეცის იყავნ შენც სრული“ — აი თავი და ბოლო ადამიანის ცხოვრებისა. ვის რა მანძილი გაუვლია, ცალკე ადამიანია თუ მთელი ერი, — ამ სისრულის გზაზე, ვინ რამოდენად წინ წამდგარა, ვის რამოდენად აღფრთოვანებული აქვს სულთასწრაფვა ამ გზაზე დაუღალავად სიარულისათვის, — აი საწყაო, როგორც ცალკე ადამიანის ღირსების, ისეც მთელის ერისა.

ამ თვალთ რომ მოვჩხრიკოთ წარსული წელიწადი, ბევრს ვერაფერს სანუგეშოს დავინახავთ. ეს ახალი ამბავი არ არის. ამ მხრით შარშანდელი წელიწადი ბევრს წინათ წარსულ წელიწადს ჰგავს და ვერაფერს დაგვამუნათებს. პირიქით, კარგად რომ მოვუჩხრიკოთ ავლა-დიდება, ავი და კარგი, იქნება შარშანდელი წელიწადი სხვა წლების წინაშე უფრო პირშავადაც გამოვიდეს. არც საკვირველია, წყარო ცხოვრებისა თავისად და თავისგნით არა სჩქეფს, არა ერთი და ორი ნახირი ღლეშუდამ შიგ ფეხს იბანს და რად უნდა გიკვირდეს, რომ იგი წყარო მღვრიეა. მბაძს მბაძი არ დაეღევაო, ნათქვამია, და ჩვენც თვითონაც ჩვენს სა-

კუთარს ჭუჭყიანს სარეცხს შიგ ვალბობთ დიდის გულმოდგინებით და, მოდით, წყაროს მოჰკითხეთ, რატომ წმინდა არა ხარ-თქო.

ამიტომაც შარშანაც, როგორც წინა წლებშიაც, იგივე შური და მტრობა იყო გააფთრებული. ძმა ძმას ველარა ჰნდობია, მამა შვილსა, შვილი მამას, მეზობელი მეზობელს, მახლობელი მახლობელს, მეგობარი მეგობარს – განა ეს ცხოვრებაა და არა ჯოჯოხეთი!.. ჩვენ ეხლა ისე გავვიხდა საქმე, რომ იმას კი აღარა ვჩივით – რაც გვაკლია, ის შევიძინოთ, არამედ იმას, რომ რა ნაგავმა და მტვერმაც აღგვაკვსო, ის გავვაკოთ და შემოვიბერტყოთ. კიდევ ერთის ფეხის წინ წადგმა იქნებოდა, კიდევ ღვთის წყალობა იქნებოდა, რომ ამის დარდსა და ზრუნვას შევდგომოდით, ცოცხნი აგველო ხელში ამ ვაი-ვაგლახის გასაგველად. ჩვენდა საუბედუროდ, ვერც ეს შევიძელით. მაშ რით უნდა ვინუგემოთ დღეს, ან სახვალოდ რა იმედი წავიმძღვაროთ ხალხის მოგვრისათვის? თვითვეული ჩვენგანი ჰკვნესის ზნედაცემულობისაგან, ჩვენის ზნეობითად წაწყვედისაგან და იმედგადაწყვეტილი, სასოებადაკარგული, ვაებით ვიძახით: ღმერთო, სად მივდივართ და რა ბოლო მოგველისო.

მართალია, ყოველივე ეს ვერაფერი საახალწლო გოზინაყია. ჩვენც იქნება მეტი მოგვივიდა, რომ ამისთანა დღესასწაულს ესეთი უღნენი და საგოდებელი ფიქრები ავუშალეთ ჩვენს მკითხველს. ამაზე სხვას აღარას ვიტყვით, თუმცა სათქმელი კიდევ ბევრია. ქართველს კაცს, ჩვენდა საუბედუროდ, საქმე ისე გაუხდა, რომ „კარგი რამ სჭირდეს, უნდა უკვირდეს, ავი კი რა საკვირველია“. ამ ყოფაში ჩავარდნილი ვართ, თუ მთელი ძალ-ღონე არ მოიკრიბა და ამ საფლობილად არ ამოვიდა, ფონს ველარ გავა დღეს. ჩვენს დღევანდელს ჭირს ფისვი აქა აქვს გამდგარი, შიში მერმისისა აქედამ მოჰქრის. მოდით და პირში წყალი ჩაიყენეთ და ნურას იტყვიოთ, აქაოდა ახალი წელიწადიაო! სატკივარი არას უზამს კაცს, თუ მიზეზი თავის დროზე გაუგო. თვალეზე ხელის მიფარებას თავის დღეში არავისთვის ხეირი არ მოუტანია. ჭირი დანახული სჯობს დაფა-

რულსა, თუმცა ორივე ჭირია და არც ერთი არ არის სანატრელი.

ამ მხრით წარსულმა წელმა არაფერი სანუგეშო არა მოგვცა რა არც სადღეისოდ, არც სახვალოდ. მაგრამ ჩვენ მიერ უმადურობა იქნება, რომ მარტო წყევლით და ქოქვით გავისტუმროთ ეს წელიწადი და არავითარი კეთილი მისი მადლობით არ მოვიხსენიოთ. ამ წელიწადმა სხვაფრივ და სხვა ფარგალში ერთი იმისთანა მაგალითი გვაჩვენა, რომლის მზგავსს მისებრ უნუგემო წინა წლებში ვერას ვიპოვიოთ.

ერთი ეს არის, რომ 11-ს სექტემბერს ჩვენ გადავუხადეთ პანაშვიდი ჩვენს გმირებს, რომელთაც თავი დასდეს მამულისათვის კრწანისში ამ ასის წლის წინად. საქმე თვითონ პანაშვიდი კი არ არის, არამედ ის მიზეზი, რომელმაც იგი გამოიწვია. საქმე თვით იგი საგანია, რომელსაც ჩვენ ჩვენი თაყვანი ვეცით და რომელმაც გავგახსენა ჩვენთა მამა-პაპათა თავგანწირული ღვაწლი. ერის დაცემა მაშინ იწყება, როცა იგი ივიწყებს თავის ისტორიას. იმისთანა ამბავი, როგორც კრწანისის პანაშვიდია, უტყვი მთხრობელია ისტორიისა. მან მოგვაგონა, გავგახსენა ერთი დიდებული, თუმცა უბედური ეპიზოდი ჩვენის წარსულისა, მაგისტანა ამბები თვალსაჩინო მასწავლებელია იმისი, თუ ვინა ვართ და საილამ მოვდივართ, რა ვყოფილვართ, რანი ვართ და რა ვიქნებით. გინდათ თუ არა, ამისთანა ამბები ამაებზე ჩავგაფიქრებენ, ამაებზე განაღვლებენ, ამაებზე მიიზიდავენ თქვენს ჭკუა-გონებას, თქვენს ძალღონეს სულისას და ხორცისას და ეს აღამიანის აღმატებისათვის კაი დიდი საფეხურია.

„სჯობს სიცოცხლესა ნამრასსა სიკვდილი სახელგანთიო“, უნებლიედ გავვირბინა ელვასავით ტანში, როცა ჩვენმა უგემურმა ცოცხლად ყოფნამ გავავითვალისწინა ის სახელოვანი სიკვდილი, რომელმაც გაუთხარა წმინდა საფლავი კრწანისის ვაჟკაცთა. ამ უმადლესის გრძნობით გულთაძვრა, სულთაძვრა ერთი იმისთანა დიდებული წამია, რომელსაც კაცი ინატრებს ხოლმე: იყავ და ნუ მომშორდებიო. ეს ისეთი ყოველთშემძლებელი წამია, როცა ჩვენისთანა დაქუცმაცებული ქონდრისკაციც კი ერთი ათად ტანს

იყრის, ერთი ათად დიდდება და აქამდე ქედწახრილი ეხლა თავმოწონებით ყელს იღერებს, ტანში იმართება, თავისს თავს გოლიათად ჰგრძნობს, ჯანი სულისა და ხორცისა ემატება და კაცი კაცად კეთდება.

ადვილად საფიქრებელია, რომ ბევრი სულ სხვა ახალს გუნებაზედ დაბრუნდა შინ კრწანისიდამ, თითქო მკვდარი იყო და გამოცოცხლდა, თითქო აქამდე არ იცოდა, ვინ არის და ეხლა თავისი ვინაობა შეიტყო, თითქო აქამდე ვერ გაეგო, რად გასტირიან წარსულს და რად ემდურიან აწმყოსა და ეხლა შეიგნო. არც ის არის დაუჯერებელი, რომ ყოველ ამისაგან გული მთლად გადმოუბრუნდებოდა. მართალია, ყოველივე ეს ბევრს დარდებს აუშლიდა, ბევრს ნალველს აუჩენდა, მაგრამ იგრძნობდა კი, რომ ეს ნალველი და ეს დარდები უფრო მაცოცხლებელნი და ადამიანის საკადრისნი არიან, ვიდრე მისი წინანდელი უდარდებლობა და უნალველეობა.

განა ყოველივე ეს ცოტაა და რატომ მაღლობით არ უნდა აღვნიშნოთ ამ მხრით მაინც იგი წელიწადი, რომლის განმავლობაშიც ერთი ამისთანა დიდებული წამი გამოვიარეთ. თუ ამ წამმა სამუდამოდ არ გამოგვაკეთა, მცირე ხანს მაინც კაცნი კაცურად გვაცოცხლა.

არა ნაკლებ ღირსშესანიშნავია, 22 ოქტომბერიცა წარსული წლისა. ამ დღეს ვიდღესასწაულეთ ორმოცდაათის წლის მშვიდობიანი მოღვაწეობა თ. რაფიელ ერისთავისა გატარებული სულ სხვა სარბიელზე, სხვა ასპარეზზე. თ. რაფიელი ჩვენი სასიქადულო პოეტია. პოეტის სიტყვა იგი ხელთუქმნელი საგანძურია, საცა ერი ჰპოებს ხოლმე თვისს უკეთესს ნააზრს და ნაგრძნობს, თვისს უკეთესს სულთასწრაფვას, თვისს იმედს და სასოებას, თვისს თავმოწონებელ გულთაძვრას, თვისს ჭირსა და ღზინსა, თვისის ენის და მეტყველების სიკეკლუცე-მშვენიერებას და ერთობ თვისს სულიერს საუნჯეს, იმ საუნჯეს, რომლითაც ერი ერობს, ადამიანი ადამიანობს.

ამბობენ, თქმა და ქმნა ერთი და იგივე არ არისო. მართალია, სიტყვა სხვაა, საქმე სხვაა, შუა უზის დიდი მზღვარი, მაგრამ თ. რაფიელ ერისთავი ერთი იმისთანა იშვიათ კაცთაგანია, რომლის სიტყვა თავისთავად

საქმეა. ეს დიდი მადლი, რომელსაც ბუნება მიანიჭებს ხოლმე თვისთა რჩეულთა და რომელიც თქმას ქმნადა ჰხდის, თ. რაფიელ ერისთავმა მთლად ამსახურა თავის საყვარელს მამულსა, თავის საყვარელს ერსა. იგი ხელთუქმნელი საგანძური გაუნსნა და შიგ წყობილი მარგალიტი გულში ჩაულაგა, შენი შენვე მიიღეო. ჩვენი სანუგეშო და თავმოწონებელი აქ ის არის, რომ თვითონ ერმაც იცნო თავისი ერთგული შვილი და საქვეყნოდ დიდის ყოფით და ამბით მადლი გადაუხადა. ეს ცნობა და დაფასება იმისთანა მშვიდობიანის ღვაწლისა, რომელიც ბუკითა და ნაღარით არა ჰღალადებს ქვეყნად და ზიზილ-პიპილებით არ იმოსება, იმისი ნიშანია, რომ ერი ცოტად თუ ბევრად გონებაშია ჩავარდნილი და იმ გაგებადმდე მიხწეული, რომ ამისთანა სარბიელზე დადებული ღვაწლი უფრო მის მიერ საგრძნობელია, უფრო პატივსაცემელია, უფრო მაღლობის გადასახდელია. ნიშანი ამისთანა აღმატებისა უნუგეშო არ არის.

ამიტომაც არც ამისთანა დღეობა ჩაუვლის ხოლმე ერს უმიძოდ, რომ თავისი თავი კაცურ კაცად არ იცნოს და ამ ცნობამ ჭკუა და გონება უფრო არ გაარჯვეინოს, თვალი ცოტად თუ ბევრად უფრო არ აახილებინოს თავისს თავზე, თავისს გარეშემოზე და გრძნობა საკუთარის ღირსებისა თავისს ფარ-ხმალად არ ახმარებინოს. ამისთანა ამბებმაც იცის ატენა ათასნაირ ფიქრებისა, ათასნაირ ნატვრისა და სურვილისა და საცა ყოველივე ეს დაძრული და ატენილია, იქ არის ცხოვრებაცა.

გვეტყვიან ზოგიერთნი, სამართლიანადაც მეტის მდომნი: ეჰ, ყველა ეს წამი იყო და წავიდაო. იქნება, ჩვენდა სამწუნაროდ, ეს მართალიც იყოს და ერთს წამს ძირიდან თხემამდე კაცურად დაძრული ცხოვრება ისევ თავისს ადრინდელს უქმსა და უფერულს კვალში ჩადგა, მაგრამ ამ ცხოვრებით თუნდ წუთიც გვეცხოვრა, ეგეც ჩვენთვის დიდი ღვთის წყალობაა. ჩვენს მდგომარეობაში კაცურად ცხოვრების წუთსაც კი თავისი სწა და ფასი აქვს. მარტო შეიძლება ამ შემთხვევაში გულის ტკივილით ითქვას: „ჰე, წამო სინარულისავ, ესე სწრაფად რათ წარხვედი“, და თუ დანანებას ამის-

თანა შემთხვევაში ადგილი აქვს, ის უნდა გვეჩვენებოდეს, რომ ყოველივე ეს წამი იყო და წავიდა.

ასეა თუ ისე, 22 ოქტომბერიც საკმაო საბუთს გვაძლევს მაღლობით მოვიხსენიოთ აწ განსვენებული წელიწადი და ლოცვა-კურთხევით ცხონება ვუთხრათ, მით უფრო, რომ ამის თქმას ბაჟი არ ადევს. სხვას ნუღარას მოგვითხავთ, თორემ დანარჩენში ეს წელიწადიც ისეთი პირშავი გამოვა, როგორც ბევრი სხვა წელიწადი ყოფილა და მით ახალწლის ტკბილ გოზინაყში ნუ გაუურევთ სიმწარეს ბალღამისას. ის ბალღამი უიმისოდაც არ დაჰმაღავს თავის თავსა და თავის გამოსაჩენად მუშადღებებც ეყოფა: უქმესა და ღღესასწაულს მაინც ნუ გაგვიმწარებს.

[1896 წ.]



## ნარკვევი (ქურნალ-გაზეთებიდაც)

(რუსეთის გავლენიანი გაზეთები ამხედრებულან ჩვენს წინააღმდეგ)

წარსული წლის 17 დეკემბრის აღმოსავლეთისა და დასავლეთის საქართველოს თავადაზნაურობათა კრება მეტად შესანიშნავი რამ იყო. ერთსა და იმავე დროს ქართველთ ერის უმაღლესმა წოდებამ საქვეყნოდ განაცხადა დიდი ხნიდამ გულში ჩაკლული საყვედური. ეს საყვედური იყო მიმართული რუსეთის ბეჭდვითი სიტყვის წარმომადგენლებისადმი. მთელი ჩვენი მხარე მოთმინებდამ გამოიყვანა მან, რომ ზოგიერთი „ვიტომ“ კი არა, მართლაც გავლენიანი გაზეთები „ამხედრებულან ჩვენს წინააღმდეგ და ეს მით უფრო შემაძრწუნებელია, რომ ასეთი ამხედრება, საზოგადო აზრით, ჩვენ სრულიადაც არაფრით გამოგვიწვევია, შემაძრწუნებელია სიცრუე მათ მიერ მოგონილის ამბებისა“.

ამერეთის თავადაზნაურობათა კრებაზედ ლაპარაკობდა კრების ერთ-ერთი წევრი (თ. დ. გურამიშვილი), ხოლო იმერეთისაზედ თვით თავადაზნაურთა წინამძღოლი,\* სწორედ ამიტომაც სხვადასხვანაირად უნდა შევხედოთ მათ სიტყვებს. რასაკვირველია, ის, რაც შეეძლო ეთქვა წევრს კრებისას, როგორც არაოფი-

\* წერეთელი სვიმონ – იმერეთის თავდაზნაურთა წინამძღოლი, ქუთაისის გუბერნიის თავდაზნაურთა მარშალი. უნდა შევნიშნოთ, რომ „ვიკრიის“ № 10-ში მოყვანილი სიტყვა თ. წერეთლისა 17-ს დეკემბერს იყო წარმოთქმული სწორედ იმავე დღეს, რა დღესაც თ. გურამიშვილის სიტყვა

ციალურს პირს, არ შეეძლო ეთქვა ოფიციალურს პირს, წარმომადგენელს თავადაზნაურობისას.

თ. გურამიშვილი სავსებით ვერ შეეხო სავანს. მარტო ჟურნალ-გაზეთები რომ იყვნენ ჩვენს წინააღმდეგ ამხედრებულნი, მარტო იმათი კორესპონდენტები რომ იყვნენ „ცრუკატონნი“, რომელნიც (არარსებულის) კართაგენის დამხობას ჰლაძიან, მაშინ ხომ ამას ადვილად მოვითმენდით და ყურადღებასაც არ მივაქცევდით.

„ეს გაზეთები მოურიდებლად ურჩევენ მთავრობას ჩვენს სამსახურიდამ განდევნას,

როგორც არასაიმედო ელემენტისას და თითქმის განძევებასაც კი იმ ქვეყნიდამ,

რომელშიაც, ნებითა უფლისათა, რამდენსამე ათასის წლის განმავლობაში ვცხოვრებთ“.

რომ ეს მათი რჩევა რჩებოდეს ხმად მლალადებლისა უდაბნოსა შინა, მაშინ ჯანდაბას მათი თავი და ტანი, მაგრამ უბედურება ის არის, რომ ეს ასე არ არის. რაც უნდა ოფიციალურად დამცირებული იყოს ბეჭდვითი სიტყვის მნიშვნელობა, მას თავისი გავლენა მაინც აქვს. რომ რუსეთის ბეჭდვით სიტყვასაც აქვს გავლენა, რომ მათ „ცრუკატონურ“ გოდებასაც ნაყოფი მოაქვს, ეს ყველამ კარგად იცის და კარგად იცის თვით თ. გურამიშვილმაც. სხვა რომ არაფერი, რა დღესაც კრება იყო, იმ დღის ნომერი აელო ჩვენის გაზეთისა და იქ აი რას ნახავდა: „იურიდ. გაზეთ“-საც გაუგონია, რომ უმაღლესს მთავრობას განზრახვა აქვს, აღკრძალოს კავკასიის მკვიდრთა სახელმწიფო სამსახურში მიღება კავკასიაშივე“. ნუთუ არ ახსოვდა თ. გურამიშვილს, რომ „კვალის“ ერთ-ერთ ნომერში მოყვანილი იყო კავკასიის რკინისგზის ლიანდაგის მართებლობისაგან მიღებული ცირკულიარი, რომელშიაც კავკასიის მკვიდრთა სამსახურში მიღება აკრძალული იყო? ნუთუ არ უღევნებია თვალყური ზოგიერთ მოხელეთა მოგზაურობისათვის ჩვენში? დაბოლოს, ნუთუ არ იცის, რომ თითქმის ყოველთვის, ყოველ დაწესებულებიდან ისტუმრებენ უკან ჩვენს უნივერსიტეტდამთავრებულ ახალგაზრდობას და სამსახურში არ იღებენ? ზოგიერთი მათგანი ისეთს გულწრფელობასაც

იჩენს, რომ გულახდილად ეუბნება მიზეზებს და ერთი მათგანი დაცინვით ეუბნება ხოლმე, თქვენი დაწესებულებანი გაქვთ, იქ მიბრძანდითო. განა არ იცის, რომ იმათ, რომელთაც სამსახურში იღებენ, ორ-სამ წელიწადს უჯამაგიროდ ამსახურებენ და მერმე ტომსკში ანუ პერმში აღმოუჩენენ ადვილს? განა ეს ყოველიფერი „ნოვოე ვრემია“-ს კორესპონდენტი „კავკაზეცის“ რჩევა-დარიგება არ არის განხორციელებული?!

თ. წერეთელს, რასაკვირველია, ასეთის საგნების შეხება არ შეეძლო. მისი წერილი დამშვიდებულია და ოპტიმისტური. მიუხედავად ამისა, მე მგონია, თ. წერეთლისა და თ. გურამიშვილის სიტყვას ერთი და იგივე აზრი აქვს. ერთის აღმფოთებული, აღელვებული სიტყვა იმასვე ამბობს, რასაც მეორესი ღინჯი და დაწყნარებული. მართლაც, წარმოიდგინეთ, თქვენმა მეგობარმა გიდალატათ და ეს თქვენ ნამდვილად შეიტყვეთ. განა მაინც არ იტყვიან: არა, ამას მე ვერ დავიჯერებ, ეს შეუძლებელია, ჩემი მეგობარი ვერ მიდალატებდაო?


რამდენი საყვედური, რა ძლიერი გულიდამ ამოსკენილი ოხვრა ისმის ამავე სიტყვებში. მისი რწმუნება, რომ ასეთი საზიზღარი საქციელი მეგობართაგან შეუძლებელია, იქამდის მიდის, რომ ამასაც კი ამბობს:

„მე ნამდვილად ვიცი და ეჭვიც არა მაქვს, რომ თუ სატახტო ქალაქების გაზეთების მოთავეებმა იცოდნენ ამ კორესპონდენტთა ნაწერების ჭეშმარიტი აზრი, მაშინ ისინი თვითონვე ზიზღით შეაქცევდნენ მათ სამუდამოდ ზურგს“.

მაგრამ ის კი მართალი სიტყვა თ. წერეთელმა, რომ „ის ხალხი, რომელიც ასეთს უსამართლობასა სწერს და ასე მტრულად გვეპყრობა, მხოლოდ თვალებს უხვევს დანარჩენს, ვითომ პატრიოტები არიან; მაინც მათ ვერ მოუხერხებიათ თავისს აზრს მიაღწიონ (მოხერხებით კი მოახერხეს, მაგრამ, ნუთუ მათი სამშობლოს სასარგებლოა ესა?) ბოლოს არ შეიძლება არ აღვნიშნოთ ის დიდი განსხვავება, რომელიც არსებობს ამერიკითა მარშლების სიტყვებში. ერთი ამტკიცებდა, ჩვენნი ბრალმდებელნი იმიტომ გვდევნიან, რომ ქართველები კონსერვატორები ვართო. ხოლო მეორემ სიტყვა,

რომ ისინი გვღვენიან, ვინც ცილს გვწამებს, რომ ვითომ ჩვენ სანდო ხალხი არა ვართ, რომ ჩვენ სახელმწიფო ცხოვრების მთავარ აზრთა ვმტრობთ და ამიტომ უნდა გვაკვიწროებდნენო.

[1896 წ. 15 იანვრამდე]



## ფ ე ლ ე ტ ო ნ ი

### ჩვენი უსლანდელი სიბრძნე-სიცრუე

ლექცია პირველი

მ თ წ ყ ა ლ ე ნ ო ქ ა ლ ბ ა ტ ო ნ ე ბ ო  
და მ თ წ ყ ა ლ ე ნ ო ბ ა ტ ო ნ ე ბ ო!

მე არ ვიცი როგორ აღმოვთქვა, რა სიხარული ჰქონდა და გადმოდიხ ეხლა ჩემს გულში, რომ გხედავთ ამდენს ბრწყინვალე გვამს, აქ მობრძანებულს ჩემდა სასმენლად. ბაგენი ჩემნი ნამეტნაობისაგან სიხარულითა ვერ შეძლებელ არიან აღმოებეჭდონ ის, რაც აწ ჩემს გულშია. სწორედ მოგახსენოთ, არც სასურველია. ვშიშობ, რომ ეს გულიდამ აღმოებეჭდვა ჩვეულებად არ გაგიხდეთ, აქაო და ასე ჰქმნაო ლექტორმა. ბაბი ხომ კარგია ზოგჯერ, ზოგჯერ კი ღმერთმა შეინახოს. გულიც არის და გულიც. ვისაც ფაქიზად გული შეინახული არა აქვს, იქიდან ამოსული არც ყოველთვის კეთილსასურნელია, არც ყოველთვის სასიამოვნოდ დასანახი, მაგალითებრ, ბოყინი, ზაფრა და სხვა ამისთანა. ბოყინი, ზაფრა კუჭის საქმეაო, მეტყვეთ, და არა გულისაო. მართალია, მაგრამ გული, გონება და კუჭი ერთმანეთზედა ჰკიდებიან, ნამეტნავად ესლანდელ დროში. ამას მერმეცა ვნახავთ. ეხლა კი უკაცრაოდა ვარ, ამისთანა ცუდგუნებიანი სიტყვა, როგორც ბოყინი და ზაფრაა, ვიხმარე. სიტყვამ მოიტანა, მაგრამ სიტყვამ ისეთი რამ უნდა მოიტანოს, რომ სასიამოვნო იყოს,

ბოყინი და ზაფრა ამისათვის რა გამოსაღვეია. კიდეც მოგახსენებთ, უკაცრაოდა ვარ-მეთქი.

მე ვხედავ, ბატონებო, ჩემმა უკაცრაობამ თქვენ გაგაკვირვათ. ნუთუ ამ სიტყვას თქვენში ლილახანა წაუხდა და ხმარებისაგან განდევნილ იქმნა? არც საკვირველია. მე მგონია, ერთი დიდი საბუთი უნდა გქონდეთ, ეს უკაცრაობა ჯვარს აცვათ და საიქიოს გაისტუმროთ. თუ ბოყინი და ზაფრა საბოდიშოა, თუ ამისთანა უმანკო სიტყვებისათვის უკაცრაობას მოვითხოვთ, მაშინ ხომ ჩვენმა სასიქადულომ “კვალის” რედაქციამ თავისი დუქან-ბაზარი უნდა ააღაგოს, რადგანაც წლითიწლობამდე, ყოველს საათს, წამდაუწუმ ამ უკაცრაობის თქმას მოუწდება. როდისღა მოიცლის იმ მშვენიერ და ტკბილ უმვერსიტყვაობისათვის, რომლითაც ასე სამართლიანად იტაცებს ჩვენს სულსა და გულსა და რომელიც ობოლ მარგალიტებსავით მოეყვანა ამას წინად „დავიწყებულ მწერალს“ „ივერიაში“.

მე მესმის ბატონებო, თქვენი საბუთიანი შიში, რომ ამ უკაცრაობას არ გადააყოლოს ბ-ნმა გ. წერეთელმა იგი ლაზათი, რომელიც ასე ამშვენიებს „კვალს“ და მით არ მოგაკლდეთ სიამოვნება „კვალის“ კითხვისა. მართლაც, უკაცრაობის ცხრილში რომ გაატაროთ „კვალი“, რაღა დარჩება ძირს, რომ ვიკითხოთ, ვისწავლოთ და ვისიამოვნოთ ისე, როგორც დღეს კვითხულობთ და ვსწავლობთ და ვსიამოვნებთ. რაკი ეგრეა, მეტი რა გზაა, მეც მოვიზრი თავს ამ შიშის წინაშე და თქვენთან ერთად პანდურსა ვკრავ ამ დროგარდასრულს უკაცრაობას, ხომ ხედავთ, ბატონებო, რა დრო და ჟამის ამყოლი და მორჩილი კაცი ვარ. ტყუილად კი არ არის ნათქვამი, დრონი მეფობენო. დიად, მე არა ვგვევარ იმ ვილაც “დავიწყებულ მწერალს”, რომელმაც „ივერიაში“ რაღაც ძველს ზრდილობასა და მართებულობაზე ჩამოაგდო ლაპარაკი. იმიტომაც არის დავიწყებული, რომ ამისთანა ძველძულეებზე, ხარახურაზე ჰლაპარაკობს. უკაცრაობა მკვდარი სიტყვაა და დეე მკვდარი მკვდარს აკვიდოთ – საფლავამდე წაიღოს. მე კი ახალი კაცი ვარ და არარა ახალი არ მეუცხოების.

ერთის სიტყვით, რა მეტი გზაა, დაგეთანხმებით და ამ მეტხორცს უკაცრაობას თავისს ძველ პატრონებს ჩავაბარებ. იქნება გეგონოთ, ამით მიხლოდეს თავი მოვაწონო გ. წერეთელს, რომ მესამე დასში შესასვლელად თავისის ბედნიერის ხელით კარი გამიღოს. სულაც არა, მე უფრო შორს მიხდა გადავაბოტო. თუ ღმერთი შემეწვევა და მე ჩემით მოვაწონეთ თავი, მე მეოთხე დასს შევადგენ და მეთაურად გავუხდები. ოთხი სამზე ერთით წინ არის და მეც მიხდა, თუ ვიქნები, წინ ვიყო. ბ-ნ გ. წერეთლის დიდი ღვაწლი მით არის დაუვიწყარი, რომ ამისთანა ადვილი გზა გვიჩვენა წინაურობისა: საქმე ეხლა თვლაშია, მეოთხეს მეხუთე მოჰყვება, მეხუთეს – მეექვსე და წავა ესე, მინამ ადამიანს სათვალავი შემოაკლდება. ქართული პროგრესი ეს არის და ევროპისა კი რა მოგახსენოთ.

მეტყვით, რომ მეთაურობას ცოტა რამ სხვა ყუათიანი საფანელიც უნდაო. არ ვიცი, რად უნდა გეგონოთ, რომ მე ამ საფანელს მოკლებული ვარ. მე როგორც ვხედავ, მინამ ჩემს განზრახულს საგანზე დავიწყებდე ლაპარაკს, მომიხდება მოგახსენოთ ჩემი ვინაობა: რა ვარ და რას უნდა მოელოდეთ ჩემგან. მე ბატონებო, ასეთ მჩვარში ნუ გამახვევთ. მე ბევრი რამ კარგი მჭირს. ვილაცამ წამოროშა, რომ თავისის თავის ქება დამპალ კიტრადაც არა ჰღირსო. სტყუის, თქვენმა მზემ. მაშ რამ ააცოცა ჩვენი ბრძენი გ. წერეთელი და დაასკუპა მუმიასავით “მესამე დასის” თავზე? ამისთანა ცხადს მაგალითს მარტო ბრმა თუ ეურჩება და იმედი მაქვს, თქვენში ბრმა არავინ არის, ღვთისა და თქვენის წყალობითა.

ერთის სიტყვით, მე ბევრი რამ კარგი მჭირს. ჯერ ერთი, რომ ბრძენი ვარ, თუმცა თ. მ. მაჩაბლისავით მარტო მე ვიძახი ჩემს თავზე ამას და სხვისაგან ჯერ არავისაგან გამიგონია. რა ვუყოთ, რომ სხვას არ მივაჩნივარ ბრძნად? გალილეი ბრძენი კაცი იყო და კინაღამ ცეცხლში არ დასწვეს, როგორც სულელი. განა გალილეი ბრძენი არ იყო!.. თუ მაშინ ვერ იცნეს, ეხლა ხომ იციან!.. მე და თ. მ. მაჩაბელი ამითი ვნუგეშობთ.



მეორე, რომ თუ ლაპარაკი გავაბი, ცხრა უღელი ხარიც ვეღარ დამაყენებს, თუნდა ენაზე წისქვილის ქვაც დამკიდლოთ. ნუ იტყვით, რომ ყბედი ვარ, ან ენის ქავილი მჭირდეს, დღეს ჩვენში ისე განხირებული, როგორც ინფლუენცია. ნურას უკაცრაოდ, თუ თ. მ. მაჩაბელი ყბედია, მეც დეე ყბედი ვიყო. აბა თ. მ. მაჩაბელზე ვინ იტყვის ყბედიაო. ცოდვა არ არის იმაზე ეს თქვას? ენა ძირში არ უნდა მოეჭრას ამის მთქმელს!.. თუნდ ვთქვათ, ისიც ყბედი იყოს და მეც. მე ამისი არ მეფიქრება. ამისთანა კაცთან ჯოჯოხეთიც სამოთხეა, თუ ნამეტნავად ყურები დაცმული გაქვს. არ მეფიქრება-მეთქი, იმიტომ რომ თქვენ ისე გაგაჩვიათ და დაგაჩვიათ თ. მ. მაჩაბელმა, რომ მის მერმე ძნელია ვინმე დაიწუნოთ, აქაო და ყბედიაო. ამ სახით თქვენისა და უფრო თ. მ. მაჩაბელის წყალობით, იმედი უნდა ვიქონიო, რომ მეც იმოდენა მოთმინებას შემაწევთ, რამოდენადაც შეაწევლით ხოლმე ჩემს წინამორბედს თ. მ. მაჩაბელსა, მით უფრო, სად მე და სად ის, რაკი ყბედობაზე მივარდება საქმე. სად კუის ცოცვა და სად გაჭენებული ცხენი. აწი-აწოც რომ ვიძახო, ვერ მივეწევი. ვერ ვიტყვი, რომ ყბედობა ჭირი იყოს და თუ ჭირია, შეჩვეული ჭირია, ნამეტნავად თქვენთვის.

მე ვამბობ თქვენთვის, იმიტომ რომ ქართველები ხართ და ქართველებს განა ერთი და ორი ბედნიერი შემთხვევა ჰქონიათ გეწვნიათ მთელი სიტკბოება ლაპარაკისა, როცა თ. მ. მაჩაბელი მოხსნის ხოლმე პირს თავის გუდას. ამიტომაც მოგახსენეთ, თქვენ ამ ჭირს შეჩვეული ხართ-მეთქი და შეჩვეული ჭირი ხომ შეუჩვეველს ღზინსაც სჯობია. აი, თუნდა ყბედადაც მიმიჩნიოთ, ჩემი ნუგეში რაშია. მართალია, ბევრჯერ მოუბეზრებია თქვენთვის თავი თ. მ. მაჩაბელს და გიკვილიათ: კაი, თუ ღმერთი გწამს, გეყოფა, გაგვეცალყო. მაგრამ შენც არ მამიკვდე. იმას წარბიც არ შეუხრია, მითამ აქ არაფერიაო. ფეხიც არ მოუცვლია, ისე მდგარა, როგორც გაუტეხელი ციხე. მეც თუ ასე მოგაბეზრეთ თავი და დამიკვილეთ, წადი, მოგვშორდიო, რა გგონიათ? განა მე იმაზე ნაკლები ვაჟკაცი ვარ, რომ კალთები ავიკრიბო და გავიქცე. მე თ. მ. მაჩაბლის დარიგებული ვარ: თუ უნდათ, თვითონ წავიდნენ და

სულ ერთიანად გალაგდნენ, შენ შენსას ნუ დაიშლი, თუნდაც მარტო დარჩეო. ეს უბრალო კაცის სიტყვა ხომ არ არის, რომ ერთს ყურში შეუშვა და მეორედამ გაუშვა.

მესამე ჩემი კარგი ის არის, რომ როცა გული ფულურო მაქვს და შიგ არა არის რა, გულში ცემა ვიცი, როგორც თ. მ. მაჩაბელმა, მითამ და იმის ნიშნად, რომ ვიწვი და ვიდაგვი ქვეყნისათვის. მე მირჩიეს, რომ სჯობს ხახვი იქონიო ჯიბეში და როცა მაგისთანა რამ დაგჭირდეს, თვალები ხახვით მოისრისო, ცრემლები მოგედინება და უფრო დაგიჯერებენო. მაგრამ შენც არ მამიკვდე; სად გულში ხელის ცემა და სად ხახვი!.. გულში ცემა ვაჟკაციური საქმეა. ხახვი რას მიქვია. ეს ჩემი ჩვეულება გულში ხელის ცემისა, ეგრეთ კარგად შეთვისებული თ. მ. მაჩაბლისაგან, იმიტომ მოვიტანე აქ, რომ გაგაფთხილოთ და ხელის გაშლაზე შორს იყვნეთ ჩემგან. რა ვიცი? იქნება ხელის ქნევაში, როცა ძალიან გავფიცხდები, ვეღარა გავიგო რა და ვისმე ხელი მოგახვედროთ. გთხოვთ, თუ ეს მოხდა, მეტის-მეტს ჩემს გულისტკივილს მიაწეროთ და სხვას არაფერსა. რა ვქნა? გულში რომ ნაპერწკალიც არ იყოს, მაინც ხანდისხან დამჭირდება გაჩვენოთ, რომ შიგ გახურებული თორნეა. თორნე ხომ იცით: პურს არსებობისას აცხობს.

ახლა იმას იკითხავთ: რაზე გააბი ლაპარაკი ასე ქსელსავით და აღარ ათავებო. მასზე, ჩემო მოწყალე ქალბატონნო და ბატონებო, რომ ხვნაში პირობის დადება სჯობს, თუ გინდა, რომ მკაში არ წამოგედანონო. ეხლა რაკი გამოგემცნაურეთ, მე აღარაფრის შიში არა მაქვს. უსათუოდ ჩემთან ერთად იტყვით, რომ მე, ესე იგი თქვენს ყურმოჭირილს მოსამსახურეს, ყოველივე ის სიკეთე მჭირს, რაც საჭიროა მეოთხე დასის მეთაურობისათვის. ხუმრობაა, ერთს კაცს წილად ჰრგებოდეს უმკერსიტყვაობა გ. წერეთლისა, ყბედსიტყვაობა თ. მ. მაჩაბლისა, ფულურსიტყვაობა თ. ი. მაჩაბლისა! მართალია, ზოგიერთი სწავლული და მეცნიერი ამტკიცებს, რომ ეს სამივე ერთად დომხალსავით რომ აურიო, კარგად დაზილო და ერთს კეცზე გამოაცხო, ის გამოვაო, რასაც რუსები „ნულს“

ეძახიან, ფრანგები „ზეროს“ და ქართველები ილია ხონელს. მაგრამ სცდებიან, ნუ გჯერათ. ამ სამის კაცის ღირსება მარტო მე მარგუნა ბედმა და სამება იგი, ზელით თუ გათქვეფით ერთ-არსებად ქცეული, მარტო მე ვარ!.. მე ვარ-მეთქი!.. ხომ ხედავთ, რაკი „მე“ ვთქვი, გულში ისე ვიკარ ხელი, რომ კინალამ გადავიქეცი. ასე იცის თ. ი. მაჩაბელმაც, როცა თავისთავს ახსენებს და თავისს „მეს მიეყუდება ხოლმე, როგორც ბოდსა. ეხლა გკითხავთ თქვენ: აბა რა მიმიგავს რუსულს „ნულს“, ფრანგულს „ზეროს“ და ქართულს ილია ხონელს?

მე გავათავე, რაც სათქმელი მქონდა, მინამ შევუდგებოდი ჩემს განზრახულს საგანს. იქნება გიხარიათ კიდევ, მაღლობა ღმერთს, ძლივს გაათავაო. მერწმუნეთ, მე თუ აქ ვიღწვი, მარტო თქვენის გახარებისათვის. მარტო ერთი რამ მედარდება. მე – ჩემის თავის ამბავი რომ ვიცი – თუ ერთი ალვირი მივუშვი ჩემს ენას, ხშირად მოგინდებათ ნატვრა: უჰ, თქვენი ჭირიძე, როდის გაათავებსო. მაშასადამე, ხშირად მოგეცემათ მიზეზი გაიხაროთ, – მაღლი უფალსა, ძლივს არ გაათავაო! ეს გახარების განშირება და, მაშასადამე, გაიფევა ვერაფერი თამასუქია ჩემთვის. ვიცი, კარვად ვიცი, რომ ოდეს ტურფა გაიფედეს, აღარა ღირს არცა ჩირად. მაგრამ გულს არ გავიტეხ. საცა თევზი არ არის, იქ კიბოს თევზად ჰხდიახო, იტყვიან რუსები. „დრო მოვა და გატკბილდების, ხილად სჭამენ პანტის ჩირსა“, ამბობენ ქართველები. მეც ვითომ კიბო ვარ უთევზურ ადგილას ან პანტის ჩირი უხილო ქვეყანაში. გთხოვთ, გამიტანოთ და დამჯერდეთ, რაცა ვარ.

ეხლა დროა შევუდგე ჩემის ლექციების საგანს. სმენა და გაგონება!.. საგანი ჩემის ლექციებისა არის ეხლანდელი ჩვენი სიბრძნე-სიცრუე.

იქნება ამ სათაურმა გაგაოცოთ. მე იმდენი თქვენი გაოცება არ მინდა, რამდენიც ის, რომ ამ უთავბოლო დრო-ჟამს, როცა ჩვენში დავთრები აირია, როცა ძალღს, უკაცრაოდ არ ვიყო – პატრონი ვერ უცვნიდა და პატრონს ძალღი, შესაფერი სახელი რამ დაერქვას. მე ვამტკიცებ, რომ ეხლანდელი დრო დროა სიბრძნე-სიცრუისა, მე ვამბობ ჩვენი, ესე იგი ქართველების დროა-მეთქი ასეთი. სხვებთან მე საქმე არა მაქვს.

ყველა ერს ეხლანდელს დროში იმდენი საკუთარი თავში საცემი აქვს, რომ ძნელია სხვისთვის მოიცალოს ვინმემ. მაინც და მაინც, დეე სხვამ თავისი იცოდეს, ჩვენ ჩვენი უნდა შევიტყოთ.

გთხოვთ დაიხსომოთ, რომ ამ საგანს პირველად მე მივეკარე, ეს საგანი პირველად მე აღმოვაჩინე, თორემ ბოლოს, როცა მე ამით სახელს ვიშოვი, ბ-ნი გ. წერეთელი წამომეცილება, სახელს პირველობისას ის დაიჩემებს და სადაოდ გამიხდის საქმეს. ესეთია მისი საქებური ზნე-ჩვეულება.

რას ჰნიშნავს ეს ორი სიტყვა – სიბრძნე-სიცრუე, ერთმანეთზე გადაბმული? ამისი პასუხი, ამისი ახსნა შორილამ დაწყებას ნდომულობს. ვეცდები ჯერ ყველაზე უწინარეს მოგახსენოთ, რა აზრი უნდა ჰქონოდა ამ ორს ერთმანეთთან განუყოფელად ჩართულს სიტყვას უწინ. ეს ახსნა მოგვინდება, რომ წინანდელი სიბრძნე-სიცრუე ახლანდელს პირისპირ წავუყენოთ და მით გავიადვილოთ გაგება, ეხლანდელი სიბრძნე-სიცრუე რით არის განსხვავებული. ჰხედავთ, ბატონებო, რა მეცნიერულ გზით მივდივარ? მაშ!.. განა ტყუილი გეგონათ, რომ ვთქვი, ბრძენი ვარ-მეთქი. ბრძენი ვარ, მაშ რა ჯანაბა ვარ!

საბა ორბელიანმა რომ თავისი ზღაპრები დასწერა, სიბრძნე-სიცრუის წიგნი დაარქვა. მე ხშირად ჩაფიქრებივარ ამ სახელს წიგნისას. მართლაც, სადაც სიბრძნეა, იქ სიცრუეს რა ხელი აქვს? სიბრძნესთან სიცრუე რა მოსატანია? რა სიტყვის მასალაა? რა უგავთ ერთმანეთს? საბა ორბელიანი – ეს ბრძენი, დარბაისელი კაცი, რათ იკადრებდა სიბრძნეში გაერია სიცრუე? ან რა სახარბიელო სახელია სიცრუე?

მე ვფიქრობ, რომ საბა ორბელიანს ამის თქმა უნდოდა: მე ზღაპარს გეუბნები და სიბრძნეს კი ვამცნებო. ზღაპარი მოგონილი ამბავია, არამართალი, მაშასადამე, სიცრუეა. ამ მხრით წიგნი საბა ორბელიანისა სიცრუეა. ის სიცრუე კი არა, რომელიც სწამლავს და ჰმხამავს ადამიანს და სიცრუის მთქმელს უფრო სთხრის და აუწმინდურებს, ვიდრე სხვას. ის სიცრუე კი არა, რომელსაც აუღია ურცხვად თავი და ქურდულად იგბინება გესლიან მორიელისავით და რომელიც ასე საზიზღარია

და სამართლიანად დევნილი ყოველ პატიოსან კაცისაგან. ის სიცრუე კი არა, რომელსაც ბუდე გაუკეთებია ჩვენს სასიქადულო „მესამე დასის“ ჟურნალში, ბ-ნი გ. წერეთლის თავმოსაწონებელ „კვალში“, და რომელშიაც ბ-ნი გ. წერეთელი კრუხადა ზის და სჩეკს ტყუილების წიწილებს და ყოველ კვირა გამოჰყავს იარბუკაზე გასასყიდად.

საბა ორბელიანის სიცრუე – უჰ, რა ცუდი სიტყვაა! ნეტავი ეს სამი სიტყვა ერთმანეთზე გადასაბმელი არ იყოს!.. საბა ორბელიანის სიცრუე-მეთქი სულ სხვაა. საბა ორბელიანის სიცრუე ზღაპარია, არაკია, იგავია. იგავი, არაკი, ზღაპარი იმისთანა სახეა, კანია აზრისა, რომელიც საჭკუო და საზნეო ჭეშმარიტებას ზედმიწევნით გვიხატავს ხორცმესხმულად, ჭკუას გვასწავლის, გვარიგებს, ზნეს გვიწურთნის, ავსა და კარგს გვანიშნებს ერთმანეთში გასარჩევად. თუ საბა ორბელიანისებური ზღაპარი, არაკი ამას არა სჩადის, განზრახვად, სავნად კი სწორედ ეს უნდა ჰქონდეს, რომ ზღაპარი, არაკი, იგავი თავისს მიზეზს არსებობისას მოკლებულ იქნება. ამ მხრით ზღაპარი, არაკი, იგავი სიბრძნეც არის და სიცრუეც. სიცრუე თვითონ ამბავია, სიბრძნე – შიგ ჩასახული აზრია. ერთიც, მეორეც და მესამეც ხელოვნური ხორცთსხმაა, საჭკუო, საზნეო სწავლა-შთაგონებისა, განსახოვნებაა აზრისა, ისეთი განსახოვნება, რომელიც მარტო შემოქმედებითის ნიჭის საიდუმლოებას შეადგენს.

ჩვენი ზღაპარი ტყუილად კი არ იწყება „იყო და არა იყო რათი“. „იყო“ შიგ ჩასახული აზრია და აზრი ხომ ყოველთვის ყოფილა, არის და იქნება. „არა კი იყო რა“ ეკუთვნის თვით ამბავსა, რომელიც არც ყოფილა და არც არის. ამიტომაც არაკი, რომელშიაც ცოცხლად, ცხოვლად არის ჩასახული აზრი, იზიდავს ადამიანის გულისყურს იმდენად, რომ თვით არაკის სიცრუეც კი მართალი გგონია და სულ გავიწყდებათ, რომ ყურს უგდებთ მოგონილ ამბავსა. ამ სასწაულს სჩადის ხელოვნება.

მე გგონია, რომ თვით სიტყვა „არაკი“ წარმოდგარია „არა კი იყოდამ“, მხოლოდ შემოკლებულია.

აქაც გთხოვთ, მემოწმეთ, თორემ ამასაც ხელიდან გამოძლეჯს ჩვენი გ. წერეთელი. ეგ სიტყვა, პირველად მე ავხსენიო და დავიღუპე ხომ კაკალი კაცი. მესამე დასი ხომ დაუჯერებს და დაუჯერებს და ერთს ადღზე კიდევ მაღლა აასკუპებს თავისს მეთაურს.

როცა მთქმელი ასე იწყებს ზღაპარს: „იყო და არა კი იყო რაო“, თითქო თავიდამვე ჰსურს გაუწყოთ, რომ არყოფილს, არარსებულს ამბავს გეუბნებით, ხოლო სულს ადევნე გულისყური და არა ხორცსაო, აზრსა და არა ამბავსაო, რადგანაც ამბავი მარტო აზრის გამო-სასახავად არის აქ ჩართული და მოგონილიო. ამიტომაც, თუ ზღაპარს, არაკს, იგავს აზრი არა აქვს, უგემურია, უმარილოა, როგორც ოხუნჯობა კევილეჭია „გზა-კვალისა“, ამ „კვალის“ უქვითვირო და ბურბუმელა დედაბურჯისა.

ზღაპარი, არაკი, იგავი მხოლოდ მაშინ აიყოლიებს ხოლმე გატაცებით ადამიანის გულისყურს, როცა გამცნებთ რასმე საჭკუოს და საზნეოს მართალს, რომელიც ისე მიშვლად, ხორცმეუსხმელად. უსახოდ, უსურათოდ, უფერადოდ ყველასათვის ადვილად დასანახი არ არის. ვიმეორებთ: სწორედ ამიტომ ზღაპარი, არაკი, იგავი ერთსა და იმავე დროს სიბრძნეც არის და სიცრუეც, სიბრძნე სულით, სიცრუე ხორციით. აქ სიცრუე ხატებაა, განსახოვნებაა სიბრძნისა. ამიტომაც ესეთი სიცრუე არამცთუ ცოდვაა, ასე სამართლიანად საზიზღარი კაცთა ურთიერთობაში და ასე მოწონებული „კვალში“, არამედ მაღლია, რომლითაც ასე გამოჩენილნი არიან ეზოპე, ლაფონტენი, გრიმები – ძმანი, ანდერსენი, კრილოვი, საბა ორბელიანი და სხვანი, ამ სახით მქადაგებელნი სიბრძნისა და ჭეშმარიტებისა. თვითონ საღმრთო წერილის იგავნი ამავე ორკვეც თვისებისა და ღირსებისანი არიან.

მთელი ეგრედ-წოდებული სიტყვაკაზმული ლიტერატურაც ამ საფუძველზეა აშენებული: მოგონილის ამბით ცხადჰყოს მართალი. იგიც ამ სათავიდამ მოდის. ამიტომაც ამგვარს ლიტერატურაში არ არის არც ერთი მოთხრობილი ამბავი, რომ მართლა მართალი იყოს, მართლა ნამდვილი იყოს: სულ ადამიანის ფანტაზიით შექმნილია და ისეთის შემოქმედებით ხორცმესხმული,

სულთნასახული, რომ კაცს კი არ ეჯავრება, დიდადაც მოსწონს და ესურვება. ტარიელი, ნესატან-დარეჯანი, ავთანდილ, ფრიდონ, თინათინ არც თავისს დღეში ყოფილან და არც იქნებიან, არც ოდესმე უცხოვრიათ და არც ეხლა სცხოვრებენ, მაგრამ აბა ნახეთ ჩვენი საკვირველი რუსთაველი როგორ სასწაულმოქმედობს ადამიანზე, როცა იმათს ცხოვრებას გვიაძობს, მათის ცხოვრების მაჯისცემას გვატყობინებს!.. შოთამ მის მიერ მოგონილ ამბავს ისეთი სული ჩაატანა, რომ ამ ჭეშმარიტ სულისაგან თვით არაჭეშმარიტი ამბავი მართალი გვგონია. აი ეს საოცარი გარდაქმნა, ანუ უკედ ვთქვათ, ქმნა არყოფილისა ყოფილად, მარტო შემოქმედს შეუძლიან და ამიტომაც ამ ღვთიურს ძალღონეს ქმნისას შემოქმედობას ეძახიან.

დიაღ, ესეთია იგი საიდუმლოება ერთგვარის მადლისა, რომელსაც ზეგარდამო შთაგონება ჰქვია და რომელიც თვით ცოდვილს სიცრუესაც კი მადლს აქმნევინებს ხოლმე და ყურმოჭრილ მსახურად უხდის სიბრძნესა.

კიდევ სხვა მაგალითს მოვიყვანდი ამისთანა მადლიან შემოქმედობისას, ზეგარდამოშთაგონებისას, თუნდა „რუხ მგელს“ გ. წერეთლისას, მაგრამ ვწუხვარ, რომ არვის წაგვიკითხავთ და თავგებს დარჩათ შესაჭმელად. თავგებმა უფრო იციან ამისთანა სანუკბარის ყადრი. რითი ჩამოუვარდება ეს „რუხი მგელი“ კეფხვისტყალსანს? მარტო იმით, რომ აიღებ ხელში თუ არა, გადააგდებ, სხვით ხომ არაფრით! აი ეხლაც გვპირდება გ. წერეთელი, ოღონდ „კვალზე“, ხელი მომიწერეთო და ჩემს ახალს ნაწერს „გულქანს“ მუქთად მოგართმევთო. მოდით და ამისთანა საჩუქარს ზურგი შეაქციეთ! თავგებს ეხლავე სუნი აუღიათ, კბილებს თურმე ჰლეწენ და სიხარულით იძახიან: რა გვემველებოდა, რომ ბ-ნი გ. წერეთელი არა გვწყალობდესო.

მართალია, სიცრუეს ისე სამართლიანადა აქვს წამხდარი სახელი, ისეთი საზიზღარი რამ არის ადამიანის ყურისათვის, რომ სჯობდა ამისთანა საქმეში სულაც არ ხმარებულყო. მე დიდის სიხარულით აქ არც კი ვახსენებდი. ღმერთმა სიცრუეც შეარცხვინოს და მისი მადლიც. ამ საქმის საკადრისი სხვა სიტყვა

საჭირო!.. ხოლო იმისთანა ბრძენი და სათნო კაცი, როგორც საბა ორბელიანია, რაკი სიბრძნესთან სიცრუესაც ახსენებს და თავისს გონების ნაღვაწს სიბრძნე-სიცრუის წიგნს არქმევს, ჩვენ ამისთანა სიტყვისათვის ჭკუა უნდა მოგვენახა. უსათუოდ უნდა გვეკითხნა: ამით რის თქმა უნდოდა იმისთანა წინდახედულს, ჭკუიანს და სათნოებით სავსე კაცს, როგორც საბა ორბელიანია. ამას მოითხოვს იგი სამართლიანი პატივისცემა, რომლითაც ჩვენ აღსავსენი ვართ საბა ორბელიანის მიმართ. საბა ორბელიანის სიცრუე და ერთობ სიტყვაკაზმულ ლიტერატურისა უცოდველია, უმწიკვლოა, უბოროტოა, უბრყვილოა. იგი ნამუსიანია, არც არავისა ჰმტრობს, არც არავისა ჰგმობს. ამაზე მეტსაც ვიტყვით, იგი მადლიანია იმ მხრით, რომ აზრის ამხსნელია, მაუწყებელია, გაგების გზა და ხიდია, ცოცხალი ხატია, ხელთქმნილი დიდის გრძნეულებით.

ამით ვათავებ ჩემს პირველს ლექციას. თუ ვერა გაგაგებინეთ რა, ნურას უკაცრაოდ. საქართველოში განა ვინა ჰლაპარაკობს იმისათვის, რომ გაგაგებინოთ რამ? მე რა წითელი კოჭი ვარ? ვისი მეტიჩარა? ამაზე ნუ ამიხირდებით, თორემ გავაბამ და აღარ გავათავებ ლაპარაკსა. ეხლაც მე თქვენგან მოწონების ტაშს ველოდი და ამის მაგიერ ვხედავ, რომ თავს აკანტურებთ თვლემისაგან და მინამ ხვრინვა არ ამოგიშვით, გეთხოვებით მეორე ლექციამდე.

## ლექცია მეორე

მ ო წ ყ ა ლ ე ნ ო ქ ა ლ ბ ა ტ ო ნ ე ბ ო  
და მ ო წ ყ ა ლ ე ნ ო ბ ა ტ ო ნ ე ბ ო!

წინა ლექციაში მოგახსენეთ, რომ საბა ორბელიანისებური სიცრუე ნამუსიანია. არც არავისა მტრობს და არც არავის ჰგმობს-მეთქი, არც არავის ჰყიდის და არც არავის ჰყიდულობს. იგი ერთგული მსახურია სიბრძნისა და ამიტომაც მადლიანიც არის.

სულ სხვაა ჩვენი ეხლანდელი სიბრძნე-სიცრუე. ეხლა სიცრუე, ვით გამოუქნელი ხარი, სიბრძნის უღ-

ლიდამ გამოეშვა და გაყალბებული დაიარება თავისად. თუ სადმე წააწყდება სიბრძნეს, მარტო იმისთვის, რომ თვითონ ბატონად გამოეჭიმოს და სიბრძნე მსახურად გაიხადოს. მაგალითებისთვის შორს არ მოგვინდება წასვლა.

ხომ გახსოვთ 23-ს დეკემბერს მომხდარი კრება სათავადაზნაურო სკოლის საქმეზე. ისიც გეხსოვებათ, რომ ჩვენს საზოგადოებას ოდესღაც ამოურჩევია კამისია და მიუნდვია გამოარკვიოს, რა სახის სკოლაა უფრო საჭირო ჩვენთვის: ის, რაც ეხლა არის, თუ სხვაგვარი რამ სკოლა. კამისიას უმუშავენია კარგა ხანს, ბევრი რამ საბუთი და ცნობა შეუკრებია, რაც ძალი და ღონე ჰქონია არ დაუზოგავს, საქმეში ჩაუხედნია. აუღია, დაუღია და ეს დაუსკვნია: აწ არსებული სკოლა დარჩეს, როგორც დღეს არის და მის სისწვრივ საჭიროა გაიმართოს სამეურნეო სკოლაცაო.

მე იმის განხილვაში არ შევალ, მართალია ამაში კამისია თუ არა. ასეა თუ ისე, ეს მისი აზრია, მისი დასკვნაა და როგორც თვით სიმძიმე საქმისა ითხოვს, ისე უნდა გამოჰკიდებოდნენ კამისიისაგან დასკვნის აზრსა. რა თქმა უნდა, ამ საგანზე ბევრი ჰოც ითქმის და ბევრი არაც და არავის აეკრძალება თავისი სთქვას. ხოლო ჭკუადაძვდარი, წინმოფიქრებული, წინდახედული, აზრიანი თქმა კი უნდა და არა ბორბოშელას სიტყვების რახუნი, აქაო და ენა მექავებაო, ანუ სხვის ნაღჭის ხელახლად ლეჭვა, როგორც ბ-ნმა გ. წერეთელმა იცის და ახალ ამბად კი ასაღებს თავისი სახელით.

გადასწყვიტეს, რომ აწ არსებული სკოლა იმ სახისა და პროგრამისავე იყოს, როგორც არის და ყოველწლივ თვითო კლასსი მიემატოს, ვიდრე სრულ გიმნაზიად გადაიქცოდეს. კარგი და პატიოსანი. ამ სახით, გაიმარჯვა ბერძნულმა და ლათინურმა ჩვენში. ნეტავი ჩვენ!.. ყველაფრით სავსენი ვიყავით, ეს ბერძნული და ლათინურილა გვაკლდა და ამასაც ხომ ვისწავლით!.. ერთმა იქ დამსწრემ კაი ნუგეში მოგვცა: რა ძალიან უფროხით ამ ბერძნულს და ლათინურსაო. ერთიცა და მეორეც მკვდარი ენაა და შორს არ არის ის დრო, რომ დასამარხავი გავვიხდებო. დეე იყვნენ,

მინამ დაიმარხებიანო. ყველამ სიხარულით პირები დავალეთ, ეს ნუგეში რომ მოგვეცა.

იყვნენ, მაგრამ რომ ისე მოგვივიდეს – მკვდარი მკვდარს აეკიდა, საფლავამდე წამიღო? ან მინამ პეტრე მოვიდოდა, პავლეს ტყავი გააძვრესო! მაშინ რალა ვქნათ? თუნდა ეგეც არ იყოს, ეგ მკვდრები ჩვენ რათ უნდა შეგვანახვინონ! იმიტომ ხომ არა, რომ ყვავმა თავისი მკვდარი ბახალა ბუს მიუგდო, დიდი თავი გაქვს და შენ იტირეო. რა დამტირებელნი და ჭირისუფალნი ჩვენა ვართ ბერძნულისა და ლათინურისა? მკვდარი მკვდრის პატრონისათვის ჩაგვებარებინა უფრო უპრიანი არ იყო? სხვა ველარავინ იშოვეს ჩვენს მეტი?!.. მაღლობა ღმერთს!.. ცხონებულმა მიხეილ ნიკიფორიძმა კატკოვმა ბერძნულს და ლათინურს კაი მაგარი აკლამები აუშენა და ბევრიც: ერთ-ერთგან მიგვესვენებინა!.. ჩვენი რა შესანახნი არიან! ან რა ძალა გვადგია, რომ მკვდრების სუნიტ გვინდა მოვშხამოთ სალი ჰაერი სკოლისა. ყოველივე ეს მერე მოგვივიდა ფიქრად, მაგრამ გვიანდა იყო. ნუგეშმა თავისი გაიტანა. მკვდრებმა გაიმარჯვეს ცოცხლებზე.

იტნება ეს ასეც უნდა. დეე მართლა იყვნენ ეს მკვდრები, მინამ აიღებს ვინმე და დასამარხავად გაიტანს. ასეა თუ ისე, ბ-მა გ. წერეთელმა სიხარულით მაშინვე დეპემა გაუგზავნა საიქიოს ნეტარხსენებულს კატკოვს და მიულოცა, რომ „თუმც მოჰკვდი, შენის ანდერძით აწ ისევ ჰსაქმობ მკვდარიო. ჩვენ, ქართველები, ძლივს მივწვდით შენს სიბრძნე-სიცრუესაო. გიხაროდენ, მიხეილ ნიკიფოროვიჩ, შენ მანდ, ვითარცა მიხარიან აქ მე, გიორგი ექვთიმეს ძესაო.“ არ ვიცით კი, ეს სასახელო დეპემა მარტო თავისის სახელით გაუგზავნა ჩვენმა ღვთით ბედნიერად ბძანებულმა გ. წერეთელმა, თუ მესამე დასის სახელითაც. არა გვგონია. თუ სასახელო სადმე რამ არის, სხვას ძნელად უწილადებს ხოლმე ჩვენი ბ-ნი გ. წერეთელი, შინ რომ წვრილშვილი გიტიროდეს, გარედ ტაბლას რა უნდაო. ეს თუ აქამდე არ გაუგია მესამე დასს, მალე შეიტყობს, – მაინცდამაინც იმაზე ადრე, ვიდრე ბერძნულსა და ლათინურს დაასაფლავებენ ღვთისა და თქვენის წყალობით.

ერთის სიტყვით, მკვდრები ჩვენს სკოლაში დავაყუდეთ. ვუცადოთ, მინამ დასამარხად გახდებიან. მაინც სხვა საქმე არა გვაქვს რა. ავილოთ ხელში საცეცხლეები და საკმეველი ვუკბიოთ, მინამ საქმე რამ გამოგვიჩნდება. ცუდად ჯდომას ხომ ცუდად შრომა სჯობია. ამინ და კირიელეისონ. მორჩა და გათავდა. ჩვენ სხვას აღარას ვიტყვით იმაზე, თუ – რამდენად ზედმიწევნითი პასუხია ეს განაჩენი იმისი, რაც ჩვენთვის საჭიროა დღეს. დავდგით ტახტი და ზედ წამოვასკუპეთ მკვდრები, ბერძნული და ლათინური. დრო გამოაჩენს, ვაი ეკუთვნის გამარჯვებულთა თუ ვაშა.

ბოლოს ჩამოვარდა ლაპარაკი, საჭიროა თუ არა აწ არსებული სკოლაც იყოს და ამასთან ერთად სამეურნო სკოლაცა. აი აქ გატყდა ტახტი. აქ გამოემო სიცრუე სიბრძნის უღლიდამა. ეხლანდელმა სიბრძნესიცრუემ აქ შემოიყარა თავმოსაწონებელი დოინჯი. თ. მ. მაჩაბელი – ეს ყველასაგან ცნობილი მეთოფე თ. ი. მაჩაბლის მეციხოვნეთა, ეს წყნარი და ტკბილი მოუბარი ყოველ აბდაუბდისა და გადასკუპდისა – წამოდგა... განა ერთხელ და ორჯერ? მე თექვსმეტი დავთვალე. ბევრი ილაპარაკა, როგორც მოგვხსენებათ იმისი ამბავი, და იქამდე წაიტყუა თავისის საკუთარის სიტყვის ლაზათმა, რომ კინაღამ დავგვაჯერა, ვითომ ჩვენში საკმაოდ გაბრძნობილნი არიან სამეურნო ცოდნითა და სწავლითა. სხვა რამ სთქვით, თორემ სამეურნო ცოდნა ჩვენში საკმაოაო. წარმოიდგინეთ, სიცლიც არავის მოსვლია, რომ ამ ბრძენთა უბრძენესმა ორატორმა ასე ადვილად ამოაჩინა ჩვენში ეს უცნაური ამერიკა.

საკვირველი კაცი ბრძანდება ეს თ. მ. მაჩაბელი. შეჯდება ხოლმე მეტყველების ჯაგლაგს მერანზე, დაეშვება თავთავქვე და როცა საძუე შემოაწყდება, ყირამალა გადადის, თავი ცალკე მიგორავს იქით, ენა ცალკე ლაყლაყებს აქეთ, თავს ენა ველარ უპოვნია და ენას თავი. მე როცა თ. მ. მაჩაბელს ვხედავ მოლაპარაკეს, მაძლავსინა მაგონდება. თ. მ. მაჩაბელიც ისე დახუჭავს ხოლმე თვალებს და ჰყვივის უპრაგონოდ, თითქო უნდა დაინახოს, რა არი მოსარიდებელი და რა გვერდასაქცევი. იმისთვის სულ ერთია, მართალი და

ტყუილი, შესაძლებელი და შეუძლებელი, ოღონდ ნუ დაუშლით კი, ქვეყნის დასასრულამდე გააბამს და აღარ გაათავებს. ენა რომ გასატეხი იყოს, აქამდე ათას ალაგას გადუტყდებოდა. არც გასაცვეთია ეს ოჯახდაქცეული, თორემ ეს მაინც გვექნებოდა ნუგეშად.

ამ თვალთა ხუჭვაშია მიზეზი იმისი, რომ ხშირად თ. მ. მაჩაბელი თავისს ნათქვამს გადათქვამს ხოლმე, მე ეგ არ მითქვამსო. მართალიც არის: თვითონ ყურს რომ არ უგდებს თავისს ლაპარაკს, საიღამ დაახსომდება, რა სთქვა და რა არა.

თ. მ. მაჩაბელმა ის არ გვაკმარა, რომ ჩვენ სამეურნო სწავლა-ცოდნით საკმაოდ სავსენი ვართ. თავმოწონებით, როგორც მოგეხსენებათ “მერმე და მერმე” მისი კეთილი ამბავი, წამოარახუნა: საჭიროა თუ არა ჩვენთვის სამეურნო სკოლა, მე ამაზე ვერას ვიტყვიო, რადგანაც ეს საგანი ჯერ ნათლად არ გამიგდია თვალწინა, ჯერ ნათლად ვერ გამომიკვევიაო და ამიტომ გთხოვთ ამაზე საუბარი შემდეგისათვის გადასდოთ. როგორ? უმაღლესს სამეურნო სასწავლებელში ნამყოფი კაცი გვეუბნება, საჭიროა თუ არა სამეურნო სკოლა, ჯერ ვერ გამიგიაო. მაშ რაღად მიბოდა სამეურნო სკოლაში, მერე უმაღლესში, თუ გაგებული არა ჰქონდა სამეურნო სწავლა-ცოდნის საჭიროება? მაშ როდისღა გაიგებს და გამოარკვევს ამ საჭიროებას, ან ვინღა გამოურკვევს, თუ უმაღლესმა სასწავლებელმაც ვერ გააგებინა, ვერ გამოურკვია? შენი მტერი იყოს, რომ რაკი უმაღლესს სამეურნო სკოლაში ასე მომცდარა და აქამდე ასე დარჩენილა, ეხლა ველარა გამოარკვიოს რა, ველარა გაიგოს რა.

ან რა სიტყვის პასუხია, რომ ითხოვა, რადგანაც მე ჯერ არ გამომიკვევია საჭიროება სამეურნო სკოლისა, სხვა დროსთვის გადასდეთ ამაზე საუბარიო. აშკარაა, ამით ამის თქმა სდომებია: დამაცადეთ, ჯერ მე გამოვარკვიო და მერე დავიწყოთ ლაპარაკიო, თორემ თქვენ რა იცითო. დიდი კადნიერებაა კაცისაგან სთქვას, ამოდენა კრებული წადით, დაიშალენით და მიცადეთ იმ დრომდე, ვიდრე მე სამეურნო სკოლის საჭიროებას გავიგებდეთ. ხომ შეიძლება თავისს დღეშიაც ვერ გაიგოს, როდემდის ვუცადოთ? ერთი ჰკითხეთ, რა

წითელი კოჭი ბძანდება, რომ რაკი იმას არა გაეგება რა, სხვადაც ხმა გაიკმინდოს. მითამ რა? უიმისოდ სხვანი, თუნდაც გაგებულნი იყვნენ საქმეს ვერ მოუვლიან, თავისს გზას ვერ მისცემენ? შენი მტერი, თუ თ. მ. მაჩაბელს ავეყვით და რაც იმას არ ესმის, იმ საქმეს ხელი აღარ მოგვიდეთ და იმას ვუცადეთ! აბა ბევრს საქმეს მაშინ გავარიგებთ აი, თუ თქვენც იტყვიან!.. მაშ დავიღუპა საქართველო რაღა, რომ თუ თ. მ. მაჩაბელს არ გაეგება, სხვამ უიმისოდ ისაქმა რამე! აი გასიება, გაბერვა თავისის თავის მნიშვნელობისა ამასა ჰქვია.

საწყალო საქართველოვ, ვაი შენს მტერს დაეყაროს, რაც შენ დაგეგრება, თუ საქმე ისე გაგიხდა, რომ თ. მ. მაჩაბლის გაგებას უცადო და ელოდინო. ბევრი წყალი ჩაივლის მინამდე, წყალს ჯანი გავარდეს, იეფია. შენ იმისთანა საქმე მაჩვენე, რომ ცდა და ლოდინი არ მოგვინდეს თ. მ. მაჩაბლის წყალობითა!..

წარმოდგინეთ, ამ სასაცილო და ამასთანა კრების ღირსებისათვის საწყენო თხოვნამ თ. მ. მაჩაბელისამ იქამდე მიაღწია, რომ კენჭი ჩამოატარეს: ვუცადოთ თუ არ ვუცადოთ ამ ვაჟბატონის გაგებასაო. სასაცილო და ამასთან საწყენი არ არის ამისთანაებისათვის კრების მოცდენა!.. კიდევ კარგია მობეზრებულმა კრებამ აინუნშიაც არ გაიტარა — თ. მ. მაჩაბელს გაეგება თუ არა, ეგ მისი საქმეა და არა ჩვენიო, უიმისოდაც ჩვენ იოლად წავალთო. ნურას უკაცრაოდო, უთხრა კრებამ კენჭითა. აკი ვამბობ, რომ კიდევ ღვთის წყალობაა, რომ კრებამ ამისთანა პასუხი უთხრა, თორემ ლოდინი მეორე მოსვლამდე მოგვინდებოდა, რადგანაც, როგორც ვიცი, თ. მ. მაჩაბელი გაგებაზე პატარა მწყურალად და უმზრახად ბძანდება, თუმცა არც ერთს შემთხვევას არ გაუშვებს, რომ არ გვითხრას მისებურის თავმოწონებით და გულში ხელის ცემითა: რაცა ვარ, მე ვარო!

ვთქვათ, დაუჯერებელი არ არის რა, რომ თ. მ. მაჩაბელს სამეურნოე სკოლის საჭიროებისა არა გაეგება რა. კაცია და გუნება. ზოგი იმისთანაც არის, რომ თავის დღეში არა გაეგება რა არასფერში. ეს ერთი როგორ არ შეენდობა ჩვენს საყვარელს თ. მ. მაჩაბელს. მხოლოდ ღმერთსა ვთხოვოთ, რომ ეს ერთი იყოს და

სხვა ბევრი არა. ღვთით ასეც არის, თუ ვინმე კარგად იცნობს თ. მ. მაჩაბელს. სხვა ყველაფერი კევსავით დაუღეჭია, ყველაფერი იცის, სხვა ყველაფერში დიდი ოსტატია. თუნდა თითონა ჰკითხეთ, თუ ჩვენი არა გჯერათ, ის გულახდილი კაცია, არაფერს დაგიმალავთ. ცოტა ამისთანაებში მორცხვია, როგორც მოგეხსენებათ იმისი ამბავი. მაგრამ არა უშავს რა, მაინც გამოგიტყდებათ. ყველაფერი ზნე-ჩვეულების საქმეა.

ერთის სიტყვით, ნუ ვაწყენინებთ თ. მ. მაჩაბელს და დაუჯეროთ, რომ მართლა არა გაეგება რა სამეურნოე სკოლის საჭიროებისა. ეს კი — უკაცრაოდ ვიყვნეთ — დასაჯერებელი არ არის, — კაცს უმაღლესი სასწავლებელი გამოეკლოს და იქამდე გულისყურდაბნეული იყოს, რომ ვერ გაეგოს სამეურნოე სწავლა-ცოდნა საჭიროა თუ არა იმისთანა ქვეყნისათვის, როგორც საქართველოა, რომლის ავლა-დიდება სოფლის მეურნობაა. ესლა ვიკითხოთ: როდის იყო მართალი თ. მ. მაჩაბელი? მაშინ, როცა უმაღლესს სამეურნოე სასწავლებელში ეწაფებოდა სიბრძნეს, თუ ესლა, როცა ამ სიბრძნეზე ასე ამკარად ჰაშა ჰკრა. ორში ერთი: ან სასწავლებელში ვერა გახდა რა და ამ სამეურნოე სწავლა-ცოდნის ალთაი-ბალთაის გონება ვერ მიაწვდინა, ან ამ სწავლა-ცოდნით აივსო, გაიტენა და ჰნანა, ყველა ესე ამაო ამოებათა და სხვა არაფერი.

მე უფრო პირველი მგონია. იგი უფრო დასაჯერებელია და აი რა მიზეზით. უმაღლესს სასწავლებელში ყოფილა და იმოდენადაც თვალი არ აუხილებია, რომ დაენახა რამოდენად წინ წასული დღეს სამეურნოე სწავლა-ცოდნა, თორემ როგორ გაკადნიერდა და სთქვა: ჩვენში ეს სწავლა-ცოდნა საკმაოაო. საკმაო კია? მაშ უნდა ვიგულისხმოთ, რომ ჩვენში ბევრი აღარა დარჩენია რა სათქმელი სამეურნოე მეცნიერებას, რომ თუ ჩვენ წინ არა ვართ ამ საქმეში, ფეხდაფეხ მივდევთ, ან მეცნიერება თუ იმაზე არ შემდგარა, რაც ჩვენ ვიცით, ბევრით წინ აღარ წასულა. განა მართლა ესეა? ესეა მართო იმის თვალში, ვისაც ამ მეცნიერებისა სუნიც არ მისდენია. შორს გაიტანა და ძალიანაც შორს ამ მეცნიერებამ, ამ სამეურნოე სწავლა-ცოდნამ თავისი სამზღვარი და კაცს რომ უმაღლესს სასწავლებელშიც

კი ეს არ დაენახოს, რას უნდა მიეწეროს, — გულისყურის დაბნეულობას, გონების დახშულობას, ჭკუის უილაჯობას, თუ თვითონ სწავლა-ცოდნის ამაოებას?

მეტყვიან მტრობით მოგდის ეს, თორემ როგორ შეეწამება თ. მ. მაჩაბელს უგულისყურობა, ჭკუის უილაჯობა, გონების დახშულობაო. რატომ არ გვჯერაო, რომ სამეურნოე სწავლა-ცოდნა იწვინია სავსებით, მხოლოდ დარწმუნდა, რომ ყოველივე ეს ფუჭია და უქმია? იქნება ასეც იყოს, არ გაგიჭირვეულდებით. რომ არაფერში გამოსადეგია ეგ სწავლა-ცოდნა, თვითონ თ. მ. მაჩაბელზედაც აშკარად ვხედავთ. რით არის ამისთანა საქმეში სხვაზე წინ? რომელი ხოდაბუნები მოხნა-მოთესა? რომელი მინდორი აქცია ვენახად? სად უჭირავს გუთანა? მარტო რაღაც პორთფელი ამოუჩრია ილლიაში და დადის, ვითომ მეც ნახირ-ნახირო. განა ცხადი არ არის, რომ მისთვის სამეურნოე სწავლა-ცოდნა ფუჭია და ამაო!..

ეს ყველაფერი ვიცი, მაგრამ მაპატიოს თ.მ. მაჩაბელმა, ისევე სწავლა-ცოდნის პატივი ვირჩიე და ამ ლილოელი ფილოსოფოსის გულისყური გაეწირე. ხუმრობაა, გაგკადნიერებულვიყავ და ერთობ სწავლა-ცოდნისათვის, თუნდ სამეურნოეც იყოს, უპატიურად წინხლი მეკრა, ფუჭი ხარ და ამაო-მეთქი. მაშინ რას მეტყოდა ჩვენი ავყია „გზა-კვალი“, თუ ბუზანკალი!.. არა, ისევე სჯობია, ყველა ეს თ. მ. მაჩაბლის გულისყურს დაჰბრაღდეს, ვიდრე სწავლა-ცოდნის ამაოებას. ამას, მე მგონია, თვით თ. მ. მაჩაბელიც მომიწონებს. იგი ყოველთვის მზად არის ჭემშარიტებისათვის თავი დასდოს, მაგრამ ისე კი, რომ ენა შერჩეს სალაპარაკოდ. ამას კი, სწორედ მოგახსენოთ, არავის დაუთმობს. ძნელიც არის. შეჩვეული ჭირია და შეუჩვევარს ლხინს ურჩევნია.

ეხლა ვიკითხოთ: თ. მ. მაჩაბლის მიერ თქმული, რომ აქამდე ვერ გამიგია, საჭიროა თუ არა ჩვენთვის სამეურნოე სკოლა და მომიცადეთ ვიდრე გავიგებდეთ, უმაღლესის სასწავლებლის სიბრძნეს მივაწეროთ, თუ უმცირესის ადამიანის სიცრუეს? პასუხი ცხადია. ამიტომ ვამბობთ, რომ ეხლანდელი სიბრძნე-სიცრუე სულ სხვაა. მშვიდობით, მესამე ლექციამდე.



## ფ ე ლ ე ტ ო ნ ი

### ლექცია მესამე

მ ო წ ყ ა ლ ე ნ ო ქ ა ლ ბ ა ტ ო ნ ე ბ ო  
და მ ო წ ყ ა ლ ე ნ ო ბ ა ტ ო ნ ე ბ ო !

ერთი ბრწყინვალე წარმომადგენელი ეხლანდელის სიბრძნე-სიცრუისა მე უკვე დაგისახელეთ წინა ლექციაზე. ამ ახალს მიმართულებას სიბრძნე-სიცრუისას სხვებიცა ჰყავს, არანაკლებ ბრწყინვალე წარმომადგენელი. ჩემის ფიქრით, ისტორიას არ უნდა დაუკარგოს კაცმა იმისთანა სახელოვანის კაცის სახელები, რომელნიც ახლის მიმართულების პიონერები არიან. ნუ გვგონიათ, ახალი მიმართულება ლილანანა იყოს, რომ მაშინვე განშირდეს და ვინც გინდათ და არ გინდათ ხელი შიგ წაურიოს. ისტორიაში არც ერთი მაგალითი არ არის, რომ ახალი მიმართულება პირველ ხანშივე ადვილად იკაფავდეს გზას. მარტო „რჩეული ამა ქვეყნისანი“, მარტო ცით ერთგვარ მადლცხებულნი მიუხვდებიან ხოლმე ახალ მიმართულებას, — რის მომასწავებელია და რაშია გამოსადეგი ამ არსებობისათვის ბრძოლაში. ამიტომაც ცოდვია ამისთანა კაცებს საუკუნო სახსენებელი არ აეგოს. მეც ამისათვის ვცდილობ, თორემ არც ისეთი მოცლილი კაცი ვარ, რომ ამისთანაებზე გამეწირა ძვირფასი დრო და ეს ქართველთათვის თავმოსაწონებელი კაცები იმავე ბნელეთში დამეტოვებინა, საიდანაც ეხლა მე გამომყავს სინათლეზე.

მეორე „რჩეული ამა ქვეყნისა“ და ბრწყინვალე წარმომადგენელი წამიგვისკუპდა იმავე 23-ს დეკემბერს სკოლის კრებაზე. ხომ მოგეხსენებათ, ვინა ბრძანდება



თ. ი. მაჩაბელი. იგი თავია იმისი, რის ფეხებიც თ. ი. მაჩაბელია თავისის პორტფელითურთ. ისე გადაბმულები კი არიან ერთმანეთზე, რომ ძნელი გამოსაცნობია, – სად თავდება ერთი და სად იწყება მეორე.

მინამ ლაპარაკი იყო იმის თაობაზე, – რა სახის და პროგრამისა უნდა იყოს ჩვენი სკოლაო, ბ-ნმა როსტომაშვილმა წარმოსთქვა, რომ თქვენ დღეს სკოლა არა გაქვთო. ეგ თქვენი სკოლა თავისად კი არ არისო, მსახურია სხვისა სკოლისათ. თუ გნებავთ თქვენი საკუთარი სკოლა იქონიოთ, სხვის მოსაწონებლად კი არ უნდა იყოს, ჩვენი საკუთარი მოსაწონებელი უნდა იქმნესო, ჩვენ და მარტო ჩვენ უნდა გვახვიროს, მარტო ჩვენი გამოსადევი, ჩვენის სვე-ბედის ამტანი და გამტანი უნდა იყოსო. თუ ასეთის თვალთ დავუწყებთ ყურებას ჩვენს სკოლას, ადვილად დავინახავთ, – რა სახისა და პროგრამის სკოლაა ჩვენთვის საჭიროო.

მართალია თუ არა ბ-ნი როსტომაშვილი, ამის გამოძიება ჩემის ლექციის საქმე არ არის. ხოლო იმისი თქმული იმისთანაა, რომ ვისაც თვალნი აქვს ხედვად და ყურნი სმენად, თვალიც უნდა აეხილნა და ყურებიც ბამბა გამოეღო. ჩემის ფიქრით, ცოდვია ასე თუ ისე თვალი და ყური არ ათხოვოს კაცმა ამ ბ-ნი როსტომაშვილის მიერ გამოთქმულს დედააზრსა და თავისს სასწორზე არ ასწონ-დასწონოს ან საპროდ, ან საარაოდ. ამისთანა მარღვიანმა აზრმა განუკითხველად არ უნდა ჩაიაროს, თუ ჭკუა ჭკუობს და გული გულობს სადმე.

ამისთანავე მარღვიანი აზრი, ხოლო სხვა თვალთახედვიდამ-კი მოვლინებული, წარმოადგინა ბ-ნმა ცხველადემ, რომელმაცა სთქვა, ჩვენც ვიცით, რა სახის და პროგრამის სკოლაა ჩვენთვის სასურველიო, ხოლო დრო-ჟამი და ეხლანდელი ჩვენთვის უცხო გარემოებანი ითხოვენ, რომ ჩვენი სურვილი, ჩვენდა სამწუხაროდ, ჯერხანად მაინც დადუმდესო, თუ გვინდა, რომ ჩვენს სკოლაში კურსმესრულებულთ შემდეგისათვის გზა ჰქონდეთ სწავლის განგრძობისათ. ამიტომაც სახე და პროგრამა ამ დრო-ჟამს და უცხო გარემოებას უნდა შევუფეროთო.

ამ სახით ორტოტად დენა დაიწყო აზრმა კრებაში და ორსავე ისეთი მართლა და მძიმე საბუთი ჰქონდა, რომ ერთიც და მეორეც ღირს იყო განეკითხა კრებას გულდასმით და ჭკუადაჯდომით.

არანაკლებ საბუთიანი და ღირსგანსაკითხავი აზრი წარმოსთქვა ბ-ნმა გოგებაშვილმაც, გ. იოსელიანმა, თ. ვ. მიქელაძემ და დეკანოზიშვილმა. თუმცა იმათი აზრები ერთმანეთში განირჩეოდნენ, ზოგი აქედამ უვლიდა საქმეს, ზოგი იქიდან, მაგრამ ყველამ გარკვეული აზრი სთქვა და მისცა კრებას საბუთი ან ჰო ეთქვა, ან არა. წამოდგა თ. ი. მაჩაბელიცა. ერთმა კუნჭულმა კრებისამ წინათვე მოამზადა ხელები ტაშისათვის.

ეს რომ დავინახე, ვთქვი: ცანგალას ხმაზე რომ აპირობს თ. ი. მაჩაბელი ლაპარაკსა-მეთქი. სწორედ ასე იცან ხელების გამოშვერა ტაშისათვის გლეხებმა, როცა ცანგალას აპირობენ. გამიკვირდა. მართალია, თ. ი. მაჩაბლის „დინასტიაში“ (ჩვენი სიტყვა არ არის) მგალობელიც არის, როგორც უკვე შენიშნული იყო ერთს დროს ერთს აქაურს გაზეთში, მაგრამ რომ თვითონ თ. ი. მაჩაბელს გალობის უნარი ჰქონოდა, არავის გაეგონა. მეც არ გამიგონია, თუმცა ბევრი სხვა რამ კი გაგონილი მაქვს. მოგახსენებთ, გამიკვირდა: ვინ თ. ი. მაჩაბელი და ვინ ცანგალა-მეთქი. შევხედე ხელახლად იმ კუნჭულს და ხელები ისევ ტაშისათვის გამოშვერილი ჰქონდათ. ყურები ვცქვიტე. ერთი ვნახოთ, ეს ახალი უნარი როგორ დაამშვენებს თ. ი. მაჩაბელსა და ან თ. ი. მაჩაბელი ამ ახალს უნარსა-მეთქი. ერთშიაც და მეორეშიაც მოვტყუვდი, იმიტომ რომ თ. ი. მაჩაბელმა თავისს თავს არ უმტყუნა.

დიახ, თ. ი. მაჩაბელმა არც აქ უმტყუნა თავისს თავსა. ერთის იოტის ოდენადაც არ დაუწყევია ძირს იმ სიმალლიდამ, საცა იგი ღვთის განგებას დაუყენებია ყელმოღერებული. ისევ ძველებურად, თავისებურად მოჰყვა სხაპასხუჰს, თითქო თავზე წვიმა დასდის და სჩქარობს მალე დარომოს დასარომელი და სადმე ფანჩატურს შეეფაროსო. როგორც მოგახსენებათ ამისი კეთილი ამბავი და ჩვეულება, გაუგორდა და გამოუგორდა ხელისგულზე კრებას, უკმია შესაფერი საკმეველი სკოლის მასწავლებელთაცა. ბევრი იყო „პაი,

საქართველოვ... ჰოი, ქართველობავ... ჰაი, ვინ გაბედავს და შესწამებს, რომ ქართული გული არ უცემთ ჩვენის სკოლის მასწავლებელთა!.. ვინ, აბა ვინ!.. სად არის ის საწყაო, რომ ასწყონ ამათი ღვაწლი!.. სად!.. ეს კრება!.. ოო, ეს კრება!.. ამ კრებამ კარგად იცის ვინ არის სკოლის მტერი და ვინ არის მოყვარე! (აქ თ. ი. მაჩაბელმა და ბ-მა გ. წერეთელმა ერთმანეთს თვალი უყვეს, თუმცა, მგონია, უმზრახად კი არიან)... მე!.. მე!.. მე, რომელიც (აქ ერთი ორჯერ გულში ხელი ჩაიკრა თ. ი. მაჩაბელმა ჩვეულებისამებრ და გ. წერეთელმა ტუჩები ზევით აიწია) მე!.. რა მე?!.. აქ, აი ამ კრებაში... ოღონდ კარგი რამ დაეწყოს, თორემ ეს კრება... მე... მე... დარწმუნებული ვარ, ან ვინ გაბედავს დარწმუნებული არ იყოს, რომ ეს კრება... არაფერს დაზოგავს სკოლისათვის, უხვად გასცემს, დიად, უხვად, უხვად გასცემს, არაფერს დაზოგავს სკოლისათვის!..“ და სხვანი და სხვანი.

ივრიალა იმ ერთს კუნჭულში წინაღვე მომზადებულმა ტაშმა, თუმცა კი ძალიან თხლად, თითქო ქალების უძღური ტაშიაო. თ. ი. მაჩაბელსაც მარტო ეს უნდოდა, როგორც ეტყობოდა. იგი გამარჯვებული წავიდა და იმ კუნჭულში ყელმოღერებული გამოიჭიმა, ვითომდა ბურთი მოედნიდამ გაიტანა და გაიტანა. ბუნრის ქუდი რომ ჰხურებოდა, თავმოწონებით ჩაიკეცავდა, ყელს უფრო მოიღერებდა და იქნება ღონივრიც შემოეყარა.

რა თქმა უნდა, თ. ი. მაჩაბლის თქმულს სიტყვა-სიტყვით ვერ აღვადგენ. ხოლო ვინც იქ იყო, გულზე ხელი დაიდოს და მითხრას: იმის სიტყვაში იმ ჰაი-ჰოის მეტი ეყარა რამე?.. იმ პირფერობის, ლაქუცისა და კუდის ქნვის მეტი ვის რა დარჩა ხსოვნაში, ვინ რა გამოიტანა?

არა მგონია, იმის გაგორ-გამოგორებასაც კრებისა და სკოლის მასწავლებელთა წინაშე ბევრი რამ კეთილი შეეძინოს თ. ი. მაჩაბლისათვის. ღილახანა დიდი ხანია წაუხდა ჩვენში ამისთანა კუდის ქნევას, ამისთანა მაღაყებსა, მით უფრო, რომ ეს ასეთი ამბავი თ. ი. მაჩაბლისაგან არ ახალია, ძველია. წავიდა ის დრო, როცა ამისთანა ბუნრიან ხორბლის მარცკლითა

წაიტყუებდნენ ხოლმე ბელურა ჩიტებსა. სხვისა არ ვიცით და სკოლის მასწავლებელნი მაინც ისეთნი არ არიან, რომ თავისი საკუთარი თვალთახედვა არა ჰქონდეთ და თავისი საკუთარი ყურთასმენა. ამათ წინაშე ზიზილ-პიპილები და კუნტრუში ვერაფერი ლარი და ხაზია სვის გატანისათვის. ამათ კარგად იციან, — რა ფასისაა, რა ღირებულებისაა იგი მიწანარევი საკმეველი, რომელსაც თ. ი. მაჩაბელი „ვისაც ჯერ არს და სადაც ჯერ არს“ ასე უხვად უკმევს ხოლმე. კიდევ კარგია, რომ ამისთანა კმევას ჯერ ბაჟი არ ადევს, თორემ დიდი გადასახდელი დააწვებოდა თავზე თ. ი. მაჩაბელს.

პირში ქებას ჭკუადამჯდარ კაცის თვალში დამპალ კიტრის ფასიც არა აქვს, პირში მაქებარს თავისის თავის პატივმცემელი კაცი რას ეტყვის ხოლმე: ეგ ქება შენთვის შეინახე, სხვაგან გამოვადგება. მე კი, ვაი რა ბაღლი გგონივარ, რომ ჰფიქრობ მაამო და მით მომატყოლო...

არა მგონია თვითონ კრებაც მოტყუებულყოფოს, რომ უქო და უდიდა გულუხვობა და არდაზოგვა სკოლისათვის. კრებამ ძალიან კარგად იცის, — რა უკადრისი გუნდრუტკმევაა ამისთანა ბაღლური ლათაიები. კრებამ ძალიან კარგად იცის, რომ თვით არაფერს შუაშია ამ გულუხვობაში და არდაზოგვაში. რა დასამალია, რაც ყველასათვის ცხადია, რომ კრებას თავისი საკუთარი ერთი გრომიც არა აქვს. მაშ რა მოსატანი იყო აქ გულუხვობა და არ დაზოგვა კრებისა? რაც კაცს თვითონ არა აქვს, იმისი უხვად გაცემა და არდაზოგვა რა ისეთი ვაჟკაცობაა, რა ისეთი სასახელოა, რომ კაცმა კაცი ამისათვის აქოს და აღიდოს? მითამ რა ეწვის, რომ ეს წვა-დაგვა სამსახურად და ქველობად ჩაეთვალოს? აქ ან ის კაცია სასაცილოდ ავდებული, ვისაც ამ გზით და მიზეზით აქებენ, ან ის, ვინც ამ გზით და მიზეზით აქებს და უნდა ამით ლარი გაიტანოს. ჩვენში კი რომ ითქვას, არც ერთია მოსაწონებელი და არც მეორე. მაშ ტაში რაღა იყო? — იკითხავთ. აი ნასკვი ესლანდელ სიბრძნე-სიცრუისა სწორედ აქ არის და თქვენ გამოსხენით.

როგორც იყო გათავდა ეს ქება-დიდების ზარის რეკაც და თხლად ტყლაშუნი ტაშისა ჩაჰბარდა თავისს პატრონს. დაიწყეს ლაპარაკი იმაზე თუ, – საჭიროა თუ არა აწ არსებულ სკოლასთან გამართულ იქნას სამეურნო სკოლაცა. გამარჯვებული და გამხნეებული თ. ი. მაჩაბელი, რა თქმა უნდა, აქაც წამოხტა თავისე-ბურად. მეგონა, აბა ეხლა იქნება სერი-მეთქი. ჩემს გაკვირვებას სამზღვარი არა ჰქონდა, როცა ბაგეთა მისთაგან წარმოინდა შემდეგი: ჯერ რადგანაც მე არ გამოძირკვევია ნათლად საჭიროება სამეურნო სკოლისა და ამიტომაც აი აღვსდეგ და მივდივარ და კენჭის ჩამოტარებაში მონაწილეობას ვერ მივიღებო. გავოცდი, და რად გავოცდი – ბოლოს შეიტყობთ. ადგა ეს ვა-ჟბატონი და ვაჟკაცურად და ყელმოღერებით გავიდა კრებიდამ. აიშალა ის ერთი კუნჭულიც დედაბუდიანად და, როგორც კრუსს წიწილები, უკან გაედევნენ. კრებამ თუმცა არა სთქვა, ვაი უიმისოდ რა გვეშველებაო, მაგრამ თვითონ თ. ი. მაჩაბელი კი უსათუოდ იტყოდა: აბა, ეხლა დაიდუპნენო, აი!..

ღვთის მადლით, კრება მშვიდობით გადარჩა ამ ღვთისსრისხვა უბედურობას, რომ თ. ი. მაჩაბელმა ასე უნუგემოდ დასტოვა და კენჭის ჩამოტარებაში მონაწილეობა არ მიიღო. მეც მადლობა შევწირე ღმერთს, რომ თავზე ცა არ წამოგვექცა, თორემ შენი მტერი!.. წარმოიდგინეთ თ. ი. მაჩაბლის გულქვაობა, მოკითხვის კაციც არ გამოგზავნა, შეეტყო – უჩემოდ დაიხოცნენ თუ კიდევ სული უდგათო. რაც იყო, იყო, მორჩა და წავიდა.

ახლა საქმე რაშიაო? აქ სიბრძნე-სიცრუე რა შუა-შიაო? – მკითხავთ. იმაშია, ბატონებო, რომ ამ სამი-ოთხი წლის წინად სათავადაზნაურო სკოლის კომიტეტს დაუდგენია, – აწ არსებულ სკოლასთან საჭი-როა გამართულ იქნას სამეურნო სკოლაცაო. ჩამოთვლილია, რა გარემოებანი ჰქონია ხსენებულს კომიტეტს საბუთად იმ დადგენილებისა, რომელიც ასე თავდება: „ამ გარემოების მიხედვით უნდა დაარსებულ იქნას ქალაქის გარეშე სამეურნო სასწავლებელი სამის წლის კურსით, სადაც შეეძლოთ შესვლა ყველა იმ მოსწავლე ყმაწვილებს, რომლებიც ათავებენ კურსს

სათავადაზნაურო პროგიმნაზიაში და სხვადასხვა მიზეზების გამო ვერ ასერხებენ სახელმწიფო სასწავ-ლებელში შესვლას“.\*

სიტყვასიტყვით არის ეს დადგენილება ამოწერილი. როგორ გგონიათ, ვის უწერია ხელი ამ დადგენილებაზე სხვათა შორის? არამც და არამც თ. ი. მაჩაბელს, რადგანაც თვითონვე ამ 23-ს წარსულს დეკემბერს დაგვიფიცა, რომ სამეურნო სკოლის საჭიროების თა-ბაზე ჯერ აზრი ნათლად არა მაქვს გამორკვეული და სამის და ოთხის წლის წინად სად ექნებოდა. ხომ!.. კარგი და პატიოსანი. წარმოიდგინეთ, რომ სწორედ თ. ი. მაჩაბელს ხსენებულ დადგენილებაზე ხელი უწერია, ვითარცა სათავადაზნაურო სკოლის კამიტეტის წევრსა!.. გესმით, ბატონებო, იმ თ. ი. მაჩაბელს, რომელიც 23-ს წარსულს დეკემბერს გვეფიცებოდა, ამ სკოლის საჭიროების ჯერ ნათლად არა გამამირკვევია რა, აზრი არ შემიდგენიაო! გესმით, ბატონებო, ეხლა ჩემი გაცემა, როცა თ. ი. მაჩაბელის ბედნიერების ბაგისაგან გავიგე, მე ეს არ „გამომირკვევიაო“.

ვიფიქრე: იქნება ეს თ. ი. მაჩაბელი ერთია და ის თ. ი. მაჩაბელი, რომელსაც დადგენილებაზე ხელი უწერია, მეორე-მეთქი. ვკითხე ერთს ჩემს გვერდით მდგომარეს: ერთი მიბრძანეთ, სხვა თ. ი. მაჩაბელი ხომ არსად არის საქართველოში-მეთქი? იმან ისე შემომხედა, თითქო გამიწყრა: „როგორ არა გცხვენიან და მაგას კითხულობო? განა თ. ი. მაჩაბელი პანტაა, რომ ეგრე წყვილ-წყვილად ცვიოდეს ციღამაო“. პასუხიც არ მადირსა, მიბრუნდა და ზურგი შემომაქცია. ვიფიქრე: უსათუოდ ბ-ნი ალექ. მირზაშვილი იქნება ეს ვაჟბა-ტონი-მეთქი. ნამდვილად კი არ ვიცი ღლეცა, ვინ იყო.

ამას გძლად განმარტება არა სჭირია. ეს ორთავი-ანობა, ეს ორპირიანობა, ეს ორგულიანობა ერთსა და იმავე საქმეში, ეს ასეთი ამკარად ჰამას კვრა იმაზე, რაც გუშინ უთქვამს და რაზედაც ხელი უწერია, თავისთავად გვეუბნება, რას ჰნიშნავს და რას მოასწავებს. „ასე ჩემო მანასეო, ხან ისე და ხან ასეო“, სწორედ

\* იხილე მეთექვსმეტე გვერდი სკოლის საქმეზე ამორჩეულ კამისიის მოხსენებისა.

ამასა ჰქვიან. აღარ იკითხავთ: თუ დღემდე არ გამოურკვევია საჭიროება სამეურნოე სკოლისა, ამ სამის-ოთხის წლის წინად სადღა ექნებოდა გამორკვეული? ან თუ მაშინ გამორკვეული ჰქონდა, ეხლა რა ალაღმა დაჰქროლა იმისთანამ, რომ რაც სიმღერები იცოდა, სულ დაავიწყა? განა დასაჯერებელია გულმართლობა ამისთანა ადამიანისა, ან როცა „ჰოს“ ამბობს და ან როცა „არას“? ადამიანი ბუმბული ხომ არ არის, რომ ქარი ხან აქედ ატრიალებდეს და ხან იქით!

აღარ იკითხავთ: როდის იყო გულმართალი თ. ი. მაჩაბელი? მაშინ, როცა სამის-ოთხის წლის წინათ ამტკიცებდა, რომ საჭიროა ჩვენთვის სამეურნოე სკო-ლაო, თუ 23-ს წარსულს დეკემბერს, როცა გვეფიცე-ბოდა, ამ საჭიროებისა ჯერ არა გამომირკვევია რაო და აზრი არ შემიდგენიაო? ამბობენ, 1884 წ. ბანკის გამგეობას ამ საგანზევე სჯა ჰქონია და ერთხმად, თ. ი. მაჩაბელთან ერთად, გამოურკვევია და ცხადად და ნათლად მოუხსენებია ზედამხედველ კომიტეტისათვის საბანკო კრებაში წარსადგენად, რომ მეტიმეტად და აუცილებლად საჭიროა სამეურნოე სკოლა ჩვენთვის, პირდაპირი სარგებლობა მისი ჩვენთა მიწათმომქმედთა და მიწათმფლობელთათვის ცხადია და ყოველ ეჭვგარე-შეაო, და ამ არსებითს საჭიროებას იმისთანა მიწათ-მომქმედ გუბერნიისათვის, როგორც ჩვენი გუბერნიისა, უნდა უსათუოდ ეშველოს რამეო და ეხლა კი გვეუბ-ნება იგივე თ. ი. მაჩაბელი, ჯერ ამ სამეურნოე სკოლის საჭიროებისა ნათლად არა გამომირკვევია რაო! რომელი ერთი დაუუჯეროთ? თუ მაშინ გონება მისი ამ საჭი-როებას ნათლად ჰხედავდა, ეხლა რა ჯანაბამ დაუბ-ნელა? აქ ქარის ძლიერება უფროა საკვირველი, თუ ბუმბულის სისუბუქე და სიმჩატე? ეს თქვენ გამოი-ცანით, ბატონებო, და მე კი ამის დავიდარაბისა არა ვიცი რა.

მე ასე ვფიქრობ: იქნება მას მერმედ ამანაც, ესე იგი თ. ი. მაჩაბელმაც, იგი ბოლაზი სამეურნოე ცოდ-ნისა იპოვა ჩვენში, რომელიც ტელესკოპით დაუნახავს ლილოელს ვარსკვლავთმრიცხველს თ. ი. მაჩაბელსა და რომელიც 23-ს დეკემბერს ჩვენ გვაუწყა.

ეხლა მაინც გვიბძანეთ: რასა ჰგავს ამისთანა საქციელი იმისთანა მძიმე საქმეში, როგორც სკოლის და, მამასადამე, ჩვენი მოზარდის თაობის განათლების საქმეა! ეს არის განა სიყვარული საქმისა? ეს არის განა გულისა და თავის დადება საქმისათვის? ეს არის განა იგი გულმართლობა, რომლის ნიშნადაც ასე ხშირად გულში ხელს იცემს ხოლმე ეს მართლა და „თამარაშნელი ბულანჟე“! ვინ რას იტყვის, თუ რომ ერთს კაცს ერთის სახის სკოლა მოსწონდეს, მეორეს — მეორის სახისა. ეს სხვადასხვაობა აზრისა კაცთა შორის მარტო ბ-ნ გ. წერეთლს მიაჩნია ცოდვად და სხვას არავის ქვეყნიერობაზედ. ხოლო ეს „ჰო“ და „არა“ ერთსა და იმავე საგანზე ერთსა და იმავე კაცის-აგან ხომ ან ერთია სიცრუე, ან მეორე. აქ სიცრუე ხომ ამკარაა ერთ-ერთში და ამკარა. სიბრძნე სადღაა? ეგ თვითონ თ. ი. მაჩაბელსა ჰკითხეთ. აი ამიტომ მოგახსე-ნეთ, რომ ეხლანდელი სიბრძნე-სიცრუე სულ სხვაა-მეთქი.

მშვიდობით, ბატონებო, მეოთხე ლექციამდე.

[1896 წ. 27 იანვრამდე]



## **<გაზეთ „მოსკოვსკიე ვედომოსტი“ მოზოლიშვიის თაობაზე>**

ტფილისი, 28 იანვარი

„მოსკოვსკიე ვედომოსტი“ (№20) თავის მეთაურ წერილში ერთს ფრიად დიდმნიშვნელოვანს საგანს შეეხო. თვით სათაური ამ წერილისა გვანიშნებს, რა საგულისხმოა იგი საგანი ჩვენთვის, ქართველებისათვის. ამ წერილს სათაურად აქვს: „სანაციონალო საქმე და ქართველები“.

წერილი იგი გამოწვეულია ქუთაისის გუბერნიის თავად-ახნაურთა მარშლის სიტყვისაგან, რომელიც წარმოთქმულ იქმნა ამას წინათ იმის თაობაზე, რომ ზოგიერთმა რუსეთის სატახტო ქალაქების გაზეთებმა გამოილაშქრეს ქართველობაზე და შესწამეს ვინ იცის რა. „მოსკოვსკიე ვედომოსტი“ ამბობს, რომ ჩვენ სინარულით აღვნიშნავთ იმ მხურვალე ერთგულობას, რომელიც ბ-ნ მარშლის სიტყვაშია გამოცხადებული ჩვენის „საერთო მამულის“ მიმართ. მეორეს მხრით ისიც კი უნდა შევნიშნოთ, ამჯერად კი მწუხარებით, რომ ზოგიერთა გაზეთის მეტსიტყვაობამ მართლა აუძღვრია მამულიშვილური გრძნობა ქართველ ერის წარმომადგენელთა თავადახნაურობასაო. როგორცა სჩანს, ამ მეტსიტყვაობაში ზოგიერთი გაზეთები მართლა დანაშაულები არიანო.

მეთაური წერილი ამით ამართლებს ამ მეტსიტყვაობას და გამოურკვევლობას ზოგიერთ გაზეთებისას, რომ იგინი ჰლაპარაკობდნენ სომხებზე და არა ქართველებზე და რადგანაც საერთო „ტუშემცებს“ ახსენებდნენ განურჩევლად – ქართველია თუ სხვა მილეთის კაცი,

– ამიტომაც ქართველებმაც იწყინესო ის, რაც სხვაზე იყო ნათქვამიო. ბევრი წერილები იყო სომეხთა შესახებ და არა შესახებ ქართველებისაო. „ნოვოე ვრემია“-ს ფელეტონები მართლა მიზეზს მისცემდნენ, რომ ვერე ეფიქრათო, რადგანაც აქ, ჩვენდა სამწუხაროდო, ერთისა და იმავე საერთო სახელით „ტუშემცე“ იგულისხმება ყველა ერთი კავკასიისაო. ჩვენ ძალიან დიდი შეცდომა გვგონია ასე ერთის სახელით ხსენება ყოველის ერისა კავკასიაშიო და თუ ასე მოუხდა „ნოვოე ვრემიას“, წინდაუხედავობით მოუვიდაო და ეს გაზეთი თავის დღეში არ უყურებს ქართველებს და სომხებს, როგორც ერთარსების ერსაო.

ასეა თუ ისე, ჩვენ ბ-ნ მარშლის თ. წერეთლის თანახმად დარწმუნებულნი ვართო, რომ არც მთავრობა და არც საზოგადოება რუსეთისა ერთმანეთში არ ურევს ქართველებსა და სხვა რომელსაღმე ერს კავკასიაშიო. რაც ჩვენში თქმულა „ტუშემცებზე“, ის ქართველებს არ შეეხებაო. თუ სადმე ვინმე განურჩევლად უყურებს კავკასიის ერთა, ჩვენა ვნატრობთ, რომ რაც შეიძლება მალე გაგებულ იქმნას ჩვენში აუცილებელი საჭიროება გარჩევისა და მაგ სამწუხარო განურჩევლობას რაც შეიძლება მალე მოეღოს ბოლოო.

არაერთხელ გამოგვიქვეყნებიაო დავწერილებით ჩვენი აზრი, რომ რუსეთის „სანაციონალო იდეა“ სულაც არ მდგომარეობს იმაში, რომ თავისებური სახე წაუშალოს, თავისებურობა ჩამოართვას, დაუკარგოს იმ მრავალ სხვადასხვა ერსა, რომელიც შესულია რუსეთის იმპერიაშიო. კუთვნილება იმ დიდის ოჯახისა, რომელსაც წარმოადგენს რუსეთის ეროვნება, იმაში უნდა იჩენდეს თავსა, რომ სულიერი ნათესაობა გვქონდეს ერთმანეთისა, ერთად ვიღვწოდეთ ერთიანის მამულის სიკეთისათვისაო. ამ მხრით სახელოვანი თავადი ბაგრატიონი ჭეშმარიტი მამულიშვილი იყო რუსეთისაო და ამასთანავე ქართველიცაო. იმისთანა კაცებს კი, როგორც დრავომანოვი არის, ჯიშით წმინდა რუსი, არაფერი საერთო არა აქვს რუსეთის ერთანაო.


ყოველ ამის შემდეგ მეთაური იხსენიებს, რომ ქართველობა ერთადერთი ერია, რომელსაც უნდა დაემყაროს რუსეთი კავკასიაში. ქართველების დიდი

მნიშვნელობა რუსეთისათვის სწორედ ამაშიაო. ჩვენ დავიწყებული არა გვაქვს საქართველოს ისტორიაო. ჩვენ ვიცითო, რომ საქართველო კავკასიაში იმავე ისტორიულ მისიის გამომეტყველია, როგორისაც რუსეთიო. თუ ჩვენ ძმურად ვექცევით სხვა ჯიშის ერსა, მით უფრო ძმურად არ უნდა მოვეპყრათ ქართველებსა, რომელნიც ნებით შემოგვიერთდნენ რუსებსაო და რომელნიც იმავე საქმისათვის იღწვიან, რისათვისაც რუსებიო? თუ რუსეთმა დაიხსნა საქართველო, ამით დაიხსნა საკუთარი — ქართველებთან ერთად გაერთებული — საქმეო; კავკასიაში ქართველებისა და ჩვენი საქმე ერთმანეთისაგან განუმორებელია და ერთი და იგივეაო.

ამიტომაც დიდი უსამართლობაა, შეუწყნარებელი წინააღმდეგობაა მამულისშვილობისა, უსიყვარულობაა რუსეთისა, გმობაა ჩვენის ეროვნებისა, რომ ქართველებზე ცუდი რამ გავიტაროთ გულში, ქართველებს ვაწყენინოთ და მათზე ეჭვი რამ ვიქონიოთო, მაშინ როცა ამისი მიზეზი არ მოუციათო.

ჩვენ რა გვეთქმის ყოველ ამაზე გარდა იმისა, რომ თქვენს პირს მაქარი-თქო. მხოლოდ აქ ერთი ამბავი გვაგონდება. ერთმა კაცმა, სულის დაღვევის ჟამს, მოიწვია მოძღვარი, თავისი ნათესავები, მახლობელი და ასეთი ანდერძი გამოუცხადა: შენთვის, ჩემო მოძღვარო, მიანდერძებია ასი თუმანი, ამისათვის ორასი, იმისათვის სამასი და ამრიგად ყველასათვის გაუნაწილებია. გაჰხარებიათ ყველას ამისთანა გულუხვობა მომაკვდავისა. ბოლოს, პირველ სიხარულს რომ გადაუვლია, უკითხავთ: მაღლობელი ვართ ამ შენის მოწყალებისათვისა, ხოლო გვიბძანე საიღამ მივილოთ ეგ შენი ნაანდერძებო, ან ვის მოვკითხოთო. იმას არც უციებია და არც უცხელებია და უპასუხნია: ახლა მაგისათვისაც დარდი და ნალველი მე უნდა გამაწვივინოთო!..

[1896 წ.]



## **<სამეურნეო-საკრედიტო საზოგადოების უსაფუძვლო კრიტიკის თაობაზე>**

ტფილისი, 6 თებერვალი

გაზეთი „კავკაზი“ არა სცხრება. არ იქნა, ჩვენი ქართველური ვერა მოვაწონეთ რა. მოწონებას ვინა ჰფიქრობს. შესაძლოა, ბევრი წუნი გვქონდეს და რად უნდა აეკრძალოს გაზეთს, რომ გამოგვიმჟღავნოს ის წუნი. ოღონდ ყველაფერს, ქება იქნება თუ კიცხვა, სამართლიანი და საბუთიანი მიზეზი უნდა ჰქონდეს. მხოლოდ მაშინა აქვს ფასი ქებასაც და კიცხვასაც, როცა ერთიცა და მეორეცა აგებულია საბუთზე და გულმართლობაზე. ჩვენ ვამბობთ, მაშინა აქვს ფასი. ფასი კი არა, მხოლოდ მაშინ არის დასტამბული სიტყვა ღირსი თავისის წმინდა დანიშნულებისა, უიმი-სოდ კი ყველა სხვა სიტყვებზე უფრო სადაგელია, საგ-მობელი და საზიზღარი.

ჩვენ გვიკვირს, რომ იმისთანა ოფიციალური გა-ზეთი, როგორც „კავკაზი“, ღირსებას დასტამბულის სიტყვისას არაფრად ჰხადის. მოგვდგომია, ბატონებო, ჩვენ, ქართველებს და ილია ხონელის პირით იღრინება ყოველს იმაზე, რაც, ჩვენი შეძლებისამებრ, ასე თუ ისე დაგვიწყვია და რასაც, ჩვენი შეძლებისამებრვე, ასე თუ ისე ვაწარმოვებთ, რომ როგორმე და რითიმე ჩვენი თავის საჭიროებას და ვაგლახს გავუძღვეთ. არც ერთი ჩვენი მიერ დაწყებული და წარმართული საქმე არ გადარჩენია „კავკაზს“, რომ ილია ხონელის წარამარა კალმის წვერით არ ააგდოს ქვა და არ შეუშვიროს თავი. ჩვენი დრამატიული საზოგადოება გნებავთ, ჩვენი სათავადაზნაურო ბანკი თუ ეს ახალი

საზოგადოება სამეურნოე ურთიერთობის კრედიტისა ყველგან და ყოველისფერში, თუ ჩვენი მოხუცი „კავკაზი“ იტყვის რასმე, უსათუოდ იმისთანას, რომ ერთსაც, მეორესაც და მესამესაც სახელი გაუტეხოს, თავზე ლაფი დაასხას, მიწასათან გაასწოროს, გაჩენისვე უმაღლ მოაკვდინოს, თითქო ყოველივე ქართული თვალში ეკლადა აქვს გაყრილიო. ესეც მომხდარა, რომ „კავკაზში“ ერთსა და იმავე ნომერში ერთს გვერდზე ერთს ამბობდეს და მეორეზე ილია ხონელის მოწყალებით თავისსავე ნათქვამს მთლად და სრულიად უარჰყოფდეს. თუ „კავკაზს“ ჰნებავს, ამის არა ერთსა და ორს მაგალითს ვაჩვენებთ.

არ ვიცით, რას მივაწეროთ ყოველივე ეს? რა დაუშვა ქართველებმა „კავკაზს“, რომ ასე გვექცევა და ამ სახით გვითხრის იმას, რასაც ჩვენ ჩვენის მოკლე ღონით ვაშენებთ? ეს მით უფრო საკვირველია, რომ „კავკაზი“ ოფიციალური გაზეთია და პატივი სიტყვისა ამისათვის უფრო სავალდებულოა და მართებული. ეს უფრო ფრთხილი და წინდახედული უნდა იყოს, როცა რასმე ამბობს და უნდა ერიდებოდეს ყოველს წარამარა და უწმაწურს ლათაიებს იმისთანა მწერლისას, რომლისათვისაც გრძნობა სიმართლისა, მიუდგომლობისა, — ეს აუცილებელი ღირსება კაცურკაცობისა ღმერთს არ მიუნიჭებია. თორემ აქაოდა „კავკაზი“ ოფიციალური გაზეთია, ბევრი ისე მიიჩნევს, ვითომც აქაური ოფიციალური წრეც „კავკაზის“ ნათქვამის თანამოაზრეა, მისის სიტყვის თანახმად, მისის აზრისა.

მართალია, „კავკაზის“ წერილებს, რომელნიც ჩვენს საქმეებს ასე სთხრის და თავზე ლაფს ასხამს, ქვეშ ილია ხონელის სახელი აწერია და ილია ხონელი ყველამ კარგად იცის, რა არის და ვინ არის, მაგრამ მაინც კიდევ „კავკაზი“ პასუხსგებისაგან ვერ გამოვა და ვერ იმართლებს თავს იმითი, რომ ილია ხონელი ხომ ვიციან, რა კაცია და ყურს ვინ ათხოვებსო. თუ ასე ჰფიქრობს „კავკაზი“, მაშინ რაღადა ჰბეჭდავს იმისთანა წერილებს, რომელსაც ყურს არ ათხოვებენ? ამჟამად, აქ სულ სხვა ამბავია, თორემ ამითი როგორ აიხსნება ესეთი დაჟინებული და დაუცხრომელი დევნა ჩვენის

საქმეებისა, მათი ავადსენება უსამართლოდ, უსაბუთოდ მოთხრა, უსაბუთოდ სახელის გატეხა.

აკი ვამბობთ, მადლობელიც ვიქნებით, თუ რომ „კავკაზი“ ჩვენს ავსა და ცუდს გაგვიმჟავნებს, დაგვანახვებს, კარგს რასმე გვირჩევს, კარგს რასმე დაგვარიგებს. ვინ სულელი იტყვის, რომ ჩვენ, ქართველები, ყველაფრით სრულნი და სავსენი ვიყვნეთ. ჩვენ ადამიანები ვართ და ადამიანი უნაკლულოდ არსად გაუჩენია ღმერთს. ამ ნაკლულობისავე არიან საქმენიც ადამიანისა. სრულყოფილად საქმე არავის გაუჩენია. დროსა და გამოცდილებას ყოველთვის უსწორებია პირველში არდანახული ავკარგიანობა ახლად გაჩენილის საქმისა. რომელი კაციც უფრო შორს გააწვდენს თვალს, უფრო დიდს მანძილზე გაუსინჯავს და მოუჩხრეკს გზას ახლად გაჩენილს საქმეს, მით უფრო სასურველია და მადლობის ღირსი, როცა იგი კაცი თავისს დანახულს და გასინჯულს გვაუწყებს. ხოლო ყოველს ამას ჭკუა უნდა, ცოდნა უნდა, თვალის სინათლის ქონება უნდა. ვინ ილია ხონელი და ვინ ჭკუა, ვინ ცოდნა, ვინ თვალის სინათლე!..

ჩვენ სირცხვილად მიგვაჩნია, ჩვენი ქვეყანა ისე გაუკაცურებულად იცნას ვინმემ, რომ ილია ხონელი დამრიგებლად და გზის მასწავლებლად გაგვიხადოს!..

გული წრფელი მაინც ჰქონდეს მაგ დალოცვილსა, სხვას ყველაფერს დაგვერდებოდით, სხვას ყველაფერს, როგორც იქნება, ავიტანდით, შევიწყნარებდით. ჩვენდა სამწუხაროდ, ესეც არ გამოუმეტნია მისთვის ღმერთსა. აულია, ბატონებო, კალამი და აქაოდა რედაქცია „კავკაზისა“ კბილს არ მიჩხრეკსო, გულწრფელობას და სიმართლეს მჩვარში ახვევს და ტყუილების გუდას პირს მოხსნის ხოლმე. ალბად იმისი იმედი აქვს, რომ რედაქციას „კავკაზისას“ ჩვეულებად დასჩემებია განუკითხველად ჰბეჭდოს ის, რაც ილია ხონელს თავისის ახგარიშებისათვის ენაზე მოადგება.

ამის დასამტკიცებლად შორს სიარული არ მოგვინდება. საკმაოა მოვიყვანო საბუთი იმ ფელეტონიდან, რომელიც „კავკაზში“ (№26) დაბეჭდილი ილია ხონელისაგან. „კავკაზის“ რედაქციას ცხვირწინ ჰქონდა საბუთები და მარტო ნახევარი საათი გარჯა მოუნდე-

ბოდა, რომ შეეტყო რამოდენად მართალია ყოველივე ის, რაც ილია ხონელმა ჩვეულებისამებრ იკადრა და არ ითაკილა, ოღონდ კი სახელი გაუტეხოს ახლად გაჩენილს საზოგადოებას სამეურნოე კრედიტისას და თავზე ლაფი დაასხას მისთა გამგებელთა და წარმართველთა. ეს საბუთები იგი ბალანსებია, რომელიც თვით „კაკვაზშივე“ იბეჭდებოდა სამეურნოე კრედიტის გამგეობისაგან. რა დიდი რამ იყო, „კაკვაზის“ რედაქციისათვის მოეკითხნა თავისს გაზეთშივე დაბეჭდილი ბალანსები და შეემოწმებინა რამოდენად ჰგავს მართალსა უკადრისი და ყოველ სიმართლეს მოკლებული ლაპარაკი იმ წარამარა მწერლისა, რომელსაც ილია ხონელი ჰქვია.

რედაქცია „კაკვაზისა“ მოვალე იყო ესე მოქცეულიყო. სამეურნოე კრედიტის საქმე ახალი საქმეა და ამას პირველშივე ტყუილებით და თავდაუჭერელ ცილებით კი არ უნდა კაცმა წაუხდინოს სახელი, არამედ უნდა შეეწიოს, უშველოს ჭკვიანურის და გულმართალის დარიგებითა და რჩევითა. ეს სალაღობო ფელეტონის საქმე ხომ არ არის, რომ მარტო მასხარაობა მოეთხოვებოდეს. საზოგადო და საპატივო. სხვა არა იყოს რა, დღეს ოთხასზე მეტი კაცი ჰყავს წევრად და ამათ ხუთი ათას თუმანზე მეტი ფული აქვთ თავისის ჯიბიდან გადადებული ამ საზოგადო საქმისათვის. ამ ოთხასის კაცის პატივი მაინც უნდა შეენახა „კაკვაზს“ და არ ეკადრნა ტყუილებით ამათს წინაშე წინ წამოდგომა ასე მოურიდებლად.

„კაკვაზმა“, ჩვენდა სამწუხაროდ, ეს მართებული გზა არ ირჩია. რალაც გაუგებარის მიზეზისა გამო, უმჯობესად დაინახა ეს ოთხასი კაცის საქმე ილია ხონელის ყბადასალებად გაეხადნა და მისის ცილებით მოესვარა. თვითონ „კაკვაზმა“ განსაჯოს, რამოდენად მართებულია ასე გაუპატიურება ამოდენა ხალხის საქმისა, ასე უმართლოდ, უკადრისად გაწირვა ამ ოთხასი კაცის ინტერესებისა – მერე რა გზით? მარტო ტყუილების და ცილების მოწყალებითა.

აი „კაკვაზშივე“ დაბეჭდილი ბალანსები რას ამბობენ და მერე ჰნახეთ, იმავე საგნებზე რას ამბობს ფელეტონი „კაკვაზისა“.

საპირველაგვისტოდ წევრთა ფული ასულა 37,735 მანეთამდე, წევრად შესულა 191 კაცი, ვექსილებით გაუსესხებიათ 16,000 მანეთი.

საპირველსექტემბროდ წევრთა ფულს უმატნია და ასულა 41,125 მანეთამდე, წევრთა რიცხვი ასულა 246-მდე, ვექსილებით გაუსესხებიათ 30,725 მან.

საპირველოკტომბროდ ასულა: წევრთა ფული 44,200 მანეთამდე, წევრთა რიცხვი 302, ვექსილებით გაუსესხებიათ 45,755 მან.

საპირველნოემბროდ ასულა: წევრთა ფული 47,410 მან., წევრთა რიცხვი – 340; ვექსილებით გასესხებული 51,495 მან.

საპირველდეკემბროდ ასულა: წევრთა ფული 48,105 მან., წევრთა რიცხვი 395, ვექსილებით გასესხებული 66,445 მან.

ხომ აშკარაა, რომ თვე და თვე წევრთა ფულსაც უმატნია, წევრთა რიცხვსაც და ვექსილებით გასესხების ოპერაციასაც. მაშასადამე, უმატნია თვით ნლობასაც, იმიტომ, რომ სხვა რაში გამოისახება ნლობა, თუ არა იმაში, რომ ფულიც შეაქვთ და წევრადაც შედიან. ახლა ყური დაუდეთ ილია ხონელის და მასთან ერთად „კაკვაზის“ თავგასულს ლაპარაკსა და კადნიერად წაშლას და შეგინებას ყოველ იმისას, რასაც სიმართლე და მართალი ჰქვია. „წევრნი არკი მოდიან, მიდიანო //! ოპერაციები არ მატულობს კი, კლებულობსო //!, საზოგადოების მიმართ ნლობა არკი მტკიცდება და მაგრდება, ჰქრებაო //! და სხვანი და სხვანიო“.

გაგიგონიათ სადმე ასეთი აშკარა, ასეთი კადნიერი, ასეთი უსირცხვილო ტყუილი!.. რომ ილია ხონელს ვერ გაეჩინოს, რომელია მატება და რომელი კლება, – ეგ საკვირველი არ არის, იქნება მაგის უნარიც არ აღირსა ღმერთმა. „კაკვაზის“ რედაქციისაგან კი ფრიად და ფრიად საკვირველია. ან იქნება „კაკვაზმა“ სთქვას, რომ მე ილია ხონელის თქმული უფრო მჯერა, ვიდრე რალაც ბალანსების სიტყვაო. ღმერთმა მშვიდობა მისცეს, თუ ესეა. ხოლო ჩვენმა მკითხველებმა კი უნდა იცოდნენ, რომ იმ ბალანსებს ხელს აწერს სამი კაცი გამგეობისა, რომელნიც კანონის წინაშე პასუხისმგე-



ბელნი არიან, თუ მცირედი ტყუილი რამ გამოერიოს ბალანსში. ილია ხონელს კი რა დარდი შეაწუხებს, თუნდ ერთის მაგიერად ათასი ტყუილი სთქვას. ღმერთმანი, სიყვარული მართლისა ხელს დაუჭერს ან ტყუილის უკადრისობას შეუშინდება!

მართალია, ილია ხონელი ეს ორი წელიწადია, რაც ჩვენდა სამარცხვინოდ, გაგვიხდა Хозяином положения, როგორც რუსები იტყვიან და ეხლა იქნება ოფიციალური დანიშნულებაც რამ მიიღო, რომ ჩვენი ოფიციალური გაზეთი ასე განუკითხველად მის ფეხის ხმას აჰყოლია და მისს უნარს მწერლობისას კბილს არ უსინჯავს.

[1896 წ.]



### **<ქართული სამონასტრო მამულები ბერძენი ბერების სამსახურში>**

ტფილისი, 8 თებერვალი

გაზეთებმა მოგვიტანეს ამბავი, რომა ბესსარაბიის თავადაზნაურობას საგუბერნიო კრებაში სიტყვა ჩამოუგდია იქაურ სამონასტრო მამულებზე. ყველამ იცის, რომ ბესსარაბიაში დიდძალი მამულები ეკუთვნის მონასტრებსა, რომელნიც აღმოსავლეთში არსებობენ. წინდაუხედავ და ყოველად ურიგო ბატონობამ ბერძნის ბერებისამ ამ მამულებშიო, ამბობენ გაზეთები, ამ ოცდახუთის წლის წინადვე მიიქცია ყურადღება იქაურ ერობისა, რომელმაც დაადგინა თურმე, როგორმე უშველოს და ამისთანა ურიგობა მოსპოს. მაშინ ერობას შუამდგომლობა გაუწევია, რომ იგი მამულები ბერძნის ბერებს ჩამოერთვას და ერობას მიეცეს. ეს საქმე იქ იმით გათავდა, რომ ხაზინამ დაიკუთვნა ის მამულები, მისის შემოსავლით დაჰმართა სკოლები და სხვა სამადლო საქმესაც უძღვებოდა. პატრონობა და ხმარება მამულებისა რიგში და წესში ჩავარდა, სკოლები გამრავლდა, ბევრი ეკკლესია აშენდა და შეკეთდა. რაც ყოველს ამას ჰრჩება, იმას დღესაც უგზავნიან ბერძნის ბერებს აღმოსავლეთში.

ეხლა, როგორც ეტყობა, ამ მონასტრის მამულების საქმესვე შესდგომია თავადაზნაურობა. საიდღამაც შეუტყვიათ, რომ ბერძნის ბერები ძალიან ირჯებიან, ეგება ეს მამულები ხელახლად დაიბრუნონ და ერთს ბესსარაბიის აზნაურთაგანს - კრისტის უთქვამს, ეხლა საქმე ამ გზაზედა სდგასო და საჭიროა თავადაზნაურობამ ხმა ამოიღოს და არამც და არამც ბერძნის ბერებს

ხელში ეს მამულები აღარ ჩაუგდოსო. კრებაში გამოაცხადეს, რომ სხვა ქვეყნის სამღვდელოების უფლება ამ მამულებზე უსაბუთოა: თავისს დღეში იმათ საკუთრების უფლებით არა სჭერიათ ჩვენში მამულები და თუ არხივებში მოვნახავთ, ბევრს საბუთს ვიპოვით ამის დასამტკიცებლად. ბოლოს კრებას დაუდგენია, ვიშუამდგომლოთ, რომ უარი ეთქვათ ხსენებულ მამულებზე ბერძნის სამღვდელოებასაო.

გაზეთები ჰკვირობენ: იმისთანას რას ჰხედვენ ამ დროში ბერძნის ბერები, რომ იმედი მისცემიათ მამულების დაბრუნებისა და დაძინებული საქმე ხელახლად გაუღვიძებიათო?

ჩვენშიაც არის ამისთანა მამულები და თუმცა იგინი, თუ არა ვცდებით, ხაზინის განკარგულებაშია, მაგრამ შემოსავალს კი სულ ბერძნის ბერებს უგზავნიან ათონის მთაზე. ესეთი წყალობა მით არის საოცარი, რომ მონასტერი, რომელიც ძველისძველიდანვე ქართველებისა იყო და რომელსაც შესწირეს ქართველებმავე აქაური მამულები, ესლა ბერძნის ბერებმა დაისაკუთრეს და ქართველი ბერები კი გამოჰყარეს. რამდენსა ჰსცდილობენ საწყალი ქართველთა ბერები, რომ ესე კადნიერად გალახული ბერძნის ბერებისაგან სამართალი კვლავ აღედგინათ და ქართველთა მონასტერი და მისთვის შეწირული მამულები ქართველთა ბერებსვე ჰქონოდათ, მაგრამ ბევრს არას გახდნენ.

განა ცოდვა იქნება და არა დიდი მადლი, დიდი ღვაწლი, რომ ჩვენებურმა თავადაზნაურობამ ამ საეროვნო საქმეს უპატრონოს და ეცადოს, ჩვენივე ჩვენებს დაუბრუნოს! დიდი შემოსავალი აქვს ბერძნის ბერებს ჩვენგან თუ ცოტა, განა არა სჯობია, იგი შემოსავალი ან აქვე მონხმარდეს სკოლებს და ეკლესიებს, ან სხვა სამადლო საქმეს, როგორც ბესსარაბიაში არის თურმე, ან ისევ ჩვენს ბერებს მიეცეთ, ათონის მთაზედ მცხოვრებთა და არა უცხო თესლის ბერებს, როგორც ჩვენთვის ბერძნები არიან. ჯერ ამას ითხოვს სამართალი და მერე იგი სახსოვარი ჩვენთა მამა-პაპათა. რომელთაც ათონის მთაზე ქართველთა და საქართველოს ხსენებისათვის ამოდენა ღვაწლი დასდეს და ამოდენა მამულები შესწირეს და გაიმეტეს. იმის მაგიერად, რომ

აქ დღეს თავადაზნაურობის სახელით ერთმანეთს თავში ვცემთ, ერთმანეთს ვრისხავთ და ვკმობთ, ის არა ჯობია, ეგ სახელი თავადაზნაურობისა ამისთანა საქვეყნო საქმეს მივაშველოთ და თუ რამ ვისმე შეუძლიან, ამისთანა საქმეში გაუწიოს ჩვენს ქვეყანას სამსახური... აქ საქმეც საკადრისია თავადაზნაურობისათვის და ღვაწლიც, თუ გული მართლა ჰგულობს და სახელი ჰსახელობს.

[1896 წ.]



## **<გაბრიელ ეპისკოპოსის ბარდაცვალების გამო>**

ტფილისი, 11 თებერვალი

სტირის და გლოობს მთელი საქართველო. მართლადაც უნდა იტიროს და იგლოვოს. დაკარგვაც არის და დაკარგვაც. დღეს საქართველომ დაჰკარგა ერთი იმისთანა დიდებული კაცი, რომელიც არამც თუ ჩვენში, საცა ასე იშვიათია კაცური კაცობა, სხვაგან ყველაგანაც, საცა დიდბუნებოვანება ადამიანისა ხშირია, იქაც კი ამისთანა კაცი სასახელოა და თავმოსაწონებელი მთელის ერისათვის.

ალარა გვყავს ჩვენი სასიქადულო, ჩვენი გათქმული და სამართლიანად სადიდებელი მღვდელმთავარი, ყოვლად ბრწყინვალე და პატიოსანი ეპისკოპოსი გაბრიელ. როცა რომელისამე ერის სიკეთე გნებავთ დაანახვით ვისმე, ერის აღმატებულობა დააჯეროთ, სწორედ ამისთანა კაცებს დაასახელებენ ხოლმე, აი ამ ერს ამისთანა კაცები ჰყავსო. ამისთანა კაცების ჩამოთვლით ერის კაცობას ზომავენ. დღეს ჩვენ ამისთანა კაცი დაკარგეთ და მოდით, ნუ იტირებთ, ნუ იგლოვოთ!..

ვაი, რომ ჯერ, როცა ამისთანა კაცი საფლაგში არ ჩავისვენებია, როცა მისი წმინდა გვამი თითქმის არც კი გაციებულა, როცა მისი კუბო ჯერ კიდევ თვალწინ გვისვენია და ველით, საუკუნოდ სახსენებელი ვუთხრათ ცრემლითა და გოდებითა, – ჩვენი რუსული გაზეთი „კავკაზი“ გვიგინებს მიცვალებულსა, მთელის საქართველოს წმინდა ცრემლში ურევს უწმინდურს დორბლს ილია ხონელისას და ზედ აყრის ჯერ არგაციებულს გვამსა.

ჩვენ ვიცით, საიღამა სტკივა ჭიანი კბილი ილია ხონელს და ის ჭიანი კბილი რისთვის გამოჰკრა ამ პატიოსანს გვამსა, რომელსაც არც კი დააცალა მიჰბარებოდა მიწას. მაგრამ ის კი არ ვიცით, ჩვენი „კავკაზი“ რას გადაგვიდებია და არ გვაცლის იმოდენას მაინც, რომ ჩვენი სასიქადულო მიცვალებული დავმარხოთ შხამდაუსხმელად ილია ხონელის ცილისწამებისაგან.

რა უნდოდა ეთქვა „კავკაზს“ იმით, რომ ჯერ ამბობს, განსვენებული იყო „უნიჭიერესი და სახელოვანი მღვდელმთავარი საქართველოს ეკლესიისაო“ და მერე უმატებს – როგორც ადმინისტრატორი კი არ ვარგოდაო. მითამ უკეთესი ქართველიც კი უარესი ადმინისტრატორიაო, განა? თუ მართლა ნიჭიერი და ყველაზე მეტად გათქმული ქართველი მღვდელმთავარი ადმინისტრატორად არ ვარგა, ცხადია ამაზე ნაკლები რა ადმინისტრატორი იქნება. ამისი თქმა უნდოდა განა? გვესმის...

შესაძლოა უნიჭიერესი და სახელოვანი მღვდელმთავარი მართლა კარგი ადმინისტრატორი არ იყოს, ამაზე, რა თქმა უნდა, გბელი ქსელი გაიბმის ლაპარაკისა, მაგრამ ამ შემთხვევაში, რაკი იმისთანა მართლა სახელოვანს და უნიჭიერეს მღვდელმთავარზე, როგორც განსვენებული ბძანდებოდა, სიტყვა ჩამოავდო „კავკაზმა“, უბრალო წესი მართებულობისა ითხოვდა, საბუთიც ერვენებინა, ერთი რამ საბუთი და არ აჰყოლოდა ამისთანაებში ყოვლად ცნობილს აყვიობას და ენაჭარტალობას იმისთანა კაცისას, როგორც ილია ხონელია.

თუნდ ცოტა ხანს დაუჯეროთ „კავკაზს“, რომ განსვენებული გაბრიელ ეპისკოპოსი ცუდი ადმინისტრატორი ყოფილა და რამოდენადაც ეს მართალია, „კავკაზის“ ნამუსზე მივაგლოთ. საქმე ის არის ვიკითხოთ: განა მართო ეს გვაკმარა!.. ჩვენი მშვიდობიანი გულმართალი, ჩვეულებრივ წყნარი, ყოველის გაჭირებულის გამკითხველი და შემწყნარებელი, სათნოებით და მადლით სავსე განათლებული მღვდელმთავარი, „კავკაზის“ სიტყვით, ერთი ახირებული, რაღაც გულღვარძლიანი კაცი გამოდის. იგი მისთანა მძიმე

ხასიათისა ყოფილა, რომ კაცი თურმე ვერ მიეკარებოდა. ეს ცოტაა: იგი დესპოტურის ბუნებისაყოფილა და ამის გამო ისეთი რაღაცეები ჩაუდენია, რომ სამართლიანად დაერქვაო „მანუბარი თუ მეომარი ბერმონაზონი“. არც ეს აკმარა „კავკაზმა“: ყველას ეჭვის თვალით უყურებდა, ყველას ზედ მიესევოდა თუ გამოეკიდებოდაო, ყველასთან საომარ ფეხზე იდგაო, ესე იგი ყველას ეჩხუბებოდაო და სხვანი და სხვანი.

საბუთი, საბუთი!.. ბ-ნო რედაქტორო!.. ყოველ ამაზე საბუთი გვიჩვენეთ, საბუთი! უსაბუთოდ ვერ გაგაქვლინებთ ამისთანა კაცს, ვერ გაგაუპატიურებინებთ გრძნობას საკუთარის ღირსებისას მთელის საქართველოსას. ეგ კაცი ჩვენი სახელი იყო და არის, ჩვენი ღირსება იყო, არის და იქნება კიდევ, ვიდრე ქვეყანაზე სიტყვა „სამართალი“ არ გაუქმდება ისე, როგორც გაუუქმებია იგი თქვენს საყვარელ ილია ზონელს, რომლის პირითაც მოგვდგომინართ და საყვარელს მკვდარსაც არ გვამარხვინებთ შაუგინებლად. აქ ან საბუთი, ან ბოდიში!.. სხვა არარა დააწყნარებს აღშფოთებულს გულს პატიოსანის კაცისას.


რაცგინდ იფიქროს „კავკაზმა“, ჩვენ კი არავის არ შევაგინებინებთ იმისთანა კაცს, როგორც ჩვენდა სასახელოდ და სასიქადულოდ მოგვივლინა ღმერთმა და აწ წავგვართვა და რომელიც მიჩნეულია უკეთესს მღვდელმთავრად არამც თუ ჩვენში, არამედ ბევრგან სხვაგან. არავის შევაბლაღვინებთ ჩვენს ძვირფასს მკვდარს, ჩვენს წმინდა მცხედარს, რომლის კუბოსაც დღეს მუხლმოდრეკით პატივსა სცემს დიდი და პატარა. ამისთანა უსაბუთოდ ავად ხსენებას ყოვლად ღირსეულის კაცისას, რომლის სახელსაც ყოველი ქართველი ილია ზონელის გარდა, დიდი პატივით და სასოებით იხსენებს, რომლის წმინდა გვამსაც მთელი საქართველო თავისს ცრემლს ადენს, უიმისოდ ვერ შევარჩენთ ვერავის, რომ ჩვენი სრული ზიზღი, ჩვენი სამართლიანი წყევლა-კრულვა არ შევუთვალოთ.

ამისთანა ამბებმა განუკითხველად არ უნდა ჩაიაროს. თუ „კავკაზს“ ცალკე ადამიანის ღირსების გრძნობა არაფრად მიაჩნია და არ ერიდება უსაბუთოდ მის გათელვას და შებლაღვას, ამ შემთხვევაში პატივი

მანც უნდა შეენახა, სხვა არა იყოს რა, მთელის საქართველოს ერისა, რომელსაც სამართლიანად მიაჩნია ლოცვა-კურთხევით გამოეთხოვოს სამუდამოდ თავისს სასიქადულო და დიდებულს კაცსა და ილია ზონელის უწმინდურ ღორბლით არ ცდილიყო შეებიღწა ჯერ თითქმის არგაციებული მცხედარი.

ნუთუ „კავკაზს“ ჰგონია, რომ გრძნობა ღირსებისა საქართველოს ერს იმოდენად გაღვიძებული არა აქვს, რომ გაუპატიურებად არ მიიღოს ესეთი უგვანო, უმართეულო, უწმინდური, უშვერი თელვა და გინება მისი, რასაც იგი დღეს თავისს სიქადულად და სახელად სთვლის და საუკუნოდ ესალმება გლოვითა და ტირილითა.

[1896 წ.]



## სიტყვა თქმული გაენათის მონასტერში გაბრიელ მაისკოპოსის დასაფლავების დღეს

არ ვიცი, ამდენს მშვენივრად თქმულ სიტყვებ შემდეგ რა მოგახსენოთ ისეთი, რომ თქვენთვის ახალი იყოს. თუნდ ეგეც არ იყოს, ზოგი იმისთანა კაცია, რომ, რაც გინდ ბევრი ისურვოთ, ვერას იტყვით, რადგანაც არა აქვს რა ღირსი თქმისა, და ზოგი იმისთანა, რომ სათქმელი ზღვაა და ან უღონოდ ვგრძნობ თავსა — მისს თვალგადაუწვდენელს კიდეებს ერთბაშად თვალი გადავაწვდინოთ მთლად და უკლებლივ, ან არ ვიცით, რომელ მხრიდამ დავუწყოთ ყურება, რადგანაც ყოველმხრიდამ დიდებული სანახავია. ამისთანაა იგი, რომელსაც დღეს დავტირით.

დიაღ, ბატონებო, დღეს სამუდამოდ ვეთხოვებით იმისთანა დიდბუნებოვანს კაცს, რომელსაც ღმერთი მოუკლენს ხოლმე ამ ცოდვილს ქვეყანას, რომ ადამიანმა მისის მიხედვით და მაგალითით შეიძლოს საკუთარის ზნისა და ხასიათის გაწრთვნა და განმტკიცება. „ნეტავი იმასაო, — ამბობს ერთი ძველადძველი ბრძენი, — ვინც არამც თუ ჩვენთან ყოფნით გვწურთნის ჩვენ, არამედ მარტო თავისის სახელის ხსენებითაცაო“. აი ჩვენს წინაშე მდებარეა იგი მაღლით მოსილი კაცი, რომლის მარტო სახელის ხსენებაც კი გვწურთნის ჩვენ. საკმაოა კაცმა გაიხსენოს მარტო სახელი გაბრიელ ეპისკოპოსისა, რომ გულში მაღლი ჩაეფინოს, ვითარცა მზის შუქი.

თვითვეული წამი მისის ცხოვრებისა — მოძღვრებაა, მაგალითია, ანდერძია ჩვენთვის და ჩვენის ქვეყნი-

სათვის. ერთად კი მთელი მისი ცხოვრება ერთი დიდი სკოლაა მაღალსათნობისა და სიყვარულისა, მართლისა და ჭეშმარიტებისა, მაღლისა და მოწყალებისა. მე ამაზე ბევრს არას ვიტყვი, რადგანაც ბევრი უკვე ითქვა და ბევრსაც კიდევ იტყვის შთამომავლობა, რომელიც ამ საისტორიე კაცს განიკითხავს თავისის სამართლიანის განკითხვითა.

მე მსურს მხოლოდ აქ აღვნიშნო ერთი იმისთანა მხარე ამ დიდებულ კაცისა, რომელშიაც არის, ჩემის ფიქრით, სხვათა მრავალთა შორის, ერთი მისი დიდი მნიშვნელობაცა. მე არ ვიცი იმისთანა სხვა კაცი, — საერო, თუ სამღვდლო, — რომლის გულშიაც მომეტებული მშვიდობისყოფით, მომეტებულის დამშობით ერთად დაბინავებულიყოს სამოქმედოდ მეცნიერება და სარწმუნოება. განსვენებული ღრმადმიწვენილი მეცნიერი იყო და იმოდენადვე ღრმადმორწმუნეცა. აქ არის, ჩემის ფიქრით, მისი აღმატებულება, მისი მნიშვნელობა არამც თუ მარტო ჩვენთვის, სხვისთვისაც, რადგანაც ბევრსა ჰკონია, რომ მეცნიერება და სარწმუნოება ერთმანეთში მოურიგებელნი და მოუთავსებელნი არიანო. იგია მაგალითი ამ მორიგებისა და მოთავსებისა.

ქვეყანა, ბატონებო, სავსეა ხილულითა და არახილულითა ადამიანის სულიერ და ხორციელ თვალისათვის. ერთის ბრძნისა არ იყოს, „ზოგი საგანია, რომ თუ არ დაინახე, ვერ ირწმუნებ, და ზოგი კი იმისთანა, თუ არ ირწმუნე, ვერ დაინახავ“. ბუნება ადამიანისა იმისთანაა, რომ სულთასწრაფვა ჩვენი ერთსაც ეტანება და მეორესაც საცნაურად ორისაც გზით, და მით უფრო, რაც ადამიანი თვალთახილულია და გონებაგაღვიძებული. ნება-უნებლიეთ ამ ორს სამფლობელოში დადის მოუსვენრად გონება და გული ადამიანისა, რომ იპოვოს ბინა და იქ დაღალული სული შესვენოს ხოლმე გულთაძვრისაგან და მსოფლიო ღელვისაგან.

ამ ორს სამფლობელოთა შორის შემაერთებელს ხიდსა სწნავს მარტო სიბრძნე, რომელიც ასე იშვიათია ამ წუთისოფელში, რომლითაც ასე სავსე იყო განსვენებული მღვდელმთავარი და რომელიც, ჩემის ფიქრით, სხვა არა არის რა, გარდა მეცნიერების და სარწმუნოების ერთმანეთში ბედნიერად მორიგებისა, ერთმანეთის

შეუბღალავად და დაუმონებლად. ამისთანა სიბრძნეს სწვდებოდნენ მარტო იმისთანა გენიოსები, როგორც ნიუტონი და სხვანი მისებრნი, ერთსა და იმავე დროს ღვთისა და ბუნებისმეტყველნი.

მთელი მოძღვრება აწ განსვენებულის სახელოვანის მღვდელმთავრისა რომ აილოთ, ძნელად იპოვიოთ მაგალითს, რომ მეცნიერება გაეწიროს სარწმუნოებისათვის, ან სარწმუნოება მეცნიერებისათვის. პირიქით, იგი სარწმუნოებას ამეცნიერებდა და მეცნიერებას ასარწმუნოებდა, თუ ასე ითქმის, და მთელი სიბრძნე მისი ამაშია გამოხატული.

იგი ერთს თავისს ქადაგებაში სთხოვდა თავისს სამწყსოს, რომელიც ყოველთვის სულგაკემნდით უსმენდა ხოლმე, ევედრებით ღმერთს, რომ მომცეს მე ძალა ჯეროვანად ვემსახურო ეკკლესიასა, ესე იგი, თქვენს ცხოვრებასაო, რადგან თვითვეული თქვენგანი და ჩვენგანი ერთად შეადგენს იმ კრებულს, რომელსაც ეკკლესია ღვთისა ჰქვიათ. ეს მისთვის ლიტონი სიტყვა არ იყო, სამღვთო წერილიდამ ამოკითხული და გაზეიერებული. ეს იყო მისი სიმბოლო, ეს იყო მისი განათლებული რწმენა, ეს იყო მისი გამეცნიერებული სარწმუნოება და გასარწმუნოებული მეცნიერება, ეს იყო ის, რასაც სიბრძნეს ეძახიან და რის გარედ მსახურება თვისი მსახურებად არ მიაჩნდა, ღვაწლი – ღვაწლად, მადლი – მადლად, საქმე – საქმედ. არ არის არც ერთი მაგალითი, რომ სადმე და რაშიმე ესუსტნოს ამ რწმენისათვის, პირიქით, თვისი ხანგრძლივი სამსახური მარტო ამ რწმენას შესწირა და შეაღია. კაცთათვის მსახურება მსახურებაა ღვთისაო, – ამას მარტო ღრმადმეცნიერული სარწმუნოება იტყვის და ამისთანა სარწმუნოებისა იყო იგი, ვისიც სიბრძნე მარტო ჩვენ არ გვანცვიფრებს.

რომ მარტო იგი ქება-დიდება შრომისა დაგვრჩენოდა, რომელიც მან გვიღალადა ერთს თავის დაუვიწყარ ქადაგებაში, და სხვა არარა, ისიც საკმაო იქნებოდა, რომ მისი სახელი ქვეყანას მოჰფენოდა და ჩვენც გვეგრძნო, რა დიდებული და ბრძენი მღვდელმთავარი დავკარგეთ. “მე თვითონ არ მინახავსო, – ამბობს იგი, – ხოლო გამიგონია სარწმუნო კაცთაგან,

რომელ ერთს ძველადველს ეკკლესიაში კედელზედ არის დახატული ყოვლადწმიდა ღვთისმშობელი და მის წინ სძევს მატყლი, ხელში უჭირავს ტარი და ჰქსოვს მატყლსა. ნეტამც ჩემის თვალთ მენახაო!” – ჰნატრულობს ამ საუცხოო ხატით აღტაცებული მღვდელმთავარი: – „მაშინ მე გავიცნობდიო მეორესა კერძოსა საღმრთოისა მისის ხასიათისასა და უდიდესსა პატივსა და კრძალვასა მისდამი იგრძნობდა გული ჩემო! რა კარგი რამ იქნებოდა, რომ ყოველსა ქალსა მარადის ჰქონდეს წინაშე თვალთა ისრეთი ხატი, ყოვლადწმიდისა, რომ ერთსკერძო მისსა იდგეს და შესცქეროდეს მას სიყვარულის ღიმილითა ღვთაებრივი მისი ყრმა, ხოლო თვით ხელთ ეპყრას მატყლი და ტარი და სახესა ზედა ღვთაებრივსა გამოყვანილი იყოს ის ღვთაებრივი სიწმიდე, სიმშვიდე და სიყვარული, თვალთა შინა მისთა ბრწყინვიდეს ის უფსკრული გონიერებისა და კრძალულებისა, რომელნი წარითაცებენ კაცის გულსაო. ესრედი ხატი იქნებოდა ჭეშმარიტი დროშა, ანუ სიმბოლო, ესე იგი ნიშანი ქალის მოვალეობისა, ღირსებისა და მნიშვნელობისაო!”

ასე ათავებს სიტყვას ზეგარდმოშთაგონებით მღვდელმთავარი. განაღა შეიძლება ამაზე მეტად გაპატიოსნება, ზეაღწევა შრომისა და გამრჯელობისა, რომელიც ბევრსა გვეგონია, ვითომ წილადხვდომილია მარტო მდაბიოსიო.

საკმაოა ეს მოკლე, მაგრამ ღრმად გაბრძნობილი სიტყვა, მღვდელმთავრის ბაგეთაგან წარმოთქმული, რომ კაცმა წარმოიდგინოს მთელი სულიერი ახოვანება და სიბრძნე მისი, რომლის ბაგენი დღეს ჩვენთვის სამუდამოდ დაღუმდნენ ჩვენდა საუბედუროდ. ბევრი რამ არის ნათქვამი შრომისა და გარჯის გაპატიოსნებისათვის, მაგრამ ამისთანა ქებათა ქება შრომისა შესაძლოა მხოლოდ იმისათვის, რომლის ბაგითაც თვითონ ღმერთი მეტყველებს.

დიად, ბატონებო, მისის ბაგით სწორედ თვით ღმერთი მეტყველებდა და ვაი რომ დაღუმდნენ იგი ბაგენი და ვინ იცის, როდისღა გვადირსებს ღმერთი იმისთანა კაცს, როგორიც დღეს წავგვართვა. რომ მისმა კაცთათვის თავდადებულ მსახურებამ, მისმა საქმებმა

უქმად არ ჩაიარა, რომ წრთვნა მისი, მისი ზნემაღალი მოძღვრება არ დარჩა ხმად მლაღადებლად უდაბნოში, — ამას ამტკიცებს გლოვა ამოდენა ერისა, რომელიც დღეს შემოჰხვევია ძვირფასს კუბოს, რომ უკანასკნელად ემთხვიოს იმა ბაგეთა, რომლითაც იგი გვლოცავდა და გვწურთნიდა, იმ მაღლიან მარჯვენას, რომლითაც იგი გვაკურთხებდა და რომელიც მუდამ გაწვილილი იყო დავრდომილთა შემწეობისათვის და დაცემულის აღდგენისათვის.

დღეს ერი ცრემლს აფრქვევს მისთვის, ვინც მთელი თავისი სიცოცხლე იმის მსახურებაში იყო, რომ თვით მოსწმინდოს ერს თვალთაგან ცრემლი ნუგეშინისცემითა და მაღლის ფენითა. რით იყო ასე ძლიერ სახელოვანი ჩვენი მღვდელმთავარი, რომ გამოიწვია ასეთი დიდი გლოვა ერისა? ნუთუ მარტო სიბრძნითა? არა, სიბრძნესთან ერთად ორი სიკეთე კიდევ ჰქონდა მიმადლებული ღვთისაგან. ერთი ისა, რომ იგი იყო შვილი, სისხლი და ხორცი ამა ერისა, და, მაშასადამე, იცოდა, რა ტკივილით იმტკივნეულოს, რა სიხარულით ინუგეშოს, და მეორე ისა, რომ მოციქულობდა ჩვენის სამშობლო სიტყვითა, იმ ენითა, რომლითაც დღესაც ვადიდებთ ღმერთსა, ვპატრონობთ ქვეყანასა და სულსა და გულს ვაწვდით ერთმანეთსა საუკუნადამ საუკუნემდე. ღმერთმაც ვერ გაგზავნა მოციქულნი სხვა ქვეყნად, ვიდრე არ მოუვლინა ცოდნა იმ ქვეყნის ენისაო, — ამბობდა განსვენებული და ამიტომაც იგი ქრისტეს ჯვარით ხელში თავგამებებით იღვა ჩვენის ენის მწედ და მფარველად.

დიდხანს და დიდხანს იქნებიან საქმენი მისნი ჩვენდა საოხად, სიტყვანი მისნი ჩვენდა ანდერძად და სახელის ხსენება მისი ჩვენდა საწვრთნელად. ყოველივე ეს დიდხანს კიდევ ისაქმებს ჩვენში. დიდხანს და დიდხანს ქართველს საბუთი ექნება სთქვას, რაც მარტო დიდბუნებოვან კაცზეა თქმული: მოკვდა და თვისის ანდერძით აწ ისევ საქმობს მკვდარიო.

მე რომ მისნი მაღლით სავსე საქმენი და სიტყვანი მაგონდებიან, თვალწინ წარმომიდგება ხოლმე შარავანდელით მოსილი ახლად დაბადებული გაბრიელ და მგონია, რომ თავს წამოსდგომია ახლად შობილს ყრმას

ფრთებგაშლილი მთავარანგელოზი, სიყვარულით დასცქერის და ლოცვა-კურთხევით ეუბნება ამ ბრძენთაგან თქმულს:

„პატარავ, როცა პირველად მოსდინარ ქვეყანაში, შენ სტირი და შენს გარეშემო კი ყოველს სიხარულს ღიმილი მოსდის; ჰქმენ ისე, რომ როცა ქვეყანას ეთხოვებოდე, ყველანი სტიროდნენ და მარტო შენ კი ღიმილი მოგდიოდეს“... და აჰა, ჰქმნა ისე, რომ როცა ქვეყანას ეთხოება საუკუნოდ, ყველანი მის გარეშემო სტირიან. დიდება სახელსა მისსა! თუ დიდება სანატრელია, აჰა, ისწავეთ გზანი დიდების შოვნისანი! ამისი მართალი გზა და ცხადი მაგალითი მთელი ცხოვრებაა ამ დიდებულ და მაღლიან კაცისა. ტყუილად კი არ არის ნათქვამი: ვინც კარგად ემსახურება სამშობლო ქვეყანას, იგი უდიდგვაროდაც დიდიაო, და აჰა იგი დიდი კაცი, რომელიც ჩვენდა საუბედუროდ, დღეს კუბოშია ჩვენ წინ მდებარე.

[1896 წ. თებერვალი]



## პოლიტიკური მიმოსილვა

შარშანდელი წელიწადი იმითაა შესანიშნავი, რომ გერმანიამ, რომელიც აქამომდე კბატონობდა ევროპაში, ცოტა არ იყოს, აბრუ გაიტენა და პოლიტიკის მოედნიდამ ერთი ნაბიჯი უკან დაიწია. წინ წამოდგა რუსეთი და ესლა თითქმის ყველანი პეტერბურგს შესცქერიან, აბა პეტერბუგი რას იტყვისო. ბერლინი დღეს ისე ხშირი სახსენებელი აღარ არის, როგორც ამის წინად იყო. ეს იმას უნდა მიეწეროს, რომ ცალკე ეგრეთ წოდებული სამთა კავშირი მოლხვა და მეორეს მხრით გაძლიერდა ორთა კავშირი საფრანგეთისა და რუსეთისა მით, რომ უფრო მაგრა შეიკრა და განმტკიცდა საქვეყნოდ.

ხელმწიფე იმპერატორის და ხელმწიფე იმპერატრიცის პარიზში მიბრძანება, საფრანგეთის მიერ დიდებული მიღება მათის იმპერატორების დიდებულებისა — ეს ისეთი ამბავი იყო, რომ მთელმა ევროპამ ყური აცქვიტა და ცოტა არ იყოს აილურსა კიდევ. შეიქმნა დიდი მითქმა-მოთქმა. ნამეტნავად გერმანია ჩააფიქრა ამ თითქმის მოულოდნელმა მაგალითმა ამ ორთა ძლიერთა სახელმწიფოთა ახლოდ დამეგობრებისამ და ერთმანეთში მტკიცედ განწყობილებისამ. აქამდინაც გერმანიას ვერ ეჭაშნიკებოდა საფრანგეთისა და რუსეთის ერთად ყოფნა და ერთმანეთთან მოთავსება, კრონშტატისა და ტულონის ამბების შემდეგ, საცა რუსეთმა და საფრანგეთმა ერთმანეთს მეგობრულად ხელი გაუწოდეს და აშკარად დაანახვეს ქვეყანას, რომ სამტროდ თუ სამოყვროდ ერთი მეორეს მხარს მისცემს, გერმანია დიდს საგონებელში ჩავარდა. მით უფო გული აუჩოჩქოლდა, რომ ჰხელავდა მისნი მო-

კავშირენი იტალია და ავსტრია გულით აღარ ეკიდებოან სამთა კავშირობას, როგორც პირველში. იტალიაში დაეცა სამინისტო კრისპისა, რომელიც თავდადებით ეტანებოდა სამთა კავშირს და მინისტრობა ჩაუვარდა ხელში რუდინის, რომელსაც გული იმოდენად არ ერჩის სამთა კავშირისათვის, როგორც კრისპის და თუ ჯერ კიდევ არ გამოუყვანია თავისი ქვეყანა სამთა კავშირისაგან, ეგ იმიტომ, რომ შეკრულია გერმანიასთან ჯერ კიდევ კრისპის მიერ შედგენილ ტრაქტატითა და თვითონ იტალიის კოროლიც მომხრეა ამ სამთა კავშირისა.

ავსტრია-უნგრეთიც არ იყო კმაყოფილი გერმანიისა. მას აქეთ, რაც ავსტრია გამოდევნილ იქმნა პრუსიის წყალობით გერმანიიდან, მთელი მისი პოლიტიკა ბალკანეთისაკენ მიიმართა. აქ რუსეთსაც დიდი ინტერესები აქვს და მრავალი ღვაწლი მიუძღვის და საკვირველი არ არის, რომ აქ რუსეთი და ავსტრია ერთმანეთს მეტოქედ და მოდავედ უნდა აღჩნოდნენ. აი ამ მეტოქეობაში გერმანიამ სიტყვაც არ დასძრა, რომ ავსტრიისათვის რამ შემწეობა აღმოეჩინა. გერმანია ერიდებოდა ავსტრიის დახმარებას, რადგანაც ეფიქრებოდა რუსეთისა, პირისპირ მტრობაში ჩამომართმევსო და უამისოდაც ბისმარკისაგან დათესილი ჩვენ შორის უკმაყოფილება უფრო გამწვავდება რუსეთშიო. ეს გულგრილობა ავსტრიის მიმართ, ცოტა არ იყოს გულს გაუტენდა ავსტრიას და ეგრეც მოხდა. ორწყაღშუაღგომა გერმანიისა, რომელიც ერთი მხრით მომხრეობას ავსტრიისას თხოულობდა და მეორეს მხრით რუსეთის არწყენას, სანდო არ იყო რუსეთის მიერ, რადგანაც გარემოებათა ცვლილება აშკარაა გერმანიას ავსტრიისაკენ მოუბრუნებდა გულს და ამიტომაც რუსეთს ღონე რამ უნდა ელონა ყოველ შემთხვევისათვის, სახსარიც ამისათვის შორს არ იყო.

საფრანგეთი, რომელსაც დღეს-აქამომდე გული გულის ადგილას არა აქვს გერმანიის მიერ დამარცხებისაგან, მზად იყო და არის რუსეთს დაახლოვებოდა. დიდი ხერხი არ დასჭირდათ ამ ორ ძლიერ სახელმწიფოთა დიპლომატებს, რომ ერთმანეთისათვის დაეახლოვებინათ ეს ორი სახელმწიფო. ამ დაახლოვების



ნიშნად კრონშტატისა და ტულონის ამბები იყო და ბოლოს დროს მათთა დიდებულებათა მიბძანება საფრანგეთში. ამ მართლა საისტორიო ამბებმა მეტად ჩააფიქრა გერმანია, როგორც ზევითა ვთქვით, გერმანიამ იგრძნო, რას მოასწავებდა ეს ამბები და აქ თითქო მიხვდა, რომ პოლიტიკა გერმანიისა, რომელმაც იძულებულჰყო რუსეთი და საფრანგეთი ესე ერთმანეთს დაახლოვებულიყვნენ, დიდად შემცდარი პოლიტიკა იყო. რა თქმა უნდა, ყველაფერი ბისმარკს დაბრალდა: იმან ისე წაიყვანა პოლიტიკა, რომ ეს ამბავი თავზე მოგვახვიო.

ბისმარკმა, ანუ უკედ ვთქვათ, მისმა მომხრეებმა ყველაფერი კაპრივის გადააბრალეს, იმის უნიჭობას მიაწერეს. თუშცა კაპრივი, რომელიც ბისმარკის შემდეგ კანცლერად იყო გერმანიისა, დიდი დიპლომატი არ იყო, მაგრამ ამასაც თავის გასამარლებლად ისა აქვს, რომ იგი იძულებული იყო ის ემკო, რაც ბისმარკს დაეთესნა და თუ თავი რამეში იჩინა, მარტო იმის ცდაში, რომ როგორმე სხვა ქვეყნებთან საქმე გაესწორებინა, ბისმარკის მიერ აწეწილი. კაპრივის მომხრეებმა ასე გაუთვალწინეს ეს ბრალი ბისმარკის მომხრეებს. მაშინ გამბურგის გაზეთმა, რომელიც ბისმარკის შთავონებით იბეჭდება თურმე, გაამხილა ერთი ასეთი ამბავი, რომ ყველა გააოცა და ავსტრიას ხომ სწორედ თავზარი დასცა.

ეს გაზეთი ამტკიცებს, რომ 1890 წ., ესე იგი, იმ დრომდე, როცა ბისმარკი დათხოვილ იქმნა კანცლერობისაგან, რუსეთსა და გერმანიას შორის პირობა იყო შეკრულიო. ამ პირობის ძალით, თუ ვინმე დაეცემოდა გერმანიის, რუსეთი არ უნდა მიშველებოდა გერმანიის მტერს და არც გერმანიას, ხოლო გერმანიისათვის კი კეთილმსურველად უნდა ყოფილიყო. გერმანიასაც ამისთანა სამსახური უნდა გაეწია, თუ ვინიცობაა რუსეთს დაეცემოდა ვინმეო. ამ პირობას ვადა გაუვიდა კაპრივის დროსაო და კაპრივიმ აღარ განაახლაო.

ამ გამხილებამ მთელის ქვეყნის დიპლომატები გააოცა და დიდის გულისტკენით ამოაკვნესა ავსტრია, ამბობს ერთი გაზეთი. 1879 წლიდამ ძმური კავშირი

აქვთ შეკრული გერმანიასა და ავსტრიას. ამათ მას აქედ პირობა აქვთ დადებული, რომ თუ ვინიცობა ან ერთს, ან მეორეს რუსეთისაგან რაიმე შიში აუტყდათ, ამ ორსავ სახელმწიფოს ჯარები ერთად უნდა დაუხვდნენ რუსეთსა. თურმე ნუ იტყვიო, მთელი თერთმეტი წელიწადი გერმანიას თავისს მომხრეს ზურგს უკან სხვა პირობა ჰქონია იმ სახელმწიფოსთან, რომლის წინააღმდეგ შეველა ჰქონდა აღთქმული და დაპირებული ავსტრიასა. ერთი გაზეთი ამბობს: ამის გამგონე ავსტრიელთა ამისთანა ორგულობაზე რა ეთქმისო. ეს რა ამბავიაო, იტყვიანო: აქამომდე ყურმოჭრილ ყმასავით რას გვატარებდნენ? ვის ვუძლიდით ფიანდაზებსა და სიყვარულით შევხაროდითო. ჩვენ უნდა მივმელებოდით ჩვენის ჯარით გერმანიას, თუ რუსეთი დაეცემოდა და კი არ მოგვეშველებოდა, თუ ჩვენზე მოიცლიდა რუსეთიო და სხვანი.

მთავრობა გერმანიისა სცდილობდა და დღესაც იმის ცდაშია, რომ სიმწვავე ამ გამხილებისა როგორმე დაუამოს ავსტრიას, რომელსაც ჯავრი ყელთ მოსდგომია. მთავრობა გერმანიისა უარჰყოფს ამ გამხილებულს ამბავს. საცა გინდათ და არ გინდათ, არწმუნებს ქვეყანას, რომ ეგ სულ მოგონილი ამბავია და ბისმარკი მაგას არ იტყოდა, რადგანაც მაგისთანა არაფერი რუსეთსა და გერმანიის შორის არა ყოფილა რაო. მაგრამ ავსტრიის ერს გული მეტად აემღვრა და რისხვას მისას საზღვარი არა აქვს. ერთი ავსტრიული გაზეთი იმასაც კი ამბობს, რომ ეხლა ცხადია, რომ ფრიდრიხსრუეში, საცა ჰბინადრობს ბისმარკი, არც ბერლინში საჭიროდ აღარ ჰხედვენ ავსტრიის მეგობრობასაო. ასეა თუ ისე, დღეს დიდად გულნაკლული არის გერმანიაზე ავსტრია და თუ გერმანიამ ამ სატკივარს არა უშველა რა, იქნება ავსტრიაც იძულებულჰყოს საითმე სხვა სახსარი რამ ილონოს.

ეს ერთის მხრით. მეორეს მხრით ამ ბოლოს ხანებში იტალიამაც სურვილი გამოიჩინა საფრანგეთს კრისპისაგან აჯანყებული გული როგორმე დაუშვიდოს. ერთი იტალიური გაზეთი ამ ბოლოს დროს ამბობს, რომ ზოგიერთი ნიშნებია, რომ იტალიასა და სა-

ფრანგეთს შორის უფრო ჰმატულობს სურვილი დაახლოვებისაო.

ყოველივე ეს გარემოება იმისთანა თვისებისა არ არის, რომ გერმანია გაუთამამდეს ქვეყანას დღეს მაინც. ეს ამისთანა ამბები „სამთა კავშირის“ დაუძღურებას უფრო მოასწავებს, ვიდრე სხვას რასმე. მართალია, გერმანია თავით თვისითაც ძლიერია ჯარისა და იარაღის განწყობილობით, მაგრამ დღეს ევროპა იმისთანა მდგომარეობაშია, რომ ცალკე და განმარტოებით არავის არავისთან არ აომებს. ეს ყველამ კარგად იცის და ამიტომაც არც ერთი იმისთანა ქვეყანა არ არის დღეს ევროპაში, რომ მარტო თავისს თავს დაენდოს და მომხრეობას არ საჭიროებდეს. ყველაზე სამიშარ ყოფაში ამ შემთხვევაში გერმანიაა, რომელსაც საფრანგეთი დღესაც გულჩახვეული უყურებს და ჯავრის ამოყრის და სამაგიეროს გადახდის სურვილი და წყურვილი ჯერ არ გაჰნელებია.

თუ სახეში მივიღებთ, რომ „სამთა კავშირის“ დაუძღურების და შესუსტების სისწორივ, ხელმწიფე იმპერატორის მიბძანებამ საფრანგეთში სტუმრად, ქვეყანას აშკარად დაანახვა სიმტკიცე და სიმაგრე კეთილმყოფელობისა საფრანგეთსა და რუსეთს შორის, ადვილად წარმოსადგენია, ამ ერთის მხრით დასუსტებულ ბანაკს და მეორეს მხრით უფრო გამაგრებულს ერთობას რა შედეგი უნდა მოჰყოლოდა. ამნაირის გარემოებისა გამო რუსეთმა და საფრანგეთმა უღელი ევროპის პოლიტიკის სასწორისა თავისაკენ გადინარეს და გერმანიამ კი თითქმის უკან დაიწია, თითქო აბრუ გაუტყდაო. არ ვიცით, მერმისი რას იტყვის და დღეს კი ორივე წვერი პოლიტიკის საბლისა ხელთ უპყრია თითქმის რუსეთსა და საფრანგეთსა, უნამეტნავესად რუსეთსა.

ესეთი გაძლიერება რუსეთისა ვერაფრად მოსდის ჭკუაში ინგლისსაც.

ინგლისი მას აქედ, რაც საფრანგეთისა და გერმანიის შორის ომი გათავდა, ცალკე გავიდა და თავი ისე უჭირავს, თითქო არც არავის მომხრეობას ჰსაჭიროებდეს, არც არავის მტრობას უფროთხოდეს. შარშან მარტოლმარტომ თავი გამოიღო ეგრედ წოდებულ

სომეხთა საქმისათვის. ჩვენ არა გვგონია, რომ აქ ინგლისმა მართლა თავი აიტკიოს საწყალ სომეხთათვის, რომელთაც სული ეხუთებათ ოსმალთა ხელში. ეგ საქმე მარტო მიზეზია, რომ აღმოსავლეთის საქმემ იფეთქოს მთელის თავისის შიშითა და ზარითა. ადრეც გვითქვამს და ეხლაც ვიტყვით, რომ აღმოსავლეთის საქმე ერთი ის დიდი კერაა, საცა საკმაოა ერთი ღერი დაიდრას, რომ ღველფში დამალულმა ცეცხლმა იფეთქოს თოფის წამალსავით და მთელი ევროპა ფეხზე დააყენოს ხმალამოწვდილი ერთმანეთის საჟლეტად. ინგლისმა კარგად იცის, რომ თუ ეს საქმე აიშალა და აიწეწა, დღევანდელი მეგობრები მტრებად გადაიქცევიან და ისე აირევიან ერთმანეთში, რომ არ ეცოდინებათ, ვინ ვისზე იშიშვლოს ხმალი.

ინგლისი დიდის ხნის მოწადინებულია, რომ ეს ასე მოხდეს იმ აზრით, რომ იქნება ამ ერთმანეთში არეუდარეუვამ ზოგიერთი სახელმწიფო გამოანაპიროს და ინგლისის თაოსნობით სხვა ახალი კავშირი შედგეს ევროპის საქმეთა წინ გასადლოლად. სხვით რით უნდა აიხსნას ის თავგამოდება ინგლისისა, რათა დარღვეულ იქმნას და განაწილებულ ოსმალეთი, როცა თითქმის ორმოცი წელიწადია, რაც ინგლისი თავსა სდებდა ოსმალეთის ხელშეუხებლობისათვის და არასფერს არ ზოგავდა ამისათვის. დღეს კი მთავარმინისტრი ინგლისისა სალუსბერი ამბობს პარლამენტში, რომ აღმოსავლეთის პოლიტიკა ინგლისისა მთელი ორმოცი წელიწადი შეცდომით მოქმედებდაო. უდიდესი შეცდომა ის იყო, რომ ლიბერალების სამინისტრომ უარყო სარჩიელი იმპერატორის ნიკოლოზ პირველისა, რომ ოსმალეთი განაწილებულ იქმნასო. მაშინ ინგლისმა არ იჯერა რუსეთის იმპერატორის სარჩიელი და აი ის შეცდომა თავში გვემსო.

მაშინ სულ სხვა ამბავი იყო და გარემოება. მაშინ რუსეთი განცალკევებული იყო და ევროპაში თითქმის მომხრე არა ჰყავდა და რაში ეჭირვებოდა ინგლისს ეს რთული საქმე ოსმალეთის განაწილებისა ფეხზე წამოეყენებინა. დღეს სულ სხვა ამბავია და სხვა გარემოება. ამ სხვა ამბავმა და გარემოებამ ისე შესცვალა ყველაფერი, რომ დღეს რუსეთი ესარჩლება ოსმალეთის

ხელშეუხებლობას და ინგლისი კი ეტანება მის განაწილებას და დარღვევასა, თუმცა როგორღაც ვერ უხერხდება, რადგანაც რუსეთი უარზეა. ასე შეიცვალა დრო და მიმართულება პოლიტიკისა ინგლისსა და რუსეთში აღმოსავლეთის საქმის შესახებ.

მაინცდამაინც ინგლისმა ძალიან გაუჭირა საქმე ოსმალეთსა, რომელსაც შემოწყრა ამ ბოლოს ხანებში იმის გამო, რომ ეგვიპტეს საქმეში ოსმალეთმა აშკარად მხარე დაიჭირა საფრანგეთისა და გული საფრანგეთისა და რუსეთის მხრივ მიიბრუნა. ინგლისის შეწყრომა იეფად არ უჯდება ოსმალეთსა. კრიტის კუნძულის ამბავი, სომხების საქმე და სხვა შინაური ალიაქოთი ოსმალეთში სულ ინგლისის უნარიაო, ამბობენ. აგრეთვე წყრომამ ინგლისისამ დიდ სასოწარკვეთაში ჩააგდო ოსმალეთი. ასე რომ, ეხლა სულთანი თურმე ზოგიერთს სახელმწიფო ელჩებს ემუდარება, როგორმე შამარიგეთ ინგლისთანაო, თუ დაფუჯერებთ ზოგიერთს გაზეთებს, რომელნიც ბოლო ხანებში ამ ამბავს იუწყებდნ.

ამას წინად, ესე იგი 29 დეკემბერს, ეხლანდელ ინგლისის სამინისტროს წევრს ბალფურს, რომელიც კონსერვატორების მოთავეც არის ქვედა პალატაში, სიტყვა წარმოუთქვამს მანჩესტერში. 1896 წლის დასაწყისში, უთქვამს თურმე, ინგლისის საპოლიტიკო ცას ჯანდი გადეფარაო ვენეცუელის და ტრანსვალის საქმეთაგანაო და ეხლა ეგ ჯანდი გადაიწმინდაო. დარჩა მარტო აღმოსავლეთის საქმე იმის წყალობით, რომ ოსმალეთში რეფორმების შემოღება გვიანდებაო. ამ დაგვიანების ბრალსა სდებს ბალფური რუსეთს. ეგროპამ საერთო თანხმობით წინამძღოლობა ამ საქმეში გადასცა რუსეთსა და რუსეთი აგვიანებს, იმოდენად გაბედულად მოსთხოვოს ეს რეფორმები ოსმალეთს, როგორც საჭიროდ ცნობილია ყველა სახელმწიფოებისაგან და მათ შორის თვით საფრანგეთისაგანაცაო. ინგლისის პალატის წევრმა სტენლიმ პარიზის გაზეთში „Éclair“ დაჰბეჭდა ვრცელი წერილი და ამტკიცებს, რომ ინგლისი მზად არის ეგვიპტეს თავი დაანებოს და ჯარები გამოიყვანოსო მაშინვე, რაკი ხართუმს წართმევს მალდისაო და გულს დააჯერებს, რომ ეგვიპტეში წესი და რივი

მტკიცედ დამყარდებაო. ინგლისისათვის სუეზის არხი სტრატეგიის მხრით არაფერი გამოსადგვია და ამ არხის გულისათვის ინგლისი ევროპას არ მოიმდურებს და ნამეტნავად საფრანგეთსაო. მაშ რა საჭიროა საფრანგეთისათვის დამეგობრება რუსეთთან ეგვიპტის გამო.

რომ მიუხვდეთ შინაგანს აზრს, ბალფურის და სტენლის მიერ გამოთქმულ სიტყვისას, საჭიროა ვიცოდეთ, რომ ამ ბოლოს ხანებში სამდურავი რუსეთის მიმართ, თუმცა კანტიკუნტად კი, გაისმოდა პარიზის გაზეთებშიაც. ყველაზე გაბედულად ხმა ამოიღო ამ საგანზე გაზეთმა „ფიგარომ“. ეს გაზეთი არაერთხელ ამბობდა, რომ რუსეთის მეგობრობამ იმდენი ჩვენ არა გვარგო რა, რამოდენადაც თვითონ რუსეთმა ჩვენის მეგობრობით ირგოო. დაგვირდნენ ეგვიპტის საქმეში ხელშეწყობას და სად არის ეგვიპტის საქმეო? ამისი ჩამიჩუმიც არ ისმისო. რუსეთი ამაზე ხმას არ იღებს და ვართ ისე პირში ჩალაგამოვლებული. რა თქმა უნდა, ამისთანა საუბარი გაზეთისა ბევრს არასა ჰნიშნავს, მაგრამ მაინცა და მაინც საყურადღებოა ამისთანა აზრი გაზეთისა იქ, სადაც მთავრობა საფრანგეთისა აგრე მაგრად რუსეთს კალთაზე ხელსა ჰკიდებს.

თუ „ფიგაროს“ ხმას დიდი აბრუ არა აქვს საფრანგეთში, ნამეტნავად საფრანგეთის გარედ, ეს არ ითქმის იმისთანა გაზეთზე, როგორიცაა „Temps“. ეს გაზეთი თითქმის საფრანგეთის სამინისტროს გაზეთად არის ცნობილი და მაინც და მაინც წინდახედულ და ჭკუადაძვიდარ გაზეთად მიაჩნია ყველას. ამას წინად ერთი ბერი იტალიისა სალვატორი მოჰკლეს ოსმალეთში და მკვლელად აღმოჩნდა პოლკოვნიკი მახსარ-ბეი. საფრანგეთი, როგორც მფარველი რომის კათოლიკეთა სამღვდელოებისა, გამოესარჩლა იტალიას და მოითხოვა მკვლელი სამართალში მიეცათ, ოსმალეთი როგორღაც თავიდან იცილებდა ამ საქმეს და სცდილობდა ჰოარობით საქმე ჩაეფუჩენა. ამის გამო ხსენებული გაზეთი „Temps“ ამბობს, ამ საქმის ჩაფუჩენება შეჰლახავს საფრანგეთის ღირსებასაო, საჭიროა, რომ სულთანს რიხიანად გამოეღაპარაკონ და შეურყეველი სიმტკიცე დაანახვონო. საჭიროა, რომ

ყველა სახელმწიფოებმა გამოიჩინონ ერთნაირი მხნეობა და ერთნაირი უკან დაუხეველობაო, თორემ ევროპას აბრუ გაუტყდებო და საქმე აუცილებლად ძალის ხმარებაზე მიდგებო.

ინგლისელები ამ სიტყვებშიაც იმისთანავე სამდურავსა ჰპოულობენ, თუმცა უფრო ფრთხილად გამოთქმულს, როგორც “ფიგარომ” გამოსთქვა. ყოველივე ეს რომ პირისპირ დაუყენოთ ზემოდმოყვანილ სიტყვებს ინგლისის სახელმწიფოთა საქმეთა კაცებისას, არ შეიძლება არ შევამჩნიოთ, რომ ინგლისსა ჰსურს ნავთი დაასხას საფრანგეთის გაზეთებში აბუუტებულს ცეცხლსა, როგორც ამბობს ერთი რუსეთის გაზეთი. ცხადია, ესლანდელი მეცადინეობა ინგლისისა იმაზეა მიქცეული, რომ საფრანგეთს გული აუცრუოს რუსეთზე. აი რისთვის არის საჭირო ინგლისისათვის ოსმალეთის საქმის აშლა, აწეწა და ევროპის წინაშე ფეხზე წამოყენება.

რუსეთს არ უნდა გამწვავება ამ საქმისა და იგი ჰრჩეობს მშვიდობით და სისხლდაუღვრელად დაუმორჩილოს ევროპას ოსმალეთი. იძახის, რომ, თუ ევროპა არ შეიშვნებს სამშვიდობო პოლიტიკას რუსეთისას და ოსმალეთი რჩევას ევროპისას არ მიიღებს, აუცილებელი იქნება ევროპის სახელმწიფოთა ესკადრების შესვლა ბოსფორშიო. მაშინ რუსეთი იძულებულ იქნება, ამბობენ გაზეთები, შავი ზღვის ნავთსადგურებისა და ფლოტის უშიშრად ყოფნისათვის მოითხოვოს დარდანელში შესვლა-გამოსვლის თავისუფლებაო. ამასაც უმატებენ, რომ იმ დრომდე რუსეთს ხელს არ მისცემს, ეს საქმე ასტეხოსო, რადგანაც საფიქრებელია ამით ევროპის თანხმობა დაირღვას, სახელმწიფოთა შორის არეულობა და განხეთქილება რამ ჩამოვარდესო. ასე ჰლაპარაკობს გაზეთი:

ოსმალეთი, ყოველ ამის მაყურებელი და მხედველი, მართალია, ძალიან გაჭირვებულია დღეს, მაგრამ მაინც ეურჩება ევროპის სარჩიელს, რადგანაც დარწმუნებულია, რომ ევროპა ძალას არ იხმარებს და სიტყვას საქმედ არ აქცევს. ევროპა ომის შიშით ვერ გაბედავს ოსმალის ხელის ზღვას, იმიტომ რომ საერთოდ ცეცხლის წაკიდება მოჰყვება ამასა. ეს კარგად იციან ოსმალებმა და ჯერხანად ამით ჰნუგეშობენ და

იოლადაც მიდიან. ამ სახით ქვაკუთხედად ესლანდელის პოლიტიკისა აღმოსავლეთის საქმის შესახებ ჯერ უსისხლოდ დამორჩილებაა ოსმალეთისა და მერე მისი ხელშეუხებლობა. შარშანდელმა წელიწადმა ამ სახით გადმოსცა აღმოსავლეთის საქმე ამ ახალს წელიწადს და დრო გამოაჩენს, ეს ახალი წელიწადი როგორ გაუძღვება.

[1897 წ. 16 იანვრამდე]

1897 წელი



## <არწრუნისეული ქარვასლის ბედი>

ტფილისი, 17 იანვარი

საკვირველ ბედზეა დაბადებული ქართველი კაცი. თითქო ჭკუაცა აქვს, მიხვედრილობაც, ცოტაოდენი ცოდნაც, ცოტაოდენი საქმიანობაც, მაგრამ თავი ბოლოსათვის ვერ გამოუბამს, საქმეს ბოლომდე ვერ გასძლოლია, აქვს რამე – სატირალი უხდება, რადგანაც ვერ მოუვლია, არა აქვს და – თავში საცემელი. ორგზითვე შუაში იჭყლიტება ჩვენი ქვეყანა, რომლის სიყვარულით ვითომ ვიღწვით და ერთმანეთს ვძულდებით. ყიჟინა და ყვირილი ბევრია ხოლმე, აი ამას ვიქით, აი იმასა, ოღონდ კი ეს მოხდეს, ან ისა, და როცა საქმე საქმეზე მივარდება, მეც შორსა და შენც შორსაო, გავურბივართ საქმეს, თითქო რაკი საქმე ფეხზე წამოდგა, თვითონ თავისთავად დანიშნულ სვეს გადაიტანდეს და მიშველება, მოკითხვა და განკითხვა ჩვენ მიერ აღარ ეჭირებოდეს. ბოლოს ის გამოდის, რომ საქმეს თავი და ბოლო არ ებმის, საქმე ყოვნდება, ბრკოლდება და ისლა რჩება ნუგეშად მის იმედისა დიდისა, რომ იმედები გვიცრუვდება და დიდის საქმიადამ პატარა ხეირსაც ვერ ვრჩებით.

რად მოგვდის ესე? რად არის, რომ ყოველი საქმე, სურვილით და სინარულით დაწყებული, ბოლოს არ გაიტანს ხოლმე ჩვენში და ჩვენვე სავალალოდ გვიხდება? ამის მიზეზს ჩვენ იმაში ვხედავთ, რომ ავიჩენთ რომელსამე საკეთილო საქმეს, აჩენისვე უმაღ ცის ანაბრად ვტოვებთ, აღარც მივხედავთ, აღარც ვკითხულობთ, ვის აბარია, როგორ აბარია, მიბარებულს როგორ უვლიან. აღარ ვკითხულობთ კეთდება რამე,

საქმე ჰხერხდება, მიდის თუ არა იმ გზაზე, რომელიც ჩვენთვის სახეირო და სასურველია, წინ მიდის, თუ უკან იხევს და სხვა ამისთანა.


დღეს სწორედ ამისთანა ნაბრალი, ამისთანა თავდაუდებლობა, ამისთანა უგულობა კისრად ედება თავადაზნაურობას, რამოდენა კიჟინა და ყვირილი იყო, რამოდენა დავიდარაბა, რომ თავადაზნაურობის კუთვნილებად შეიქმნას არწრუნისეული ქარვასლა. როგორც იყო ეს სურვილი თავადაზნაურობასა აუსრულდა და ეს მილლიონის ფასის ქონება, რომელსაც რამდენიმე ათასი თუმანი შემოსავალი აქვს, ეს უკეთესი თვალი მთელის ტფილისისა, დღეს შეძინებული აქვს თავადაზნაურობას, მერე ისე, რომ ერთი ცალი ფულიც ამაზე არ დაჰხარჯვია თავისის ჯიბიდან და რა გამოდის? ისა, რომ თავადაზნაურობამ მიანდო ბ-ნს გუბერნიის მარშალს—შეადგინე წესი და რიგი იმისი, თუ როგორ უნდა ვუპატრონოთ, მოვუაროთ და განვაგოთ მაგ შეძინებულ ქონების საქმე და მინამ ეს მოხდებოდეს, გამგებელი კომისია უნდა ამოერჩია ბ-ნს მარშალს და დროებით მისთვის ჩაებარებინა შეძინებული ქონების საქმე და გამგებლობა. კომისია ამორჩეულ იქმნა ბ-ნ მარშალისაგან და დღესაქამომდე იგი განაგებდა.

ამ წინა დღეებში ხმა გავარდა და მერე ხომ გამართლდა კიდევ, რომ წინად არჩეულმა კამისიამ თითქმის მთლად დაანება თავი თავის თანამდებობასა და ბ-ნმა მარშალმა სხვა წევრნი დანიშნაო. მთელის კამისიის სამსახურიდამ გამოსვლა იშვიათი ამბავია და იმოდენად დიდმნიშვნელობიანი, რომ თუ არ დიდი მიზეზი, სხვა არა აიძულებდა რა. ყველა ჰკითხულობს: რა მიზეზი უნდა იყოს იმისთანა, რომ ეს ასე მოხდაო? დღესაქამომდე არავინ არ იცის რა, გარდა ჭორებისა, რომელიც ქუჩა-ქუჩა დადის და ყურადღების ღირსიც არ არის. ნუთუ ამოდენა ძვირფას ქონების საქმე ღირსი არ არის, რომ საჭიროდ დანახულ იყოს, ვიცოდეთ — რა მიზეზმა აიძულა წევრნი კამისიისანი, რომ თავი დაანებეს მიბარებულ საქმეს? რა მოხდა ისეთი? რატომ თავადაზნაურობას არ ატყობინებენ საქმის გარემოებას და გზას უხსნიან ათასნაირ ჭორებს, რომელთაც უკვე

ენები გაილესეს და გულს უთუთქვენ ყოველ იმას, ვისაც საზოგადო საქმე ხელში მჩვრად არ გახდომია, ან როდემდის უნდა უცადოს თავადაზნაურობამ, რომ რაიმე ინსტრუქცია დაიწეროს, როგორ და რა გზით ეპატრონოს შეძინებულ საკუთრებას, რომლის შემოსავალზე დამყარებულია ამდენი იმედი თავადაზნაურობისა თავისის ჭირ-ბოროტის გასადლოლად? აი ეს ერთი წელიწადი მეტია, რაც ეგ ქარვასლა თავადაზნაურთა ხელშია და რაც თავადაზნაურობამ დაადგინა, რომ მაგისთანა ინსტრუქცია მომზადდეს და წარედგინოს თავადაზნაურთა კრებას დასამტკიცებლად. ამის შემდეგ რამდენიმე საგანგებო კრება ყოფილა თავადაზნაურობისა და აბა თუნდ ერთი კაცი გვიჩვენეთ, რომ ამ ინსტრუქციის გამო ხმა ამოეღოს და მოეკითხოს.

ეგრე დავლება საქმისა შეუძლებელია. თავადაზნაურობამ უნდა რამ იღონოს, რომ ქარვასლის საქმე კარგად გარკვეულ წესსა და რიგს დაუმორჩილოს. აკი ვამბობ, შევიძინეთ ქარვასლა და ამით ვათავეთ ჩვენი ზრუნვა და გულ თხელი დავიკრიბეთ: არაფერსა ვკითხულობთ, არაფერს გამოძიებაში ვართ, თითქო საქმე მარტო შეძენა იყო და არა შეძენილის მოვლა და პატრონობა. 23 ამ თთვეს საგანგებო კრებაა დანიშნული თავადაზნაურობისა და მეტი არ იქნება, რომ ამ საგანზე ორიოდ საქმიანი სიტყვა დაჰხარჯონ და საქმისა გაიგონ და გამოიკითხონ რამე.

[1897 წ.]



## **<სულიერი ბალთაქება და საზოგადოების ბუღრილობა>**

ტფილისი, 18 იანვარი

ამას წინად ერთს სახლში ერთს საუბარს შევესწარით. ერთი ჭკალარამოსილი კაცი, გულზედ მოსული, ეხლანდელს დროებას უჩიოდა და სხვათა შორის ამბობდა: ეს რა ღმერთი გაგვიწყრა ქართველობას! ყველგან, საცა კი ადამიანი სცხოვრობს, ყველაფერი წინ მიდის, წარმატებაშია. სიმდიდრე გინდათ — ჰმატულობს, ცოდნა გნებავთ — ძლიერდება, ზნეობას და მართებულობას, პატიოსნებას და ნამუსს იკითხავთ, ყველა ესენი აღორძინებასა და მატებაშია და ჩვენში კი რალაც ღვთის წყრომაა. დღე არ გავა, გლახამათხოვარა კარს არ მოგვადგეს და ღმეჭით და ღრეჭით ლუკმა პურს არ გვემუდარებოდეს. დღეს რომ ერთი იყოს, ხვალ ათი და თხუთმეტი პირდაღებული შემოგცქერის, აცა იქნება გადმოგვედოს რამეო. ასეთს ხალხს აუღია თავი და გლახაობს, რომ ცალკე სირცხვილი გწავს, ცალკე ჯავრი ბოლმასავით ყელში მოგდგომია და სჩივით, რომ სხვა არა შეგიძლიანთ რა, და იძახით: ესეთი რა შევცოდეთ ღმერთსა, რომ ამ დღეში ჩავცვივდითო. ამ შიმშილს და წყურვილს ვინა სჩივის? ხორცის გაღარიბებასთან სულითაც დავლატაკდით. საქმე ის არის, რომ ნამუსიც აღარ არის, სირცხვილი დაგვარგეთ, უკადრისებსა ვკადრულობთ და ხმის ამომღებიც არ არის, რომ ჩვენს თავზე მოგვახედოს, სამარცხვინო შეარცხვინოს, უნამუსობა გაჰკიცხოსო. პირიქით, აღარც სირცხვილი გვწავს, აღარც ნამუსი გვაძნეებს, აღარც სინიღისილა ჰლაპარაკობს. დაეცა ზნეობა, მართებულობა, ნამუსის ქუდი

მოვიხადეთ და ლაფში გადავადგეთ, გრძნობა საკუთარის ღირსებისა დაგვარგეთ და აღარაფრად მიგვაჩნია. უკადრისობა ჩვენს თვალწინ მალაყებს გადადის, საჭიროლაც არა ჰხადის, თავი მაინც დაიმალოს, გამოდის საქვეყნოდ და ჩვენც პირში შევცინით, ვითომდა აქ ძირი არ უღპებოდეს ჩვენს კეთილდღეობას, ჩვენს კაცურკაცობას. ამ ზნედაცემულობისაგან ლამის ისე წავეწყმდეთ, რომ ყოველ ამაყების მოქმედს ბარაქალა ვუძახოთ. აბა გაგონილა სადმე იმისთანა ამბავი, რაც აქაურმა გაზეთებმა ამ დღეებში ქვეყანას მოჰფინესო. აბა რატომ დედამიწა არ უნდა გაირღვეს და შიგ არ უნდა ჩაგვიტანოსო! მთელს თავადაზნაურობას თავზე ლაფი გვესხმის. ნუთუ მართლა ასე დავეცენით სულით და ხორციით, რომ „სამტრედეს“ სასტუმროში ცხვრებსავით გვერეკებიან, გვაჭმევენ, გვასმევენ მარტო იმისათვის, რომ მივიღეთ ბანკში არჩევანების დროს და კენჭი, ეგ გამომეტყველი ჩვენის სინიღისიანის ხმისა და განაჩენისა, ავიღოთ და საცა სხვამ გვანიშნოს, იქ ჩაუძახოთ და ამით ვგძოთ სული და ხორციცაო. გესმით, რაებს ამხელს ბ-ნი არუთინოვის საჩივარი, „სამტრედეს“ სასტუმროს ამბავი. რაო? ეს ჩვენი ქვეყანა ბაზარია, საცა სინიღისი გამყიდავსაც ჰშოულობს და მსყიდველსაცა, თუ რა ღვთის წყრომაა ჩვენს თავზე!.. ეს რა მოგვდისო? ეს რა გვემართებაო? ვინდა ვართ და რანილა ვართო? რა პირითლა ვერვინოთ ქვეყანასაო? აი აქ არის ის ჭია, რომელიც ძირს გამოულრღნის ჩვენს ცხოვრებას და დედამიწის ზურგადამ აგვევისო. ქვეყანა სიღარიბეს გაუძლებს, ხოლო საცა ზნეობა აღარ არის, იქ არც ქვეყანაა, არც ერია. ხომ თავი მოგვეჭრაო ყველას მთელის ქვეყნის წინაშე მით, რასაც გვაუწყებენ გაზეთები ამ ბ-ნ არუთინოვის საჩივრის თაობაზე: იმასაც ვინც ეს საქმე იკადრა, იმასაც, ვისაც აკადრეს და ჩვენც ყველას, ვისაც ჩვენის ქვეყნის შვილს ეძახიანო. ყბად აიღეს აქაურმა გაზეთებმა ეს ამბავი და ვინც წაიკითხავს ამას, რა უნდა იფიქროს ჩვენზე საერთოდ და ჩვენს აზნაურობაზე საუთორივო?

მართლა და რა უნდა იფიქროს!..

[1897 წ.]





## «ოქისის სამეურნეო სკოლის საკითხზე»

ტფილისი, 20 იანვარი

23-ს იანვარს დანიშნულია საგანგებო კრება თავდაზნაურობისა მოსალაპარაკებლად იმის თაობაზე, რომ თ. ზაქარია ერისთავს ჰსურს უძღვნას თავდაზნაურობას თავისი ოძისის მამული იმ პირობით, რომ თავდაზნაურობამ თავისის მხრითაც შრომა მიიღოს, სამეურნეო სასწავლებელი გამართოს და სასწავლებელს საგზალი და სახსარი აღმოუჩინოს. ეს თითქმის პირველი და სასახელო მაგალითი უხვის შეწირულობისა საზოგადო საქმის საოხად და საშველად დიდმნიშვნელობიანია და ცოდვა იქნება, რომ თავდაზნაურობა ისე ხელდახელ და გაკვრით მოეკიდოს ამ საქმეს და მის გაჩხრეკას და გადაწყვეტას მოუმზადებლად შეჰბედოს. აქ მცირედი რამ წინდაუხედულობა, არასაკმაროდ გამორკვევა ყოველის ვითარებისა და გარემოებისა, არასაბუთიანად გამოკვლევა ყოველ იმისი, რაც საფუძვლად უნდა დაედვას ჩვენს ამ საგანზე განაჩენსა, მეტიმეტი უგულობა, უთავბოლობა იქნება ჩვენის მხრით.

რომ ეს ასე არ მოხდეს ჩვენდა სამწუხაროდ და სავალალოდ, საჭიროა ვიცოდეთ მოკლე ისტორია მაინც ამ საქმისა, როგორ იქმნა დაწყებულ, რაზედ აშენდა, რაზედ შესდგა, და რა გარემოება შეხვდა გზაზე და რამ მოიყვანა იგი დღევანდელ დღემდე. ამ საგანზე არსებობს პროტოკოლი თავად-აზნაურთა საგანგებო კრებისა. პროტოკოლი დადგენილია 7 მაისს 1895 წელსა. ამ პროტოკოლიდამა სჩანს, რომ ჯერ კიდევ 1893 წელს მაშინდელ გუბერნიის მარშლისათვის

მიუწერია თ. ზაქარია ერისთავს და გამოუცხადებია შესწიროს თავდაზნაურობას თავისი ოძისის მამული იმ პირობით, რომ იქ გამართოს სამეურნეო სასწავლებელი, შესაფერი თავდაზნაურთა საჭიროებისა. მაშინდელს მარშალს სწორედ ასე მოუხსენებია ეს სურვილი თ. ზაქარია ერისთავისა თავდაზნაურთათვის, რომელნიც მოწვეულ ყოფილან საგანგებო კრებაზე 2 მაისს 1893 წ. ამ კრებაზე თავდაზნაურობას დაუდგენია: 1) გამოეცხადოს მთელის თავდაზნაურობის სახელით. ზაქარია ერისთავს მადლობა; 2) მიენდოს გუბერნიის მარშალს კანონიერის გზით დაემტკიცოს თავდაზნაურობას ეს შეწირული მამული, როგორც კუთვნილება და საკუთრება; 3) მასვე გუბერნიის მარშალს მიენდოს, თუ საჭიროდ დანახულ იქმნება, იშუამდგომლოს, რომ უმაღლესად ნებადართულ იქმნას ამ შემოწირულ მამულის დამტკიცება თავდაზნაურთა სახელობაზე; 4) მიენდოს გუბერნიის მარშალს მიიღოს იგი პირობანი, რომელსაც თ. ზაქ. ერისთავი დაადგენს კუთვნილების ქალაქის შედგენის დროსა.

9-ს დეკემბერს 1894 წ. უმაღლესად ბრძანება გამოვიდა, რომ ნებადართულ იქმნა შემოწირული თ. ერისთავისაგან მამული 1.000 დესეტინა, რომელიც შეადგენს მამა-პაპეულს მის კუთვნილებას, მიიღოს საქართველოს თავდაზნაურობამ იმ აზრით, რაც ნაჩვენებია თვით შემწირველისაგანაო (იხ. ბ-ნ გუბერნატორის ქალაქი 12 იანვრის 1896 წ. № 197).

ამის შემდეგ თ. ზაქ. ერისთავს მიუწერია გუბერნიის მარშლისათვის ორი წერილი, ერთი 24 აპრილს და მეორე 3-ს მაისს. ამ წერილებში თ. ზაქ. ერისთავი ამ პირობას თხოულობს თავდაზნაურობისაგან: 1) წელსვე შემოდგომიდან გამართოს სასოფლო მეურნეობის სკოლა დაბალის ხარისხისა; ათს წელიწადს შემდეგ, როცა იმ დროისათვის შეძლება სკოლისა

\*) აქ საჭიროა მოვიყვანოთ თვითონ ტექსტი ამ მეოთხე მუხლისა: 4. исполномочитъ губернскаго предводителя дворянства на принятие тех ограничений, какие будут устроены князем Захарием Георгиевичем Еристовым, при составлении акта о переходе имения.

დროისათვის შეძლება სკოლისა მოიმატებს მამულის რიგინად კეთების გამო, და თვით თ. ზაქარია ერისთავიც, თავისის მხრით იმ სკოლის ღონისძიებას განაძლიერებს, იგი სკოლა უნდა გადაკეთებულ იქმნას სასოფლო-მეურნეობის სასწავლებლად. ამასთან თ. ზაქარია ერისთავი სთხოვს გუბერნიის მარშალს ეს კატეგორიულად დადგენილი პირობანი აუწყოს თავადაზნაურობას და აცოდინოს, რომ თუ თვითონ თავადაზნაურობაც თავისის მხრით არაფერს შემოსწირავს და თავისის მხრითაც არაფერს გაიმეტებს, ეს საქმე არც ეხლა და არც ბოლოს არ განხორციელდება. მოისმინა რა ყოველივე ეს თავადაზნაურობამ 7-ს მაისს 1895 წ. დაადგინა: ამორჩეულ იქმნას კამისია თ. ზაქ. ერისთავის თავმჯდომარეობით და წევრებათ კამისიისა დანიშნულ იქმნან თ. ივ. სულხ. ჭავჭავაძე, ალ. იოს. კობიაშვილი, დ. ი. მუსხელიანი, თ. ივ. ზაქ. ანდრონიკაშვილი, იოს. ივ. წინამძღვრიშვილი და თ. რევ. ქაიხ. ვაჩნაძე. ამით თავადაზნაურობამ დაავალა დაწვრილებით გამოარკვიონ საქმე და გამორკვეული და მომზადებული მოხსენება წარუდგინონ ამ საგანგებო კრებას თავადაზნაურობისას, ან მორიგს, როგორც საჭიროდ დაინახავენ.

კამისია შეუდგა თუ არა ამ მისთვის მინდობილ საქმეს, თავისი ყურადღება მიაქცია ოთხს საგანს და ეს ოთხი საგანი გამოარკვია ამ სახით: პირველი საგანი იყო ის, თუ რა მნიშვნელობა აქვს სასოფლო სამეურნეობის ცოდნას თავადაზნაურობისათვის. ეს საგანი მეტად თვალნათლივ დასანახია და ამაზე დიდი ლაპარაკი და საუბარი არ დასჭირებიათ: ყველას ერთხმობით გარდაუწყვეტია, რომ იმისთანა სასწავლებელი, საცა ჩვენ ყმაწვილკაცობას შეეძლება მიიღოს ხსენებული ცოდნა, უცილობელს საჭიროებას შეადგენს მთელის თავადაზნაურობისათვის. “მარტო ის გარემოება, ამბობს მოხსენება კამისიისა, რომ სასოფლო მეურნეობის სასწავლებელი საჭირო ცოდნას მისცემს იმ ნაწილს ყმაწვილკაცობისას, რომელიც ვერ შესძლებს თავისი სწავლა-განათლება განაგრძოს აწ არსებულ საშუალო სასწავლებლებში, და თავის ოჯახს დაუბრუნდება განსაზღვრულად მომზადებული, ისეთის

დიდის მნიშვნელობისააო, რომ სასოფლო მეურნეობის სასწავლებლის სარგებლობა ექვს გარემოებაო.”

მეორე საგანად ის აღნიშნეს, თუ რა სახის სასოფლო-მეურნეობის სასწავლებელი უფრო სასურველია და შესაფერი. კამისია იმ აზრზე დადგა, რომ თუ გვინდა სასწავლებელი გაუძღვეს აწ არსებულ საჭიროებას თავადაზნაურობისას, მთელი თვისი ღონე იმაზე უნდა მიჰმართოს, რომ საკმაო სწავლა-ცოდნა მიანიჭოს შუათანა და წვრილი მამულების მეურნეობისათვის თეორიულად და პრაქტიკულად და ამიტომ განზრახული სასწავლებელი უნდა იქმნას საშუალო სასწავლებლის კურსითაო.

მესამე საგანი ის იყო, თუ, – ოძისის მამული, მისი ადგილმდებარეობა და გარემოება შეეფერება თუ არა ხსენებულ სახის სასოფლო მეურნეობის სასწავლებლის მოთხოვნილებასო. მცოდნე კაცებს გაუსინჯავთ ამ მხრით შემოსაწირავად დანიშნული თავ. ზ. ერისთავისაგან მამული და უცვნიათ, რომ ოძისის მამული თავისის ადგილმდებარეობით, სივრცით და სიდიდით სხვადასხვა ნაწილებისა, მიწისა და ჰავის მხრით, აგრეთვე მით, რომ ადვილი სარწყავები აქვს, მთლად შეეფერება მას, რაც საჭიროა სასოფლო მეურნეობის სასწავლებლისათვის. ნაკლად მარტო ის უცვნიათ, რომ რკინისგზას მოშორებულიაო, მაგრამ გზები უკვე კეთდება და ამ სიკარგით მისვლა-მოსვლა გაადვილებულ იქმნებაო.

ყველაზე მძიმე და ძნელად გადასაწყვეტი მეოთხე საგანია. ეს საგანი შეეხება მას, თუ რა ეღირება სკოლის გამართვა და მისი შენახვა. ეს რადგანაც რთული და ვრცელი საგანია, ამაზე საუბარს ხვალისათვის გადავდებთ.

ტფილისი, 21 იანვარი

მეოთხე საგანი, რომელიც კამისიას გამოურკვევია, ის არის, – თუ რა დასჭირდება, რომ ოძისის სკოლა გამართოს, მოეწყოს, და რა ხარჯი მოუნდება მას შემდეგ ყოველწლივ. ამის შესახებ კომისიას შეუდგენია სრული და დაწვრილებითი ხარჯთაღრიცხვა, რომელიც უნდა წარედგინოს თავად-აზნაურთა კრებას. ამ ხარ-

ჯთალრიცხვიდამა სჩანს, რომ თუ სახეში მივიღებთ 80 შეგირდს და იმათგან მარტო 40-ს, რომელთაც თვით სკოლა შეინახავს თავისის ხარჯით, სკოლას მოუხდებოდა მოწოდებისა და მომართვისათვის 43,300 მანეთი ერთხანად და ყოველწლივ 21,270 მანეთი – იმ 4000 მანეთის გარდა, რომელსაც თვითონ შემოწირული მამული შემოიტანს. კამისია ამასთანავე იმედოვნებს, რომ თვითონ შემოწირულ მამულის შემოსავალი თანდათან იმატებს და საკმაოდაც, რადგანაც უფრო უკედ მოუვლის და უპატრონებს სკოლა.

კამისია აცხადებს, რომ რადგანაც ოძისის მამულში უკვე სადგურის შენობებია და სხვა საოჯახო მომართულობა, და რადგანაც პირველ ხანებში კლასები საჭირო არ იქნება ერთბაშად ყველა ერთად გაიმართოს, ამისათვის შესაძლოა, რომ ზემოხსენებული ხარჯი პირველ სამს წელიწადს ამნაირად განაწილდეს: პირველს წელიწადს გაწეობისა და მომართვისათვის საჭირო იქნება მარტო 19,400 მანეთი, მეორე წელიწადს – 16,500, მესამე წელიწადს – 11.400 და ყოველ წლიურ ხარჯად პირველს წელიწადს – 16.000 მანეთი, მეორე წელიწადს – 18.500 და მესამე წელიწადს – 22.000.

ამ სახით გამოდის, რომ პირველ წლისათვის ერთობილი ხარჯი შეადგენს 35.000 მანეთს, მეორე წელიწადს – 35.000 და მესამე წელიწადს – 33.500. ამ ხარჯებს უნდა გამოეკლოს ოთხასი თუმანი, რომელიც ოძისის მამულიდან ყოველწლივ უნდა შემოვიდეს, კამისიის აზრით.

კამისიას უგრძობია, რომ იმოდენა ფულის გამოღება, რაც ზემომოყვანილ ანგარიშით დანახულია საჭიროდ მის მიერ, დაუძიმდება თავადაზნაურობას და მოუწადინებია შემდეგის სახით გაუადვილოს. იგი ამბობს, რომ 47.300 მანეთი ან ცოტა ამაზე ნაკლები შესაძლოა იქნეს ხოლო საადგილმამულო ბანკებიდან იმ პირობით, რომ თავნი და სარგებელი იხადოს საერთო საჭიროებისათვის გადადებულმა ფულმაო. თუ ეს მოხდა, მაშინ საქმე იმაზე მისდგება, რომ თავადაზნაურობამ ინაღვლოს მარტო 21.270 მანეთი ყოველწლივ ხარჯისათვის, თუ 40 შეგირდს სკოლა თავისის ხარჯით შეინახავსო, და

თუ ეს თავისის ხარჯით შესანახი არ მოუნდება, მარტო 17.270 მანეთის შოვნა დასჭირდებაო. ამ სახით პირველ წელიწადს დასჭირდება, თუ 40 შეგირდს თავისის ხარჯით შეინახავს 12.000 მანეთი, მეორე წელიწადს 14.540 და მესამე წელიწადს 18.100; და თუ შეგირდებს არ შეინახავს თავისის ხარჯით, – პირველს წელიწადს 11.000 მანეთი, მეორეს – 12.520 და მესამეს – 15.000. ხოლო მეოთხე წელიწადს სრულს ხარჯში შევა სკოლა და ყოველ წლივ დასჭირდება, 40-ს შეგირდს თავისის ხარჯით შეინახავს, 21.270, და თუ არა – 17.200 მანეთით.

თუ ვინცობა ბანკიდან აღებული სესხად ფული არ აუდგება 47.300 მანეთს, მაშინ ეს აღრიცხვა ამისდა მიხედვით შეიცვლებაო.

ჩვენ არ შევალთ იმის გარჩევაში, თუ რამოდენად ზედმიწევნილია ეს რაოდენობა ხარჯისა. მცოდნე და ამ საგანზე დაახლოვებულ კაცებს გამოურკვევიათ ეს რაოდენობა და ჯერხანად მაინც საბუთი არა გვაქვს მათი გამონარკვევი არ დავიჯეროთ. ხოლო საკითხავი ეს არის: საიდან და როგორ უნდა შესძლოს თავადაზნაურობამ ამ ხარჯის გაძღოლა? ამ საკითხზე დავაპასუხებ თვითონ კამისია. იგი ამბობს, რომ ჩვენ აღვნიშნეთ შემდეგი წყაროები: 1) ის სამეურნოე თავნი-ფული, რომელიც წესდების ძალით უნდა გადიდოს ხოლმე თავადაზნაურთა ბანკის მოგებიდან ყოველწლივ; 2) ზოგი იგი შემოსავალი, რაც თავადაზნაურთა ქარვასლას აქვს და ექნება; 3) ზოგი საერთო საჭიროების თავნი-ფული, რომელიც სათავადაზნაურო საადგილმამულო ბანკის მოგებიდან შესდგება ხოლმე და 4) იგი ფული, რომელიც შესაძლოა იქნეს ხოს ბანკიდან თავადაზნაურობამ და გირაოდ მისცეს თვით ოძისის მამული, იმ პირობით, რომ თავნი და სარგებელი მოშორებულ იქნას იმავე საერთო საჭიროებისათვის გადადებულ ფულიდამ, რომელიც წინა მუხლშია მოხსენებული.

ჩვენდა სამწუხაროდ უნდა ვაღიაროთ, რომ ამ ნაჩვენებ წყაროთაგან საიმედოა ერთი. ეგ ის წყაროა, თუ თავადაზნაურობა დააგირავებს საადგილმამულო ბანკში ოძისის მამულს და იქიდან ნასესხის ფულით

ხელს მონაცვლის. სხვა წყაროები დიდად საეჭვოა. საერთო საჭიროებისათვის ბანკის მოგებიდან გადაღებულ ფულს ისეთი მძიმე ტვირთი აწევს აწ არსებულის სათავადაზნაურო სკოლის შენახვისა, რომ ღმერთს მადლობა უნდა შევწიროთ, თუ ამას უნაკლოდ გაუძღვა. ჩვენის ფიქრით ამ ფულს არამც თუ სხვა უფრო მეტი რამ ტვირთი მოუმატონ, არამედ თავადაზნაურობამ უნდა წინაღვე იფიქროს სხვა რამ წყარო მოაშველოს, რომ ბანკმა შესძლოს ყოველწლივ ეს სამსახური გაუწიოს აწ არსებულს სკოლას თავადაზნაურებისას. ჯერ თვითონ ბანკი იმისთანა ბუნების და თვისების საქმეა, რომ იმედს ყოველთვის მოგებისას ვერ მოგცემთ და, მაშასადამე, ჯერ სათავადაზნაურო სკოლაც ამ მხრით დიდს განსაცდელშია. მერე ჩვენს ბანკს ამ უკანასკნელ წლებში ისეთი დავიდარაბა და თავში საცემი ამბები დაატყდა ჩვენგანვე, რომ სავინცობაოდ გახდა მისი ბედი და უბედობა და ღმერთმა იცის რამოდენად კლებაში შევა მისი მოგება. აი წელს, მაგალითად, არა გვგონია იმოდენა იყოს, რომ დაჰფაროს მთლად აუცილებელი საჭიროება აწ არსებულის სკოლისა. თავადაზნაურობას დასჭირდება მოფიქრება წელსვე საიდან და როგორ გასწვდეს ამ სკოლის ხარჯსა. ქარვასლის შემოსავლიდან თუ არ მოეშველა თავადაზნაურობა ამ სკოლას, სკოლის საქმე მეტისმეტად გაჭირდება წელსავე. ამიტომაც მეტი და ტყუილი იმედი იქნება, რომ ბანკის მოგებისაგან გადაღებული ფული და ქარვასლის შემოსავალი სხვა რასმე მოხმარდეს თუ არ აწ არსებულ სკოლას თავადაზნაურობისას. ამიტომაც ამ ორს წყაროზე დაფუძნებული ანგარიში ქვიშაზე აშენებული შენობა იქნება და არა იგი უღლებელი წყარო, რომელიც საჭიროა იმისთანა სამუდამო და მძიმე საქმის გასაძლიერად, როგორც სკოლაა.

[1897 წ.]



## **<თავად-აზნაურთა კრებების უფლება- მოვალეობა>**

ტფილისი, 1 თებერვალი

გუშინწინ „ნოვოე ობოზრენიე“-ში დაბეჭდილი იყო ქუთაისიდან კორესპონდენცია და გუშინ ჩვენს გაზეთშიაც მოვიხსენიეთ იგი მოკლედ. კორესპონდენტი იუწყება, რომ 28 იანვარს ქუთაისის გუბერნიის თავადაზნაურნი გუბერნიის მარშლის თანდასწრებით შეყრილან კერძოდ ერთმანეთში მოსალაპარაკებლად იმაზე, თუ რა სარჩიელი წარუდგინონ საერთო გუბერნიის მორიგს კრებას, რომელიც დანიშნულია ამ მომავალს მაისში.

ამ კერძო კრებას მოუსმენია სხვადასხვა საგანი, ზოგი მოუწონია, ზოგი დაუწუნია და გადაუწყვეტია, რომ თუ მათი მოწონებული საერთო კრებამაც მოიწონა, საჭირო და სათანადო შუამდგომლობა გასწიონ, საცა და ვისთანაც ჯერ არს. დასაბუთება მოწონებულის საგნებისა დაუვალეობა თვითვეულ ცალკე კამისიისათვის. ჩვენ არ ჩამოვთვლით აქ, რა და რა საგანზე ჰქონიათ საუბარი, რა მოუწონიათ, რა საბუთით და რა საბუთითვე რა დაუწუნიათ.

აქ ჩვენ სულ სხვა სიხარული გვალაპარაკებს და ამავე დროს სხვა დარდი და ნალველიცა.

ვიდრე ამ უცნაურს ნასკვს გამოვხსნიდეთ და ამ მზიან-ჩრდილში გზას გავიგნებდეთ, ჯერ ეს ვიკითხოთ: რა აზრი უნდა ჰქონოდა კანონმდებელს, რომ თავადაზნაურობას მიანიჭა ძვირფასი უფლება სამსწელიწადში ერთხელ მაინც ერთად მოიყარონ თავი? კრება გუბერნიის თავადაზნაურობისა რის მომასწავე-

ბელი უნდა იყოს, კანონმდებლის აზრით? ამ აზრის გამორკვევა ძნელი არ არის, ჩვენის ფიქრით, თუ კაცი საქმეში ჩახეულია.

ძლიერი და გავლენიანი ნაწილი ერისა ერთს დროს თავადაზნაურობა იყო და არც დღეს ითქმის, რომ ეს მნიშვნელობა დაჰკარგოდეს თავადაზნაურობას მთავრობის წინაშე მაინც. ამიტომაც საჭიროდ დანახულ იქმნა კანონმდებლის მიერ, რომ ამ ძლიერს და გავლენიანს ნაწილს ერისას გზა და ღონისძიება ჰქონდეს, თავისი საკუთარი საჭიროება თვითონ გამოარკვიოს, თავისს ჭირსა და ღონის თვითონ მოუაროს, თვითონ უპატრონოს და ყოველივე თავისი დარდი, ნაღველი და საჭიროება აცოდინოს მთავრობას და მთავრობის წადილ-სურვილი – თავადაზნაურობას.

სხვას რას უნდა შესძლებოდა ეს ორნაირი სამსახური გაეწია, თუ არა იმისთანა ორგანოს, რომელიც წარმოადგენს მთელს თავადაზნაურობას ამა თუ იმ გუბერნიისას ცალკე? ამისთანა ორგანოა კრებული თავადაზნაურობისა, რომელიც კანონის ძალით სამსწელიწადში ერთხელ მაინც უნდა შეიკრიბოს, თუმცა ნება აქვს დართული სხვა დროსაც შეკრებისა საჭიროებისამებრ. რადგანაც ეს ორგანო, ვითარცა მრავალკაციანი კრებული, ვერ შესძლებს ყოველ დღეს იმოქმედოს თავისის დანიშნულებისამებრ, ამიტომაც საჭიროდ დანახულია კანონმდებლის მიერ ყოველ სამისწლის განმავლობაში თვისი წარმომადგენელი იყოლიოს თვისთა შორის ამორჩევითა. ამისთანა წარმომადგენელი არიან გუბერნიის და მაზრის მარშლები და ზოგიერთი სხვა მოხელენი, რომელნიც კანონებში დასახელებული არიან, ყველა ესენი სხვა არა არიან რა, გარდა იმისა, რომ თავადაზნაურობის მხრით კრებულის კანონიერს ნებას და განაჩენს უნდა ასრულებდნენ ამ წესით და რიგით, რაც დაწვრილებით ნაჩვენებია კანონებში და თავად-აზნაურთა სახელობით არა უნდა გაჰბედონ რა თავადაზნაურთა კრებულის დაუკითხავად.

ამ სახით, დედააზრი საგუბერნიო კრებისა ივია, რომ ყოველსავე კანონის მიერ შესაწყნარებელს დარდსა, ნაღველს და საჭიროებას თავადაზნაურობისას, კანონმდებელმა გზა გაუხსნა გამორკვევისა მთავრო-

ბამდე მისაღწევად და სატკივარის წამლის მოსაწოდებლად, რამოდენადაც ეს შესაძლებელია მთავრობისაგან. აი რით არის ეს უფლება კრებისა ძვირფასი თავადაზნაურობისათვის: იგი მისდა საჭიროების კანონიერი გამოთქმელია, ხმამაღლა მეტყველი და მლაღაღებელი. მართლადაც, სხვამ ვინ იცის უკეთესად დანახვა საჭიროებისა, თუ არ თვით გაჭირებულმა და, ამ შემთხვევაში, თუ არ კრებულმა მთელის თავადაზნაურობისამ?

აი ეს ძვირფასი მხარე თავად-აზნაურთა საზოგადო კრებისა, ჩვენდა სამწუხაროდ, დავიწყებული გვაქვს. თავად-აზნაურთა კრება ჩვენ ეხლა მარტო მარშლების ამოსარჩევ ორგანოდ მიგვაჩნია და ის კი აღარ გვახსოვს, რომ თუ სათქმელი არა გვაქვს რა, თუ საჭიროება არა გვცემს თავში, თუ არც დარდი, არც ნაღველი რამ არ გვაწუხებს, თუ არა გვტკივა რა, არც მარშალია საჭირო, არც სხვა ვინმე მოხელე. რა უნდა გვიკეთონ ან ერთმა, ან მეორემ? რისთვისდა ვიცხელებთ თავს? რაკი კანონი ნებას გვაძლევს ყოველ ამაზე ჩვენვე ვინაღვლოთ, სათხოვნელია რამ, ვითხოვოთ, გასაკეთებელია – ჩვენვე გავაკეთოთ – ნუთუ, ვამბობთ, ყოველივე ეს იმათ არა ღირს, რომ წინაღვე აღვზუსხოთ, წინაღვე მოვისაზროთ, წინაღვე სიგარძე-სიგანე გავუზომოთ, ავწონ-დავწონოთ და მომზადებული საბუთიანი სარჩიელი შევიტანოთ კრებაში და ჩვენთა მოძმეთა კრებულს დავეკითხოთ, – საიდ რას გავხდეთ და რა გზითა!

კრებას რომ დედააზრი გავუქარწყლეთ, ის, რისთვისაც იგი ძვირფასია, ჩამოვათაღეთ, რისთვისაც განსაკუთრებით დანიშნულია, ის დავივიწყეთ და რაღად უნდა გვიკვირდეს, რომ თვით მოხელეთა ამორჩევაშიაც ბრმად და წინდაუხედველად ვიქცევით. რაკი საქმე აღარ არის, რასლა უნდა შეურჩიოთ ძალ-ღონე ამოსარჩევ კაცისა? ვინც გინდა იყოს, განა სულ ერთი არ არის, რაკი უქმად ყოფნა ასე დაკვებებული გვაქვს? აბა კრებამ თავისდა დანიშნულებისამებრ საქმიანობა გასწიოს, ამოსარჩევ კაცს ვალად დასდოს და თავისს დროზე ყველაფერი მოჰკითხოს, რაც დავალებული და მოსაკითხია, და მაშინ ჰნახავთ ბევრი გაბედავს თუ არა

კენჭის ჩამოტარებას და იმ სასახელო ტვირთის ზიდვას, რომელსაც საზოგადო საქმე ჰქვია და რომელიც ჭეშმარიტ მზიდველისათვის მარტო წვალეა, პასუხისგებაა, ჯაფაა და არა მოედანი მუნდერში გამოჭიმვისა და პტყელ-პტყელ სასაცილო ბაქობისა: რაცა ვარ, მე ვარო. რომ კრება თავისს დანიშნულებისამებრ არა საქმობს, რად გვინდა საქმიანი კაცი უსაქმობაზე მოვაცდინოთ. ამიტომაც დიდს არჩევანში არ შევღვივართ, როცა მარშლებს და სხვა მოხელეებს თაროზე წამოვასკუპებთ ხოლმე და გვგონია საქმე გავაკეთეთ და ქვეყნის წინაშე ვალი ავიხადეთო.

ჩვენში დედააზრი კრებისა დღეს დავიწყებულა, მკვდარია. ამ დედააზრის მკვდრეთით აღდგენა აუცილებელ საჭიროებად უცვნიან ქუთაისის თავადაზნაურობას და ამისათვის მზადებას შესდგომია თავისდა სასახელოდ და ჩვენდა სამაგალითოდ. აქედამ აშკარაა, რომ ქუთაისის თავად-აზნაურთა მიუგნით კრების უმთავრესს და ერთადერთ სანატრელ ძარღვისათვის და ცოდვად ჩაუთვლიათ მარტო კენჭობისათვის თავის მოყრა მორიგ კრებაზე. კანონი ნებას გვაძლევს ჩვენის თავისათვის ვინაღვლოთ რამ, რაც წარსადგენია, წარუდგინოთ მთავრობას, რაც ჩვენგან გასაკეთებელია, გავაკეთოთ და რა საკადრისია, რომ ამ საზოგადო მოვალეობას ვლაღატობდეთო.


ასეთი ამბავი ქუთათურებისა გონების აღმატებას მოასწავებს. ეგ იმის ნიშანია, რომ იქ გულსა და გონებას მუშაობა დაუწყვია, თვალს ხედვა მოჰმატებია და ყურს სმენა. ღმერთმა ჰქნას ყოველ ამისი უფრო მეტად გაძლიერება!

აი სასიხარულო რა არის იმ ამბავში, რომლის მოთხრობითაც დავიწყეთ ჩვენი წერილი. სანაღვლელო და სადარდელი რაღა არისო, იკითხაეთ? ის, ჩვენო ბატონებო, რომ ჩვენც, ტფილისის თავადაზნაურობას, ბევრი რამ გვიჭირს და ხმის ამომღები არ არის. ვართ ისე მიყურებულნი და გაბრუებულნი, თითქო მოსაკითხი, განსაკითხი არა გვქონდეს რა, თითქო არაფერი გვტკიოდეს, არაფერი გვენაღვლებოდეს. ჩვენც ველოდებით 28 მაისს თავადაზნაურთა კრებას და ყურსაც არ ვიბერტყავთ, მივალთ ცხვრებსავით და ცხვრებ-

სავით ყურებჩამოყრილები გამოვალთ. ჩვენ დღეს იმით ვალამებთ და ღამეს იმით ვათენებთ, ერთი იძახის სამასხარო ქადილითა Я имь задамь-ო და მეორენი სიცილით ეუბნებიან: ბალი ალაო, იყავნ ნება თქვენო. ამაში მიდის დრო, ესე იგი მთქნარება ჩვენი. ღმერთიც მწყალობელია და კაციც.

ჩვენ სხვა არა დაგვრჩენია რა, რომ ვთქვათ: ნეტავი ქუთათურებს! შურიანობაში ნურავინ ჩამოგვართმევთ. ჩვენ იმათი უკან დახევა კი არ გვინდა: ჩვენი ძმები არიან, ჩვენ იმათამდე მიღწევა გვენატრება: ჩვენც იმათი ძმები ვართ.

[1897 წ.]



## «სამეურნეო სასწავლებლის დაარსების საჭიროება»

ტფილისი, 8 თებერვალი

ჩვენ შევიტყუეთ, რომ მთავრობას ერთი ჩვენთვის ფრიად გასახარებელი და საბედნიერო აზრი მოსვლია და ამ ამბის მომტანს სწორედ სამახარობლო ერგება ჩვენგან. აწ განსვენებულს მთავარმართებელს ბ-ნს შერემეტიევს თვისს უუქვეშევრდომესს მოხსენებაში აღუნიშნავს სხვათა შორის განწირული ყოფა-ცხოვრება ჩვენის თავადაზნაურობისა. მართლდაც, სიღარიბე და შეუძლებლობა ამ წოდებისა იმოდენად ძლიერია, რომ თავადაზნაურობას ღონე არა აქვს თავისის ადგილ-მამულის შემოსავალი განადიდოს და მით სული მოიდგას. ამის მიზეზი ყველაზე უწინარეს ის არის, რომ ცოდნა არ არის, რა გზით და როგორ მოუარონ მამულს, რაგვარად შეუწყონ ხელი, რომ მამულის უკეთესად მოვლით და შემუშავებით უფრო მეტი ღონე მოიციენ. სიღარიბე ვერ აზრდევინებს, ვერ ამზადებინებს შვილებს, რომ შვილი სჯობდეს მამასა და ეს წოდება უკან და უკან მიდის ქონებითაც და გონებითაც. ეხლა უცოდინარი მშრომელი უხორთუძო სპილოა, უბრჭყალო ლომია არსებობისათვის ბრძოლაში, უფარხმალო მელმარია და რაც გინდ ვაჟკაცი იყოს, დამარცხებულია და ძლეული.

ამის გამო განსვენებულს მთავარმართებელს დაუსახავს, რომ ერთი უმაღლესი სამეურნეო სასწავლებელი საქართველოში დიდ შემწეობას მისცემს აქაურ თავადაზნაურობასა, რომელსაც ეგრე ენატრება ერთობ სწავლა-ცოდნა და სამეურნეო განსაკუთრებითაო. მინ-

ისტრთა კომიტეტში მისს იმპერატორების უმაღლესობას დიდს მთავარს მიხელ ნიკოლოზის ძეს, როცა ამ საგანზე ლაპარაკი და მსჯელობა ჰქონიათ, მეტად გულმტკივნეული სიტყვა უბრძანებია ჩვენდა სასარგებლოდ და ამით გაუთავებია, რომ სასურველია, რომ მთავრობამ ამ მხრივ შემწეობა რამ აღმოუჩინოს იქაურობასაო.

ფინანსთა მინისტრი ბ-ნი ვიტტე თანაგრძნობით მიჰგებებია დიდის მთავრის მიერ ნაბრძანებს და თავისის მხრივ დაუძენია, რომ იგი მოიპოებს ფულის ღონისძიებას საქართველოს თავად-აზნაურთა შვილების სწავლა-განათლებისათვის. მინისტრთა კომიტეტს დაუდგენია, რომ აქაურს მთავრობას ეცნობოს ყოველივე ეს და ეკითხოს: რაოდენად საჭიროა აქ გაძლიერდეს თავად-აზნაურთა შვილებისათვის სწავლა-ცოდნის ღონისძიებანი და ეს საჭიროება რამოდენა ხარჯს მოითხოვს. მთავარმართებლის კანცელარიას ეს კომიტეტის განაჩენი გარდაუცია გუბერნატორისათვის და უთხოვნია, თქვენი აზრი გვაცნობეთ ამ საგანზეო. გუბერნატორს თავისის მხრით მოუკითხნია აზრი ჩვენი გუბერნიის მარშლისაგან.

მერე? იკითხავთ. მერე ისა, რომ გუბერნიის მარშალს არც უციებია, არც უცხელებია და პასუხი უკვე მიუწერიო, გვიამბო ამ ამბის მომტანმა.

„როგორ?“ უცრად შემობლაგლა ერთმა იქ მყოფმა დარბაისელმა ქართველმა. „უმაღლესმა მთავრობამ მოწყალეს თვალთ გადმოგვხედა, მისმა იმპერატორებითმა უმაღლესობამ დიდმა მთავარმა გულმტკივნეულად მოიწადინა ჩვენი ხსნა, ფინანსთა მინისტრმა არ დაიშურა ჩვენს ხსნას ხელი შეუწყოს და სახსარს იძლევა ჩვენის შვილების განათლების და სწავლა-ცოდნისათვის და რომ ჩვენს სატიკვარს, ჩვენს ჭირს და ვაგლახს სიგრძე-სიგანე ჭეშმარიტად გაეზომოს და ზედ გამოიჭრას მართალი და უებარი წამალი, — ჩვენვე გვეკითხებიან, ჩვენ კი ამაებისა არც არავინ რა შეგვატყობინა, არც არავინ არ დაგვეკითხა და აიღეს და ჩვენ მაგიერ პასუხიც კი გაკზნავენ! ეს დიდად სასურველი და დიდად სანატრელი საქმე განა იმისთანა რამ არის, რომ კანცელიარულად წავიდ-წამოვიდეს?! თუ მთავრო-

ბას არა სურვებოდა ჩვენის თავადაზნაურობის აზრის შეტყობა ამ დიდი საქმის შესახებ, ბ-ნს გუბერნიის მარშალს რად დაეკითხებოდნენ. და თუ ესეა, ჩვენ მაგიერ ვინ მისცა პასუხი, ან ვის შეეძლო მიეცა ჩვენდა დაუკითხავად! გამიგონია, რომ ერთს დროს, რომელიც წავიდა და ღვთის წყალობით აღარ მოვა, ბატონი ყმის მაგიერ იძლეოდა პასუხს და ჩვენ ვინ გადაგვაქცია ხმაამოუღებელ ყმებადაო!..“

„ამისთანა, ღრმად მოსაზრისი, მრავალმნიშვნელობიანი საქმე ამ საუკუნეში, არა მგონია, სხვა ბევრი გაგვიჩინოდეს და ესეც კანცელიარულად ჩავაფუჩეჩოთო! განა ეს იმისთანა საქმე არ არის, რომელზედაც დამოკიდებულია ჩვენი წინ წაწევა, წარმატება ქონებით თუ გონებით, ჩვენი აღმატება, ჩვენი გაძლიერება, ჩვენი შვილების სვე-ბედი და, მამასადაძმე, მთელი ჩვენი მერმისი, მთელი ჩვენი სასოება ხვალისდელ დღისა, მთელი ჩვენი ავი და კარგი, მთელი ჩვენი ცხოვრება და სულდგმულობაო! აიღეს ეს დიდი საქმე და თავადაზნაურთა დაუკითხავად, მის მიერ გაურჩევლად და განუსჯელად გადასწვებეს და პასუხიც გაჰგზავნესო! არც კი გვატყობინებენ, რა პასუხი მისცეს ჩვენ მაგიერაო! ეს რა ამბავი მოდის ჩვენს თავსაო! ცხვრები ვართ, თუ რა ჯანაბაა, რომ ასე გვექცევიან ჩვენებივეო! აღარაფრად მივანნივართო! ვყრივართ სადმე თუ არა, აღარავის ვავონდებითო! სადაურია? გაგონილაო?“ იმანდა გულგახეთქილი, გამწარებული დარბაისელი კეთილშობილი.

სადაურიაო? აქაურია, ჩვენებური, ქართველური! გაგონილაო? გაგონილზედაც მეტია. ჯერ მოიცადეთ, ღმერთი მოწყალეა, ბევრს კიდევ სხვას გაიგონებთ.

[1897 წ.]



## <კრიტიკის ახალი აზრი და ოსმალეთის საკითხი>

ტფილისი, 10 თებერვალი

ნუთუ თვალწინ დაგვიდგა დასაწყისი ოსმალეთის დასასრულისა? ასეთი საკითხი ყოველს კაცს მოსდის ფიქრად, როცა ამბად მოდის კრიტიკის კუნძულის გამო ატეხილი ალიაქოთი. რა ჰქმნა ისეთი საბერძნეთმა, რომ ევროპა მუქარით და საყვედურით ხელს უქნევს. იუღიტება ტყუილ-უბრალოდ ქრისტიანი ხალხი, ლამის სულის ამონადამდე მივიდეს კუნძული კრიტიკისა, ლამის ერთმანეთი შესჭამონ იქ დატყვევებულმა ბერძნებმა და დამპყრობელმა ოსმალომ, ევროპა კი არამცთუ ხელს არ სძრავს, თავისს რიხიან ხმას არ იღებს, არამედ გამოსულა და მუქარით ეუბნება პატარა საბერძნეთს: შენც სუ და მეც სუო.

დიპლომატიისა არ ვიცით, — რა უძევს წინ, რომ ასე იქცევა. საბერძნეთის მოქმედება კი ადვილად ასახსნელია, საიღამ მოდის და სად მიდის. ქვეყნის გული თანაგრძნობით უნდა უყურებდეს ამ პაწია საბერძნეთის თავგამოდებას და გაბედულებას. კრიტიკის ბერძნების სისხლხორცნი არიან, მათი ერთმორწმუნენი და ოსმალთაგან მოწყვეტილნი თავისს მოძმეთაგან, მისგან დევნულნი და ჩაგრულნი. ბევრს კრიტიკელს ვაჟკაცს დაუდვია თავი საბერძნეთისათვის, როგორც თავის სამშობლო ქვეყნისათვის, ბევრს დაუღვრია თავისი სისხლი, მტლად დაუდვია თავისი სიცოცხლე საბერძნეთის განთავისუფლებისათვის, ბევრს სულის დაღვევის დროს ომში უძახნია: გაუმარჯოს საბერძნეთსაო და ამის ნატვრით დაუღვევია სული! ნუთუ სა-



ბერძნეთს საყვედური უნდა შეეთვალოს ვისგანმე, რომ იგი დღეს თვისთა მოძმეთა სიყვარულით აღფრთოვანებულია, გამოუდვია თავი იმათის ხსენისათვის, გამოსულა და იძახის: პატარა ვარ, მაგრამ გული დიდი მაქვს ძმათა საშველად, ჩემი იარაღი, ჩემი თოფი და ზარბაზანი ჩემი სიმართლეა, სიმართლე ერთის სისიხლხორცობისა, ერთსარწმუნოებისა სიმართლე ჩაგრულთა და წვალებულთა ძმათათვის გულმტკივნეულობისა და თავდადებისაო.

მართლაც, რა იმისთანა დანაშაულობაა, რომ კაცმა თავისი ძმა, ტყვედქმნილი, ძალით წართმეული, მოტაცებული, გულის ამოხდომამდე მიღწეული, – იძიოს, რომ ისევ თავისთან იყოლიოს, შეივრდომოს, შეიერთოს, ძმას ძმურად მიემეველოს, შეეწიოს. გრძობა ადამიანობისა, ქრისტიანობისა, მაღალზნეობისა – სხვა რა არის, თუ არ გულისტკივილი ყველასათვის საერთოდ და ძმათათვის განსაკუთრებით, აი ეს, სწორედ ეს გრძობაა ის ღონე უღონოსი, ის შემძლებელობა შეუძლებელისა, რომელიც სასწაულს აქმნევინებს ხოლმე ადამიანს და რომლის საოცარი მაგალითები ძლევაძმოსილობისა არა ერთი და ორია ისტორიაში.

ჩვენის ფიქრით, პირველი მიზეზი და საბუთი იმ თავგამოდებისა, რომელიც დღეს საბერძნეთმა გამოიჩინა, ამაშია და ამაშივეა მისი იმედი და სასოება. ეს იმედი და სასოება უნდა გაორკეცდეს და გაძლიერდეს იმ საზრისით, რომ ქვეყანა ამ შემთხვევაში საბერძნეთისაკენ უნდა იყოს, თუ მარტო მუცლისათვის არ მოუკლავს უმაღლესნი სულთაწრაფვანი ადამიანობისა, კაცთმოყვარეობისა, ქრისტიანობისა.

დიპლომატია, რასაკვირველია, სულ სხვა თვალთი უყურებს საბერძნეთის, ამ პაწია და უღონო სამეფოის, გაბედულობას. უკვირს, საბერძნეთი როგორ ჰბედავს და ჯიუტობს და არ ემორჩილება ევროპასაო. დავიჯეროთო, იძახიან დიპლომატები, აქ არავინ იყოს იმისთანა, რომ საბერძნეთს ერთს აწვეთებდეს ყურში და პირად-კი სულ სხვას გაიძახოდესო? თუ ესეა, აშკარაა – ის, ვინც არის, ღონეც უნდა შესწევდეს, ზურგი მეტად მაგარი უნდა ჰქონდეს, თორემ სა-

ბერძნეთი არც ისეთი უპატრონოა და წინდაუხედავი, რომ თვით უღონო – უღონოსავე სიტყვას და ქადილს აჰყვეს და თავისი სვე-ბედი დიდს განსაცდელში ჩააგდოს. აშკარაა, აქ ისეთი წამქეზებელი უნდა ჰყვანდეს, რომ მისის იმედით და უეჭველის დაპირებით საბერძნეთმა გაბედოს ის, რაც უკვე ეგრე თამამად გაბედა.

თქმა არ უნდა, ეხლანდელი სულთაძვრა საბერძნეთის ერისა, მისი ზნემაღალი მოვალეობა თავის სამშობლოსა და მოძმეთა წინაშე – შეექმნებოდა ზოგიერთს სახელმწიფოს იმედად, რომ, იქნება, ამით აღმოსავლეთის საქმემ მთელ თავისს სიგრძე-სიგანეზე იფეთქოს და ევროპა აირ-დაიროს, გამეგობრებულნი ერთმანეთს გადაამტეროს, მტერნი დაამოყვროს და ამ სახით, საცა წვრილია, იქ გაწყდეს ძაფი ეხლანდელის კავშირობისა. ადრეც გვითქვამს და ეხლაც ვიმეორებთ, აღმოსავლეთის საქმე იმისთანა საბეულია, – თუ ცეცხლი წაეკიდა, ყველა თავისის საკუთარის ხელების თობას დაიწყებს, ყველა ეცდება თავისაკენ მოითალოს, რაც მოსათლელია. რაკი სახელმწიფოთა „მე“ გაიღვიძებს, ოსმალთაგან დატოვებულს სამკვიდროს განაწილების მადაც თავისს გაუმაძღარს პირს დააღებს, და მოდით, ყველა პირდაღებული გააძლეთ ისე, რომ მეტი არავინ ინდომოს და ამ ნდომით ხელი ხმაღს არ იკრას სიხარბითა, იმისდა მიუხედავად, ბედი და შემთხვევა ხელს შეუწყობს თუ არა.

აი, დიპლომატიის შიში რაში მდგომარეობს. იგი ფრთხილობს, რომ პაწია საბერძნეთმა არ ააფეთქოს აღმოსავლეთის საქმე და თოფ-ზარბაზანმა არ გაიხმაუროს თავისის საშინელის ხმით იქ, საცა დღეს მარტო დიპლომატების ენა ტყუილ-უბრალოდ ჰლაქლაქებს.

ამ სახით, უეჭველია, რომ დღეს ევროპაში ერთის მხრით აღმოსავლეთის საქმის ატეხა ჰსურთ და, მეორეს მხრით, – მისი ჩაფუჩჩეება. აშკარაა, თვითოეული მხარე ისე იქცევა, როგორც უჯობს, და საკვირველი არ არის, რომ საბერძნეთს მოიმედე წამქეზებელი ჰყვანდეს და ზურგთ უკან მაგრად ჰქონდეს დაჭერილი საქმე. ეს, რასაკვირველია, საბერძნეთის ტრფიალებით

კი არ მოსდის წამქეზებელს, თუ იგი სადმეა: იმას თავისის პოლიტიკის ნასკვის გამოხსნა სწადიან, გაჭირებისაგან გამოსვლა, ერთის სიტყვით თავისი ინტერესები ამოქმედებს და, როგორც ეტყობა, ჯერ ხანად აღჩუ უჯდება. არც მეორე მხარეა ოსმალის ტრფიალებით გატაცებული. ყველამ კარგად იცის, რომ დღენი ოსმალის ხელმწიფობისა ევროპაში დათვლილია, დღეს არა, ხვალე იგი დადნება, ვითარცა მარშანდელი თოვლი. ხოლო სამკვიდროს გასანაწილებლად და გასაყოფად მზად არიან და სცდილობენ ეს საქმე გასჭიმონ იქამდე, ვიდრე შესაძლო იქნება, რისით და ზარით მივიდნენ და თავისი ნაწილი უკლებლივ მოიჭრან ოსმალთაგან დაძინილ სამკვიდროსაგან.

ამასთან „ჰო“ და „არა“ ერთსა და იმავე დროს ევროპის სახელმწიფოთა შორის საბერძნეთს, ჩვენის ფიქრით, ხელს უნდა უმართავდეს. დიპლომატია, როგორც, კარგად გაწურთვნილი მეძებარი, ამ „ჰოსა“ და „არას“ კვალსა, უეჭველია, უნდა აჰყვეს და ამის უკან დევნას მოახმაროს თავისი დრო და ჭკუა. მოულოდნელი არ არის, მინამ დიპლომატია ამაებით გართული იქნება, საბერძნეთმა აილოს და კრიტიკის კუნძული დაიჭიროს და ამით გათავდეს საქმე ჯერხანად. ამისთანა წაჯექ-უკუჯექობა იყო, როცა ინგლისმა არც აცხელა და არც აცივა, აილო და ეგვიპტეში დასკუპდა მთელის ევროპის წინააღმდეგ; ევროპამ პროტესტი გამოუცხადა და დაჩუდა. ავსტრო-ვენგრიამ დაიჭირა ჰერცოგოვინა და ბოსნია, კიდევ წინააღმდეგ მთელის ევროპის განაჩენისა; ეს შერჩა ავსტრო-ვენგრიას და ევროპამ პროტესტი გამოუცხადა და დაჩუდა. ბოლგარეთსაც ბევრი თითი უქნიეს, მაგრამ აილო და რუმელია დაიჭირა, აქაც ევროპამ პროტესტი გამოუცხადა და დაჩუდა. რასაკვირველიაა, რომ საბერძნეთმაც დაიჭიროს კრიტი და ევროპამ კიდევ თავისი პროტესტი გამოაცხადოს და დაჩუდეს.

ესე გათავდება კრიტიკისა და საბერძნეთის საქმე, ანუ თუ კრიტს სრულ ავტონომიას მისცემენ, — ამით მაინც იგი იარა, რომელიც ევროპის ტანს აჩნეული აქვს აღმოსავლეთის საქმის სახით, არ გამთელდება. მოსურნე

აღმოსავლეთის საქმის აწეწვისა არ მოისვენებს, თუ კრიტს და საბერძნეთს დააჩუძებენ, ახლა მაკედონიაში წაუკიდებენ ცეცხლსა და ასე ივლიან, ვიდრე მოლოდინი ოსმალეთის განაწილებისა და გაყოფისა ერთმანეთს არ წაჰკიდებს აწ დაძეგობრებულს სახელმწიფოებს და სხვა ზავ-კავშირობას არ ჩამოაგდებს ევროპაში ამის მეცადინეთა სასარგებლოდ. დასაწყისი ნამდვილის დასასრულისა ოსმალეთისათვის მაშინ იქნება.

[1897 წ.]



## ნარკვევი (ჟურნალ-გაზეთებიდან)

### (სამეურნეო საზოგადოების პროექტის თაობაზე)

რუსულ ჟურნალში „Неделя“ –ში დაბეჭდილია ტფილისიდან წერილი სახელად „Кавказская утопия“. იგი წერილი შეეხება ეგრედ წოდებულ „გლეხთა სამეურნეო ფულს ტფილისის გუბერნიის სოფლის საზოგადოებათათვის“, განზრახულს ტფილისის გუბერნატორის მიერ შედგენილ პროექტითა.

სამწუხაროდ ჩვენდა უნდა ვსთქვათ, რომ ავტორი ამ წერილისა მეტად მძიმე საქმეს სუბუქად მოჰკიდებია და, რამოდენადაც ჩვენ მივწვდით მის წერილს, მთლად უცოდინრდაც. ჯერ პირველი ის, რომ ავტორს იმ დედაზრისათვისაც ვერ მიუგნია, რომელიც ქვაკუთხედად დადებული აქვს პროექტს და თავიდან ბოლომდე გატარებული მთელის თავისის სიგძესიგანითა. ეს კიდევ არაფერი, რომ ზოგადი აზრი, არსებითი საგანი ამ პროექტისა სრულიად ვერ უცვნიან: თვითეული ცალკე მუხლიც წესდებისა ვერ გაუთვალისწინებია, ვერ გაუგია რიგიანად. ჩვენ, როცა შემთხვევა გვექნება, იქნება ამ საგანს კიდევ მივუბრუნდეთ და თვალსაჩინო საბუთები წარმოვადგინოთ ჩვენის სიტყვისა. ეხლა მარტო საკმაოა თუნდ ერთი საბუთი მოვიყვანოთ იმისი, რომ ავტორი ტყუილად მომცდარა დაცინვისათვის. მაგალითებრ: პროექტს სხვათა შორის საგნათა აქვს, რომ გლეხთა საზოგადოებამ მისდა კუთვნილ სამეურნეო ფულიდამ იყიდოს მიწები, ტყეები, გაატაროს არხები სარწყავად, აიშენოს საჭირო შენობანი საზოგადო სახმარად და სხვანი. სხვათა შორის ნაჩვენებია პროექტში ჯიშთან საქონლის სყიდვაც, რომ


განიკარგოს პირუტყვის ჯიშში სოფლებში. რა გზით შეუძლიან საზოგადოებას ამისთანა საჭიროება დააკმაყოფილოს? § 34 და შემდეგი მუხლები წესდებისა ამის გამო ამბობს: რანაირიც გინდ იყოს საზოგადო საჭიროება, იმის საჩვენებლად უნდა სასოფლო განაჩენი შესდგეს სოფლის ყრილობისაგან ორის მესამედის ხმის უპირატესობით. განაჩენში ნათლად და ნამდვილად უნდა იყოს აღნიშნული საგანი საზოგადო საჭიროებისა და რაოდენობა ფულისა, რომელიც უნდა მოუნდეს მაგ საჭიროებას. ეს განაჩენი მაზრის უფროსს უნდა წარუდგეს და ამან თავისის აზრით წარუდგინოს გუბერნატორს. გუბერნატორიც კი თავისით არა სწყვეტს ამ განაჩენში მოხსენებულს სურვილს სოფლის საზოგადოებისას. მან უნდა მოიწვიოს შეერთებული კრებული ტფილისის გუბერნიის მართველობისა და გლეხთა საქმეთა გამგეობისა. მარტო ამ კრებულსა აქვს უფლება ან უარი უთხრას განაჩენზე სოფლის საზოგადოებას, ან ნება დართოს გაიტანოს ფული, რომ განაჩენში მოხსენებულ საჭიროებისათვის მოიხმაროს. ყოველივე ეს მოხსენებულია წესდების §§ 34, 35, 36 და 40.

ამის შემდეგ რას ამბობს ახლა ავტორი, ცოტა არ იყოს, დაცინვით და წყრომითაც: ვინ უნდა უყიდოს საზოგადოებას მიწები და სხვა ამისთანა? ან უჩასტკის პოლიციამ, ან ეს უნდა იქმნას იმის აუცილებელ და ძალიან დაახლოვებულ მონაწილეობითაო. ვინ უნდა გაატაროს არხები, აშენოს წისქვილები და სხვა საზოგადო შენობები? უჩასტკის პოლიციამო. ვინ უნდა დაიბაროს და იყიდოს ჯიშთან საქონელი, სამეურნეო იარაღი და სხვანი და ვისის წარდგენითა და შემწეობით? უჩასტკის პოლიციამ და უჩასტკის პოლიციის წარდგენითა და შემწეობითაო.

ავტორი თვითონვე ჰხევს და თვითონვე ჰკერავს, როგორც ეტყობა. ვთქვათ, შეეძლო თავისის თავისათვის ყოველივე ეს ეკითხნა, ხოლო პასუხი კი წესდებაში უნდა მოენახა და იქ ამოეკითხნა და არა თავისით მოეგონა. ნუთუ ზემოხსენებულ მუხლებში სადმე ან ერთი სიტყვა ამხელს უჩასტკის პოლიციის მონაწილეობას ამ საქმეში? ნუთუ ცხადი არ არის,

რომ ამისთანა საქმეებში წესდება სრულს თაოსნობას აძლევს თითონ სოფლის საზოგადოებას? ვისი წარდგენით უნდა იყოსო, ჰკითხავს თავის თავს უცნაური ავტორი. ნუთუ ცხადი არ არის ზემოხსენებულ § 34 მუხლში ვისის წარდგენით უნდა მოხდეს ყოველივე ის, რაზედაც ასე ოხუნჯობს ავტორი ნუთუ აქ საკითხავია, ვინ უნდა გააკეთოს არხები, წისქვილები, ვინ უნდა იყიდოს მიწები და სხვა ამისთანა? ამას კითხვალა უნდა, თუ კაცი მეტად მოცლილი და უსაქმური არ არის. ვინ? ვინ და იმან, ვისაც თვითონ საზოგადოება დაავალებს, მოანდომებს, ვისაც მოურიგდება. ამის გამოცნობას დიდი ხაზი და ლარი უნდა განა? საიღამ ჩამოურევია ავტორს აქ უჩასტკის პოლიცია? ეგ თვითონ ავტორსა ჰკითხეთ, და ჩვენ კი ამას ვიტყვით: მინამ კაცი საქმეს ხელს მოჰკიდებს, სახტომი უნდა გასინჯოს და იცოდინოს!

[1897 წ. 10 თებერვლამდე]



## **<ეროზის საკითხი და ღვაჭრებთან საპრემიუმო>**

ტფილისი, 15 თებერვალი

არაერთხელ გულდასხეთქებით გვიჩვილია, რომ ქალაქებგარეთ მცხოვრებ მკვიდრთა, სახელდობრ სოფლობას, რიგიანი პატრონი და მომვლელი არა ჰყავს. ვის არ გაუგონია სამართლიანი საჩივარი, რომ არც გზები გვაქვს, არც საემო სკოლები, არც სამკურნალო, არც მკურნალი გვყავს, რომ კაცს გაუჭირდეს და მოიწვიოს. ეს კიდევ ცოტაა: გაუჭირდება რამ სოფლობას, ვთქვათ – ჰური შემოაკლდა, მიმშილი ჩამოვარდა, ვთქვათ – ჭირი გაჩნდა საქონლისა, თუნდ აღამიანისაც, ვთქვათ – წყლები გვაფუჭებს, ცეცხლი გვწვავს და ამისთანა სხვა რამ უბედურება, მაგალითებრ კალია, თავვი, ხელიღამ გვართმევს წლის ნაშრომ-ნადავს, ყოველ ამისთანაში უღონონი ვართ თავს როგორმე ვუშველოთ.

ქალაქებს კიდევ ყოველ ამაებში პატრონი ჰყავთ და ეგ პატრონები თითონ მკვიდრნი არიან, რადგანაც თვითმართველობა აქვთ, და ყოველს ამას მათივე კაცები უძღვებიან, ყოველს ამისათვის ჰზრუნავენ და მეცადინეობენ. შიდარუსეთშიაც მთავრობამ ამისთანა საქმეების გაძღოლა და მართვა თვით სოფლობასაც მიანიჭა და ეგ მძიმე ტვირთი შორიღამ მაგისტანა საქმეების გამგებლობისა და მართვისა თვით აიხსნა და თითონ ადგილობრივს მკვიდრს მიანდო, რადგანაც ადგილის მკვიდრმა უფრო ზედმიწევნით იცის თავისი ჭირ-ბოროტი, და რადგანაც სატკივარი იცის, წამალსაც უფრო ადვილად მოახერხებსო. ესეთი დაწყო-

ბილობა მთავრობის მიერ მით უფრო სამართლიანია, რომ სოფლობა იხდის ეგრედ წოდებულ „ზემსკი პოვინოსტებს“, რომელთაც საგნად გაძლოდა აქვთ ყოველ იმ საჭიროებისა, რაც ზევით მოკლედ მოვიხსენიეთ.

ჩვენშიაც მაგისტანა ფული იკრიბება, მაგრამ როგორც წინანდელ რუსეთში, ისეც ეხლა, ჩვენში სოფლობის საქმეებს შორიდან განაგებს მთავრობა, რომელიც, რაკი სხვა ათასი უფრო საჭირო საქმეები აქვს, ვერ იცლის სოფლობისათვის იმოდენად, რამოდენადაც სასურველია, და ფული ფულად მიდის და შესანიშნავს შეღავათს და შეებას კი ვერა ვხედავთ. სოფლობას არც რიგიანი გზა აქვს მისვლა-მოსვლისათვის, არც სამკურნალო აქვს, არც მკურნალი ჰყავს, არც სკოლა აქვს, შიმშილია – პატრონი არა ჰყავს, განსაცდელია რამ საერთო – საშველი არსად არის სწრაფი და საკმაო, და სხვანი და სხვანი.

ეს ნაკლულოვანება იგრძნო ტფილისის გუბერნიის თავადაზნაურობამ, ბევრჯელ ჩამოაგლო ამაზე ლაპარაკი, ბევრჯელ აილო, დაილო და ბოლოს 1894 წლის 30 მაისში მთელის კრებულის ერთიანის ხმით დაადგინა: საქმე ტფილისის გუბერნიაში სოფლო ბის დაწესებულებათა (Земские учреждения) გადაეცეს კამისიას, შედგენილს გუბერნიის და სამაზრო მარშლებისაგან. რადგანაც 30 მაისს 1894 წ. სათავადაზნაურო კრებაზე ამ საგანზე სიტყვა ჩამოაგლო თ. გ. მ. თუმანიშვილმა, ამასვე მიანლო კრებამ ამ საქმის შესახები პროექტი მოამზადოს. კარგა ხანს გასტანა ამ პროექტის შედგენამ, რადგანაც სხვადასხვა ადგილებიდან საჭიროდ დანახულ იქმნა შეგროვება ცნობებისა. ბოლოს პროექტი შემზადდა და 28 თებერვალს 1896 წლისას თ. გ. მ. თუმანიშვილმა წარუდგინა ბ-ნს გუბერნიის მარშალს და სთხოვა მოიწვიოს ხსენებული ზემოთ კამისია და თავად-აზნაურთა კრების განაჩენისამებრ – გაასინჯოს.

საჭიროა და სასურველი ჩვენში შემოღება მაგ სოფლობის დაწესებულებისა, ან რამოდენად ზედგამოჭრილია და შესაფერი ჩვენთვის თ. გ. მ. თუმანიშვილის მიერ შედგენილი პროექტი, – ჩვენ ამის გა-

მორკვევას არ შევუდგებით. ჩვენ მხოლოდ ამას ვიტყვით, და ვგონებ ბევრნიც სხვანი დაგვეთანხმებიან, რომ საგანი დიდის ყურადღების ღირსია. სხვა არა იყოს რა, ჩვენი შინაური საქმე ჩვენვე გვექონდეს ხელში წარსამართავად და საპატრონებლად, ჩვენვე გვექონდეს ხელში ღონე ჩვენისავე თავის შევლისა და ათასნაირ საერთო განსაცდელისაგან ხსნისა, ჩვენვე გვებაროს სოფლობის ფული და ჩვენვე გვეკითხებოდეს – სად რას მოვახმართო, – ეს ისეთი საგანია, რომ ღირს კაცმა მთელი თავისი დრო და მოცალეობა ზედ შეალიოს, თუნდ თავად-აზნაურთა კრებისაგან დავალებულიც არ იყოს, ეს ისეთი საგანია, რომ ანბანის უცოდინარსაც კი უნდა ესმოდეს მისი სიდიდე და სიმძიმე.

სად არის ეხლა იგი კამისია, რომელსაც ამისთანა დიდის საქმის შესახები პროექტი უნდა გაესინჯა და თავისი დასკვნა წარედგინა თავად-აზნაურთა კრებისათვის? შარშან თებერვლიდგან დღეს-აქამომდე სამი თუ ოთხი კრება ჰქონია თავადაზნაურობას და ერთხელაც არავის ფიქრადაც არ მოსვლია ეუწყებინა თავადაზნაურობისათვის, რომ მომზადებულია პროექტი და უკვე წარდგენილი შარშან თებერვლიდამდე. ეხლაც 28 მაისს დანიშნულია მორიგი კრება თავადაზნაურობისა და არც კი დაუნახავთ საჭიროდ. რომ სხვათა საგანთა შორის ეს დიდი საგანიც აღენიშნათ კრების განსახილველად. კრებაში წარდგენას ვინა სჩივის, კამისიაც კი ამ მთელის ერთის წლის განმავლობაში არავის უფიქრია მოიწვიოს, რომ პროექტი, თავად-აზნაურთა განაჩენისამებრ, გაესინჯათ. განა ასეთის პატივის ღირსია მთელი კრებული მთელის გუბერნიის თავადაზნაურობისა, რომ ასე თვითნებობით ექცევიან მის განაჩენს და აინუნშიაც არავის მოსდის არც მისი სურვილი, არც მისი განაჩენი თითქოს ბაზრის ბიჭების ნაყბედი რამ იყოს, ქარის მოტანილი და ქარის წასაღები. რად უყურებენ მთელს თავადაზნაურობას ამისთანა აბრუ გასატენ თვალთ? როდის აქედ გაუტყდა ეს აბრუ ტფილისის გუბერნიის თავად-აზნაურობას, როდის აქედ ჩამოერთო საზოგადოებრივი ღირსება, რომ მის განაჩენს კანონიერ და საპატიო გზას არ უხსნიან,

მის სიტყვას ყურს არ ათხოვებენ და აგრე აუს-  
რულელებლად და, მაშასადამე, უპატიურად სტოვებენ,  
თითქო ბაშვის ტიტინი იყოს და არა ჭკუაღამჯდარის  
კრებულისა, რომელმაც იცის რას მოქმედობს, რას  
შეუწყოს ხელი და რას არა.

აქ ვის რა ხმა ამოელება, ვის რა ხელი გაუწვდება,  
რომ კანონიერი სვლა ამ საქმისა თავისის ნებით  
აბრკოლოს? ამისთანა ყოვლადშემძლეობა ვის აუღია  
თავის თავზე? ვის აქვს იმის უფლება და ნება, რომ  
თავად-აზნაურთა კრების განაჩენისამებრ შესრულებული  
საქმე ასე მჩვრად გახადოს და გამხილების შიშს მაინც  
არ შეუშინდეს? ესეთი ქცევა სასაცილოდ, სამარცხვი-  
ნოდ და აბუნად აგდებაა მთელის თავად-აზნაურობისა,  
რომლის განაჩენსაც ასე მჩვრად ჰხდებიან.

ნუთუ არ იციან, რომ თავად-აზნაურთაგან ამორ-  
ჩეული კაცი, ვინც გინდ იყოს, სხვა არა არის რა,  
გარდა იმისა, რომ რასაც თავად-აზნაურობა და მარტო  
თავად-აზნაურობა ჩასძახებს, ის უნდა ამოიძახოს, და  
არა თვითნებობდეს და თავისის ჭკუით იწუნებდეს ან  
ერთს, ან მეორე განაჩენსა, ამომრჩეველთაგან  
დადგენილს. ყველას შეუძლიან რასაკვირველია, თავისი  
აზრი იქონიოს, როგორც ყოველს კერძო კაცს, მაგრამ  
თავად-აზნაურთა საქმეებში მარტო თავად-აზნაურობაა  
მბრძანებელი და სხვა არა ვინმე. მართალია, ბევრი  
მისთანა კაცია ქვეყანაზე, რომელთათვისაც კანონი ჯერ  
არ დაწერილა, მაგრამ აქედამ სულაც არ გამოდის ის,  
რომ სხვები ყურმოჭრილ და ხმაამოუღებელ ყმად  
გაიხადონ. ყველას თავისი კუთვნილი ღირსება აქვს და  
ნამეტნავად მთელს თავად-აზნაურობას, როგორც  
მთელს კრებულს, და ნუთუ ღირსების დამცირება,  
ღირსების შელახვა არ არის, რომ, მაგალითად, ჩვენმა  
მოხელემ ჩვენს მოსაზრებულს სიტყვას, ჩვენს  
მოფიქრებულს განაჩენს ზედ არ შეხედოს, ხალიჩას  
ქვეშ ამოდოს სადმე და გულში იძახოდეს: ბევრი იმის-  
თანა სულელობა გვინახავს, ეგეც იმათშიო.

სად არი ეხლა იგი პროექტი, იგი კამისია? რატომ  
თავისი გზა და სვლა არ მისცემია ან ერთს, ან მე-  
ორეს? ჩვენ ამის პასუხად ორი რამ ვიცით: ერთი ის,  
რომ ბ-ნ გუბერნიის მარშლისათვის 28 თებერვალს

1896 წელს წარუდგენიათ მომზადებული პროექტი და  
ის დღეა და ეს დღე, არც კამისია, არც ჩლავი და არც  
ფლავი. უთუოდ წნილად ჩაუდვიათ და ელიან, როცა  
დამჟავდება.

პატრონობა საქმისა, თუ გნებავთ, ეს არის, და  
რადგანაც სიჩქარით სოფელი არავის მოუჭამია, ჩვენც  
ვითმინოთ, ეგებ მოთმინებითა ჩვენითა სული ჩვენი  
მოვიპოვოთ ოდესმე. ესეც კაი ნუგეშია, თუ თქვენ იტყ-  
ვით.

ყველაფერი ახია ჩვენზე. რაც მოგვდის, ჩვენივე  
ბრალია, სხვას ნურავის ვუსაყვედურებთ. ტყუილად კი  
არ დაიცინებინან, ნამეტნავად ამ ბოლოს ხანებში, და  
იძახიან: რა თავად-აზნაურობა, ვინ თავად-აზნაურობა,  
განა თავად-აზნაურობას თავი აქვს, რამ ისაქმოს და  
გაკეთოსო, ან არისლა თავად-აზნაურობაო!..

მოდით და, თუ არ დაგიშლიათ, სიტყვა მოუჭერით,  
სიტყვა შეუბრუნეთ ამის მთქმელს.

[1897 წ.]



## «სწავლა-განათლება და საზოგადო მოღვაწის მოვალეობა»

ტფილისი, 19 თებერვალი

ჩვენ, ქართველები, რაღაც უბედურ ბედზედა ვართ გაჩენილნი. საცა მიიხედავთ, ყველგან სწავლა-განათლებას ქვეყანაში ჭკუა შეაქვს, ზნეობის სიმაღლე და სიფაქიზე ჰმატულობს, გრძნობა ურთიერთობისა ძლიერდება, საზოგადოს, საერთოს საქმეს მოღვაწენი უჩნდებიან, გულშემატკივარნი მისნი უფრო და უფრო გულმხურვალედ ეკიდებიან ყოველ მას, რაც ავლადიდებას ქვეყნისას საერთოდ და საზოგადოებისას ცალკე შეადგენს ზნეობითად თუ ქონებითად და ჩვენში კი ყველა ეს ჰნელდება, ყველა ეს უკან და უკან მიდის. მტერს, რასაკვირველია, ყოველივე ეს უხარიან და მოყვარეს კი გული უკვდება.

რად არის ესე? რატომ ეგრე უკუღმართად ტრიალებს ჩვენი ბედი? განა ცოტანი არიან ჩვენში სწავლა-განათლებით მირონცხებულნი? შედარებით მთელის ჩვენის ქვეყნის მკვიდრთა, იქნება, ცოტანიც იყვნენ, მაგრამ ეს კი უეჭველია, რომ სწავლა-განათლებულნი ეხლა უფრო ბევრნი გვეყვანან, ვიდრე წინად. მაშ რად დაგვემართა ესე? ეს მით უფრო საოცარია, რომ გონებადანშულობა, აზრის უზნეობა, საზოგადო საქმის ძარღვის და წესის გაუგებლობა, ყოველივე ეს უფრო ეგრედ წოდებულ სწავლა-განათლებულს ემჩნევა ჩვენში. ყველაზე, რასაკვირველია, ეს არ ითქმის, მაგრამ ვისზედაც ითქმის, განა საკვირველი და საოცარი არ არის?

გაუნათლებელს კაცს, რომელსაც არც კი მიჰკარებია სწავლა-განათლება, ყოველივე ეს ასე თუ ისე შეენდობა და იმაზე კი რა უნდა ვსთქვათ, რომელსაც თავი მოაქვს და სწავლა-განათლებით თავი მოსწონს. დღეს ბულვარზედ რომ გაიაროთ, მთელი ჯგუფი შეგხვდებათ ამისთანა თავმომწონე განათლებულებისა და ერთი ყური დაუგდეთ, რა საანბანო საგანზე აქვთ ერთი გაცხარებული ბაასი, ერთი გაკაპასებული საუბარი, თითქო წინ ერთი დიდი რამ ჭეშმარიტება აქვთ აღმოსაჩენიო, რა თქმა უნდა, ჯერ ადგილი, საცა ამისთანა აზრთა ჭიდილს ჰმართავენ ხოლმე ის ვაჟბატონები, ამხილებს იმათს ქარაფშუტობას, თავცარიელობას და მერე თვით ის საანბანო საგანი, რაზედაც აგრე ცხარედ სჯიან და ჰლაპარაკობენ, ჰმოწმობს იმათს გონებაუწვრთნელობას, გონებადაცემულობას და უქმად ყოფნას.

აბა ღვთის წყრომას არ უნდა მიაწეროთ, რომ კაცმა, რომელსაც თვალადად მაინც ფერი ადევს სწავლა-განათლებისა, არ იცოდეს რა მოეთხოვება საზოგადო საქმეში ჩაბმულს მოღვაწეს, რომელსაც უკისრნია საზოგადოებისაგან დავალებული და ჩაბარებული საქმე. ერთი ამისთანა სწავლა-განათლების ფერ-უმარილით წაცხებული ყმაწვილი კაცი ამას წინად ბულვარზედ ჰქადაგობდა, რომ დიდი გაუპატიურება არისო, რომ საზოგადო საქმის მოღვაწეს მოჰკითხო ანგარიში, რა ჰქმენ და რა იმოქმედო. აქამდე გონების დაბრმავება გაგონილა!

ნუთუ ცოტად მაინც გონებაახილებულმა კაცმა არ უნდა იცოდეს, რომ არამც თუ თვითოეულს წევრს საზოგადოებისას ნება აქვს თავისს ამორჩეულ კაცს ანგარიში მოჰკითხოთ, არამედ ყოველი რიგიანი ამორჩეული კაცი, ვითარცა საზოგადო საქმის მოღვაწე, თვითონ, სხვის მოუკითხავად, მოვალეა ანგარიში მისცეს საქმის პატრონს თავისს დროზე. ნუთუ არ უნდა იცოდეს, რომ მის მიერ ანგარიშის მიუცემლობა, არაფრად ჩაგდება საქმის პატრონისა, საქმის პატრონის მხრად ქცევა ამორჩეულ კაცის მხრით, თელვაა და შეგინება, ერთის სიტყვით, გაუპატიურებაა საქმის პატრონისა, სრული უკადრისობა და ურიგობაა

თვით ამორჩეულისა. ნუთუ არ უნდა იცოდეს, რომ ანგარიშის აღებ-მიცემა ყოველს შემთხვევაში და ნამეტნავად საზოგადო საქმეში, ეს ისეთის რიგიანობის და მართებულობის ნიშან-წყალია, ურომლისოდაც ადამიანი არამც თუ პატივის ღირსია, არამედ სახსენებელიც არ არის. არც ერთი რიგიანი კაცი არ იკადრებს ანგარიში არ მისცეს საქმის პატრონსა, თუკი საქმეში ჩაყენებულია საქმის პატრონისაგან და გრძნობა თავისის თავის ღირსებისა დაკარგული არა აქვს. მაშ საზოგადოებამ როგორ ადევნოს თვალი თავისს საქმეს, თუ ანგარიში არ იქმნება, ან თვით მოღვაწე რით უნდა გამოვიდეს პირნათლად, საზოგადოების წინაშე თუ არა, თავისის თავის წინაშე მაინც.

ანგარიშსა გთხოვო, რომ იტყვიან, განა ეს იმასა ჰნიშნავს, რომ ავი რამ შეგწამე და მინდა დაგიჭირო ავკაცობაში. ანგარიში საქმის სასწორზე დადებაა და სასწორს ვინ უნდა გაექცეს, თუ არ უბირი და გონებადახშული კაცი? განა შენი მოვალეობა არ არის, ვისაც საქმე ჩაგბარებია, თავის ღროზე პატრონს საქმისას შეატყობინო, რა მდგომარეობაშია მისი საქმე, როგორ ვიტარებია, როგორ წავიმართავს, სად რა იქმნა და საიღამ რა გამოდნა. არც ერთი რიგიანი კაცი არ გაექცევა ამ მოვალეობას და არც ერთი რიგიანი კაცი არ ითაკილებს, როცა ანგარიშს მოთხოვენ. სათაკილო აქ მარტო ის არის, რომ მოთხოვნამდე პატრონს ანგარიში არ მიეცი, შენ არ დაასწარ ის, რაც შენი წმინდა მოვალეობაა და იძულებულ გახადე, შენი მოვალეობა გაგახსენოს. თუ საკუთარის ღირსების პატრონი კაცი ხარ, აი რა უნდა გეთაკილებოდეს, თორემ გამოხვიდე და იბღავლო ანგარიშის თხოვნა გაუპატიურებაა ჩემიო, — ეს ისეთი გონების საპყრობაა, რომ ამისი მთქმელი უფრო შესაბრალისია და შესაწყალბელი, ვიდრე შესარისხველი.

შესაბრალისი და შესაწყალბელი ის საზოგადოებაც არის, საცა ამისთანა საანბანო საგანიც კი ასახსნელია და განსამარტებელი და საცა ყურისმგდებელს ჰმოულობენ იმისთანა ვაჟბატონები, რომელთაზედაც დღეს ეს საუბარი ჩამოვადეთ და რომელთაც ვერ შერგებიათ

მიღებული სწავლა-განათლება, კუსავით ფეხი კი გამოუყვიათ და იმანთან: მეც ნახირ-ნახირო.

[1897 წ.]





## «საზოგადო საქმისღმი პასუხისმგებლობის თაობაზე»

ტფილისი, 22 თებერვალი

ღმერთო, გვისხენ უარესისაგან! ამით, ამ ამონაკენ-სით იძულებულნი ვართ დავიწყოთ ჩვენი მეთაური. ბოდიშს ვიხდი მკითხველის წინაშე, რომ ასეთის სამძიმარის სიტყვების ლაპარაკს ვბედავთ. ქართველი კაცი არც ისე განებივრებულია სვე-ბედისაგან, რომ ბევრი რამ სასიხარულო ესმოდეს ან შინ, ან გარედ და საკვირველი არ იქნება გვისაყვედურონ, — რაღა შენი გულის გახეთქვა გვინდაო, რაღა შენი გახსენება, რომ უბედურნი ვართო! ჩვენ ვგრძნობთ მთელს საბუთიანობას ამისთანა საყვედურისას, მაგრამ რას იზამთ? ჩვენი ჭირი ჩვენ რომ დავმალეთ, თვითონ ჭირი არ ჰმაღლავს თავის თავსა და დღეყოველ თავში გვცემს, დღეყოველ სულსა გვხუთავს, დღეყოველ გულს გვიწყლულებს, დამალვას ისევ გამულავენება სჯობია, — აგება ღონე ხსნისა ვიძიოთ და ვიპოვოთ.

სვე-ბედი ჩვენი, ესე იგი ქართველობისა, იმისთანა გარემოებით შეიმოსა საერთოდ და ამ უკანასკნელს ხანებში ნამეტნავად, რომ კაცმა აღარ იცის, სად იწყება და თავდება თხრა იმ ორმოსი, რომელშიაც ჩასაცვივებლად ერთმანეთს ვერეკებით, როგორც ცხვრის ფარას? არ არის არც ერთი საზოგადოებრივი საქმე, რომ ვინმე ჩვენგანივე მტრად არ გაუჩნდეს და მიწასთან არ ასწორებდეს მარტო იმ მწიკვლმოკიდებულ გულის ძვერით, ერთი მეც მაწირვინონო, ესე იგი მეც ფეხი გამომაყოფინონ, რომ ვთქვა, მეც ნახირ-ნახირო. ბატონებო, თუ რამ შეგიძლიანთ, აი ბურთი და

მოედანი, ჯერ იმოდენა შესძელით, რომ გაკურთხონ, მერე ჩაიცივით ანაფორა, აიღეთ საცეცხლური და სწირეთ, თუ რისამე უნარი გაქვთ. ვინ ვიშლით, წინ ვინ აგეფარათ? და თუ ღმერთს ეს უნარი თქვენთვის არ მოუცია, სასესხი ხომ არ არის, ისესხოთ, მოწყალება ხომ არ არის, გიწყალობონ ის, რაც ღმერთს თქვენთვის არ უღირსებია. განა არ იცით, რომ მინა არ გახდება შირაზის შუშა, რაც გინდ მაღლა თაროზე დასდოთ?! ამისი მთქმელიც კი აღარ ჰყავს საქართველოს. ამ ხმაამოუღებლობით წაქეზებული კაცი ამისთანა საპამპულო პრეტენზიით გაბერილი და გასიებული, დონჯშემოყრილი დადის და აბრიყვებს თვალაუხეღველს ადამიანსა, რომელთა შორის არა ერთი და ორია იმისთანა, რომ ტაშსაც უკრავს და იძახის: რა უბედურება გვწვევია, თურმე ამასა და ამას არ აწირვინებენო და დავილუპენით კიდეცაო.

იქნება ეს უკანასკნელნი გულმართლადაც ჰგლოვობენ, ვინ იცის? არცოდნა არცოდვაო. რა ქნან, თუკი ჭკუა არ უჭრით, გამოიცნონ, რომ აბრუ კაცისა, მისის სიტყვისა, აზრისა და რჩევისა თვითონ კაცის შინაგან ღირსების საქმეა და არც სესხით, არც ვისიმე მოწყალებით არ მოიპოვება. იმის მაგიერ, რომ უთხრან, იღვაწე და შენის ღვაწლით ეგ აბრუ მოიპოვეო, მაწირვინეს მთქმელთან ერთად იგინებიან, რომ ამ აბრუს არ აწვდიან მზამზარეულად, როგორც გოზინაყს ტაბაკზე და თანაც არ ეუბნებიან, ეგრედ ტკბილად დაგვიბერდიო.

რა თქმა უნდა, ამისთანა დაუჯერებელ პრეტენზიით აღსავსე კაცი სხვისაგან არიან გაბრიყვებულნი, თორემ ძნელად დასაჯერია, კაცმა თითონ გაიზადოს თავისი თავი ესოდენ სასაცილოდ, რომ იმღურებოდეს საქვეყნოდ, — ჭკუა არა მაქვს და რატომ არ მაძლევთო. ეს პრეტენზია, საკუთარი თვალაზრეული ჟინია თუ სხვისაგან ჩაგონებული, ორივე ღმერთმა შეინახოს, ამას კიდეც კაცი როგორმე გაუძლებს. განა ცოტა დადის აღვირაშვებული უჭკუობა ქვეყანაზე? ეგეც იმათში. გონიერი კაცი გზას აუქცევს და სულელი კი კალთაში ჩაავლებს ხელსა და ამ სახით მკვდარი მკვდარს აეკიდება, სამარემდე წამიღეო. გზაც ის არის.

ხოლო რას იტყვით, რომ ამისთანა ხალხს სხვასაც ბევრს რასმე უჯერებენ. დაიცადეთ, იძახიან თურმე: ერთი ორიოდ დღე და მე გიჩვენებთ, ვინა ვარ. დღეს არა, ხვალე ქალაღი მომივა და ყველას ჩვენს საქმეს მე გავუბატონდებიო და მაშინ მიყურეთ, ქვასაც კი რძესა და თაფლს ვადენო. არიან თურმე ჩვენში იმისთანა მსმენელნი, რომელნიც თაფლის ხსენებაზე ეხლავ ტუჩებს ილოკავენ და აცმაცუნებენ. ბევრს, ვისაც გონება არ უჭრის ამისთანა აბდაუბდების და ცრუპენტელაობის განსაკითხად, აუღიათ თავი, ხელები გულზე დაუკრებიათ, აღარაფრისათვის დარდობენ. ელიან ამ მანანას ციდამ და ბარაქალას ეძახიან თავიანთ თავისვე გამბრიყვებელთ: კაციც შენა ხარ და ქუდიც შენა გხურავსო. ამასაც კაცი როგორც იქნებოდა გაუძლებდა, ნათქვამია: „დე, ბაშვებმა ითამაშონ, ოღონდ კი ნუ იტირებენო“, რომ ამ უცნაურს დაჯერებას სხვა ბოლო არა ჰქონდეს.

ნუთუ არიან ჩვენში იმისთანანი, რომელნიც ამისთანა სასაცილო ქაღილს უჯერებენო, იკითხავთ? არიან თურმე, ჩვენდა საუბედუროდ. ეს ერთის მხრით უნდა მიეწეროს ადამიანის გონების ზარმაცობას, რადგანაც ზოგს ჩვენში ტვინის დაძვრა სიკვდილსავით ეზარება, თორემ აქ რა დიდი ლარი და ხაზი უნდა, ცრუპენტელობას მიუხედავად ჭკუათამყოფელი კაცი. მეორეს მხრით, ან თვით მოქაღილე გონებაცარიელი უნდა იყოს, ვითარცა სახლი, რომელსაც რუსულად შუბლზე აწერია ხოლმე „своден от постоя“, ან თავისნი მსმენელნი უნდა ეგულდებოდეს იმოდენად გამოყრუებულნი სულელობითა, რომ გაუბედოს ამისთანა ტყუილი ქაღილი და შიში და რიდი არ ჰქონდეს, ცრუპენტელობას გამიგებენ და შემარცხვენენო. შერცხვენა ჭირსაც წაუღია, ჩვენი უბედურობა იმაშია, რომ ქაღილს უჯერებენ კიდეც და, რაკი ამისთანა დაქადული იმედები ეგულებათ, ხელს არაფრისათვის აღარა სძრავენ, აინუნში აღარა მოსდით რა. აცა ქალაღი მოუვა და პირში ქაღები ჩაგვიცვივაო, იძახიან.

ყოველივე ეს რომ მარტო ამ ჯურის ხალხმა წამოიყრანტალოს, კაცი კიდეც ასე თუ ისე გვერდს აუქცევდა, შეიწყნარებდა. უფრო დიდი უბედურება ის


არის, რომ ეგრედწოდებულნი ინტელიგენტებიც კვერსა სცემენ და გულში კი მოქაღილესაც დასცინიან და მის დამჯერსაც. ორივეს გასულელება და გაბრიყვება კი ამ ინტელიგენტებისათვის ფრიად საჭიროა: იციან, რომ კვერის ცემა მარტო წყალს აამღვრევს და მღვრიე წყალში სასურველ თევზს ადვილად დავიჭერთო. რადგანაც სხვა პირდაპირი პატიოსანი გზა ჩვენს ბედისწერას ჩვენთვის შუბლზე არ დაუწერიაო. ან როგორ გაბედვენ პირდაპირ ამისთანა ქაღილს კვერი დაუკრან? განა არ იციან, თვითონვე, რომ ამისთანა ტყუილი ქაღილი აშკარა ტყუილია და თავს რად შეირცხვენენ? ისინი თხუნელასავით სოროში იმაღვენ თავსა და იქიდან სხვისის ხელით უთხრიან თავისს მოძმეს ორმოსა ტყუილითა, ჭორებითა. ივინი სხვას აბრიყვებენ და სხვით გადიან ფონსა. როცა სულელობა ქაღილისა გამოძულავნდება, ეს ბატონები პირველნი დაიწყებენ ყვირილს: აკი წინადვე გეუბნებოდით, ნუ გჯერათ, ტყუილიაო და რად მოისულელებთ თავიო.

დღეს ბევრი რამა გვაქვს თავში საცემი: აქ ბანკის საქმე, რომელიც ერთმანეთის მტრობამ ისე აწეწა, რომ კაცმა აღარ იცის, რა ბედი მოეღის, იქ სათავადაზნაურო სკოლაა, რომლის ბედი ასე უგულოდ უპატრონოდ დაგდებულია ყოველგვარ შემთხვევის და განსაცდელის ანაბრად, აქ მარშლების არჩევნები, იქ ხმოსნებისა, ოძისის საქმე, რკინისგზა კახეთისა, სოფლის თვითმართველობა (Земское самоуправление) და ბევრი სხვა ჭირი და ბოროტი. ყოველივე ეს შეაყენა რაღაც ქალაღის მოლოდინმა, რომელიც დაუხვევიათ ხელზე და საზოგადო საქმეებისათვის მზრუნველს გულს უცრუებენ ამისთანა ტყუილის მოლოდინებითა, გზა და კვალს ურევენ. თავისს დროზე საზოგადოება მოიკითხავს ყოველს ამის პასუხს და ვაი, თუ გვიანდა იყოს. გვეყო, ბატონებო, ამოდენა თავსაცელი (!), დროა ჭკუას და გონებას მოვიდეთ.

მოგახსენებთ, ათასი სატკივარი გვაქვს, უღონობამ და უილაჯობამ ლამის თან გადაგვიტანოს და ჩვენ კი ვნუგეშობთ, აცა ქალაღი მოუვა და ყველა ჭრილობა გამთელდებაო. ჩვენ ვურჩევთ ამ ტყუილის იმედებით გაჭვდილს ქართველ კაცს, — ქარის მოტანილი ქარსვე

წააღებინოს და თავისს დღევანდელ საქმეს თვალი და გული ადევნოს, მათთვის იფიქროს და იზრუნოს რამ, თორემ ზღაპრები და ბაქიაობა ბევრი გაგვივინია, მაგრამ ანწლს თავის დღეში ყურძნობა არ უქმნია.

[1897 წ.]



### **<შინაური საჭირბოროტო საქმეები და თავად-აზნაურთა უფლება-მოგალეობა>**

ტფილისი, 1 მარტი

არ არის არც ერთი გუბერნია შიდა რუსეთში, რომ თავისს საერთო სატკივარზე დღეს ხმამაღლა არა ჰპარაკობდეს. სწავლა-განათლების საქმეა, მამულ-დედულების განკარგვა, ხვანა-თესვის და ერთობ მეურნეობის გაძლიერება, გზების კეთება, ხიდების და ბოგირების შენება, ხალხის ჯამრთელობისათვის მკურნალების, სამკურნალოების და აფთიაქების გამრავლება, წყლისა და ცეცხლისაგან, ადამიანის და საქონლის ჭირისაგან ხსნა და სხვა ბევრი ამისთანა, რომლის ერთიანი კრებული წარმოადგენს მეტნაკლებობას ერის ცხოვრებისას სოფლად. ყოველივე ეს საღალადებელ საგანს შეადგენს შიდა რუსეთისათვის და მკვიდრნი მისნი ამ საჭირბოროტო საგნებს იძიებენ, არაკევევენ, ასე თუ ისე ხსნიან, მიზეზს უჩხრეკენ, სცდილობენ წამალი რამ ასე თუ ისე დასდონ და ამით სატკივარი ან მოსპონ, ან ტკივილი ცოტად თუ ბევრად დაინელონ მანც.

იქ, რუსეთში, რასაკვირველია, ყველა ამაზე სჯა და საუბარი უფრო ვრცლად შესაძლებელია, უფრო ხშირად, ვიდრე ჩვენში. ამისათვის რუსეთის გუბერნიებს იგივე სოფლობის წყობილება აქვთ მინიჭებული უმაღლესის მთავრობისაგან, რომელსაც „Земство“-ს ეძახიან. ჩვენში ეს ჯერ არ არის შემოღებული. გუბერნიის სოფლობას თავისი წარმომადგენელი ორგანო ჩვენში არა ჰყავს თვით მკვიდრთაგან, როგორც რუსეთშია. ამის გამო შესაძლოა ჩვენში ხმის ამოუღე-

ბლობა ჩვენს შინაურ სასოფლო საჭირობოლოტო საქმეებზე ამ მიზეზს მივაწეროთ, თუ მაინცა და მაინც მიზეზის პოვნა გვინდა.

ხოლო ერთადერთი კანონიერი ორგანოა ჩვენშიც, რომელსაც თუ ყველაფერში არა, ზოგიერთში მაინც ხმა ამოვლება და თუ აქა ვკოჭლობთ, აქ კი ჩვენი ბრალთა. ამისთანა ორგანო, ჩვენი ფიქრით, გუბერნიის თავად-აზნაურთა საზოგადო კრებულია. მართალია, კანონში განსაზღვრულია იგი საგნები, რომელიც ექვემდებარება სჯად და განკითხვად თავად-აზნაურთა კრებულს და ზოგიერთი კაცი, რომელსაც ჭკუის მიძვრამოძვრა ჭირივით ეზარება და ემძიმება, ყოველს საზრისს და სარჩიელს ზემოხსენებულ საგნების შესახებ წინ დაუყენებს ხოლმე ამ კანონით განსაზღვრულს საგნებსა იმ აზრით, რომ უთხრას კრებულს: ეგ ჩვენი საქმე არ არის, კანონში არ გვიწერიან და მაგაზე ხმას ნუ ამოვივლებთო, ჩვენ მარტო თავად-აზნაურთა საჭიროებაზე გვაქვს ნება ვილაპარაკოთ, მარტო ამნაირ საჭიროებისათვის ვიშუამდგომლოთო და სხვა ამისთანა.

თვით კანონმდებელმა კარგად იცოდა და თვით ცხოვრებამაც კარგად დაანახვა, რომ არ არის არც ერთი იმისთანა საჭიროება თავად-აზნაურობისა, რომ ასე თუ ისე სხვა წოდების მკვიდრთაც არ შეეხებოდეს. ჯანმრთელობა მკვიდრთა, რომელთა შორისაც სცხოვრობს თავადი ან აზნაური, განა მისი საკუთარი ჯანმრთელობა არ არის? ჭირი და სნეულება ერთნაირად არ შეიწირავს ხოლმე გლეხსა და თავადსაც, თუ ახლომასლო არც მკურნალია საშოვარი და არც წამალი? გზები, ხიდები და ბოგირები თუ არ ვარგა, განა ერთნაირად არა წვალობს თავადიც, აზნაურიც და გლეხიც, ერთნაირად არა ჰზარალობენ? თუ სწავლა-განათლება არ არის გარშემო, თუ უმეცრება, უვიცობა სულთა ჰზუთავს ყველას, ვინც კი გარს გვახვევია, ამისაგან თვით თავადსა და აზნაურსაც განა სული არ ეხუთება, განა არა ჰბრკოლდება ყოველ ბიჯის გადადგმაზე, თვითონ თუნდაც ძალიან განათლებული იყოს? რა უნდა მოვითვალდოთ ისეთი, რომლის ძალმომრეობით და დანაკლისით არ იჩაგრებოდეს გლეხთან ერთად თავადიც და აზნაურიც, ღიღიც და პატარაც, რაკი ბელმან

ერთად დაუდვა ბინა ერთსაც და მეორესაც და რაკი უურთიერთოდ ცხოვრება ადამიანისა, ვინც უნდა იყოს, – თავადი თუ გლეხი – ბუნებითად შეუძლებელია. ვინ არ იცის ღღეს, რომ თუ გარეშემო ყველა ჰკენის, მეც საკენესელი გამიხდება საქმე; თუ ყველანი გალატაკდებიან სულით თუ ხორციით, მეც თან ჩამიყოლებენ, ბევრიც რომ ცალკე ვიფორთხალო და გავიჭიმო. ასეთია უძლეველი კანონი საზოგადოებურის ცხოვრებისა და ამ კანონს ვერ გარდასცვლის ადამიანი, როგორც კანონს ბუნებურსა: ამიტომაც ვიწრო ფარგალში მოქცევა თავად-აზნაურთა უფლება-მოვალეობისა განგებ თვალეებზე ხელის აფარებაა, რომ არა დავინახო რაო. საზოგადოებური ცხოვრება ისე გადაბმულ-გადმობმულია ერთმანეთზე, რომ ერთი კაცი, თუნდ წოდება, ისე ვერ გაიწევს, რომ მეორეს არ შეეხოს. ამიტომაც სამზღვრების დადება – აქ მე ამ ფარგალში უნდა ვიყო და შენ იქ იმ ფარგალშიო, – ძველი მოძღვრებაა, რომელსაც ეხლა ყურს არავინ ათხოვებს. თავისად, კარჩაკეტილად ცალკე ცხოვრება ნადირის საქმეა და არა ადამიანისა, რომელიც დანიშნულია მგზავსთა თანა ცხოვრებისათვის და თუ არ – “მე თქვენით და თქვენ ჩემით”, არავითარი ღონე არა აქვს არც ცხოვრებისა და არც რჩენისა.

პროგრესს რომ ეძახიან, – ეგ არ მოასწავებს მარტო ერთის წოდების წინ წაწევას, გამოკეთებას, წარმატებას სულიერად და ხორციელად, არამედ მთელ იმ კრებულისას, რომელსაც ერი ჰქვიათ განურჩევლად ღიღისა და პატარისა. აი ამისთანა საერთო წარმატებისათვის გარჯა და თავის გამოღება უუწმინდაესი მოვალეობაა თავადაზნაურობისა, ნამეტნავად ჩვენში, რადგანაც გუბერნიის სახელით ხმის ამოღება და შუამდგომლობა ჩვენში მარტო მაგ წოდებასა აქვს მინიჭებული კანონის მიერ. ამ მოვალეობას უნდა კარგად ჩავუფიქრდეთ, თუ გვინდა თავადაზნაურობამ ჩვენში კვლავ აღიდგინოს აწ გატეხილი აბრუ და სახელი წინ წამდგარ წოდებისა და ერის მოჭირნესი. უამისოდ ცარიელი ძახილი, – მე თავადი ვარ და აზნაური, უქმი და ფუჭი ქაღილია. კაცს ერი პატივისა

სდებს, როცა მის საეროდ დადებულ ღვაწლს დაინახავს.

ყოველივე ეს იმიტომ ვთქვით, რომ ამ 28 მაისს დანიშნულია საგუბერნიო კრება თავად-აზნაურთა. ათასი საჭიროება გვაქვს, ზოგი ჩვენივე გასადლოლი, ზოგი მთავრობის შემწეობით. ერთსაცა და მეორესაც წინაღვე მოფიქრება და მომზადება უნდა. მართალია, წინაღვე მოფიქრება სათქმელისა და სარჩიელისა შარშან ჩვენში სასაცილოდ აგდებულ იქმნა, როგორც ერთი რამ უგუნურება. ერთმა ყოვლად ცნობილმა არამკითხე ორატორმა, რომელსაც ჩვეულებად აქვს თვალის დახუჭვით რახუნი, რაც ენაზე მოადგება, ეს წინაღვე მომზადება და მოფიქრება იმოდენად იუცხოვა, თითქო ქვეყანაზე ახალი ამბავი იყო მისთვის, რომ მოფიქრება და მომზადება წინაღვე უნდა ყოველსა სათქმელსა და სარჩიელსა და აუცილებელი საჭიროებაა ყოველ რიგიან კაცისათვის, თუ კაცს პატივისცემა აქვს იმ კრებულისა, საცა ჰლაპარაკობს და გული მართლა უცემს იმ საქმისათვის, რაზედაც ენასა ჰძრავს. რაც გინდა იუცხოვოს და იოცოს ხსენებულმა ორატორმა ეს ასეთი ამბავი და მოუფიქრებლობა და მოუმზადებლობა საკუთარ ღირსებად მიიჩნიოს, ჩვენ არ შევეცილებით. ჩვენ მარტო ამას ვიტყვით, ჭკუათამყოფელი და გონებიანი კაცი ვიდრე ერთხელ მოსჭრიდეს, ჯერ ათასჯერ წინად გაზომავს ნამეტნავად იქ, საცა საზოგადო საქმეა. სულელმა და უგუნურმა კი ჯერა სჭრას და მერე ჰზომოს, რაკი ესე უწერია ბედისწერის დაეთარში.

გვგონია, რომ ჩვენში ბევრი არ იყოს იმისთანა, რომ ჩვენი რჩევა წინაღვე მოფიქრებისა და მომზადებისა კრებისათვის ცოდვად ჩავითვალოს ხსენებულ სასაცილო ორატორსავით და ადამიანისაგან რაღაც ახალ ამბად მიიჩნიოს მისებრ. მოფიქრებას და მომზადებას აზრისას ითხოვს ჯერ კაცური კაცობა მთქმელისა და მრჩეველისა და მერე ღირსება თვითონ კრებისა, საცა მარტო საბუთიანი სიტყვა, კარგად აწონილი სარჩიელი უნდა მოციქულობდეს. მოუფიქრებელი ლაპარაკი და სიტყვა-პასუხი ბუზების ბზუილია და სხვა არაფერი. ამაზე მოცდენა თავად-აზნაურთა

კრებულისა მეტისმეტი უწრთველი ლალობაა, შეუნდობელი და საბრიყვო კანდიერება.

მაშ რატომ არ ვემზადებით? რატომ არავინ თავს არ იღებს, რომ საჭიროება ჩვენი გამოირკვას წინაღვე, ყოველი გარემოება მისი წინაღვე მოიხზრიკოს, საბუთიანი სახსარი რამ მოეპოვოს ან ჩვენგნივე, ან მთავრობის ნებართვითა და შემწეობით. ერთის სიტყვით, სატკივარი დავიამოთ, გაჭირებიდამ თავი დავიხსნათ, დღევანდელს ჭორ-ბოროტს პასუხი გავცეთ და მით ჩვენი მოვალეობა რიგიანად და ადამიანურად ავასრულოთ. ნუთუ სათქმელი და სარჩევი არა გვაქვს რა? სხვას ყველაფერს რომ თავი დავანებოთ და შორს არ წავიდეთ აი, მაგალითად, თუნდა არწრუნისეული ქარვასლა ავილოთ. განა მეტი იქნებოდა, რომ წინაღვე შეყვრილვიყავით და მოგვესაზრა რა წესსა და რიგზე დავაყენოთ მისი მოვლა და პატრონობა, როგორ გამოვიყენოთ ეს თითქმის მილლიონის ღირებულების ქონება, რას, როგორ და რა მოვახმაროთ? აი თუნდ სათავადაზნაურო სკოლა ავილოთ. მეტი იქნება განა ერთად მოვიფიქროთ, საიღამ რა სახსარი აქვს ამ სკოლასა, ამ სკოლის ჭეშმარიტი სვე-ბედი გავითვალისწინოთ, შევიტყოთ, დღეს რით არსებობს, ხვალ რით იარსებებს, ყოველივე შიში და განსაცდელი მოვაშროთ და სხვა ამისთანა. აი თუნდა ავილოთ სოფლობის საქმე. პროექტი უკვე შედგენილია. განა მეტი იქნება, წინაღვე ჩახედული ვიქმნეთ ამ პროექტში, წინაღვე ვიცოდეთ, რა არის და რას მოასწავებს, სად რა აკლია, სად რა მეტია, სად რა არის ჩვენი მოსახდენი და სად არა. ამ პროექტის ჩაფუჩეჩება ხომ შეუძლებელია, რადგანაც მოწონებულთა გუბერნიის თავადაზნაურობისაგან და ამისი განაჩენიც არის. აი თუნდა ბანკის საქმე ავილოთ. ბ-ნი გუბერნიის მარშალს ერთი პროექტი წარუდგენია ცვლილებისა, ბანკს მერე პროექტი აქვს, ფინანსთა სამინისტროს მესამე გამოუგზავნია, რომ აქაურმა მთავრობამ თავისი აზრი გამოსთქვას. არავინ იცის, სად როგორ მიდის საქმე ამ სამის სხვადასხვა პროექტისა და თვით საქმე კი ძალიან ღრმად მოსაფიქრებელია, ღრმად გასასინჯი, იმიტომ რომ სვე-ბედი ჩვენის ბანკის იმაზეა დამოკიდებული, თუ რა

გზას დაადგება ფინანსთა სამინისტრო, რაკი საჭიროდ დაუნახავს, ბანკის საზოგადო კრებას აწ არსებული წესი და რიგი შეუცვალოს. რაც გინდ ბევრი მომდურავი ჰყვანდეს ჩვენს ბანკს, მაინც ყველამ უნდა აღიაროს, რომ იგია ჯერხანად ერთადერთი წყარო ჩვენის საჭიროების გასაძლოლად. ცოტაა თუ ბევრი – ჯერ სხვა წყარო არა გვაქვს.

გარდა ყოველ ამისა, უმაღლესმა მთავრობამ მოიწადინა ჩვენი სწავლა-განათლების საქმე წინ წასწიოს, ჩვენს შვილებს და მოზარდს თაობას სასწავლებლის კარი უფრო ფართოდ გაუღოს, უფრო დიდი გზა მისცეს, რომ თვითონაც იხეირონ და ქვეყანაც ახეირონ. განა მეტი იქნება შევიყარნეთ, მოვიკითხოთ ამ დიდს საქმეზე ვის რა აზრი აქვს, ვის რა სათქმელი, ვინ რას გვირჩევს და სად რა წამალი დაედება? გან ცოტაა ყოველივე ეს? განა ყოველსავე ამას მომზადება და მოფიქრება არ უნდა? განა ყოველივე ეს არა ღირს იმად, რომ პატარა ხელი გავძრათ, პატარა დაუუკვირდეთ, გული და გონება გავსარჯოთ და საქმეს საბუთიანად და რიგიანად გავუძღვეთ?

ნუთუ ფიქრადა აქვს ვისმეს, ყოველივე ესე არ აუწყოს მოწვეულს მორიგ კრებას გუბერნიის თავადაზნაურობისას და არ აცოდინოს ყოველივე წვლილი ამ ჩამოთვლილ საქმეებისა? არა გვგონია ეგ სასურველი იყოს ვისთვისმე და თუ ესეა, რატომ არავინ არ ჰთაოსნობს, რომ ერთი ათიოდე კაცი მაინც შეჰყაროს ერთად, თვითოეულ საქმის ვითარება აუწყოს, წინადავე მოასაზრებინოს და მოაფიქრებინოს. ჩვენა გვგონია, რომ ეს თაოსნობა ბ-ნი გუბერნიის მარშლის მოვალეობაა.

[1897 წ.]



### პატარა საუბარი

- მართალია, კაცო, რასაც ჰლაპარაკობენ? – ჰკითხავდა ერთი ქართველი მეორეს.
- რისა რა მართალია? – უპასუხა მეორემ.
- მინამ მაგას გეტყოდე, ერთი ამიხსენ: რა წესით აფასებს ჩვენი სათავადაზნაურო ბანკი ან სოფლის მამულებს, ან ქალაქებისას?
- მინამ ეს რაღაც ჭია-ჭუები გაჩნდებოდნენ . . . .
- რა ჭია-ჭუები?
- აი ეს რაღაც ჯანაბა ოპოზიციიაა, მინამ ეს გაჩნდებოდა ასე იყო: სოფლის მამულს ჯერ შეუტყობდნენ წმინდა, ესე იგი ხარჯთგარეთს შემოსავალს. ვთქვათ, ამისთანა წმინდა შემოსავალი დადგა ერთი თუმანი. ამ ერთს თუმანს თექვსმეტ და ორ მესამედჯერ აიღებდნენ და ის იყო ფასი მამულისა. არითმეტიკულად ეს ვითარება ასე გამოისახება:  $10 \times 16^{\frac{2}{3}} = 166$  მანეთი 66 კ.
- მაშ მამულს რომ ერთი თუმანი წმინდა შემოსავალი ჰქონებოდა, უნდა დაფასებულიყო თექვსმეტ თუმნად, ექვს მანეთად და 66 კაპ. მესმის. ქალაქის მამულისა როგორღა იყო?
- ქალაქის მამულის მთელს შემოსავალს გამოარკვევდნენ. აქედან უნდა გამოსულიყვნენ ოცს ასის თავზედ, თუ შენობა ქვიტკირისაა, და თუ ხისაა – ოცდაათს, და რაც ძირს დარჩებოდა, ის იყო წმინდა შემოსავალი. ეს წმინდა შემოსავალი თორმეტ ნახევარჯერ უნდა აეღოთ და ის იქნებოდა ფასი ქალაქის მამულისა.
- ეგ ცოტა ვერ მესმის და კარგად გამაგებინე.

– ვთქვათ, ხარჯთგამოთვლელი შემოსავალი ქალაქის მამულისა ერთი თუმანია. თუ შენობა ქვითკირია, ამ ერთ თუმნიდამ ორი მანეთი და თუ ხისა – სამი მანეთი ხარჯად უნდა გადადებულიყო. ძირს დარჩება პირველ შემთხვევაში რვა მანეთი და მეორე შემთხვევაში შვიდი მანეთი. ეს უნდა აგელო თორმეტ ნახევარჯერ და ასე გამოგეყვანა ფასი ქალაქის მამულისა. არითმეტიკულად ასე გამოდის  $8 \times 12^{1/2} = 100$  ქვითკირის შენობისათვის და ხისათვის:  $7 \times 12^{1/2} = 87^{1/2}$  მანეთი.

– რაც ბ-ნ მინისტრისაგან შარშან ქალაქი მოუვიდათ, სოფლის მამულის წმინდა შემოსავალი უნდა აიღონ  $14^2/7$  – ჯერ და არა  $16^2/3$  – ჯერ როგორც აქამდე იყო.

– მაშ ასე გამოდის ბ-ნ მინისტრის ბძანებით, რომ, ვთქვათ, სოფლის წმინდა შემოსავალი ერთი თუმანია, მამული უნდა დაფასდეს თექვსმეტ თუმნად, ექვს მანეთად, 66 კაპეიკად კი არა, არამედ თოთხმეტ თუმნად და ექვს შაურზე ცოტა ნაკლებ.

– ეგრეა.

– ქალაქისა?

– ქალაქის მამულის შემოსავლიდამ ეხლა უნდა გამოვიდეთ ბ-ნ მინისტრის ბძანებით ასზე ოცს და ოცდაათს კი არა, არამედ ოცდაათს და ორმოცს, იმისდა მიხედვით, ქვითკირის შენობაა თუ ხისა და გარდა ამისა ყოველ სახელმწიფო და საქალაქო ხარჯსა და რაც ძირს დარჩება, ის უნდა ავიღოთ თორმეტნახევარჯერ.

– ერიჰა!... ძირს რაღა დარჩება, მაგდენი წილი რომ ხარჯად გადასდო შემოსავლიდამ? ეგ ხომ შემოსავლის თუმანზე ოთხი და ხუთი მანეთი ხარჯი მოვა. ამოდენა ხარჯი რომ უნდებოდეს ქალაქის მამულს, ვინდა ააშენებდა ქალაქში სახლებს? რას ამბობ? თითქმის ნახევარი, თუ ცოტა ამაზე ნაკლები შემოსავალი, რომ ხარჯს მიჰქონდეს, სად წავა? ვინდა ოხერი იქნება, ინდომოს ქალაქის მამული და შენობა. ეგ ხომ განგებ დაფოლება გამოდის სოფლის მამულისა და ქალაქებისა.

– ესეთი ბძანება კია და შენ რაც გინდა სთქვი.

– მერე ამას არა ეშველება რა? ხმას არვინ იღებს ამაზე? პატრონი აღარავინა გყვავს?

– პატრონისა კი რა მოგახსენო და ჩვენის ბანკის გამგეობა კი, თავის ფიქრით, მითამ გაუძალიანდა. ეგ ახალი ბძანება ბ-ნ მინისტრისა მიერ დაფასების წესისა და რიგის შეცვლააო. უმაღლესად დამტკიცებულ წესდების ძალით კი დაფასების წესრიგის შეცვლა ეკუთვნის მარტო ბანკის საზოგადო კრებასაო. მართალიც არის: ეგრე გვიწერია წესდებაში. და მინამ ამ წესსა და რიგს კრება არ შესცვლის, გამგეობა ორ წყალს შუა ჰრჩებაო: თუ უწინდელ წესრიგზე დადგება, – ეს ხომ ურჩობა იქნება და თუ ბ-ნი მინისტრისაგან ნაბრძანებს დაემორჩილება, – ეს ხომ წესდების დარღვევა და გაუქმება გამოვაო.

– მახსოვს, ასე აგვიხსნა ეს გარემოება გამგეობამ შარშან კრებაშივე და გვირჩია, ამ უმაღლესად დამტკიცებულ წესდებით მონიჭებულს უფლებას ნუ დასთმობთ, ნუ დაჰკარგავთო. დაფასების წესრიგის დადგინება თქვენი საქმეა და არავის სხვისაო. თუ კანონი ჩვენკენ არის, შიში და ფიქრი ვისი უნდა გვქონდეს?

– ეგ ხომ ეგრეა და ეგრეც უნდა იყოს, მაგრამ გაიხსენე, რა დღე დავაყენეთ ჩვენ თვითონ გამგეობას მაგაების თქმისათვის, ჩვენის უფლების გამოსარჩლები-სათვის.

– მერე ვინ დააყენა? აი პირი არ უნდა გამხმობოდა რომ ეგ მექმნა? კაცი ჩემკენ ლაპარაკობდეს, ჩემს უფლებას ესარჩლებოდეს და მევე პირში ბურთი ჩავჩარო!... აი გაქრეს!...

– მაშ არ გახსოვს, ეგრედ წოდებული ჩვენი მხსნელი ოპოზიცია რა ამბებში იყო? არ გახსოვს, რეები არ შესწამეს მაგისათვის გამგეობას? თქვენ ეურჩებით ბ-ნი მინისტრის ბძანებასაო. თქვენ უძალიანდებით უმაღლესს მთავრობასაო! როგორა ჰბედავთ და ბ-ნ მინისტრის ბძანებას არ ასრულებთო და სხვანი და სხვანი. გეხსომება, რა თავმოწონებით, დონჯის შემოყრით და რა ყელმოღერებით ამაებს იძახოდნენ. ძახილს კიდევ ჯანი გავარდეს, ჩვენშივე იყო და ჩვენშივე დარჩებოდა. საჩივარიც კი შეიტანეს ბ-ნ მინისტრთან და ეს

ნათქვამი გამგებობისა ამ საგანზე ურჩობად დაანახვეს, აი ამისთანები არიანო.

– მახსოვს, მახსოვს ეგ ყველაფერი ჩვენდა სასახელოდ. ღმერთმა ყველას მშვიდობა მისცეს. ტყუილად კი არ არის ნათქვამი: რასაც კაცი თავის თავს უზამს, იმას მტერიც ვერ უზამსო, დრო მოვა და ცოდვა და მადლი გაირჩევა ყველასი ერთად და თვითვეულისა ცალკე. სულ ესე ბრძანი ხომ არ ვიქმნებით? ეხლა კი ერთი ეს მინდა ვიკითხო: რა დღე მოელის ჩვენს ბანკს, რომ ბ-ნმა მინისტრმა ინებოს და ძალა დაატანოს ბანკს, ჩემი ბძანება აასრულეთ, უმაგისობა არ იქნებაო?

– შენც კარგად იცი, რომ აქ სოფლის მამულები-სათვის სახელმწიფო ბანკიც მოქმედებს. იქ წესდება დაფასებისა ნებას აძლევს მამულები ჩვენზე მეტად აფასოს. ამას გარდა, მამულის ფასისას იქ მანეთში სამს აბაზს და ზოგჯერ ხუთმეტ შაურსაც იძლევიან სესხად მაშინ, როდესაც ჩვენს ბანკს მანეთში ათის შაურის მეტის მიცემის ნება არა აქვს. ყოველ ამასთან იქ სესხი უფრო იფთია, ვიდრე ჩვენს ბანკში. აბა სახელმწიფოს ბევრი რამ შეუძლიან და ჩვენი ბანკი იმასთან ფეხს სად გაიწვდენს. აიღე ეს სამივ გარემოება ერთად და შენვე იფიქრე: ჩვენს ბანკს რა ძლიერი მოცილე ჰყვანდა მაშინაც, როცა ნება ჰქონდა უწინდელე ეფასებინა მამულები, და ეხლა ხომ, როცა უწინდელზე კიდევ ნაკლებ უნდა ვაფასოთ, ვილა ოხერი მივა ჩვენს ბანკში მამულის დასაგირავებლად?

– მაშასადამე, აქედამ თუ სრულად არ მოსწყდება წყარო ჩვენის ბანკის შემოსავლისა, ძალიან დაიწრიტება მაინც.

– ეგ უეჭველია. ქალაქის მამულებშიაც მოცილე ჰყავს ჩვენს ბანკსა. ტფილისის ქალაქის საკრედიტო საზოგადოებაა ამისთანა მოცილე. ამ საზოგადოებას არსებული წესი ნებას აძლევს ჩვენზე მეტად აფასოს მამულები და ჩვენ კიდევ უფრო ქვევით დაგვწია დაფასების საქმეში ბ-ნი მინისტრის ბძანებამ. თუ სახეში მივიღებთ, რომ უდიდესი შემოსავალი ჩვენის ბანკისა ტფილისის მამულების გირობისაგან მოდის,

შენ თითონ მიხვდები, რა კლებაში უნდა შევიდეს ჩვენი ბანკი, როცა ასეა საქმე.

– მართალია, გადამეტებულად დაფასებული მამული – სოფლისაა თუ ქალაქისა – საშიშარია და საზარალოც. ზარალი ბანკისა ამან იცის. მაგრამ არც ის არის სახეირო ბანკისათვის, რომ უმიზეზოდ და უსაბუთოდ ფასი აკლოს მამულებსა. თუ ყველა არა, ბევრი ამღებელი სესხისა სცდილობს იმდენი აილოს, რამოდენასაც მამულები უთავდებებს. თუ აქ განგებ უკლებ ფასს მამულსა, შენთან ვილა მოვა, როცა გვერდით იმისთანა ბანკია, საცა მამული თავისს სწორე ფასად ჰფასდება, რაოდენადაც შესაძლებელია. სიფრთხილე ყველგან კარგია, მაგრამ სახელმწიფო ბანკი და საკრედიტო საზოგადოება რა არი და ჩვენი ბანკი რა? აქ განსხვავება რად უნდა იყოს დაფასებაში? თუ პირველებისათვის უშიშარია ერთგვარი წესი დაფასებისა, ჩვენის ბანკისათვის რადლა უნდა იყოს საშიშარი იგივეგვარი წესი? ეს მით უფრო გაუგებარია ჩემთვის, რომ ბ-ნს რევიზორს ჩვენი წესდება დაფასებისა არ დაუწუნებია, პირიქით, სთქვა, რომ იგი წესდება თავისის დანიშნულების შესაფერიად და ასეც მოახსენა ბ-ნს მინისტრს.

– საქმეც მანდ არის. საბუთი ჩვენის მამულების ასე განგებ დაფოლებისა და ამის გამო ჩვენის ბანკის შეხუთვისა არც სარევიზიო მოხსენებაშია და არც ეხლანდელ გარემოებათა ვითარებაში და მაინც გვიბძანებენ, ნაკლებ უნდა აფასოთ ამის შემდეგაო. თუ ჩვენებური მამულები იმოდენად არა ღირან, რამოდენადაც აქამომდე ვაფასებდით, ხომ სახელმწიფო ბანკისათვისაც და საკრედიტო საზოგადოებისათვისაც არ უნდა ღირდნენ. ამაებს რად დარჩათ წინანდელი წესი დაფასებისა და ჩვენ რად შეგვიცვალეს? თუ მამულების ფასმა დაიწია, ეს მარტო ჩვენთვის მოხდა და სხვისათვის კი – არა?! თორემ ხომ ცხადია, რომ ჩვენში ფასი მამულებისა დღე და დღე ჰმატულობს და არა ჰკლებულობს. ამას თვით რევიზორიც ჰმოწმობს. ფულიც ხომ საერთოდ გაიფუდა და იმოდენა სარგებელს არ იძლევა ბანკებში და ბანკის ქალაღლებით, რამოდენადაც უძრავი ქონება. ამის გამო ეხლანდელ დროში ფული უფრო



ძლიერ ეტანება უძრავს ქონებას, ვიდრე წინად და, მაშასადამე, ამგვარს ქონებას მუშტარი დღეს უფრო ემატება და არკი აკლდება. მამულის მუშტარის მატებას მოსდევს ფასის მატებაც მამულებისა და არა კლება. ყოველივე ეს სახეში მქონდა, რომ ვთქვი: არც გარემოება და ვითარება იძლევა საბუთს მეთქი, რომ დღეს ნაკლებ ვაფასოთ მამულები, ვიდრე წინად ვაფასებდით.

– მაშ საიღამ გვეწვია ეს წყრომა ღვთისა?

– ვილაცამა სთქვა: ჩვენს ქართველებში რომ ძმა ძმის მტერი არ იყოს, ჩვენს ბედს ძალღიჯ არ დაჰყეფდლო.

– ეგ რაზე სთქვი? არ მესმის.

– იმაზე, ჩემო საყვარელო, რომ აქ ჩვენ თვითონვე ვუმტრეთ ჩვენს თავსა.

– ეხლა ეგ სთქვი!...

– მოდი და ნუ იტყვი. შენ იცი თუ არა, – ჩვენის ბანკის გამგეობამ ქალაქით მოახსენა ბ-ნს მინისტრს, რომ თქვენის ბმანების ასრულება და ბანკის უკან დაწევა ერთი იქნებაო: ჩვენს ბანკს სესხის ამღები ან სულ აღარ ეყოლება, ან ძალიან შემოეღვევო. გარდა ამისა საბუთები წარუდგინა, რომ ეგეთი დაფოლება მამულებისა უმიზეზოა და უსაბუთო და სთხოვა, ნუ ინებებთ ეგრეთს შევიწროებასა და უწინდელს წესზე ნება მოგვეცით მამულები ვაფასოთო.

– ბარაქალა, თუ ეგრეა.

– ეგ ბარაქალა სხვისთვის დაგვჭირდება, ჯერ მოიცადე.

– კაცო, მე კი სული გადამელია და! რა ღობე-ყორეს ედები! ერთი ძალე გამაგებინე, რა ამბავია.

– აბა ძაღლის კულიც აქა მარხია. ეგ ქალაქი წავიდა თუ არა ჩვენის ბანკიღამ, ზედ მეორეც მივაყოლეთ ისეთი, რომ შენი მოწონებული.

– ეე! მესმის! ის, მე და შენ რომ ვიცით, უსათუოდ ის გამოიდებდა ჩვენთვის თავს და მხარს მისცემდა გამგეობის თხოვნას.

– გამოცანა გერგება. ამისთანა ბიჭბუჭების თხოვნას და მერე ამისთანა წვრილმანისათვის ის რად იკადრებდა ან

მოცლას, ან გარჯას. განა არა ჰხედავ ხოლმე, რარი-გად იბღვირება და ილურსება ბანკის ხსენებაზე...

– მაშ ვინ მოაყოლებდა სხვა ქალაქს, ვის რა თავი სტკივა ჩვენთვის?

– არც მართლა ისე უნუგეშონი ვართ, როგორც შენა გგონია. ავირჩიეთ კაცი, მივეცით ვექილობის ქალაქი და გზა დაგულოცეთ. იმან არც აცივა, არც აცხელა და თავისის და ჩვენის სახელით ერთი კაი ლაზათიანი საჩივარი გამოაცხო და მიაართვა სამინისტროს...

– ბარაქალა!... მართლა-და უნუგეშონი არა ვყოფილ-ვართ. ძმა ძმისთვისა და შავი ღლისთვისაო. კიდეც კარგია, თუ ეგრე მოგვივლია საქმისათვის.

– აკი გითხარ, სხვისთვის შეინახე ეგ ბარაქალა-მეთქი. აკი გამოგადგა კიდეც.

– მერე ?

– მერე ისა, რომ საჩივარში სხვათა მრავალთა შორის შესჩივლა, რომ ბანკის გამგეობა თქვენს ბმანებსა მამულების დაფასების შესახებ ეურჩება და არ ასრულებს და ხელახლად უბმანეთ ბმანება ბ-ნ მინისტრისა აღსრულებაში მოიყვანონო.

– როგორ? უბმანე, ჩვენი მამულები უმიზეზოდ და უსაბუთოდ აფოლოს ჩვენმა ბანკმავეო?!

– ეგრე გამოდის, როგორც ჰხედავ.

– ბიჭო-და, მე მეგონა, ბანკს გამოესარჩლებოდა, – მაშ დედამიწა არ უნდა გასკდეს და თან არ უნდა ჩაგვიტანოს ყველანი დედაბუდიანად! ჩვენის ხელით ჩვენვე ვიჭრით ყელს. ვინ იქნება ჩვენში იმისთანა, რომ ამისთანა ვექილობაზე ხელი მოუწერა? რას ამბობ, ადამიანო, გაგიჟდი თუ რა ჯანაბაა!

– იმას ვამბობ, რაც გითხარი.

– ჩვენვე ვთხოვთ, ჩვენი მამულები იმათ არა ღირან, რაც აქამოდღო? მაგას კიდეც ჯანდაბამდე გზა ჰქონდეს: ჩვენვე ვთხოვთ, ჩვენს ბანკს ისე გაუნადეთ საქმე, რომ წინ ფეხი ვეღარ წასდგას სულ უკან-უკან იწიოსო! ჩვენვე ვთხოვთ, მოუწყვიტეთ ჩვენს ბანკს წყარო შემოსავლისაო? მაშ რითღა შევინახოთ სკოლა? რითღა მივეშველნეთ ერთმანეთს გაჭირებაში?

– ეგ წადი და ჯერ ჩვენს თავმოწონებულს ოპოზიციას ჰკითხე და მერე მის მიერ გაბრიყვებულ

ქართველს, რომელმაც ხელი მოუწერა ვექილობაზე და რომელიც ამის მომქმედს შენსავით ბარაქალას ეუბნება და გამგეობას კი ნიშნს უგებს დღესაც „ჰიო“!

– კაცო და ეგ „ჰიო“ გამგეობას კი არა, ჩვენვე გვცემს თავსა და პირში. მაშ ეხლა სამინისტროში ორი ქალაღლია: ერთი გამგეობისა, რომელიცა სთხოვს, უწინდელს წესს ნუ ჩამოგვართმევთო, ნუ შეჭნუთავთ ჩვენს ბანკსა, ბორკილს ნუ უყრითო, და მეორე ჩვენი – საცა ჩვენვე ვჩივით ჩვენის ვექილის პირით, გამგეობა გეურჩებათ, გიძალიანდებათ, არ გემორჩილებათ, და ჩვენვე ვეხვეწებით, – უბძანეთ ბანკს ყელი გამოჭრან, მაგრა წაუჭირეთ ყელში თოკი, რომ არაქათი აღარა ჰქონდეს შემოსავლისაო. სამინისტრომ რომელს ერთს გაუგონოს სვეწნა და მუდარება? ეგ ხომ ის გამოვიდა – ფიცი მწამს, ბოლო მაკვირვებსო.

– მაგისი კი რა მოგახსენოთ.

– ბევრს უწერია ვექილობაზე ხელი?

– არ ვიცი, ამბობენ, კარგა ბლომა ხალხიაო.

– ახლა, რა პირითლა უნდა დაგვენახვენ ის ხელმომწერნი?

– ბულვარზე გადი და შეიტყობ : დღეს ჩვენი სალაყბო, აი ევროპაში რომ პარლამენტს ეძახიან, იქ არის.

– მოდი და იხეირე, ქართველო კაცო! რაკი აქამდე მივედით, ჩვენი საქმე წასულია. ჩვენივე რომ ჩვენვე გვცემდეს, სხვებს რა ვუთხრათ, რას ვემდუროთ!

– აბა ბარაქალას თქმა თუ გინდა, ეხლა სთქვი.

– მართლა-და ბარაქალა მეცა და შენც. ორივე ღმერთმა შეგვინახოს. ფუ, ჩვენს კაცობას და ადამიანობას! პირში თევზსავით წყალი ჩავვიყენებია და ხმის ამოდებას ვერა ვბედავთ. ეს ამბავი არამც თუ სასაცილოდ ავდებთ ჩვენის თავისა, თავზე ლაფის სხმაა. ეს უხარიანთ სალაყბოზედ? ღმერთმა ამისთანა სიხარული ჩვენს მტერს მისცეს და ჩვენს მოყვარეს ხომ ჭირად ეყოფა და ეყოფა. შაბაშ, ქართველო!.. ტყუილად კი არ დაგვცინიან: ქართველებს მარტო ერთი რაღაც ბანკი აქვთ და ლამის ისიც პირქვე დაამხონო.

– მაგას იცი კიდევ რას უმატებენ? „არა შეჯღა მწყერი ხესა, არა იყო გვარი მისიო“. ვინ ქართველი

და ვინ საქმე ! რის უნარიც ღმერთს არ მოუცია, – არ მოუცია. ისიც საკვირველია, რომ ჩვენს ბანკს აქამდე გაკადლებინეთ.

– მე და ჩემმა ღმერთმა, მართალს ამბობ. ვაი ჩვენი ბრალი!.. რამ წაგვწყმიდა ესე?

[1897 წ. 1 მარტამდე]



## თავადი 6. ზ. ჭავჭავაძე

ნეკროლოგი

გუშინწინ გარდაიცვალა თ. ნ. ჭავჭავაძე. ერთი გულშემატკივარი კაცი კიდევ მოაკლდა ჩვენს ქვეყანასა, კაცი ჭკუიანი, თავისის საკუთარი მხნეობით და ნიჭით დიდ ხარისხამდე მიღწეული, თავისის საკუთარის ბეჯითობით და ღვაწლით გონებაგახსნილი და თვალახილებული, კარგი მცოდნე ჩვენის ყოფა-ცხოვრებისა, კარგად ჩახედული ჩვენს ავკარგიანობაში. პატარაობითვე ჩვენს შორის გაზრდილა, ჩვენთან ერთად ჭირსა და ლხინში ყოფილა, ჩვენთან ერთად უგრძნია საგრძნობელი, ჩვენთან ერთად უგლოვია საგლოვებელი და ჩვენთან ერთად ულხენია სინარული. არა ყოფილა ერთი იმისთანა ამბავი, ავი თუ კარგი, რომ იმის გულს არ დასჭედოდა ღრმად, რაკი ჩვენს ქვეყანას შეეხებოდა რამ. იცოდა, რა სთქვას რა დროს, სად რა წარმართოს, ვის რა უთხრას და ამისთანაებში თამამი და კადნიერი იყო და არა რაიმე ანგარიში არ დაახვეინებდა უკან. მისის მახვილის ენისა, მისის პირდაპირობისა, როცა კი საქმე ატკენდა გულს და საცა ჯერ არს აალაპარაკებდა, ბევრს ეშინოდა, ბევრს ეფიქრებოდა. საცა იგი იყო, აღვირაშვებელი წყურვილი ქართველთა გაუპატიურებისა ენას მოიკვნეტდა ხოლმე; ხელაღებით ავად ხსენება ქართველისა, რომელიც ბევრს ენაზე აკერია დღესაც, ვითარცა ერთადერთი ღონე მოედნიდამ ბურთის გატანისა და წინ ფეხის წადგმისა, მის წინაშე სოროში იმაღავდა თავს დამფრთხალ თხუნელასავით.

აწ თვით დადუმდა და საუკუნოდ გამოესალმა თავისს საყვარელს საქართველოს, რომლის სარჩლისა

და გამოქომაგებისათვის მას არასდროს არ დაუზოგავს თავი არც დიდისა და არც პატარის წინაშე. მას აქედ, რაც თავის ბრწყინვალე სამსახურს თავი დაანება, იგი მთლად მიეცა ჩვენის ქვეყნის ჭირსა და ბოროტს. არ იყო არც ერთი საერთო საქმე, რომ მთელის გულის მხურვალეობით არ მოჰკიდებოდა და სხვებთან ერთად არ ეზრუნა, არ ეფიქრნა, საიღამ რა ეშველოს, საიღამ რა მოეგლოს. სასურველია კაცმა ხელთ იგდოს იგი წერილები, რომელიც მას მიუწერია საქართველოს შესახებ პეტერბურგში დიდკაცებისათვის, რომელთაც თითქმის ყველას იცნობდა და ბევრს მათგანს ისე ემეგობრებოდა, რომ „შენაობით“ ესაუბრებოდა.

აწ იგი მღუმარეა კუბოში, ხოლო კუბოდამაც დაგვანხვა თავისი სიყვარული ქვეყნისა, რომელიც უკანასკნელ ჟამსაც თვალწინ სდგომია. არ იყო მდიდარი კაცი, ხოლო მაინც შეუნახავს საქართველოსთვის თავისი წვლილი შესაწირავად. ორი ათასი თუმანი სტიპენდიად დაუდვია, რომ ერთი ქართველი გაიზარდოს სამთო ინსტიტუტში და ერთიც უნივერსიტეტში, ხუთასი თუმანი უანდერძებია ყვარლის (ყვარელი მისი სამშობლო სოფელია კახეთში) გლეხთა შვილების სტიპენდიად ან სამეურნოე სკოლაში, ან სემინარიაში.

სხვა რომ სიკეთე არა მიუძღოდეს რა განსვენებულს, ეს შედარებით უხვად ნაანდერძევი შესაწირავიც დიდი საქმეა ქართველის კაცისაგან, როგორც თუ არ ერთადერთი მაგალითი, — ძალიან იშვიათი მაინც. სიცოცხლის დროს რომ აღარავის ახსოვს საქართველო, სიკვდილის ჟამს ვისღა მოაგონდება და აკი ისე მივდივართ ხოლმე ამ ქვეყნიდამ, ისე უგულოდ ვტოვებთ ხოლმე ჩვენს სამშობლოს, რომ გროში რა არის, გროშსაც არ გავიმეტებთ მამულისშვილობის და მადლობის ნიშნად. განა სამშობლო სამადლობელი არ არის, თუნდ მამულიშვილობაც არ იყოს, რომ დაგვებადა, გაგვზარდა, შეგვივრდომა, გვიპატრონა, გვაცოცხლა და გვაცხოვრა!

ამ ანდერძილამ იგივე გონებაგახსნილობა განსვენებულისა სჩანს, რაც სიციცხლეშივე შენიშნული ჰქონდათ მის მახლობელთა. იგი გულმტკივნეული იყო ქართველისათვის, განურჩევლად წოდებისა. თავად-

აზნაურია თუ გლეხი, ბედნიერება ორივესი ერთნაირად სწყუროდა. ანდერძითაც დაამტკიცა, რომ უკანასკნელ ჟამამდე ეს წმინდა მცნება გულს შერჩენია ჩვენდა სამომდევრებლად და სამაგალითოდ. ხშირად უთქვამს: უერთმანეთოდ ცხოვრება ტყუილი სიზმარიაო, უქმი იმედია უქმის გონებისაო.

მოგვაკლდა კიდევ ერთი კაცი! ჩვენ ამას იმ აზრით კი არ ვამბობთ, რომ სათვალავში დაგვაკლდაო. საერთო კაცთა სათვალავში ერთი მეტი თუ ნაკლები, დიდი თაბაუთი არ არის, ხოლო აქ სხვა დაკლებაა. ხმის ამომღები კაცი მოგვიკვდა, ჭკუიანი მოსარჩლე და გაბედული ქომავი გამოგვეცალა ხელიდამ. აქ დაკლება დიდი უბედურებაა, ქვეყნისათვის დიდად საგრძნობელი დანაკლისია, მით უფრო, რომ მთელს ჩვენს სამშობლოში ორი-სამი ხმის ამომღები კაციღა გვეგულეობდა და ამათში ერთი აწ განსვენებული თ. ნ. ზ. ჭავჭავაძე იყო. გვეცლებიან, ჩვენდა საუბედუროდ, ხელიდამ ესენი და, ჩვენდა საუბედუროდვე, მომდევართ ვეღარა ვხედავთ. მიდიან და აღარავინ მოდის მათდა სამაგიეროდ. აი რაშია უბედურება!..

ბევრმა არ იცის, რა გულუხვად გაუსტუმრებია აწ მიცვალებულს ღარიბნი და უნუგეშონი, როცა მისთვის გაუწვდიათ ხელი, — და როდის არ გაუწვდიათ? ბევრმა არ იცის, რამდენისათვის შემწეობა აღმოუჩენია არამცთუ მარტო ფულით, რომელსაც ერთობ არა ჰზოგავდა გაჭირვებულთათვის, არამედ სიტყვით, დახმარებით, შუამდგომლობით, საცა ჯერ არს. ბევრნი მის მიერ ნუგეშდებულნი, ტირილით და გლოვით გააცილებენ მისს კუბოს და უანგარო ცრემლს დაღვრიან მისს საფლავზე. ბევრნი აწ უნუგეშოდ შთენილნი იტყვიან: ღმერთო, წაგვართვი ჩვენი პატრონი და ნუგეშმცემელი და სამაგიეროდლა ვის ვგაძლევი!..

[1897 წ. 10 მარტამდე]



## **<პრიტის კუნძულის ნავსადგურების ბლოკადა>**

ტფილისი, 13 მარტი

მუქარა აღსრულდა. ეგრედ წოდებული ბლოკადა განხორციელდა, ესე იგი, დიდთა სახელმწიფოთა შეჭრეს კრიტის კუნძულის ნავთსადგურები და აღარ უშვებენ საბერძნეთის გემ-სომალდებს აღარც იქით და აღარც აქედ. დიდი ვაჟკაცობა არ უნდოდა, რომ თითქმის მთელს ევროპას ასე დაეჩაგრა პაწია საბარძნეთი, და არცა გვეონია, რომ ეს ამბავი დიდი თავმოსაწონებელი და სასახელო იყოს იმ დიდ კრებულისათვის, რომლის თვითოეულს წევრს ცალკე საბერძნეთი ყლაპადაც არ ეყოფა, როგორც ვეშაპს ბუზი.

ეხლა საკითხავი ეს არის: გათავდა ამით ის საშიშარი და განსაცდელიანი საქმე, რომელსაც აღმოსავლეთის საქმე ჰქვიათ, თუ ეს უბრალო „ბლოკადა“ კუ და ეტლის თამაშია საპოლიტიკო ჭანდრაკის ფიცარზე? შახია, თუ შამათი? ჩვენა გვეონია, რომ არც ერთია და არც მეორე. ეს მარტო დიპლომატიის ჩვეული ოსტატობაა: ნახეს, ირღვევა კედელი და ხელდახელ შელესეს სხვისა და თავისის თავის მოსატყუებლად. დღევანდელი შიში და განსაცდელი ხვალისათვის გადასდეს და ეგ ხვალე, თვითონაც კარგად იციან, შორს არ არის, ძალიან და ძალიან ახლოა. პაემანი ქარცეცხლის ატენისა გადაიდვა, მაგრამ ცეცხლი მაინც არ დაიშრეტა, ისევ იმ თივაშია დამალული, რომელსაც აღმოსავლეთის საქმეს ეძახიან, მხოლოდ ახალი ის არის ყოველ ამაში, რომ თუ სადმე გაჩნდა ცეცხლი, ეგრე ადვილად ვეღარავინ გააქრობს. მშვიდობისმოყვარე დი-

პლომატიამ მარტო ეს შესძინა ქვეყანას, რომ თუ ამას იქით ატყდა რამე ოსმალეთის თაობაზე, უფრო მძვინვარე და უფრო საშინელი რამ მოხდება ევროპისათვის. და რომ ატყდება, ამაზე ეჭვი არავისა აქვს, და სხვათა შორის, თვით დღევანდელ დიპლომატიასაც, რომელიც იმის ცდაშია, ოღონდ დღეს კი ნუო და ხვალემ თავისი იცოდესო, ოღონდ დღეს ჩვენს ხელში ნურა მოხდება რაო.


ჩააფუჩჩენეს საბერძნეთის საქმე, რომელიც სხვას არასფერს არა თხოულობს გარდა იმისა, რომ ჰკითხეთ თვით კრიტიკებს, უნდათ თუ არა ჩემთან შემოერთებაო, და რასაც იტყვიან, ისე მოიქეცითო. რასაკვირველია, ძალა აღმართსა ჰხნავს და საბერძნეთსაც უთხრეს: ენა გრძელი გაქვს და მოიკვნიტეო. ჯერ ხანად იქნება ჩააჩუმონ კიდევ, მაგრამ როდემდის? ვთქვათ, მართლა ხმა გააკმენდინონ საბერძნეთსა, თუმცა ძნელად საფიქრებელი კია. მითამ ამით გათავდეს საქმე? მაკედონია? აქ კი ცოტა ასაფეთქი წამალია? ვინ უთავდებებს განცხრომილს დიპლომატიას, რომ კრიტიკის კუნძულზე ჩამქრალი ცეცხლი აქ, მაკედონიაში, არ იფეთქებს და მთელს ბალკანეთის კუნძულს ძირიდან თხემაძღე არ შესძრავს. სერბია, ბულგარია, რუმინია, ჩერნოგორია და თვით საბერძნეთიც, რომელნიც მემკვიდრეობას ოსმალეთისას სჩემობენ, ხომ დაერივნენ ერთმანეთში და ერთი ხათაბალა ასტეხეს. ახლა დიდნი სახელმწიფონი აიღეთ, რომელთაც თავისი საკუთარი ჭირბოროტი აქვთ აღმოსავლეთის საქმეში და ყველა კაი ლუკმის გამოთლას მოელის, და ადვილად წარმოსადგენია, რა ალიაქოთი და ვაი-ვაგლანი ასტყდება, თუ კრიტიკის კუნძულზე შემჭვარტლულმა საქმემ მაკედონიაში ნაპერწყალი გადისროლა.

კრიტიკის კუნძულის და საბერძნეთის თავგამოდებულმა საქმემ ცხადად დაანახვა ქვეყანას, რომ თუმცა დიდნი სახელმწიფონი, რომელთაც პირში კაპი ამოსდეს საბერძნეთს, პირად ერთმანეთის სურვილით აღტკინებულნი არიან, მაგრამ გულშიკი ზოგიერთნი მათგანი ამ თანხმობის ფარდას იქით რაღაცას სცუღლუტობენ და ცეცხლის ჩაქრობა არ უნდათ. თუ ესლა საბერძნეთის გამო ერთმანეთს დაჰყვნენ და მოურიგდნენ, ეგ ჯერ

კიდევ ბევრს არა ჰნიშნავს, აქ დათმობილი, სხვაგან იპოვის იმედს და მიზეზს მონასტრის არეუ-დარევისას და, ჩვენა გვეონია, არ არის შორს ის დრო-ჟამი, როცა ერთგან დაძინებული საქმე სხვაგან გაიღვიძებს უფრო საშინელის სახითა. ეს „სხვაგანი“ მაკედონიაა. მაშინ ვნახოთ, დიპლომატიას რა თავბრუ დაესხმის და როგორ დაიძვრენს თავს საშინელის თოფ-ზარბაზნის ჭექა-ქუხილისაგან.

აღარ გვახსოვს, ვინა სთქვა, რომ აღმოსავლეთის საქმე იმისთანა საქმეა, რომელსაც გაცვეთილი კბილი დიპლომატიისა ვერ დაღეჭავსო. მართალიც არის. მხოლოდ წვრილმანი საქმენი შესაძლოა კანცელარიების გზით ასე თუ ისე გადასწყდესო და ისტორია მხოლოდ ამისთანა საქმეს აძლევს ზოლმე საცოხნავად დიპლომატიასაო. ხოლო იქ, საცა საქმე შეეხება სამსოფლიო ვითარებას, თითონ ისტორია სდებს თავისს სამსოფლიოს განაჩენსავეო და ამ განაჩენს თითონვე წარმოსთქვამსო, სხვათა დაუნმარებლად, გარემოცული ჭექა-ქუხილითა, ვითარცა საბაოთ მამა სინაის მთიდაძაო. აღმოსავლეთის საქმე ერთი ამისთანა სამსოფლიო საქმეა და დიპლომატიას სად შეუძლიან იგი გადასწყვიტოს!

[1897 წ.]



## **<მობრძანდა ახალი მთავარმართებელი კავკასიისა>**

ტფილისი, 14 მარტი

გუშინ მობრძანდა ახალი მთავარმართებელი კავკასიისა, თავადი გრიგოლ სერგეის ძე გალიცინი. მისს ბრწყინვალეობას წინ მოუძღვა უმაღლესი სახელდობრივი ბრძანება სენატის მიმართ. მისს იმპერატორებთან დიდებულებას ხელმწიფე იმპერატორს კეთილშენებია ღრობით მიენიჭებინა ახალ მმართველისათვის იმისთანა დიდნი უფლებანი, რომელნიც “ნამესტნიკობის” გაუქმების შემდეგ არა მთავარმართებელს არა ჰქონია. ეს ამისთანა ნიშანი უმაღლესის ნდობისა დიდმნიშვნელოვანი საქმეა. ამისთანა დიდნი უფლებანი ცხადად ჰქვამდებენ, რომ კავკასია სამართველოდ ებოძა უმაღლესად რჩეულს, რომლის ხელშიაც იგი უფლებანი მარტო კეთილის მომასწავებელნი არიან. ყოველივე უფლება კეთილსაიმედოა სამართლიანის, წინდახედულის, განათლებულის, გულგამთბარის და გულმტკივნეულის კაცის ხელში. სჩანს, ყოველ ამისთანა ღირსების მექონეა იგი რჩეული, რომელსაც ჩვენმა მოწყალემ ხელმწიფე იმპერატორმა კეთილ იწიება და მიანდო დიდნი უფლებანი. ჩვენც დიდის ნდობით და სასოებით ვეგებებით მისს ბრწყინვალეობას ახალ მთავარმართებელს და შევხარით მისს მშვიდობით მობრძანებას ჩვენდა საკეთილოდ!..

ქართველნი იტყვიან, სიმართლით მოჭრილი ხელი არ მეტკინებაო. ამ სიტყვაში დიდი და ღრმა აზრია. არანაკლები, თუ არ მეტი, აზრია შემდეგშიაც: ქმნა მართლისა სამართლისა ხესა შეიქმს ხმელსა ნელდად.

საქმე სამართლიანად მოქცევაა. სხვა ყოველი, რაც გინდ მწვავე რამ შეეძთხვას ადამიანს სამართლის პირდაპირობითა და სახელითა, ჭკვათ მისაღებია, ვითარცა აუცილებელი ქვაკუთხედი კაცთა კრებულის აგებულებისათვის. უამისოდ ქვეყანა ვერა ჰხეირობს, ვერა უფლება თავისს კეთილს ნაყოფს ვერ გამოიღებს და თვით უფლება სხვა რა არის, თუ არ ღონე დათრგუნვილ სამართლის აღდგენისა და სამართლისათვის გზის გაკაფვისა და გახსნისა. სხვა უაღრესი მიზეზი და საბუთი არსებობისა უფლებას არა აქვს რა.

სამართალი და სიყვარული, ერთმანეთთან ხელჩართული, – აი ის უშრეტი წყარო, საიდანაც წარმოდინდება მადლი მართველობისა და კეთილი ქვეყნისათვის. რაც სითბო-სინათლეა ბუნების სიცოცხლისათვის, ის სამართალ-სიყვარულია კაცთა კრებულის ცხოვრებისათვის.

უმაღლესის ბრძანებით ბოძებულნი უფლებანი ცხადად გვასწავლიან, რომ მისი ბრწყინვალეობა ახალი მთავარმართებელი თავისს დიდს და პასუხისმგებელს სამსახურს სამართლით და სიყვარულით გაუწევს ერთის მხრით სახელმწიფოს და მეორეს მხრით მისდამი რწმუნებულს ქვეყანას და ამ ორს უდიდესს ღონეზე დაამყარებს ყოველს თვისს განათლებულს მზრუნველობას. სამართალი და სიყვარული ჰქმნის იმ ერთსულობას, ერთგულობას, რომელიც ასე საჭიროა სახელმწიფოს მაგრად და მკვიდრად დგომისათვის, ერთადერთი ზღუდეა, რომელსაც ყოველივე ავი და ბოროტი ზედ შეასკდება ხოლმე, როგორც სალსა კლდესა და ერთადერთი საწყაოა მართველის ღვაწლისა.

კავკასიის მართვა, სადაც ამდენი სხვადასხვა ერი მკვიდრობს და სასოებით შეჰყურებს დიდს რუსეთს, მეტად ძნელია. თვითვეულის ერის ზნე-თვისება, რჯული, ჩვეულება, აწმყო და წარსული იმისთანა რთულს საგანს შეადგენს მართვისათვის, რომ ძნელია კაცმა ადვილად გაიგნოს გზა. თუ აქ კაცი, ვიდრე თავისს განაჩენს დასდებდეს, ყოველ ავსა და კარგს ჯერ წინად არ გამოიძიებს, არ გამოარკვევს, გულს არ გაღუხსნის გეშის მიტანით კი არა, ცარიელის გუმანით კი არა, რომელიც ყოველთვის მაცდუნებელია და არ-

მისანდობი, არამედ მართალის აღმოჩენითა და თვალწინ დაყენებითა, ერის გულისტკენის მეტს ვერას მოიპოვებს...


სხვადასხვა ენის, რჯულის და ზნე-თვისების ერთა სიმრავლე კავკასიაში, ვიმეორებთ, აძნელებს საქმეს მართვისას და რომ აქ არც მწვალი დაიწვას, არც შამფური, გამორკვევა უნდა სახელმძღვანელო აზრს. ჯერ ყოველთა უწინარეს უნდა გაიმიჯნოს, სად იწყება და თავდება ჭეშმარიტი მოთხოვნილება სახელმწიფოსი, რომელსაც ყველა უნდა ექვემდებარებოდეს უცილობლად, და სად — სხვადასხვა ერთა ბუნებური სურვილი თავისი თავის შენახვისა და პატრონობისა, რომელსაც ყველა უნდა გულისტკივილით და პატივისცემით ეპყრობოდეს. როგორც ცალკე ადამიანს არ ეკიჟინება, რომ თავისი სულიერი და ხორციელი სახე იქონიოს კრებულში, ისეც ცალკე ერს — სახელმწიფოში.

სახელმწიფოს ერთობას, როგორც პოლიტიკურს და საზოგადოებურს ერთარსებას, სულ არ უშლის ეთნოგრაფიული სხვადასხვაობა. ერთსახობა, გარეგანი იგივეობა კი არ არის საჭირო სახელმწიფოს სიმტკიცე — სიმაგრისთვის, არამედ ერთსულობა, ერთგულობა, რომელიც ერთადერთი ქვითკირია სახელმწიფოს მკვიდრ აგებულებისათვის. სახელმწიფოს, რა თქმა უნდა, არ შეუძლიან თავისი ინტერესები დაუთმოს ვისმე. ამიტომაც საბუთი აქვს თვალყური ეჭიროს და ადევნოს, რომ სურვილმან ცალკე ერისამ მართლად დადებული მიჯნა სახელმწიფო ინტერესებისა არ გადალახოს. ხოლო ამ მიჯნის გარედ მოქმედება ერისა სასურველიც უნდა იყოს სახელმწიფოსათვის და წასახალისებელიც, იმიტომ რომ აქ თვითმოქმედება ერისა ღონეა სახელმწიფოსივე, როგორც საერო სახსარი თავისით ცხოვრებისა, სხვის დაუხმარებლად და, მამასადაძმე, სახელმწიფოს შეუწუხებლად.

ყოველივე კაცი თავისს რჯულზე ცხონდებაო, — იტყვიან ხოლმე ჩვენში და დაე, ყოველი თავის რჯულზე სცხონდეს ხორციელად სააქაოს და სულიერად საიქიოს. რა ხელსაყრელია სახელმწიფოსათვის, რომ ეს სასოება გაუფთხოს ცალკე ადა-

მიანს თუ ცალკე ერსა და მით განუქარვოს და გაუქარწყლოს იგი დიდი გულმოდგინება, ამ სასოებისაგან წამომდგარი, რომელიც სძრავს და ამოქმედებს ადამიანსა თუ ერსა მისდა სულიერ და ხორციელ თავისებურ კეთილდღეობისათვის...

[1897 წ.]



## **<ტფილისში სომხობამ ხელთ იგდო ქალაქის თვითმართვლობა>**

ტფილისი, 19 მარტი

კარგა ხანია, რაც აქაურმა რუსულმა გაზეთებმა გამართეს ცხარე საუბარი სომხების თაობაზე ჩვენში. საგნად ერთმანეთთან დაჯახებისა ის გულახდილად კანდიერი მოქმედება სომხებისა შეიქმნა ჩვენში, რომ ტფილისში სომხობამ ხელთ იგდო ქალაქის თვითმართვლობა და აღარავის სხვა თესლის კაცს, რომელთა საერთო რიცხვიც 53% მკვიდრთა შეადგენს, არ იკარებენ და, როგორც ჰსურთ, ისე ჰბატონობენ და ჰპატრონობენ სრულად სხვისს დედაქალაქსაო. ვინც იცის ყოვლად ცნობილი თვისება და თვითება აქაურ სომხობისა, რომელიც ეჩოს უფრო ჰგავს, სულ თავისაკენ მთლელს, და არა ხერხსა, რომელსაც თავისაკენაც გამოაქვს და სხვისაკენაც გააქვს, ის ადვილად მიხვდება, რა გულთბილი და გულტკბილი პატრონი ეყოლება სხვებსა, სომხებთან ერთად მცხოვრებელსა, თუ მართლა სომხებმა დაიჩემეს სხვისი პატრონობა ტფილისში.

რომ დაიჩემეს და მორჩნენ და ამას გულახდილად იქადიან კიდევც, — ეს აღარავისათვის დამალული არ არის. ისე ხელის გულიც ადვილად დასანახავი არ არის, როგორც ეს ამბავი. ეს ყველასათვის ცხადია და თვითონ აქაური სომხობაც ამას არამც თუ უარს არა ჰყოფს, პირიქით, იქადის კიდევც „ტფილისის ლისტოკის“ პირით, — ასეც უნდა იყოსო: ქალაქი ტფილისი ჩვენი საკუთრებაა და მისი სვებედი ჩვენს ხელთ უნდა იყოსო. ამისთანა ქადილს და ბევრს კიდევ სხვას გულ-

ღვიძლს თავისს ადგილას გაუვსინჯავთ და მაშინ დავინახავთ, შიგ რა ჰყრია.

ეხლა კი ამას ვიტყვით, რომ გაზეთმა „კავკასიზმა“ ამისთანა მდგომარეობა ტფილისის საქმეებისა მეტისმეტ უსამართლობად იცნა და გამოესარჩლა სხვა თესლის მკვიდრთა, რომელიც ტფილისში სცხოვრებს და რომელსაც სომხების წყალობით პირში ჩალა აქვთ გამოვლებული. რა თქმა უნდა, ამისთანა სარჩელს „კავკასიზის“ ყური არ მოუყრუეს აქაურმა სხვა რუსულმა გაზეთებმა და ასტყდა ერთი დავიდარაბა და წეწვა-გლეჯვა. უღონოთა ღონე ხომ მოგეხსენებათ, რა არის? ხავსია, რომელსაც წყალწაღებული ხელსა სჭიდებს ხოლმე, როცა სხვა ყოველს ღონეს მოკლებულია. რომ მოპირდაპირენი ვერას გახდნენ, ერთს ლიბერალურს ფრაზას ჩაჰკიდეს ხელი და დღევანდლამდე ამასა ჰხედნიან. ყველამ იცის, რომ ეხლანდელს დროში დევნა და ძულება ეროვნული, ერთმანეთის შეუწყნარებლობა, ერთმანეთის გაუტანლობა იმის გამო, რომ შენ სხვა თესლისა ხარ და მე სხვა თესლისა და ერთად ვერ გვეცხოვრებო, მარტო ბრიყვის და უვიცის მოძღვრებაა და სამართლიანად გასაკიცხი ყოველ პატრიოსან და გონებაგახსნილ კაცისაგან.

აი სწორედ ამ გზით მოუარეს „კავკასისა“ და შესწამეს, შენ დევნა და ძულება ეროვნული გინდა ჩამოაგლო ჩვენში, გინდა სომხები და ქართველები ერთმანეთს სამტროდ გადაჰკიდო და ესეთი საქციელი რა საკადრისია ეხლანდელ დროშიო. საკადრისი არ არის, მართალია, ხოლო ერთი ჩავუფიქრდეთ ამ „კავკასის“ მიერ ატეხილს ამბავსა და ჩვენს თავსავე ვკითხოთ: ეროვნულის დევნისა და ძულების ატეხა აქ რა შუაშია?

სხვა არა იყოს რა, მარტო ამ გარემოებას დავუკვირდეთ: სომეხი კანდიერად და მოურიდებლად იჩემებს ქართველის დედაქალაქს, სადაც სომეხი, სწორედ რომ ვსთქვათ, ხიზანია და ქართველი — ბინადარი, ადგილის კაცი. რა ჰგონიათ დევნა-ძულების მოძულეთა, ეს ამბავი დიდის სიყვარულის დამთესავია? აი, თუ სადმე დევნა-ძულებაა, მიზეზი სად არის, თუ სამართლით განსჯა სასურველია. შემოხიზნული კაცი პატრონს



ეუბნებოდეს: მე ვარ, რაცა ვარ, შენ ვინა გდინარო, — ეს კი დევნა-ძულების ამტენი არ არის და ის კი ამტენია, რომ დაჩაგრულმა და უმადურობით გაოცებულმა პატრონმა ხმა ამოიღოს, ეს კაცი მაღლობის მაგიერ, უყურეთ, რა ოინს მიშვრებაო: სახლიდამ, საცა მე შევიხიზნე, ჩემის სისხლით შევიხიზნე მტრისაგან და ჩემის ოფლით ვკვებე და გავაძლეო, ეხლა მე მითხოვსო, თითონ უნდა ჩემს სახლში მარტო ყოფნა და მე კი გარედ მაგდებსო.

დაუფიქრდით ამ ორს გარემოებას და გულზე ხელის დადებით გვითხარით: ამ ორს შემთხვევაში ვინ არის ამტენი დევნა-ძულებისა? ის, რომელიც ასე ექცევა სახლის პატრონს, თუ სახლის პატრონი, რომელსაც სხვა დანაშაული არა მიუძღვის რა, გარდა იმისა, რომ არ უნდა თავისი სახლიდამ გამოგდებულ იქმნას, თავისს სახლში ხმაამოუღებელი იყოს და ამას საქვეყნოდ ჰლადადებს და სჩივის. ჩაგრულია მიზეზი დევნა-ძულების ატენისა თუ მჩაგვრელი? ამას განა დიდი ხაზი და ლარი უნდა, თუ ჭკუა ჭკუისა და გული გულის ადგილას აქვს ადამიანს და თვალზე ხელს არ იფარებს განგებ, რომ მართალი არ დაინახოს?!

როგორ არის ეს? მტაცებელი კი სიყვარულის დამთესია და ამისი გამძხილებელი კი — დევნა-ძულებისა?! ეს რომელ ტიბიკონში სწერია? მამ გავეუჩუდდეთ, ვსთქვათ, მტაცებელს იმის შიშით, რომ დევნა-ძულება ჩამოვარდება და ამის ატენა საკადრისი არ არის? თუკი მტაცებელია სადმე, — იქ მარტო მტაცებელი არის დევნა-ძულების მიზეზი და ამის დევნა-ძულებას თხოულობს ღვთისა და კაცის კანონი და თვით ბუნება ადამიანისა. მამ ის უფრო საკადრისია, რომ მტაცებელმა ითარემოს და სხვამ ყველამ პირი წყლით ავივსოთ, ან ბარაქალა ვეძახოთ? აქ საქმე მარტო იმამია, ტყუილ-უბრალოდ ხომ არავინ არის შეწყამებული, უსაბუთოდ გამოყვანილი მტაცებლად. აქ რიდი კი არ უნდა იმისი, რომ ან მტაცებელი შეგვიძულეს ჩვენ, ან ჩვენ იმას და ამიტომ უნდა ხმა გავიკმინდოთ. პირიქით, მთელის რისხვით და წყრომით უნდა მივესიოთ მტაცებელს — სულ ერთია, — ცალკე კაცი იქნება, თუ

რაზმად დაწყობილი კრებული, და თუ კრებულია, მით უფრო უარესი. მტაცებელს ჯერ იმითი ვძულვართ, რომ გვტაცებს, თორემ სიყვარულით ტაცება არავის გაუგონია, მერე ჩვენც იმითომ ვღვენი და გვძულს, რომ არ გვინდობს და გვძარცვავს, თორემ სიყვარულით და ლოცვა-კურთხევით არავინ დახვედრია მტაცებელსა და არავის გაუსტუმრებია სახლიდამ დალოცვითა — ღმერთმა მშვიდობის მგზავრობა მოგცესო. თავში კაცი თუ კრებული გვცემს — ეგ სიყვარულის რგვაა, თუ არ დაგიშლიათ, და გვემული ან სხვა ვინმე, ამ საქციელის მხანველი, ხმას იღებს: „კაცო, რას იცემები!“ — ეს კი ძულების, დევნის ამტენია. ეს ასეთი ლოლიკა იმისთანა აქლემია, რომ შეიძლება სომხების წინაც დაიჩოქოს და მამინ რაღას იტყვიან სომხები?

იქნება ამით მოისურვონ სიტყვა მოგვიჭრან: „კაკას“ ყოველ ამაში რა საქმე აქვს, რად ესარჩლება ჩაგრულთა და დევნულთაო? ის საქმე აქვს, რაც ყოველ პატიოსანს კაცს, რომელიც ვერ შეიფერებს, ვერ შეიწყნარებს, რომ ერთმა სთელოს და სჩაგროს მეორე, ცალკე კაცი იქნება თუ მთელი კრებული, ან მთელი ერი. ეს ასე რომ არ იყოს, ჩაგრულთა სარჩლი და ქომაგობა რომ უუწმიდაესს მოვალეობად არ იყოს აღიარებული ყოველ პატიოსან და გულმართალ კაცისაგან, მამინ ხომ ეგრედ წოდებული სომეხთა საქმე ოსმალეთში არ გამოიწვევდა იმ სამართლიანს და პატივსაღებს თანაგრძნობას, რომელმაც ქვეყანას, თავისს სასახელოდ, ხმა ამოაღებინა და ამ ხმის სამართლიან რიხისაგან ბევრად ძლიერი ოსმალეთი ყოველად უძღურ სომეხს შეუშინდა, შეუფრთხა. ეს ხმა რომ არ ყოფილიყო, ოსმალეთი ისე მალე მოუღებდა ბოლოს სომხობას, როგორც სვაკი კურდღელსა: ყლაპად არ ეყოფოდა.

განათლებულმა და გულწმინდა სომხობამ კარგად იცოდა, რომ პატიოსანი კაცი, რომელსაც გულში უღვივის მუდამ სურვილი ჩაგრულთათვის შველისა და შეწყენისა, ბევრია ქვეყანაზე და ამ უტყუარ იმედით გაჰბედა ხსნა სომეხმა თავისის თავისა მჩაგვრელთა ხელისაგან. უამისოდ ბრძოლის ატენა ოსმალეთში მათ მიერ უგუნურება იქნებოდა. და თუ ამ პატიოსან კაცთა

სარჩლსა თვისდა მოქმედების ქვაკუთხედად ჰკიებს სომხობა ჩვენს გარედ, ჩვენში რად უნდა უკვირდეს და იკიცხებოდეს მათ მიერვე, როცა პატიოსანი კაცი, თუნდა უცხოც, ჰხედავს მათგან სხვის ჩაგვრას და ამას გულახდილად ამხელს?

გამხილება კი არ არის დევნა-ძულების ამტენი მიზეზი, არამედ გამხილებულის ჩადენა და ქმნა არის. აქ არის სათავე დევნა-ძულებისა და მარტო საბუთიანი გამხილება არის ამ სათავეს მოწყვეტის წამალი. აქ ეროვნება და სხვა ამისთანა მაღალ ფარდის სიტყვა მოსატანი არ არის. ქურდს, ვსთქვათ, ქართველსა, რომ სომეხმა მსაჯულმა უთხრას, ქურდი ხარო, — ესეც ხომ შეიძლება განგებ გაფიცებულმა წინდაუხედაობამ ეროვნულ ფეხზე დააყენოს და შესწამოს ეროვნულ დევნა-ძულების ატეხა. ამ გზით, ვინ იქნება იმისთანა ჭკუით გლახა, გააფრთხილოს სომეხი მსაჯული: ჰა, ქურდს ქურდად ნუ იცნობ, თორემ ეროვნულ დევნა-ძულებას ასტეხავ და მტრობას ჩამოაგდებ სომეხთა და ქართველებს შორისო. ამით, რასაკვირველია, ქურდი სინარულით თავს დაიხსნის ხელახლად საქურდავად, მაგრამ გაქურდულს და ერთობ გაქურდვას რა პასუხს მისცემთ? ნუთუ ეს თვალწინ დასაყენებელი საგანი არ არის? და თუ არის, აქ საძიებელი მარტო ის უნდა იყოს, საბუთიანად იცნა მსაჯულმა ქურდი ქურდად თუ არა. სხვა არაფერი აქ მოსატანი არ არის და შესაწყნარებელი.

გვეტყვიან, რომ აქ მთელს სომხობაზე არის ლაპარაკი და არა ცალკე კაცზე, როგორც თქვენს მაგალითშიო. მართალია, სომხობაზე არის, მაგრამ არა მთელს სომხობაზე. სხვა სომეხთან, რომელნიც ვინ იცის სად არ არიან დასახლებულნი, ჩვენ რა ხელი გვაქვს! ღმერთმა იმათს კაცურკაცობას და ადამიანურს სულთა სწრაფვას ხელი მოუმართოს ყველგან. ჩვენ პირველნი გულითადის სინარულით მივეგებებით ამ მართლა-და სასინარულო ამბავს. აქაურ სომხობაზე თუ ვილაპარაკებთ ან სხვანი ჰლაპარაკობენ, ეგ სულ სხვა საქმეა. აქ მთელს ერთან საქმე არავის არა აქვს რა. ყველამ კარვად იცის, რომ არ არის ქვეყანაზე იმისთანა ერი, რომელ შორისაც კარგიც არ იყოს და ავიც.

უეჭველია, სომეხებსაც ეყოლებათ იმისთანა კაცნი, რომლის წინაშე ჩვენც ქუდს მოვიხდით პატივისცემის ნიშნად. აქ ჩვენ ვლაპარაკობთ მარტო ჩვენს სომხობაზე, რომელიც, ჩვენდა სამწუხაროდ, რალაც ცალკე რაზმად დაეწყო და იმისთანა მოძღვრებას ადვია, რომ თვით გონებაგანსნილ სომეხსაც კი უნდა ეთაკილეობოდეს, არ მოსწონდეს.

ჩვენც გვსურს ჩვენებურ სომეხების ბედნიერად ცხოვრება ჩვენშიაც, მაგრამ ისე კი, რომ სხვისი ბედნიერებაც იწამოს. იწამოს ის, რის მეოხებითაც თვითონვე ჰსურს ყოფნა ქვეყანაზე და ქვეყანაში ცხოვრება და, რაც თავისის თავისათვის ჰსურს, ის ისურვოს სხვებისათვისაც. განა ესე კია საქმე ჩვენში, ესე იგი იქ, სადაც სომეხები შემოხიზნულნი არიან, ჩვენის სისხლით დაცულნი მტრისაგან და ჩვენის ოფლით მამლარნი? აი საკითხი, რომელსაც პასუხი უნდა დინჯად მოფიქრებული, საბუთიანი და არა ღობე-ყორეს მოდება და ლიბერალურ ფრაზების ტყუილ-უბრალოდ პრანჭვა და ფანტვა. აქ რა ეროვნებაა მოსატანი? რა დევნა, რა ძულებაა, როცა ერთი მეორეს ამხელს — შენ ცუდსა ჰმვრებიო?

თუნდ ეგეც არ იყოს, ეროვნების საქმე კავკასიაში არც სომეხების ხელშია, არც ქართველისაში იმ მხრით, რომ ერთიცა და მეორეც ღონემოკლებულია, ერთმა მეორე სჩაგროს ეროვნების ფეხზე წამოყენებით. მაგის ნებას ან ერთს, ან მეორეს ვინ მისცემს? განა სომეხებს შეუძლიანთ ქართველს ნება არ მისცენ თავისი რჯული, თავისი ენა, თავისი სარწმუნოება, თავისი ისტორიული სულთასწრაფვა იქონიოს, ან ქართველს შეუძლიან განა ყოველივე ეს ჩამოართვას სომეხებსა?

აქ თუ სამდურავი ისმის სომეხების მიმართ, მარტო იმის თაობაზე, რომ აქაურ კრებულს სომეხებისას მეტად კადნიერად დაუდვია თავისის ცხოვრების სახსრად და საგზლად ერთი მეტისმეტად შეუწყნარებელი მოძღვრება: ჩვენ და არავინ სხვაო. ამას ეხლა აღარა ჰმალვენ, პირიქით, საქვეყნოდ ჰყვირიან კიდევ. რა თქმა უნდა, ზოგი სომეხი აქაც მოიაპოვება იმოდენად განათლებული ჭკუითა და გულით, რომ ამისთანა თავგასული მოძღვრება სწყინს და ეთაკილება. მაგრამ ჯერ

ამათ იმოდენა გავლენა არა აქვთ აქაურს სომხობაში, რომ თვალი აახილებინონ და თავისიანი დააჯერონ, რომ „სულ მე და მარტო მე“ იმისთანა საბოლოოდ მკვიდრი ნიადაგი არ არის, რომ ამაზე ფეხი მაგრად მოიკიდოს კაცმა, ერთხელაც იქნება ფენს მოასხლეტინებენ, თუ არ მოატეხინებენ, იმიტომ რომ სხვასაც ცხოვრება და სიცოცხლე უნდა და ეს სურვილი სხვისა, სომხობისაგან თუ სხვა ვისგანმე შევინებული და უარყოფილი, მეტისმეტად ძლიერია, რადგანაც ბუნებითვე თანდაყოლილი აქვს ყოველს სულიერს და ნურავინ იფიქრებს, რომ იგი სურვილი ოდესმე ხმას არ ამოიღებს და თავისს დროზე სულთამხუთავსავით კარზე არ მიაღდება შემგინებელს თავისის მკაცრის და სამართლიანის განაჩენითა.

განა ვერავინ ჰხედავს, რა გზას ადგია აქაური სომხობა? რა თვალად ამკარად დასანახავი ერთიანი ძარღვი სჩანს იმის მოქმედებაში იმისდა მიუხედავად, რომ მათ შორის არიან იმისთანანაც, რომელთაც ძლიერ აწუხებს ამისთანა მდგომარეობა საქმეთა და ვერა გაუწყვიათ რა, რომ საქმე იმ კაცთმოყვარულ მცნებაზე დააყენონ, რომელიც ერთადერთი მოძღვრებაა კაცთა კრებულის საბედნიეროდ და რომელიც გვასწავლის: ერთი ყველასათვის და ყველა ერთისათვის, შენც იცხოვრე და სხვაც აცხოვრეო. ეს მცნება, ურომლისოდაც ვერა კრებული, ვერა საზოგადოება, ვერა ერი ვერ ჰხეირობს, შესაძლოა კაცმა დროთა ხელშეწყობით გასთელოს, მოშუშოს, მაგრამ ძირი მაგარი აქვს, როცა იქნება ამოხეთქავს და თავისას მოითხოვს უნაკლოდ. თუ ადამიანი თავისს თავს კაცად ჰხადის, სხვაც უნდა კაცად იგულოს, თორემ თვითვე გაიჭყლიტება და გაითელება თავისისავე მოძღვრებისაგან. დრო და ჟამი არავის შეარჩენს უსამართლობას, სხვის ჩაგვრას და თელვას.

ჩვენებურ სომხობას ეს დავიწყებული აქვს და ჩვენს გარეთ თუმცა სხვის ადამიანობას მთელის თავისის სამართლიანობის უფლებით წინ აყენებენ და თხოულობენ: მეც კაცი ვარ და კაცად მიცანიო, – შინ კი, ესე იგი ჩვენში, სულ სხვას ჰქადაგობენ, – მე ვარ კაცი და სხვა არავინ მინდა ვიცნო კაცად და ადა-

მიანადაო. ეს მხარე აქაურ სომხობისა, თითქმის საერთო მხარე, ყველას თვალწინ გვიდგა და აი აქ არის ის დამალული მშვილდი, რომელიც დაშხამულს ისარს ისვრის ძულებისას და დევნისას.

აქაურ სომხებს, თუ ყოველს ამას აქამომდე უთმობდნენ, ესლა აღარავინ დაუთმობს. სომხობას, როგორც ერს, აქ არავინ სძულობს, არავინ სდევნის. აქ ეროვნულს მტრობას და ძულებას ადგილი არა აქვს. აქ ჰლადადებს დათრგუნვილი უფლება ადამიანისა, რომლის მიზეზი რაზმად დაწყობილი ჩვენებური სომხობაა. ადამიანისათვის სულ ერთია, ცალკე კაცი ჰლახავს ადამიანურს უფლებას, თუ რაზმად დაწყობილი კრებული. ორგანვე სამართლიანია მდურვა და ყვედრება, თუკი დათრგუნვილ უფლების აღსადგენად იღვწიან და იბრძვიან. საკვირველი ეს ღვაწება და ბრძოლა კი არ არის ჭკუათამყოფელ კაცისათვის, არამედ უამისობა იქნებოდა, იმიტომ რომ ლახვა სხვის უფლებისა, მერე იმისთანისა, რომელიც ბუნებითად მინიჭებული აქვს ყოველს ადამიანს, შეუწყნარებელია და დაუზოგველად განსაკითხავი ყოველგან და ყველასგან. შენც იყავ და მეც მამყოფე – განა ბუნებური და სამართლიანი სურვილი არ არის?

დავანებოთ ამას თავი და ერთი ვიკითხოთ: თუ აქ ვინმე ეროვნულ ნიადაგზე გამართულს ძულებასა და დევნას ჰხედავს, ვინ არის ამისი ერთადერთი მიზეზი? – აქაური სომხები და სხვა არავინ. ვინ გაიცალკევა თავი და შეიკეტა კარი, რომ სხვა არავინ გააჭაჭანოს? მარტო სომხებმა და სხვა არავინ. შორს რომ არ წავიდეთ, ავილოთ, მაგალითად, თუნდ სომხების მოქმედება ტფილისში. განა სომხობის სახელით არ მოიმწყვდიეს თავი ტფილისის თვითმართველობაში და სხვას კარი გამოუგულეს, აქ თქვენ ადგილი არა გაქვთო?! აბა ერთი მთელი საბჭო ჩამოთვალეთ, ვინა სხედან? თითო-ოროლას გარდა, სულ მთლად სომხები არიან. თუ აქ პროგრამმა მოქმედებისა ტფილისის აკარგვიანობაა, და უნდა იყოს კიდევ, ნუთუ სხვა თესლის კაცნი ამ საქმისა და პროგრამისათვის ხელალებით უვარგისნი არიან, რომ არ ელირსნენ სომხებთან ერთად ყოფნას საბჭოში. განა ცხადი არ

არის, რომ აქ არ მოქმედებდა პროგრამმა და საქმე, ქალაქის კეთილდღეობის შესახები? ეს რომ ასე ყოფილიყო, მეტიმეტი თავგასულობა იქნებოდა სომხებისაგან, რომ ტფილისში სომეხს სომხის მეტი სხვა არავინ ეცნო ხეირიან კაცად ქალაქის მოვლა-პატრონობისათვის. ამ ოთხის წლის წინად მოხდენილმა არჩევანებმა ცხადად დაგვანახვეს, რომ მარტო ერთადერთი ღირსება იყო საჭირო, რომ ხმოსნად ამორჩეული ყოფილიყო კაცი. იმას კი არ კითხულობდნენ, რა უნარის კაცი ხარ, არამედ იმას, — სომეხი ხარ, თუ არაო.

თუ სადმე ეჭვმისატანია ეროვნული ძულება და დევნა, ვინ გადაიტანა და ვის გადააქვს დღესაც ამ ნიადაგზე საქმე? ამისთანა ცხადი მაგალითი ეროვნულ დევნისა და ძულებისა სხვისაგან ვის გინახავთ? ვის გამოუვლია ასე თვალსაჩინოდ და მოურიდებლად პირში ჩალა სხვა ერის წარმომადგენლებისათვის ტფილისში, საცა სცხოვრებს სომეხთან ერთად 53% უწინდელ ანგარიშით და დღევანდელით უფრო ბევრად მეტი სხვა ერის მკვიდრი? ვინ შეიკეტა თავი ცალკე, ვინ გავიდა ცალკე, ვინ შემოივლო გარს ზღუდე ცალკე ეროვნებისა და სხვას არავის არც ეკარება და არც იკარებს ტფილისში? — სომხებმა და სხვამ არავინ. აი, საცა სამართალია, სად არის ეროვნული დევნა და ძულება და არა იქ, საცა მარტო მხილება ამგვარის საქციელისა.

გაგვიბატონდნენ ტფილისის თვითმართველობაში, ქალაქი ხელთ იგდეს და თითქო სიცილით გვეუბნებიან: თუ ცხონებაა, ჩვენ, სომხებიც კარგად გაცხონებთო. ვინც იცის, რამდენად გულუხვია და ხელგამლილი აქაური სომეხი სხვის ცხონებისათვის, იმას, რასაკვირველია, არა დაუშლის რა ამ იმედით იცხოვროს. ხოლო ძალად, თუნდ ცხონებაც იყოს, კაცს ვერაფრად ეჭაშნიკება და იმ ცხონებაზე ხომ აღარა ითქმის რა, რასაც აქაური სომხობა ჩვენდა უნებურად გვიქაღის.

[1897 წ.]



## **<სად სომხეთი და სად ტფილისის ქალაქი?>**

ტფილისი, 22 მარტი

ჩვენს მეთაურში\*) ამას წინად ვთქვით, რომ სომხობამ შეიკეტა თავი მარტოკამ ქალაქის თვითმართველობაში და თითქმის სხვა აღარავინ მიიკარაო. ამას ისიც დავუმატეთ, რომ ასე ცალკედ გასვლა სომხებისა არ არის გამოწვეული ქალაქის საჭიროებისათვის მოწყობილ პროგრამისაგან. თუ ვცდებით, აბა ერთი გვაჩვენონ, რა პროგრამამ ქალაქის მოვლა-პატრონობისამ შეკრა და შეჭბოჭა აქაური სომხობა ერთად? ეს ამბავი რომ პროგრამისაგან იყოს, გასვლა-გამოსვლა ქალაქის მკვიდრთა და დას-რაზმობად დაწყობა პროგრამის ნიადაგზე მოხდებოდა და მაშინ ესა თუ ის პროგრამა, ქალაქის მოვლა-პატრონობის შესახები, უეჭველად კარს გაუღებდა ბევრს სხვა თელის მკვიდრთაც ქალაქის თვითმართველობისას.

პროგრამა არსად არის. ის ამბავი კი, რომ სომხობა მარტო გავიდა ცალკე და სხვა აღარავინ შეუშვა ქალაქის საბჭოში. ყველას თვალწინ გვიდგა. ნუთუ ამ გარემოებათა მნახველს საბუთი არა აქვს სთქვას, რომ არჩევანებში, რომელმაც ასე ცალკე თავი მოუყარა მარტო სომხობას ქალაქის მოვლა-პატრონობის საქმეში, მოქმედებდა მარტო ის, რომ მე სომეხი ვარ, შენ არა და შორს ჩემგანაო?

ამ სახით თვითონ სომხობამ ააფრიალა ჩვენში დროშა სომეხის სახელითა, დროშა თავისის ეროვნებისა, და სხვამ არავინ. რომ ეს ასეა, ამას კიდევ

\*) იხილეთ „ივერია“ №85.

ბევრი სხვა საბუთი აქვს, რომელსაც ხელთ გვაძლევენ თვითონ სომხები აქაურ რუსულ გაზეთების პირითა. ეს გაზეთები პირდაპირ გვეუბნებიან: ქალაქი ტფილისი ჩვენიაო. ეს რა თქმაა? ეს ის არის, რომ რაკი ქალაქი ჩვენია, აქ სხვას არავის ხმა არ ამოელება ჩვენს მეტსაო. თუ ესე არ არის, — „ქალაქი ჩვენია“-ო, რის მაქნისი საბუთილაა? ტყუილად დაცლილი ყუმბარა იქნება. სომეხი, — ხომ მოგეხსენებათ, — ტყუილ ყუმბარისათვის ტყუილად ხარჯს არ გასწევს, ყაირათიანი კაცია. მართალია, თანაც გვეფიცებიან, ჩვენ აქ ეროვნების ფეხზე არ ვაყენებთ საქმესაო, მაგრამ რაკი ამასთან იძახიან, ქალაქი ჩვენიაო, სომხებს ისე მოსდით, როგორც ურიას, რომელსაც ეუბნებიან: ურიავ, ღმერთს ნუ ჰფიცავო, და არა, ღმერთმან იცისო.

დავანებოთ თავი ამ ბაშვის მოსატყუებელს კრიმან-ჭულს ფიცსა და ერთი ეს ვიკითხოთ: ქალაქი ტფილისი მართლა იმათი კია? ვინ მოახსენათ? სტყუიან, ტყუილად იქადიან, ტყუილად ჰჩემულობენ. ტფილისში მარტო სახლებია იმათი, თუ რამ არის, ქალაქი კი, ნურას უკაცრაოდ, ვერ მივართვით.

ქალაქი ტფილისი ჯერ რუსეთისაა და მერე საქართველოსი. პოლიტიკური და გეოგრაფიული კუთვნილება ერთია და კერძო საკუთრება - სულ სხვა. ამათ შუა დიდი მანძილია და ეს ცხვირზედ კარგად უნდა დაიჭდიონ მადაგალვიძებულმა სომხებმა. მაშინ ნახჩევანიც სომხების ქალაქი იქნება და არა რუსებისა და, თუ არ დაუშლიათ, ზოგი რუსეთსაცა ჰკითხოვნ. ბერდიჩევში 10,777 რუსია და 62,000 და კიდევ მეტიც ებრაელია, მაშინ ეს ქალაქიც ებრაელებისა ყოფილა და არა რუსისა და რუსეთის იმპერიისა. თითონ სიცილიად არ ეყოფოდათ, რომ ბერდიჩეველმა ებრაელმა თავისის ერის დროშა გაშალოს ბერდიჩევში და როგორც აქ, ტფილისში, სომხებმა, იძახონ: ბერდიჩევი ებრაელთა ქალაქიაო. აი ტფილისსა და ავჭალას შუა გერმანელთა ახალშენია, რომელსაც Дальняя Колония — ს ეძახიან, სულ გერმანელნი არიან, მაშინ გერმანიას ეკუთვნება, მაშინ გერმანია იქნება?

ტფილისი რომელი სომხეთია ან საზღვარმდებარეობით ან ხელმწიფებით, რომ ასე კადნიერად ჩემულობენ

სომხები, — ჩვენიაო? საიღამ სადა? სად სომეხი და სომხეთი და სად ტფილისის ქალაქი? საიღამ სად იწვიდიან ხელსა! კიდევ ვიტყვი, აქ მარტო სახლებია სომხებისა, ისიც, ვინ იცის, რამდენად, და არა ქალაქი, რომელიც საქართველოს მიწა-წყალზეა და საქართველოსთან ერთად ეკუთვნის რუსეთსა. აქ სომეხს, როგორც ეროვნებას სომხობისას, კრინტიც არ შეუძლიან დასძრას, სომხის სახელით აქ დროშას ვერ გაშლის და სომხობით ვერ იბატონებს. აქ სომხისა არა არის რა, აქ ყველანი ტფილისის თანასწორი მკვიდრნი არიან, განურჩევლად ქართველისა, სომეხისა, რუსისა და სხვისა და სხვისა. აქ ლაპარაკი ქალაქის მკვიდრის სახელით არის მარტო შესაწყნარებელი და არა სომეხისით, და ნამეტნავად სომეხისით, რომელიც აქ ხიზანია და სხვა არარა.

აი სად არის იგი სატკივარი, რომელმაც ასე გაამწარა და გააკაპასა დღევანდელი მითქმა-მოთქმა სომხების გამო და რომელმაც, ჩვენდა სამწუხაროდ, ჭკუიანად ცნობილ სომხებს დაეთრები აურია და აღარ გაეგებათ, სად რა სთქვან და როგორა სთქვან. რომ მაღა დიდი აქვთ აქაურ სომხებს, ეს არავისათვის არ არის ახალი ამბავი, მაგრამ არც ესე ძლიერ უნდა კაცმა პირი დააღოს, აქაო და მაღა დიდი მაქვსო. ქალაქი ჩვენიაო. ვინ მოგახსენათ? როცა თქვენ ვინმე წამოგედავებათ ამ ქალაქში თქვენდა კუთვნილ სახლებს, მაშინ ამოყაჭეთ ჯიბიდან თქვენი ნასყიდობის სიგელები, გამოგადგებათ. ხოლო როცა ლაპარაკია, — ქალაქი ვისიაო, — მაშინ ეგ სიგელები აბგამი მაგრა შეინახეთ. აქ ის სიგელები უქმი ფარატინაა, იმიტომ, რომ სულ სხვა საბუთი უნდა, რომ ქალაქი ტფილისი თქვენი იყოს, ქალაქი დაიჭიროთ, დაიჩემოთ. აქ პოლიტიკური და გეოგრაფიული საბუთი უნდა და არა სიგელი სახლის ნასყიდობისა. ეს იმისთანა საბუთებია, რომ მარტო ოქროთი გატენილი ტომარაც კი უღონოა ხელთ ივდოს.

ვწუხვართ, რომ სომხების დაუჭერელმა საუბარმა იძულებულ გაგვხადა ყოველივე ეს გვეთქვა და არა გვგონია, რომ ყოველი გონებაშიხვედრილი სომეხიც ამასვე არ სწუხდეს.

[1897 წ.]



## პატარა საუბარი

ჩვენმა დარბაისელმა „Новое Обозрение“-მაც მითამადა ოხუნჯობა დაიწყო. რატომ? მხიარულება კარგი საქონელია, მაგრამ ღმეჭა და ღრეჭა ოხუნჯობაა თუ არა, — ეს ღმერთმა იცის. განა ყველა, რაც ადამიანს სიცილს მოჰგვრის, ოხუნჯობაა? თქვლევაც ხომ ჭამაა და ჭამაც ჭამა, მაგრამ შუა ღილი ზღვარი უხით. ეგრეც ღმეჭაა და ოხუნჯობა. ჩვენა გვგონია, რომ ამ ხანად პირველი ღებუიტი „Новое Обозрение“-სი ცოტა არ იყოს ღმეჭასა ჰგავს და, თუ ვიცინით, ღმეჭაზე გვეცინება, ანუ უფრო ტებილად რომ ვთქვათ, მასხ-არაობაზე. ეს დარბაისელი გაზეთი ჩვენა გვწამებს, რომ ჩვენ ბ-ნს გუნიას შეგირდად მივებარენით და იმისაგან ჭკუასა ვსწავლობთ. ეს ღილი ოხუნჯობა ჰგონია პატივცემულს გაზეთს. მითამ აქ სასაცილი რა არის, თუნდაც რომ მართლა ეგრე იყოს?

თუ დარბაისელი „Новое Обозрение“ ჭკუასა და ამასთან ზრდილობას და თავაზიანს საუბარს ბ-ნ ვართანიანცისაგან სწავლობს და ამაზე არავის ეცინება, ის რაღა სასაცილოა, რომ ჩვენ ბ-ნს გუნისაგან ვსწავლობდეთ. ვთქვათ, ბატონი გუნია ცილამ ჩამოსული კაცი არ არის, ხომ არც ბ-ნი ვართანიანცია ცილამ ჩამოსული. მაშ განსხვავება რაშია? ჭკუათა მასწავლებლობაში არა გვგონია ბ-ნს ვართანიანცს ღილი სახელი მოეპოვოს საღმე. არც ბ-ნი გუნია თავსა სღებს ამისთანა სახელისათვის. მაშ ოხუნჯობა რაშია, რომ ბ-ნი გუნია ჩვენი მასწავლებელია? რით არის ბ-ნი გუნია ბ-ნ ვართანიანცზე ნაკლები? ბევრიც რომ თავი იტკივთ, ასწონ-დასწონთ, ამისი პასუხი ერთია და სხვა არა.

ბ-ნი გუნია ქართველია და ბ-ნი ვართანიანცი კი სომეხი.

ეს წვერი ხომ ვიპოვეთ ნასკვისა, ახლა გამოვსნათ თვით ნასკვიც. რა გამოღის იქილამ, რომ ბ-ნი გუნია ქართველია და ბ-ნი ვართანიანცი სომეხი? ისა, რომ ბ-ნი გუნია ქართველია და აბა ქართველს რა ჭკუა აქვს, რომ მისგან სხვა კაცმა და ისიც ქართველმა ჭკუა ისწავლოს. აი მარლი იმ ოხუნჯობისა, რომელსაც ჩვენ ღმეჭა დავარქვით. ბ-ნ ვართანიანცი კი სომეხია და ღმერთმა ჭკუა ხომ მარტო სომეხს მისცა და თუნდაც არ მიეცა, იმოღენა ფული აქვს, რომ ჭკუის პრივილეგიას იყიდდა, ან არა და “კონტრაბანდა” ხომ აქ არის, უბაჟოდაც შემოაპარებდა და აიჩემებდა. მაშასადამე, ჭკუა მარტო სომეხისაგან ისწავლება და აი “ივერიას” რომ ჭკუის მასწავლებლად ბ-ნი ვართანიანცი აეყვანა, როგორც „Новое Обозрение“-მა ჰქმნა, მაშინ სულ სხვა იქნებოდა: არავინ არ დასცინებდა, თვითონ დარბაისელი თ. გ. თუმანიანციც ბარაქალას ეტყოდა.

თუ „Новое Обозрение“-ს ამისი თქმა უნდოდა, რატომ ბოლომდე არ გაიტანა ეს ლარი თავისის აზრისა? მართალია, ამ დარბაისელ გაზეთს აქამდე უყვარდა ორ სკამშუა ჯღომა და ეხლა ხომ ნიღაბი აიხადა და ყველანი ვხედავთ, საით უფრინავს გული და გონება. გვიანლაა ეხლა ორჭობად ლაპარაკი და ნამეტნავად ღმეჭითა და პრანჭვითა.

მეორე ოხუნჯობა იმავე „Новое Обозрение“-სი პირ და პირ გვეუბნება, რომ ან ბ-ნი ვართანიანცი, თუმცა სომეხია, ვერა ყოფილა კარგი ჭკუის მასწავლებელი, ან „Новое Обозрение“-ს მასხარა ვერა ყოფილა ჭკუის სწავლების მიძღები. საქმე იმაშია, რომ “ივერიას” მოუვიდა სურათი თ. ნ. ბარათაშვილისა და სურათზე გამოსახული მართლა თ. ნ. ბარათაშვილია თუ არა, ამისი შემოწმება მოიწადინა. ამის გამო „Новое Обозрение“ ასე ოხუნჯობს: ჩვენ ვიცით, რომ “ივერიის” რედაქტორს უწინ ერთი სხვა სურათი ჰქონია თ. ნ. ბარათაშვილისა და ვილას იწვევდა შესამოწმებლად? სასაცილოა განა! „Новое Обозрение“-ს რომ მის მიერ ყბადღებული ბ-ნი გუნია მაინც ჰყოლოდა ჭკუის მას-


წავლებლად, ისიც კი ჭკუას ასწავლიდა ამ შემთხვევაში და გვიკვირს სახელგანთქმულს ბ-ნს ვართანინაცს აქ ცოტად მაინც ყური არ აუწევია თავისის შეგირდისათვის. რატომ არ უთქვამს: აქ საოხუნჯო რა არის, შენის სიბრძავეს მეტიო. განა წინანდელი სურათი ბარათაშვილისა კი შესამოწმებელი არ შეიძლება რომ ყოფილიყო? განა ის კი ნამდვილი სურათი იყო მისი და არა სხვისა? ამას ხომ დიდი ჭკუა არ უნდოდა. აქ კი, სწორედ მოგახსენოთ, თ. გ. თუშინიანი, თუშცა სომეხია, მაგრამ სომეხის ჭკუისათვის ვერაფერი მაგალითი მოუცია, ვერაფერი სამსახური გაუწევია. მე რომ სომეხი ვიყო, არ შევარჩენდი აგრე მოუხრელებლად სომხის ჭკუის დაფოლებას და გატეხასა.)

### X X X

გუშინ, „Новое Обозрение“-ში დაბეჭდილი იყო ერთი წერილი. წერილის ავტორი, მოგვითხრობს რა სამეურნეო-საკრედიტო საზოგადოების კრების ამბავს ზოგადად, ცალკე იხსენიებს იმ 15 კაცის თხოვნასაც, რომლის გამოც კრებამ თავისი განაჩენი დაადგინა და დაგებით უარჰყო იგი თხოვნა. ამის გამო ავტორი ისაყვედურება, ეგრე სასტიკად არ უნდა მოჰქცევოდა იმ 15 კაცს კრება და ნამეტნავად ერთი ორატორი კრებისაო, იმიტომ რომ ყოველს აზრს, თუნდაც უმცირესმა ნაწილმა წარმოსთქვას, შეწყნარება უნდაო. „Новое Обозрение“-ც თავისით ამბობს, რომ ჩვენ მთლად ვეთანხმებით წერილის ავტორსაო. ჩვენც, ივერიელნიც, თანახმანი ვართ, რომ ყოველი აზრი, ბევრისაა თუ ცოტასი, შესაწყნარებელია და არა სადევნელი, ხოლო როგორც ავტორს წერილისას, ისეც „Новое Обозрение“-ს ავიწყდება აქ ერთი რამ, სახელდობრ ისა, რომ აზრია შესაწყნარებელი და არა უთავბოლო კიცხვა-კილვა ადამიანისა. გამოსულან და საქვეყნოდ კრებაში იძახიან: ესა და ეს თქვენი ამორჩეული კაცები

არ ვარგანანო და გამოლაღეთ სირცხვილეულნიო. ამის საბუთად ერთი ამბობს: ჩემს სტამბაში არა ჰბეჭდვენ ბლანკებსაო და იმიტომ არ ვარგანანო; მეორე კადნიერად გვეუბნება, მე იმოდენა ფული არ მომცეს, რამდენიც მინდოდაო და იმიტომ არ ვარგანანო. მესამე ყოველად უადვილო ოხუნჯობით გვეუბნება, საკუთრივ ერთს კაცს უჩივიან და სხვებიც ზედ მიაყოლეს „გარნირადაო“. ეს განა აზრია და არა სასაცილოდ აგდება მთელის კრებისა, საცა ამისთანა სამარცხვინო საქციელს ადგილი აქვს! ეს განა აზრია, რომლის შეწყნარებასაც ითხოვს წერილის ავტორი და მასთან ერთად „Новое Обозрение“-ც! ამისთანა აზრის შეწყნარებას გვასწავლიან ან ერთი, ან მეორე? მას ერთსაც ბარაქალა და მეორესაც. კიდევ ვიტყვი: ეგ აზრი კი არ არის, თავადებული და აღვირამოდებული შეგინება ადამიანის ღირსებისა ცალკე და მთელის კრებისა საერთოდ და რომელს ზნეობის დავთარში სწერია, რომ გინება ადამიანისა, ადამიანის კილვა, შებლაღვა სადმე შესაწყნარებელი იყოს?! ყოველს აზრს შეწყნარება უნდაო. გაუგონიათ ეს და აღარა კითხულობენ; — აქ აზრზეა ლაპარაკი თუ კილვა-გინებაზე? ამათ შუა დიდი მანძილია და ეს უშველებელი მანძილი თვალწინ გამოჰპარვია როგორც წერილის ავტორს, ისეც დარბაისელს „Новое Обозрение“-ს. გამოდის, რომ იგი ზნეობური კანონი, რომლისათვისაც ამ შემთხვევაში ხელი ჩაუჭიდნია წერილის ავტორს და „Новое Обозрение“-ს, ზეპირად დასწავლული ჰქონიათ და სად არის იგი კანონი წამოსაყენებელი და სად არა, ამაზე კი უკაცრაოდ ბძინებულან. ამას განა დიდი ლარი და ხაზი უნდა, რომ ჯერ აზრი უნდა იყოს და მერე მისი შეწყნარება. აბა ერთი აზრი გვიპოვონ იმ 15 კაცის თხოვნაში და მერე შეწყნარება იმ აზრისა მოითხოვონ. ან იქნება, რაც კაცს ენაზე მოადგება და წამოიყრანტალეებს, აზრი ჰგონია წერილის ავტორს და ამასთან ერთად მისს მობანეს „Новое Обозрение“-ს? ეგ იმათი საქმეა და სხვას კი რომ ამისთანა სასაცილო ბარგი არ აჰკიდონ, მეტი არ იქნება.

\*) ეს საუბარი ჩვენგან დამოუკიდებელ მიზეზთა გამო დაგვიანდა და ახლა იბეჭდება.



## **<მოვიდა სომეხი და მოიტანა სხვა მხსიო>**

ტფილისი, 29 მარტი

გარდა იმისა, რომ ჩვენს ქალაქში გაბატონების საბუთად, აქაურმა სომხობამ, წამოაყენა, ქალაქი ჩვენია<sup>\*)</sup>, ორიოდე სხვა საბუთიც დაგვისახელეს საკუთრივ ჩვენ, ქართველებს, და თავმოწონებით პირში მოგვანალეს. თქვენ, ქართველები, რა კაცები ხართ? მარტო ჩრდილქვეშ წამოწოლილხართ ყანწით ხელში და ამთქნარებთ ძილმორეულნიო. ჩვენ, სომხები, უფრო მხნენი ვართ, უფრო გამრჯელნიო. ჩვენ თქვენზე მეტნი ვართ სწავლით, ცოდნით, თქვენზე მეტი ფული გვაქვს და რად გიკვირთ, რომ თავზე წამოგასხედითო. ეს წინდაუხედავი და მართლა საწყენი ლაპარაკი იქამდე გასჭიმეს, რომ ესეც კი სთქვეს აუწითლებლად: – ეხლანდელ დროში „ჰუმანობა“, კაცთმოყვარეობა და სხვა ამისთანა ტკბილ-ტკბილი და ადამიანის სასახელო მაღლი ზღაპრია და ტყუილ-უბრალო ლაქლაქი მოცლილ და უსაქმო კაცისაო. ესეც არ იკმარეს და იქამდე თავს გავიდნენ, რომ გვეუბნებიან: კულტურის წარმომადგენელნი კავკასიაში ჩვენა ვართო და ჩვენი მაღლობელნი იყავით, რომ კულტურა ჩვენ შემოგვაქვს საქართველოშიო. სასაცილო კია, მაგრამ მაინც მაგალითად მოჰყავთ ერთი სომეხი, რომელსაც მუხათგვერდში მამული უყიდნია და ეს მამული ვითომ ისე წაუწვეია წინ, რომ ლამის ჩვენთვის ჭკუის მასწავლებლად შეიქმნეს.

<sup>\*)</sup> იხილეთ „ივერია“ №56.

ყოველ ამას გვიქადაგებს ერთი აქაური რუსული გაზეთი სომხის რელაქტორობით და დონეზუემოყრილი სასაცილოდ გვივლებს ჩვენ, ქართველებს, მიწასთან გვასწორებს. თუ სასაცილოდ ავლება და მიწასთან გასწორება აქ მეტი თქმაა, საწყენი ხომ უსათუოდ არის, რომ ეგრე კადნიერად მჩვარში გვხვევენ ჩვენ, ქართველებს. მერე ვინ? სომხები. ერთის კაცის წინდაუხედავ ლაპარაკს მთელს აქაურს სომხობას რად აბრალებთო, გვეტყვიან. მართალია: ერთმა რომ არ იცოდეს, სად რა სთქვას და როგორა სთქვას, მთელი აქაური სომხობა რა შუაშია, მთელის სომხობისა რა ბრალია? ის ბრალია, ბატონებო, რომ, ჩვენდა სამწუხაროდ, არც ერთმა სომეხმა საჭიროდ არ დაინახა აქ სიტყვა შეებრუნებინა იმ უცნაურ რუსულ სომხის გაზეთისათვის და ეთქვა: მაგას რაებსა ჰბოდავო.

მართალია, ვისა აქვს იმოდენა დრო და მოცალეობა, რომ თვითვეულის ცალკე რახუნს პასუხი აძლიოს კაცმა, მაგრამ აქ ამნაირი გამართლება თავს არ დაიჭერს. თუ ბ-ნმა ვართანიანცმა საჭიროდ დაინახა დავი დარაბა აეტეხნა იმაზე, რომ ორი კაცი – ქართველი – გამოავლო სამსახურიდამ, თუ ერთი, თუდინჯმა „Новое Обозрение“-მ აქედ-იქით უკბილო კბენა დაიწყო სომხობის და ქართველობის თაობაზე და ამისათვის ერთმაც და მეორემაც დრო და მოცალეობა ხელთ იგდეს, ნუთუ კადნიერი თარეში სსენებულ რუსულ-სომხის გაზეთისა ღირსი არ იყო სიტყვა დაეხარჯათ ან ავად, ან კარვად. ყველა გაუჩუმდა, ხმა არავინ ამოიღო. გაჩუმება, ხმის ამოუღებლობა შესაძლოა და საბუთიანი იქ, საცა წინდაუხედავობა შეეხება საგანს, რომელსაც საზოგადოებური მნიშვნელობა არა აქვს და ჭკუადაძვდარ კაცისათვის არაფერს ღირებულს არ წარმოადგენს, ხოლო იქ, საცა ერთი ერი მეორეს სასაცილოდ იგდებს, როგორც მეტს ბარგს ქვეყნისას და ეუბნება: შენ სულელი ხარ და მე – ჭკვიანი, შენ ბრიყვი და უსწავლელი ხარ და მე – განათლებული და ნასწავლი, შენ ლატაკი ხარ, მე – მდიდარი, შენ თვლემის მეტს არას აკეთებ, მე კი ვირჯები, „ჰუმანობა“ და სხვა ამისთანა რამ ჩემთვის ზღაპარია, – და შენ კი მაგ ზღაპრით გინდა ფონს გახვიდე, –



ნუთუ ყოველივე ეს ღირსი არ იყო და არ არის, რომ აქაურს სომეხს ვისმე ხმა ამოელო? ვთქვათ, მჩვარში გახვევა ქართველებისა და ბაქობა სომხობისა არაფრად მიიჩნიეს, ეს „კაცთმოყვარეობა“ და სხვა ამისთანა მაღლიერი საფუძველი კაცთა ცხოვრებისა, კაცურკაცობისა, ადამიანობისა, სომეხის სახელით სასაცილოდ რომ აიგდეს, უარჰყვეს, ვითარცა მეტი რამ ნაგავი, – ნუთუ არც ერთმა სომეხმა არ ითაკილა, არ იუკადრისა და რისხვა-წყრომით არ შეუტია ვისაც ჯერ არს, – ამას რას რომავთო! განა სომეხი კი ადამიანი არ არის, პირუტყვი მხეცია, რომ უარჰყოფდეს „კაცთმოყვარეობას“ და სხვას ამისთანას. „ჰუმანობა ეხლანდელ დროში ანაზრონიზმიაო“, აი ამაზეა ნათქვამი: სიტყვამან შენმან გამოგაჩინოს შენ. სხვას კი არასფერს არა სწამობენ სომხობას, გარდა იმისა, რომ სომხობისათვის „ჰუმანობა“, კაცთმოყვარეობა ფუჭი სიტყვააო.

ამას ბეჭვდით საქვეყნოდ სომეხის რედაქტორობით და, მაშასადამე, თვითონვე იძახიან და სხვას კი ემდურებიან, ცილსა გვწამებთო, მაგეთები არა ვართო, ჩვენც ადამიანები ვართ და არა რა ადამიანური არ გვეუცხოებაო. რა თქმა უნდა, სომეხიც ადამიანია და არარა ადამიანური არ უნდა ეუცხოებოდეს, მაგრამ განა კაცთმოყვარეობა ადამიანური მაღლი არ არის? რად იუცხოვა სომეხმა რედაქტორმა ასე გაბედვით და არავინ სომეხმა არ უთხრა: კაცო, თუ შენ გეუცხოება, ჩვენ რაღას გვემართლები დანარჩენ სომეხებსა-თქო, ჩვენი ავად მხსენებელნი ამაზე უარესს სხვას რას გვეუბნებიან-თქო!

უამისოდ რა გამოდის? ისა, რომ სომეხი სომეხს ცხოვრების დედაბოძად ამისთანა მოძღვრებას უღებს, კაცთმოყვარეობა ეხლანდელ დროში სულელობააო, და ერთმა აქაურმა განათლებულმა სომეხმაც კი საჭიროდ არ დაინახა ამის მოქმელისათვის პირში ბურთი ჩაედო. რა უნდა ვიფიქროთ ამის მნახველებმა და მოწამეებმა? ნუთუ აქაური სომხობა თანამგრძობელია ამ უაღამიანო, ამ უღმერთო მოძღვრებისა. ქართველების მიწასთან გასწორებაზედაც რომ არა ვთქვათ რა, თავისის თავისათვის მაინც უნდა ეპატრონათ, სომხის ადამიანო-

ბას მაინც უნდა წამოჰქომაგებოდნენ, სხვა არა იყოს რა.

თუ არა და ასეთი წარამარა ლაპარაკი რატომ თვითონ სომეხებმა არ იწყინეს და თავისის დუმილით თითქო შეამოწმეს კიდევ, ასეაო. აქ დუმილს, ხმის ამოუღებლობას განა ადგილი აქვს! აქ ხმის ამოუღებლობა წაქეზებაა, ბარაქალის თქმა უთქმელად. თუ ამირანისათვის გულში ძღერა შესაძლებელია, განა გულში ბანის თქმა კი შეუძლებელია? აი აქ ხმის ამოუღებლობას რა ბოლო მოსდევს, არა სასახელოდ სომეხთა. ვინც იტყვის: კაცთმოყვარეობას ჩემს გულში ადგილი არა აქვსო, – იმას ერთი ფეხი სამარისაკენ გაუშვერია, იმას ამითი თავისი ანდერძი აუგია, იმას თავისი ყელის გამოსაჭრელი დანა თვითონვე გაულესია. ერი, ამისთანა მოძღვრებაზე ამგებელი თავისის ცხოვრებისა, დღესა თუ ხვალ აიგვება დედამიწის ზურგიდამ, ვითარცა მტვერი ქარისაგან, და ხანგრძლივად ცხოვრების იმედს ტყუილად ებლაუჭება.

ნუთუ მართლა კაცთმოყვარეობა სომეხთა თვალში სულელობაა! ასე ამბობს გაზეთი, რომელსაც სომეხი ჰყავს რედაქტორად, დანარჩენი სომხობაც, უნდა ვიფიქროთ, მისი თანახმაა, რადგანაც დუმილი ნიშანია თანხმობისა. თუ არა და, რატომ ამისთანა მოძღვრებას თავისი შესაფერი სიტყვა არავინ უთხრა? იქ, საცა ვისმე ჩარჩს-სომეხს გამოეკიდებიან და მოედანზე გამოიგდებენ, დიდი და პატარა ყალხზე შესდგება ხოლმე და აქ კი ხმის ამოღება მეტი ჰგონიათ. სჩანს, ამ მოძღვრების წინ ქედს იხრიან, სჩანს ამ სათაკილო მოძღვრებას ჰკისრულობენ. ამათმა ხმის ამოუღებლობამ სხვა რა უნდა აფიქრებინოს ქვეყანას?

კიდევ ვიტყვით: ეს იმისთანა ამბავი არ არის, რომ სომეხი გასწუმებოდა. ეს იმისთანა ამბავი არ არის, რომ წამლად ეს ანდაზა ეხმარათ: ყბედს რა დააჩუმებს და მუნჯიო. ეს იმისთანა ამბავი არ არის, რომ თავი იმართლონ. – ამისთანების მოძღვარი ღირსი არ არის, კაცმა თავი გაუყადროს და პასუხი მისცესო. ჭემმარიტი და გულწმინდა სომეხი, რომელიც, სომეხთა სასახელოდ და ჩვენდა სასიამოვნოდ, არა ერთი და ორია ჩვენში, მოვალე იყო და არის ამ უკადრის და

სათაკილო მოძღვრებას მაინც გაჰმკლავებოდა და მიჰსვოდა მთელის თავისის სამართლიანის გულიწყრო-მითა და რისხვითა. ქართველობის ავად ხსენება და სომხების მალლა თაროზე შესკუპება, თუნდა შერჩენოდა მთქმელსა, ის მაინც არ უნდა შეერჩინათ, რომ სომეხისათვის კაცთმოყვარეობა სულელობააო. ამას სასიკვდილოდ გადამტერებული მტერიც არ იტყოდა სომხებზე და რადგანაც ეს სომეხმავე სთქვა თუ სხვას ათქმევინა და ამასთან აქაურმა სომხობამ ყური მოუყრუა, ისე გამოდის, თითქო ეს სათაკილო ნათქვამი იკისრესო.

რაც შეეხება ქართველობის ავად ხსენებას და სომხების მალლა თაროზე დასმას, ამაზე მერე მოვილაპარაკებთ დაწვრილებით და ეხლა კი ესეც ვიკმაროთ, რომ საქართველოში კულტურის შემომტანი სომეხი ჭკუას ასე გვასწავლის: კაცთმოყვარეობა სულელობააო.

თუ კულტურა მართლა იმაშია, რომ კაცთმოყვარეობა სულელობაა და განდევნილ უნდა იყოს კაცთა საცხოვრებელიდამ, ღმერთმა ის კულტურაც შეარცხვინოს და მისი მომგონიცა. რამდენი სიკეთე წარმოსდგება ამისთანა კულტურულ მოძღვრებისაგან, ღმერთმა მშვიდობაში მოახმაროთ და ჩვენ, ქართველებს კი სხვა არა დაგვრჩენია გარდა იმისა, რომ ვთქვათ: მოვიდა სომეხი და მოიტანა სხვა მეხიო. თუ ამისი თქმა არ უნდოდათ, თვითონ სომხობას უნდა გამოედვა აქ თავი და უარეყო ესეთი კულტურული მოძღვრება და ქადაგება იმავე გზით, რა გზითაც გამოქვეყნდა. ჩვენდა სამწუხაროდ, ეს ასე არ მოხდა და ამიტომ იძულებულ გავხდით, ჩვენ გვეთქვა ის, რაც იმათი სათქმელია.

[1897 წ.]



## პატარა საუბარი

უმაღლესად დამტკიცებულია სამოსწავლო გეგმა, რომლის ძალითაც საქართველოს საექსარხოლოში ქართულ სამრევლო სკოლებში სლავიანურის ენის მაგიერ ქართული საეკლესიო ენა უნდა ასწავლონ. რადგანაც საკმაო სახელმძღვანელო წიგნები საღმრთო წერილის სასწავლებლად არა ჰქონდათ აქაურ ქართულს სამრევლო სკოლებს, ამიტომაც ქართველმა საეპარხიო სასწავლებელთა საბჭომ ორჯერ მიჰმართა სამოსწავლო კომიტეტს სინოდისას და სთხოვა სამრევლო სკოლებისათვის სხვათა შორის ქართული სახარება, ფსალმუნები და სხვა გვიბოძეთო. ეს კარგა ხნის ამბავია. 1892 წელს უწმინდესს სინოდს გამოუგზავნია რამდენიმე ასი ცალი სახარება, ხოლო ქართული კი არა, სომხური! რა თქმა უნდა, ეს საოცარი ამბავი შეცდომით არის მომხდარი, ხოლო უფრო საოცარი ის არის, რომ ეს ამბავი არავის ოფიციალურად არ მოუხსენებია საეპარხიო საბჭოსათვის 1894 წლამდე, და მას შემდეგ კი არ ვიცით, ამ ამბავს რა დაემართა: დაურიგეს ქართულს სამრევლო სკოლებს სომხური სახარება, თუ ეს სახარებანი ოზმა-ოზმად უწყვიათ, საცა ჯერ არს; ეს კი ვიცით, რომ 1894 წლის დამლევამდე ქართულ სამრევლო სკოლებისათვის უუწმინდაესის სინოდისაგან არ იყო ბოძებული ქართული სახარება და არც არავისაგან არ იყო განმეორებული თხოვნა, რომ საჭიროა ქართველთათვის ქართული სახარება და არა სომხური.

ეს ამბავი თუმცა არ ახალია, ძველია, მაგრამ მაინც ამბავია და ჩვენ ღონისძიება გვაქვს უტყუარის საბუთით დავამტკიცოთ. ჩვენთა კეთილისმყოფელთ რომ ეს

შეიტყონ, ბუკსა და ნალარას დაჰკვირენ: აი, ქართველებს სახარებაც კი თავისი არა ჰქონიათ და სომხურს ენაზედ ჰლოცულობენო, და მაგალითად ამ ამბავს მოიყვანენ. განა ცოტა უცხოელნი მოსულან ჩვენში და ამისთანა მაგალითებით აუბამთ თვალი!.. ეს ამბავიც წავა და მოივლის ქვეყანას, ვინ არის პატრონი? სიტყვას ხომ ბაჟი არ ადევს ღვთისა და თქვენის წყალობითა! რა ხარჯი გაუვათ!

[1897 წ. 29 მარტამდე]



### <ქართველებისა და სომხების განსხვავებული ხასიათი და ინტერესი>

ტფილისი, 5 აპრილი

ჩვენ წინა მეთაურში\*) ვთქვით, რომ საბუთად ტფილისში და ერთობ ჩვენში გაბატონებისა და თავიანთის „კულტურულ“ საქციელისა სომხებს, სხვათა შორის, ისიც მოჰყავთ, რომ ჩვენ ქართველებზე მეტი მცოდნე და განათლებული კაცები გვყავსო, ჩვენ კულტურით უფრო დაწინაურებულნი ვართო, კულტურის მთესავი ამიერკავკასიაში სომეხი არისო, ჩვენ ქართველებზე მეტი ფული გვაქვს და რად უკვირთ, რომ ქართველები, რომელნიც ძილისა და „მრავალ ჟამიერის“ ძახილის მეტს არას აკეთებენ და არაფერში არ ვარგანან, პირში ჩალაგამოვლებული დარჩენილან და ცარიელზე სხედანო.

დასამტკიცებლად იმისა, რომ მეტი მცოდნე და განათლებული კაცები ჰყავთ, ვიდრე ქართველებს, თვლით გვეუბნებიან: აი ტფილისში ამდენი ინჟინერია სომეხი, ამდენი მკურნალი, ამდენი ადვოკატიო და გამოდის, რომ ყველა ესენი სომხებს გაცილებით მეტი ჰყოლიათ, ვიდრე ქართველებსა. კარგი და პატიოსანი! ქება და დიდება სომხებს, რომ თავისს შვილებს უსწავლელად არა სტოვებენ. ამისათვის, სწორედ უნდა ვთქვათ, სომეხი დედ-მამა არაფერსა ჰზოგავს შვილისათვის და წელებზე ფეხს იდგამს, შვილს ცოდნა რისამე მისცეს, სასწავლებელში ფეხი შეადგმეინოს.

\*) იხილეთ „ივერია“ №61.

ყველაფერში ხელმოჭერილი და ყაირათიანი სომეხი აქ თავისის შვილის სიკეთისათვის ხელგაშლილია და მეტი არ იქნება ვთქვათ, რომ თითქმის გულუხვიცა. თვითონ იქნება ხმელი პურიც იკმაროს და ერთი დღეც სიხარულისა და სიამოვნებისა არ გამოიაროს და შვილის სწავლისათვის არაფერი ჰშურს: გროშს გროშზე აკოწიწებს, მარცვალს მარცვალზე სდებს, რომ შვილს სწავლისა და ცოდნის შეძენის გზა მისცეს.

სასახელოდ სომეხისა ესეც უნდა ითქვას, რომ არც შვილები ჰყავთ უმაღურნი. ესენიც თავისს მხრით დედ-მამას სამაგიეროს იმით უხდიან, რომ რაც შეიძლება ბეჯითობენ, თავგამოდებით ბოლომდე გულგაუტყნელად და გულაუცრუებლად ებრძვიან სიძნელეს სწავლა-ცოდნისას, დაწყებული ბოლომდე გააქვთ. ესე ყოველი ჩვენ, ქართველებს, კი არა გვშურს, გვენატრება და სახატრელიც არის, ღვთის წინაშე. ცალკე სომხის დედ-მამის ასეთი თავდადება შვილთათვის და ცალკე სომხის შვილების ასეთი საქებური ბეჯითობა, ასეთი უკანდაუხვეველი და მედგარი სვლა სწავლა-ცოდნის გზაზე საოჯახო წურთვნისა და დისციპლინის საქმეა. ამაში სომხობას და ნამეტნავად ჩვენებურ სომხობას ჩვენ, ქართველები, ჩვენდა სამწუნაროდ, წინ ვერ წაუვალთ, აქ სომხობას უნდა ვაკუთვნოთ გვირგვინი პირველობისა და უპირატესობისა. რაც მართალია, მართალია. ღმერთმა ნურავის ნუ მოუშალოს ასეთი ოჯახობა, ასეთი საოჯახო ანდერძი, ასეთი წურთვნა შვილისა სახლშივე, ოჯახშივე და ასეთი გულმოდგინე დედ-მამა, – ეს პირველდამწყები და უებრო მწურთვნელი, რომლის მაგიერობას ძნელად თუ გაუწევს ვინმე შემდეგში, რაც გინდ კარგ სასწავლებელში იყოს მიბარებული.

ქართველებს ეს უნარი არა გვაქვს. ჩვენი ოჯახი ამ დარგზე არ არის დაყენებული, ჩვენდა საუბედუროდ. ქართველი დედ-მამა ჯერ ყველაზე უწინარეს ბედოვლათია. რა მიზეზია ასეთის ხასიათის გაჩენისა ქართველებში, ამის გამორკვევა შორს წაგვიყვანს. არ იქნება საკვირველი და ვთქვათ, რომ იქნება აქ ჩვენი ისტორიაც იყოს მიზეზი. ისტორიულმა ბედმა ასეთს მდგომარეობაში დააყენა ქართველი, რომ დღეს არ

იცოდა, ხვალე მისი იქნება თუ არა. იგერიებდა ყოველდღე მტერს, ყოველ წუთს მოელოდა, რომ აი ან ეხლა ამიკლებს მტერი ან ეხლაო, სარჩო-ქონებას გადამიბუგავს, წამგლეჯს, წაიღებს და ეხლა რომ ცოცხალი ვარ, არ ვიცი, წუთის შემდეგაც ვიქნებილა ცოცხალი თუ არაო. საკვირველიც არ არის, რომ დღითი დღივით, წლითი-წლობით და საუკუნით და საუკუნემდე ამისთანა ყოფამ ხვალის უიმედობისამ ვერ შეუჩვია ფიქრი – დღევანდელი დღე იგულისხმებს ხვალისათვის, დღევანდელი დაპზოგოს მერმე გამოყენებისათვის, რადგანაც იგი „მერმე“, არ იცოდა, მის ხელთ იქნება თუ არა. ამიტომაც რაც დღეს ჰქონდა, დღესვე თავის თავს ახმარებდა, სჯობია ჩემი მევე ვირგო, ვიდრე ჩემს მტერს დარჩესო. ერს, რომელიც იმისთანა ყოფაშია, რომ ყოველ დღე და ყოველს წუთს მოელის განსაცდელი ან გამარცხულ იქმნას მტრისაგან, ან სულამოხდილი და სადმე მოკლული, და რომელსაც ეს ლოდინი განსაცდელისა მთელი საუკუნოები გამოუკლებლივ გულს უცრუებდა ყველაფერზე, საკვირველი არ არის, რომ დასჩემდა ხასიათი დღევანდელის დაუზოგველობისა, დღევანდელის დაკლებით და ხელმოჭერით ცხოვრებისა. ვისთვის და რისთვისო? ჩემით გავამდიდრო ჩემი მტერიო? მე დღეს დავიკლო, დავზოგო იმისათვის, რომ ხვალ გამარჯვებულმა მტერმა დაავლოს ხელი და სულ გახვეტოსო.

ჩვენებური სომხებიც ხომ ამ დღეში იყვნენ და რატომ იმათზე კი არ იმოქმედა ამისთანა ისტორიულმა გარემოებამო? იკითხავენ. რაც სომხის სახელმწიფო დაეცა, სომეხი ხმლით აღარავის დასდგომია წინ, სასიკვდილოდ თავი აღარ გამოუმეტნია, ასაკლებად აღარავინ მისევია. ისინი ზოგი სად შეიხიზნენ და ზოგი სად და ყველგან იმისთანა ხელობას მოჰკიდეს ხელი, რომელიც ოდესღაც სათაკილოდ მიაჩნდათ მეომართ ერთა და როგორც უკადრისს, დაბალს, მაშინდელის აზრით, ხელობას არავინ შეეცილნენ. ეხლაა ვაჭრობა, აღებმიცემობა დიდს პატივში, თორემ მაშინ რა იყო და ვინ შეეცილებოდა. საცა ცილობა არ არის, იქ არც შიშია, არც ლოდინი თავდასხმისა, მოსევისა და სისხლის ღვრისა. გარდა ამისა, თვით იგი ხელობა, რო-

მელსაც ვაჭრობას, ალებმიცემობას ეძახიან, იმისთანა ბუნებისაა, იმისთანა თვისებისა, რომ დაუზოგველად ერთს დღესაც ვერ იჭაჭანებს ქვეყანაზე. ხელობა, რომელიც იმაზეა მარტო დამყარებული, რომ დღეს იყიდე ხვალე გასასყიდად, ხვალეზეა დამოკიდებული და ამიტომ დღეისას ზოგვა უნდა, რომ ხვალე საგზალი ჰქონდეს. აქ ხვალის იმედი რომ არ იყოს, არც დღეისი იქნება, აქ ხვალე გვირგვინია დღეისა, ვითარცა დასაწყისი დასასრულისა, ესე იგი ნაყიდის გაყიდვისა. სულ სხვაფრივ მოქმედობს იგი ხელობა, თუ ასე ითქმის, როცა კაცს დღე-მუდამ თავს ესხმიან მოსაკლავად და იძულებულია უკანასკნელ განწირულე-ბამდე მტერი იგერიოს და თავისის ძელებით იშენოს ზღუდე, ციხე-სიმაგრე, თავისის ცხოვრებისა კი არა, სიცოცხლისა. აქ ქონების ზოგვას, გაფრთხილებას, გროვას და ხვეჭას არც მიზეზი აქვს გაჩენისა, არც საფუძველი და სათავე, არც დრო და არც მოცალეობა.

ასეა თუ ისე, ამას, რა თქმა უნდა, ორიდღე სიტყვით ძირამდე ვერავინ ამოსწურავს და საქმე კი იმაშია, რომ დღეს სომხები დაზოგვისათვის უფრო მტკიცე ხასიათისანი არიან, ვიდრე ქართველნი. სომხის ერთი დიდი თვისება ის არის, რომ იგი ბატონი და მბძანებელია გულთა-თქმისა, თვალწინ გამორკვეული საგანი აქვს ცხოვრებისა. უნდა გავმდირდეთ, იძახის და ამის მისაღწევად არაფერს ერიდება, ყოველს დაბრკოლებას ებრძვის, ყოველისფერს ითმენს: შიმშილს, წყურვილს, წვიმას, თოვლს, სიცხეს, სიცივეს, ყბადალებას, დაცინებას, ოღონდ ნათქვამი კი შეისრულოს. რაკი ერთხელ დასდო, დღეში ერთი გროში ხვალისათვის გადასდოს, დღეს მშიერი დარჩება, თუ გაუჭირდა, და მაინც გადასდებს. ესეთის მტკიცე და დადგრომილის ხასიათის კაცია და ვიღაცამა სთქვა, ისტორიას მარტო ხასიათი ჰქმნისო. იგია ბატონი თავისის წადილებისა და სურვილებისა. განა იმან კი არ იცის სიტკბოება ლხინისა, სიამოვნებისა, შექცევისა, მაგრამ მინამ ყოველს ამას მიეცემა, გაეტაცინება, ვალად ჰრაცხს ჯერ საჭირო იქონიოს, ჯერ მამასახლისობა გაუწიოს ოჯახს, ცოლ-შვილს, ჯერ სახლი, ოჯახი კარგად დააბინავოს,

შვილებს გზა მისცეს და ლხინი და სიამოვნება არსად წაუვა.

ქართველი კი ჯერ ყველაზე უწინარესს ბედოვლათობას ემსახურება. იგი ქეიფისათვის, შექცევისა და ლხინისათვის, ერთის მხოლოდ ბარაქალობისათვის საჭიროსაც ანაცვალებს ხოლმე და ზედ წააკლავს. წადილი, სურვილი, გულთათქმანი არიან მისი ბატონები და ბძანებელნი და თვითონ იმათი ყმაა ყურმოჭრილი. ქართველს იმოდენა ხასიათი არა აქვს, რომ ლხინისა და შექცევის მაცდურობას არ დაეძღვენოს. ვაჟკაცი თავის გულთათქმას ხელში მჭრად უხდება და ეთელვინება. ტაბლა გარედ გააქვს მაშინ, როდესაც შინ ცოლ-შვილნი უტირიან. უკაცრაოდ, ცოლ-შვილნი კი არა, მარტო შვილნი, იმიტომ რომ ბედოვლათობაში ქართველის ცოლი თუ არა სჭარბობს, არა ჰმეტობს, შველით ხომ ჰშველის და ჰშველის. ჭირს დამალვა არ უნდა. ამ უწესრიგოდ ქცევამ ოჯახშივე, ამ ფანტავლანგვამ, ამ უხასიათობამ მოგვიღო ბოლო და ამ ჭირს თვალში თვალის გაყრა უნდა და არა თვალთა ხუჭვა. მინამ დროა, გონს უნდა მოვიდეთ, ჩვენს ჭირს ჩვენვე უნდა ვუწამლოთ. ჩვენი ჭირი ჩვენს ოჯახშივეა და აქედამ უნდა დავიწყეთ ჩვენი წურთვნა, ჩვენი განკურნება იმ ბოროტისაგან, რომლის არა ერთი და ორი მაგალითი ჰმხამავს და წამლავს ჩვენს შვილს, ჩვენს მთელს მოზარდს მოდემას: შინ, ოჯახშივე დედამის დაუდევნელობა, სახლ-კარის უპატრონობა, ოჯახისათვის უზრუნველობა, ბინის გაძლიერებისათვის გაურჯელობა და მარტო საბარაქალოდ ცხოვრება — რა კეთილს დააყრის ყოველს ამის ყოველდღე მნახველს შვილსა.

დედ-მამისაგან ოჯახშივე უნდა ჩაენერგოს შვილს სიყვარული ბეჯითობისა, გარჯისა, შრომისა კაცად განდომის გზაზე. გულთათქმის, სურვილების დამორჩილება, მათზე გაბატონება აქავ, ოჯახში უნდა ისწავლოს შვილმა, აქავ უნდა ჰნახოს, რომ გულში ჩაინერგოს, ჩაითესლოს. შილერმა სადღაცა სთქვა, რომ გენიოსობა ადამიანისა იქნება იმაზედაც იყოს დამოკიდებული, როგორ იმოქმედა ბაშვზე გარე-მოწყობილობამ, როცა პირველ თვალი აახილაო. რამოდენად უფრო

ძლიერ უნდა მოქმედობდეს ბაშეზე, როცა მთელი შვილი-რვა წელიწადი დედ-მამას შეჰყურებს და იმათს მაგალითს ჰხედავს. ჩვენი შვილი ოჯახიდანვე გატანულ საუნჯით უნდა შევიდეს სასწავლებელში და იქ გაიფურჩქნოს, იქ გაიშალოს, იქ აყვავდეს კაცად, ჩვენდა საბედნიეროდ.

ვინ იტყვის, რომ ქართველ დედ-მამას სომეხსავით არა ჰსურდეს სწავლა-განათლება მისცეს შვილსა. გვსურს ყველას, ყველა მოწადინებულია, ყველას კარგად ესმის, რომ ეხლანდელ დროში უცოდინარი, უსწავლელი კაცი სხვის ლუკმაა, თუნდაც სპილოც იყოს, უხორთუმო სპილოა, თუნდ ლომიც იყოს, უბრჭყალო ლომია. თუ აქ განსხვავებაა რაშიმე ქართველთა და სომეხთა შორის, მარტო ის, რომ სომეხი დედ-მამა შვილის სწავლა-ცოდნისათვის თვითონ იღწვის, თვითონ იკლებს და შვილს კი უგროვებს სწავლის სახსარს, სხვის იმედზე, სხვის ანაბარად შვილს არა სტოვებს. მუქთად გაზდას მისას არავისაგან არ მოელის და სულ იმის ცდაშია, რომ ერთი გროში აქვს თუ ორი გროში, აქედამ შვილის სწავლისათვის და გადასდოს რამ, თუნდ ამით თვითონ ცარიელს პურზედ დარჩეს. ეს სიკეთე, მართალია, ზოგიერთს სომეხსაც გულიდამ ამოღებული აქვს, მაგრამ საერთოდ, დიდად მეტ ნაწილს კი თითქმის საოჯახო ანდერძად მიუჩნევია. ამის გამო, შეიძლება ითქვას, რომ საქებური სიკეთე, ეს დიდი მადლი ოჯახისა, საერთო კუთვნილებაა სომეხობისა, მათდა სასახელოდ. დავცინით სომეხებს, ძუნწები არიანო. ძუნწები არიან ტყუილ-უბრალო ფანტავა-ფლანგვისათვის, ძუნწები არიან ბედოვლათობისათვის. რა არის აქ ცუდი? აბა ახლა ჰნახეთ, რაკი სომეხი ქონს მოიცნობს, გამდიდრდება, რამოდენად გულუხვია თავისი ერისათვის, თავისი ერის სწავლა-განათლებისათვის. ისე არ მოკვდება, რომ კარგა ზორბად ფული ან ქონება რამე არ შესწიროს თავისი ერის საზოგადო საჭიროებისათვის, სომეხთა შვილთა სწავლა-ცოდნისათვის საერთოდ. აქ არამც თუ მზრუნველობა და ნაღველი სჩანს თავისი საკუთარის შვილისათვის, სჩანს სხვათა შვილთათვისაც ფიქრი და ნაღველი გულიდამ, ცოცხალია თუ მკვდარი, მოშორე-


ბული არა ჰქონია, სხვა სომხის შვილისათვისაც ის წყურვილი ჰქონია, რაც თავისი საკუთარისათვის და თავისი ნაჭირნახულევის ნამეტანობისაგან ხელს უმართავს. რას იტყვით? ვანა ცოდვია, რომ კაცმა ამისთანა მადლისათვის იძუნწოს, თვითონ იკლოს და თავისი ერისათვის ასე სასახელოდ იმეტოს!

ქართველი და ქართველის დედ-მამა სულ სხვაა. აქაც, რასაკვირველია, ყველაზე არ ვლაპარაკობთ, აქაც არიან შვილებისათვის ერთგულნი მომჭირნენი, ხოლო გაცილებით ბევრი კი ისე თავდაუჭერელია, ისე უწესურიგოა, რომ არც გარჯა და შრომა მიაჩნია ერთადერთ სათავედ ქონების შეძინებისა, არც ბედოვლათობისათვის გადაურჩენია რა, რომ საკუთარს შვილს მონამაროს, თვითონ მოუმზადოს სახსარი სწავლა-განათლებისათვის და სხვას არ მიაყენოს კარზე, — გამიზარდო, ან უილაჯობით გაუზრდელი არ დაურჩეს.

რა თქმა უნდა, ჩვენებურს სომეხს უადვილდება შვილის გაზდა და კარგა ნაკლებადაც უნდა უჯდებოდეს, რადგანაც სომეხი უფრო ქალაქად სცხოვრებს, საცა სასწავლებელიც ბევრი იშოვება, მასწავლებელიც და საცა სომხის შვილს ბინა თვისის დედ-მამის სახლშივე აქვს. ქართველი კი უფრო სოფლად არის, საცა არც სასწავლებელია, არც მასწავლებელია და იმისათვის ქალაქში გამოგზავნა შვილისა, აქ მიბარება და შენახვა დიდს ხარჯსა ჰთხოვლობს. ეს ხომ ესეა, მაგრამ უფრო დიდი მიზეზი ჩვენი დაუდევრობაა, ჩვენი ბედოვლათობაა, უხასიათობა. საერთოდ ისე გამოდის, თითქო სიყვარული ბედოვლათობისა ჩვენში სძლევის სიყვარულს შვილისას და დღევანდელი კვერცხი გვირჩევნია ხვალისდელ ქათამსა.

რა გამოდის ამ განსხვავებისაგან და ბოლოს ძირს რა ჰრჩება ან ქართველისათვის, ან სომხისათვის, ამაზე მერე მოვილაპარაკებთ.

[1897 წ.]



### <ბ-ნ გ. წერეთლის წერილის გამო>

ტფილისი, 16 აპრილი

ჩვენ მოგვივიდა თითო-ორი წერილი ლანძღვისა და გინებისა იმის გამო, რომ ქართველ-სომხის საქმეზე ჩვენი აზრი გამოვთქვით. სიტყვა-პასუხი ამ წერილებისა ისეთი უშვერი და უწმაწურია, რომ დაბახანა დაგავიწყდებათ. ეს უწმაწურობა ცხადად გვანიშნებს, საიღამ მოჰქრის ეს საზიზღარი ქარი და ვისი უნარია. ეს ორიოდ წერილი, რა თქმა უნდა, ხელმოუწერელია და უსახელო. თითქო თვითონვე დამწერთ უგრძობნათ მთელი ურცხვობა თავისის სიტყვა-პასუხისა და სირცხვილით თავი ვერ გამოუჩენიათ, სახელისა და გვარის გამოძღვლება უთაკილნიათ. ესეც დიდი საქმეა დაბახანის აკადემიაში გაზრდილთათვის, სჩანს, გრძობა სირცხვილისა ცოტაოდნად მაინც კიდევ შერჩენიათ და ყელთამდე არ ჩაფლულან იმ ლაფში, საიღამაც იწიკენ და ვერ ამოსულან.

ხოლო არ ვიცით, რა ვთქვათ იმისთანა კაცზე, რომელსაც ეს მცირედენი თავაზაც არა ჰქონია თავისის თავისა და პირდაპირ საქვეყნოდ ლანძღვა-თრევით აპირობს მოედნიდამ ბურთის გატანას და ამასთან თავისს სახელს არა ჰმაღავს. მართალია, სახელის არმაღვა ამ შემთხვევაში ვაჟკაცობასაც მიეწერება, მაგრამ ვაჟკაცობას ურცხვობისას, უწმაწურობისას, სიტყვამრუშობისას, ისევ სირცხვილეული ლაჩრობა სჯობია ამისთანა ვაჟკაცობასა.

ამ უსახელო წერილთა შორის, რომლის ავტორებს თავისი საქციელი თვითვე შერცხვენიათ და ამიტომ სახელები დაუმაღავთ, მარტო ერთი წერილია ხელ-

მოწერილი და ამასთან „კვალში“ დაბეჭდილი, თუმცა სხვა უსახელო წერილებზე არა ნაკლებ სამარცხვინოა ყოველ ავტორისათვის, ვისაც კი გემო მართებულობისა და ზრდილობისა დაკარგული არა აქვს. ეს წერილი ვახლავთ ბ-ნ გ. წერეთლისა, ზნემაღალ „კვალის“ ბაირალტარისა. ყოველი მზგავსი მზგავსა ჰმობსო, ნათქვამია. მოგვილოცნია ბ-ნ გ. წერეთლისათვის, რომ შემდეგ ამდენის ტოკვისა, აქედ-იქით ტრიალისა და ოთხზე ცოცვისა ძლივს მიაგნო სამშვიდობო ნავთსადგურს დაბახანაში და იქ დააბა თავისი წაჯექექუჯექობის ნავ-ხომალდი. ყოველი მზგავსი მზგავსისაკენ მიიზიდება და საკვირველი არ არის, რომ ბ-ნ გ. წერეთელი ზურგის ქარმა აქ მიიტანა და თავისის ჯურის და გუნების თანამოღვაწენი აქ აპოვნინა, რაკი სხვაგან და სხვებთან სამუე შემოაწყდა. ესლა, უეჭველია, ეს მესამე დასის შემქმნელი ჯამბაზი მეოთხე დასს შეადგენს და ახალ „კულტურის“ დროშას წინ გაუძღვება ჩვენდა სასახელოდ. დიდი ხანი არ გაივლის, რომ დონჯსაც შემოიყრის, ქუდსაც ჩაიკეცავს, ჩითმერდინსაც ყელზე დომლულად გადაიდებს და დაფაზურნით შუა ბაზარში ჩაივლის, ღმერთანი, ცოტანი მისძახებენ სიხარულით: „ალა ბაღში მიბძანდება, მიხედ-მოხედვის ჭირიბე!“, მითამ არ მოუხდება თუ?

ჩვენ არ გვიკვირს, რომ ბ-ნი გ. წერეთელი შიგ ჩარევიან სახელიანად ხსენებულ უსახელო ავტორებს. ერთი დიდი ღირსება ბ-ნ წერეთლისა ის არის, რომ თავის დღეში არ უღალატნია თავისის ზნეჩვეულებისათვის: ვისიც ერდო მაღალია, ის იმისი მყარია. ესლანდელ დროში, როცა „ჰუმანობა“ და ერთო კაცური კაცობა სულელობაა, ამისთანაების ალოს ალება დიდი უნარია მეძებარისათვის და რა კურდელეს დაიჭერს, ამას ხომ დრო გამოაჩენს.

ჩვენ ყოველს ამას თავს არ გავუყადრებდით და ყურსაც არ ვათხოვებდით არც უსახელო ავტორებს და არც სახელოვანს ბაირალტარს „კვალისას“, რომ ძმობისა და სიყვარულის სახელით ეს ჩვენი ბრძენთა-ბრძენი ბ-ნ წერეთელი არ გამოდიოდეს მოედანზე. ჩვენც ვიცით, რომ ძმობა სჯობია მტრობასა, სიყვარული სიძულვილსა. ბ-ნ გ. წერეთელს ეს ჩვენზე უკედ

სკოდნია, ხოლო ერთი რამ გამოჰპარვია გონებიდამ, სახელოდრ ისა, რომ ძმობა, სიყვარული, როგორც ყოველივე სხვა მადლი, სესხი და ვალიც არის ერთსა და იმავე დროს, თუ შენი ძმობა მე მმართვეს, ჩემიც უნდა შენ გემართოს, თორემ ძმობა და სიყვარული მარტო ჩემი ვალი იყოს შენი კი – სესხი, ეგ სადაური სამართალი იქნება.

სწორედ ამისთანა სამართალით მოგვდგომია ჩვენი ბ-ნი გ. წერეთელი ჩვენ ქართველებს და და ლამის რისხვამან მისმან გაგვიტანოს ჩვენ და ამ ტყუილ რისხვის ბუკმა და ნალარამ ლამის ყური გამოგვიყროს. ისე გამოდის ბ-ნი გ. წერეთლის სიტყვით, რომ ძმად ყოფნა მარტო ჩვენი ვალია და სხვისა სესხი. მართალია, ქართველისათვის ვალი ახალი ამბავი არ არის, შეჩვეული ჭირია და არც სომხისათვის სესხია ახალი ამბავი და შეჩვეული ლხინია, მაგრამ ჭირი შენ და ლხინი მეო – ეს ზომ შორს არის ძმობაზე. თუ ძმობა გინდა, შენცა ჰზიდე ტვირთი ძმობისა ჩვენდა საკეთილოდ და მარტო მე ნუ მკიდებ შენდა სასარგებლოდ. გვეტყვიან, ეგ რაღა ქრისტიანობაა, სამაგიეროს თხოულობო. სამაგიეროს კი არ ვთხოულობთ, გვინდა, რომ შენც ქრისტიანე იყო, რაკი ქრისტიანობა ძმობაა და ურთიერთის სიყვარული.

იქნება ბ-ნი გ. წერეთელი, ვითარცა ჭეშმარიტი ქრისტიანე, გვასწავლის, რომ ერთს ყბაში რომ ლაწანი გაგაყრევიონ, მეორეც მიუშვირეო. მაგრამ აქედამ ის სულაც არ გამოდის, რომ ქვეყანაზე ერთი სცემდეს ძმურად და მეორე ყბებს უშვერდეს ყმურად, ანუ ვინც დაასწროს, სილა გაუშალოს და ვინც არა, ყბა მიუშვიროს ძმობითა და სიყვარულით. ნურავის ნუ ავიწყდება, რომ ქრისტე-ღმერთი სდევნიდა მცემელს და ამხნევებდა ცემულს. აი ნამდვილი ქრისტიანული ძმობა და სიყვარული ადამიანისა სად არის! ყველა რომ ისე მშვიდი იყოს გულითა და მზად იყოს ყბის მისაშვერად, მცემელიც აღარ იქნება. აი ღრმა აზრი იგავად თქმულ მოძღვრებისა რაშია! მშვიდ იყავით გულითა ყოველნიო, აი რას გვასწავლის ქრისტე და არა იმას, რომ ორად გაიყოს ქვეყანა, ერთნი სცემდნენ და მეორენი ითმენდნენ და მცემელნივე ჰყვიროდნენ: ძმობა უნდა და სიყ-

ვარულიო, და ამ ყვირილს მოძახილს ეუბნებოდეს ჩვენი ბ-ნი გ. წერეთელი თავისის სირინოზის სმითა.

დასასრულ, ერთი რამ გვინდა ვკითხოთ ბრძენთა ბრძენს ბ-ნს გ. წერეთელს: თუ მართლა ძმობითა და სიყვარულით აღტკინებულია, თუ ლაღადი ძმობა-სიყვარულისა მართლის გულითა არის და არა ქარისა-გან მობერილი აქვს, და როგორც ქარის შემოტანილს თავისს დროზე ქარსვე არ გაატანს, ეს როგორ მოხდა, რომ მეგრელები საიდლამაც მოთრეულად გვიხსენია და ვილაც „ხეჩა-გოგებთან“ ერთად ერთს მოსახრაკავ ტაფაში მოგვიმწყვდია. თუ ძმობა და სიყვარულია, მეგრელები უფრო ჩვენი სისხლ-ხორცი ძმები არ არიან, ჩვენთან ერთად ყოფილნი ჭირსა და ლხინში, ჩვენთან ერთად წამებულნი და სისხლის მღვრელნი, ჩვენთან ერთად ძლეულნი და გამარჯვებულნი! ამათ ეუბნება: თქვენ ქართველებთან რა ხელი გაქვთ, წადით, გაგვეცალენითო, საიდამაც მოთრეულხართო, და აქ კი ძმობას და სიყვარულს გვიქადაგებს!.. შინ რომ ცოლ-შვილი გიტიროდეს, გარედ ტაბლას რა ხელი აქვსო, სწორედ ეს არის. შინ ძმებსა გყვრის ერთმანეთისაგან, ძმას ძმად არა ჰხადის, ერთს სისხლ-ხორცს ძმათ იძულებს და გვაძულებს, აქ კი ძმობასა და სიყვარულს ჰქადაგებს! მოდით და დაიჯერეთ გულწრფელობა ამისთანა მქადაგებელისა! ვისთვისაც ჰფენს ამისთანა ტყუილს ვარდებს, ისინი არც ისეთი სულელები არიან, რომ ბ-ნი გ. წერეთლის მახეში აგრე ადვილად გაეხნენ.

[1897 წ.]





## პატარა საშუარი

წაიკითხავდით „კავკასში“ ერთს ამბავს, რომელიც ერთსა და იმავე დროს სასაცილოც არის, როგორც ფენმოკლე ოსტატობა, და სამწუნაროც, როგორც მაგალითი დღევანდელის დღის გულის ცემისა. ერთს მანდილოსანს უყიდნია ბაყლისაგან სატაცური. ბაყალს, ნასყიდ სატაცურის მაგიერ, სხვა მდარე სატაცური ჩაუპარებია ქალაქის პარკში. ქალს ეს დაუნახავს და საყვედური უთქვამს. ბაყალს რაღაც აურზაური დაუწყია და უმართებულად მოჰყოლია როტვას. ქალსა სწყენია და სახელი და გვარი უკითხავს. ბაყალს სახელისა და გვარის მაგიერ უთქვამს, ეს დუქანი თ. მუხრანსკისა არისო. ბაყალი და თ. მუხრანსკი, რა თქმა უნდა, ვერაფრად დასაჯერია და ქალი, რაკი ვერაფერს გამხდარა, იქავ გვერდით დუქანში შესულა და უკითხავს სახელი და გვარი ბაყლისა. აბა ძმა ძმის ძვალს რად გასტენდა, და იმასაც აულია და უთქვამს რაღაც გძელი გვარი, რომლის ბოლოც „ძე“ ყოფილა. ბოლოს ქალს უხმია პოლიციელი და მხოლოდ იმის შემწეობით შეუტყვია, რომ სატაცურის გამყიდავი ბაყალი „ხითაროვი“ ყოფილა და არა ვილაცა „ძე“.

რომ მედუქნეს სდომებია მუშტრის მოტყუება – ეს ახალი ამბავი არ არის არავისათვის, მაშ რის მედუქნეა, თუ არ მოატყუებს! იქნება ვაჭრობა და მოტყუება და-ძმანი არიან, ესლანდელს „კულტურას“ თუ დავეკითხებით, თუ „ჰუმანობა“ და სხვა ამისთანა ლათაიები სულელობაა, როგორც აქაურნი კულტურის მოძღვარნი გვიქადაგებენ, ნამუსი რაღა წითელი კოჭი ბძანდება, რომ ზემო თაროზე დავაბძანოთ.

არც ის არის საკვირველი, რომ ძმამ ძმის ძვალი არ გატენა. ესეც ახალმოდურ კულტურის უნარია, რომელიც ჰლადებს, ძმა-ძმასთვისა და ავკაცობის დღისთვისაო. ყველაფერი ეს სესხი და ვალია, დღეს ამას უჭირს, ხვალ იმას გაუჭირდება და ხელი ხელს დაჰბანს და ორნივე კარგად იქნებიან. ამისთანა „კულტურა“ თავისებური ქვითკირია, ერთს მეორეზე მაგრად გადააბამს ხოლმე.

არც ის არის ახალი ამბავი, რომ ჭკვიანმა „ხითაროვმა“ სახელგასატენი საქმე ჩაიდინა და ქართველის სახელი კი დაირქვა, ან მოძმემ დაარქვა, როცა ავკაცობაზე დაიჭირეს. მართალია, ფენმოკლე ჭკვიანობა კი მოუვიდათ, რადგანაც თაღლითობა იქავ გამომჟღავნდა, მაგრამ ცდა ბედის მონახევრეაო, ნათქვამია და ხომ შეეცადნენ. საქმე ცდა არის, რომელიც, სწორედ უნდა მოგახსენოთ, მხნეობის ნიშანია. არა ჰგვანებია უხეირო ქართველს, რომელიც მოჰყოლია და იძახის: ვინც ორ კურდღელს გამოუდგება, ერთსაც ვერ დაიჭერსო.

მერე აქ სატაცურის ამბავში ორი კურდღელი სად იყოვო, იკითხავთ. სატაცურის ამბავში მართო სატაცურია, ხოლო სახელისა და გვარის თაღლითობაში სწორედ ორი კურდღელია, ერთი ისა, რომ ამისთანა თაღლითობით თვითონ თავს დაიდურენს პასუხისგებისაგან და მეორე ისა, რომ საყვარელს ძმა-ქართველს სახელს გაუტენს. პირველი საკუთარის თავის ანგარიშია და მეორე პოლიტიკის საქმეა. დიდ, პოლიტიკისა და, თუ გნებავთ, პოლიტიკა აი სწორედ ეს არის. მოდით და ამას იქით სთქვით, რომ პროჰავანდა „კულტურისა“ ჩვენში არა ჰდულს და არ გადმოდისო!. ბაყლებამდინაც კი ჩაუწვეთნია და მეტი რაღა გნებავთ!..

## X X X

ამ სატაცურის ამბავმა ერთი ძველი ამბავიც გაგვახსენა სხვათა მრავალთა შორის. უკანასკნელ რუსთოსმალთა ომების დროს აქ, ჩვენში, ერთი კორრესპონდენტი საფრანგეთის გაზეთის „Temps“-ის მოვიდა. იგი ბევრს რასმეს მოგვითხრობს თავისს კორრესპონდენ-

ციებში და, რა თქმა უნდა, სომხებს აქებ-ადიდებს და ქართველებს მჩვარში ჰხვევს. მერმისი კავკასიაში სომხობისა არისო, ქართველების საქმე კი წასულია ხელალებითაო. ქართველი ანდერძაგებულ ერია, მარტო ჩარვადრობა და მეურმეობაა შერჩენიათო და სხვანი და სხვანი. ორიოდე დღე ყოფილა იგი ტფილისში და ასე ღრმად გაუცვნია აქაურობა. არც საკვირველია. იგი გულანდილად სწერს ხსენებულ გაზეთში, სად და როგორ დახვდნენ სომხები და სად როგორ აქეიფებდნენ. კაი დრო გაუტარებინებიათ, სხვათა შორის გვიამბობს, რომ შინდისში რალაც დღეობა ყოფილა და იქ მიუწვევიათ სომხებს. რა თქმა უნდა, ქალი და ვაჟი დღეობაში ბევრი იქნებოდა. ხოლო ერთს რასმეს ძლიერ გაუკვირვებია კორრესპონდენტი: ვინც კი ქალი შეხვედრია, სულ უშველებელ ცხვირიანები ყოფილან, უკითხავს, ეს რა მილეთის ქალებიაო, და უთქვამთ, სულ ქართველები არიან ეგ დიდცხვირიანებიო. აქედამ ცნობისმოყვარე ფრანგს დაუსკვნია, რომ ქებული სილამაზე ქართველებისა ტყუილი ზღაპარიაო.

ბევრი კიდევ ამისთანა „კულტურული“ მაგალითებია და იქნება ოდესმე მზეზე გამოვფინოთ. ეხლა კი ეს სატაცურისა და შინდისის ამბავიც საკმაოა გვანიშნოს, სადამდე აღვირაშვებულია კადნიერება და სითამამე არარაობისა, რომელიც თავისი რომ არა გააჩნია რა, ჰცდილობს ამისთანა სასაცილო და სამასხარაო ოინებით ფონს გავიდეს. მეტი სიყვარული და ძმობადა გინდათ: განა ჩვენი გეურქა-აღა ბ-ნი წერეთელი ალაღბედად ჰროტავს, რომ „ხითაროვი“ და ყველა ამისთანა კეთილის მდგომი ქართველებისა უნდა ვიძმოთო! მართლა და, უკეთესს ძმას იშოვილა სადმე! ღმერთმანი სახელს არ შეგინახავენ შეუმწიკველად და პატვის! ღმერთმანი, არ დაგზოგავთ, არ გაგიფრთხილდებათ თქვენს ქვეყანაში ჩარვადრობა და მეურმეობა თქენთვის დაუთმიათ, თქვენთვის ურგენიათ უცილობლად სართდაუღებლად და მეტი სულგრძელობადა გინდათ! დიდი ცხვირები ხომ მათი კეთილშეძინებულია და სამმო არ არის, ესეც კი აულიათ და სულ მთლად თქვენთვის უწყალობებით და მეტი ძმური გულუნვობადა გინდათ! ძმობა არ არის, მაშ რა ციებ-ცხელებაა! უმადურობაც

ამასა ჰქვიან, თუ თქვენ იტყვით ბ-ნო გ. წერეთელი! ან რა ჭკუა დაგიშლით, რომ ეს არა სთქვათ: აქ ერდო მაღალია!

[1897 წ. 16 აპრილამდე]



## **<სწავლა-ცოდნა, რომორც მხოლოდ ფუ- ლის ხვეჭის საგანი>**

ტფილისი, 19 აპრილი

ჩვენ ამას წინად მეთაურს წერილში\*) ვთქვით, რომ სომეხი შვილისათვის თავდადებულია და ცდილობს იმის სწავლა-ცოდნას, შვილიც მცდელი და ბეჯითი ჰყავს, ქართველი კი იმდენად არა ჰზრუნავს შვილისათვის, შვილიც თავდაუდებელია და არა ბეჯითობს. ყოველივე ეს მივაწერეთ სომხის ოჯახის წესრიგიანობას და ქართველის ოჯახურ ურიგობას, უწესობას. რა გამოდის ან სომხის ამისთანა სიკეთისაგან, ან ქართველის ამისთანა ბოროტისაგან? აი საკითხი, რომლის განსჯა და გამორკვევა დღეს საგნად აგვილია.

როცა გვეუბნებიან, სომხებს ქართველებზე უფრო მეტი ინჟინერები ჰყავთ, უფრო მეტი მკურნალები და ადვოკატებიო, პასუხი ჩვენის საკითხისა აქ უნდა ვეძიოთ, ნასკვი აქედამ უნდა გამოვხსნათ. აშკარაა, ნაყოფი სომხის სიკეთისა ამ ინჟინერების, მკურნალების და ადვოკატების მეტობაშია. მერე რა გამოდის აქედამ? ნუთუ კაცური კაცობა, განათლება და ერთობ ადამიანობა მარტო ამ სამს ხელობაშია და სხვაში არსად? ამისთანა უმეცრებას ვერ შევწამებთ “კულტურის” თავმოწონებულ მოძღვრებს კავკასიაში, ნამეტნავად დღეს, როცა გრძნობა საკუთარის ეროვნების ღირსებისა იმოდენად გაუსიებიათ, გაუზვიადებიათ, რომ ჩვენზე ან კარგი სთქვით, ან სულ ნურას იტყვიოთ. დრონი მეფობენო, ნათქვამია. ჩვენ მარტო ის გვიკვირს,

\*) იხილეთ „ივერია“ №67.

– ეს რა დრო გაგვიმეფდა ასე ძღვევამოსილად, რომ სხვას კი ქმნაც შეეძლოს და ჩვენ ქართველებს კი თქმაც არა.

ასეა თუ ისე, უფროს ერთი სომხის საოჯახო სიკეთეს სჩანს მარტო ის ნაყოფი გამოუღია, რომ ინჟინერები, მკურნალები და ადვოკატები ჰყოლიათ. ინჟინერობასა, მკურნალობასა და ადვოკატობაში რომ მეტი სომეხი იყოს, საკვირველიც არ არის: ყველა ეს სამი ხელობა ერთად და თვითვეული ცალკე ფულის საშოვი ხელობაა და ადვილად მისახვედრია, აქ სომხები სხვაზე მეტნი რად არიან. ისიც ადვილად ასახსნელია, რომ თავმოსაწონებლად მარტო ამისთანა თავისუფალ ხელობის კაცებს გვიგდებენ ანგარიშში, თითქო სათვალავში სხვა არავინ ჩასაგდები არ არის და თავმოსაწონებელი ადამიანობა მარტო ინჟინერობასა, მკურნალობასა და ადვოკატობაში იყოს. რაკი ესეა, ჩვენც საბუთი გვაქვს ვიფიქროთ, რომ ბევრი წილი სომეხი სწავლა-ცოდნაშია მარტო იმას ეძიებს, რაც მის განსაკუთრებულს ძარღვს ცხოვრებისას შეადგენს და რითაც – არავისათვის დაფარული არ არის – უფროს ერთი სომეხი ყველასაგან ცნობილია და გათქმული. რაკი მარტო ამ სამის ხელობით მოაქვთ თავი და უპირატესობას ამით ჰჩემულობენ, სჩანს სწავლა-ცოდნასაც მარტო ალებმციმობის თვალით უყურებენ, ალებმციმობის სახსრად ჰხადიან, მარტო მაგნიარ ცოდნისათვის ბეჯითობენ და აბეჯითებენ შვილსა და ამას იქით აღარ მიდიან.

შესცდათ თუ არა, რომ მარტო ამისთანა ხელობის კაცებით თავს იწონებენ აქაური სომეხთ რუსული გაზეთები, ეგ არ ვიცით, ხოლო შეცდომაც კი აქ საგულისხმდებელია, როგორც უნებლიეთი გამომეტყველი გულისნადებისა. სხვაგვარ სწავლა-ცოდნისათვისაც რომ გული უთქმიდეთ, სხვაგვარი სწავლა-ცოდნაც თავმოსაწონებლად, სასიქადულოდ და სანატრელად მიაჩნდეთ, სხვა ჯურის მცოდნეთაც ჩამოგვითვლიდნენ. სჩანს, ან სხვაგვარი სწავლა-ცოდნა არაფრის მაქნისად მიაჩნიათ, ან ამისთანაებში ცოტაოდნად ფეხმოკლენი არიან, თორემ აქამდე კვენით გაგვათავებდნენ.

ნურავინ გვიწყენს და თუნდაც გვიწყინონ კიდევ, დიდი არაფერია, – და ჩვენ კი ვიტყვით, რომ თუმცა მაგ სამგვარ ხელობაშიაც არიან პატიოსანი და რიგიანი კაცები, მაგრამ თუ, მაგალითებზე, სადმე თავზეხელაღებული კაცია და ცხოვრების საგნად მარტო ხვეჭა ფულისა გაუხდია, ის – ქართველი იქნება თუ სომეხი – ისე ადვილად, უტკივარად, უხნავ-უთესველად არაფრით მოჰხვეჭს ფულსა, როგორც ინჟინერობითა, მკურნალობითა და ადვოკატობითა. ისე უშიშრად, პასუხუგებლად ყინულზე ვერავინ გააცურებს ადამიანს, როგორც ინჟინერი, მკურნალი და ადვოკატი, – რა მიღეთისაც გინდ იყოს, – თუკი ერთად ნამუსს დააძინებს მკვდრისა ძილითა და თავისის ცხოვრების ანდერძად ამას დაიდებს: „ოფლითა მოყვასისა შენისათა სჭამდე პურსა შენსა“.

მართალია ინჟინერობა, მკურნალობა, ადვოკატობა ცოდნას მოასწავებს, მაგრამ ბევრს არას გვეუბნება იმ ადამიანურ ძალ-ღონისას, რომელსაც განათლება ჰქვია და ურომლისოდ ყოველივე ცოდნა ქვეყნისათვის ბევრი არაფერია. ცოდნა ცოდვა-მადლიანი საქმეა, ორპირი მახვილია. ჯოჯოხეთის მანქანის მოძვონიც მცოდნე კაცი იყო. მარტო ზნეწამხდარს მცოდნეს შეუძლიან დინამიტი, – კაცთა საშველად აღმოჩენილი, – კაცთა საულეტად მოიხმაროს. რის უნარია, რომ ღვინო, – ეს კაცთა მარგებელი სასმელი, თუ ზომიერად ხმარებულია, – თითქმის საწამლავად გადაექცა ქვეყანას და ზოგიერთი ხორაგი – შხამად სხვადასხვა ქიმიურ შეზავებით, – თუ არ ფულის სახვეჭად მიმართულ ცოდნისა?... ყალბის ფულის კეთება ქალაქისა თუ ოქრო-ვერცხლისა – მარტო მცოდნე კაცს შეუძლიან. ბევრი ქიმიკოსი ყოფილა ქვეყანაზე, რომ თავისი სწვალა-ცოდნა საწამლავების კეთებაში დაუღევია ფულის ხვეჭის სიხარბითა. განა სისხლის სამართალი ევროპისა ცოტა მაგალითებს გვიჩვენებს, რომ მცოდნე მკურნალს განგებ გაუსტუმრებია ჭკვათაყოფილი ცაგი-ჟეთში ან სხეული – საიქიოს, რადგანაც მემკვიდრეთაგან დახარბებული ყოფილა ფულითა. რამდენი რამ ჩამოვთვალოთ იმის დასამტკიცებლად, რომ ცოდნას

დიდ მადლთან დიდი ცოდვაც შეუძლიან, ოღონდ კაცმა ნამუსზე ხელი აიღოს.

ცოდნა რომ ბოროტადაც გამოსაყენებელი არ იყოს, ჩვენა გვგონია, კარგა დიდი წილი ავაკცობისა აღარ ააშფოთებდა მშვილობას ქვეყნისას და კაცთა ცხოვრებისას.

ხარბი და სახვეჭი ცოდნა ხარბს და სახვეჭ ფულზე უფრო უწყალოა, უფრო დაუნდობელი, უფრო მოსარიდებელი, იმიტომ რომ სავენებელად უფრო გაწურთულია, უფრო ძლიერი და ხერხიანია. ცოდნა არანაკლებ ხარბს ფულზე თავისს ღალას იღებს ქვეყნისაგან, თავისს ბეგარას ახდევინებს, თუ წინ არ უძღვის განათლებული გული, რომელიც მარტოა შემძლებელი ცოდნა მადლად აქციოს. ესლა ქვეყნის უბედურებას მარტო ხარბ ფულის ძალმომრეობას აბრალებენ, ფული ყველგან მარტო თავისის თავისაკენ ითლისო და მოჭირნახულეს მარტო იმდენს უწილადებს, რომ შიმშილით არ მოკვდეს, სიცოცხლის ილაჯი ჰქონდესო. დრო მოვა და ყოველადშემძლებელ ცოდნასაც ამ თვალთ შეხედვენ, როცა საეკონომიო მოედანზე მარტო ფულის სახვეჭად ფენს მოიკიდებს დღევანდელ ფულისამებრ, და ამასთან თუ „ჰუმანობა“, კაცთმოყვარეობა, ადამიანობა მართლა სულელობად გადაექცევა კაცობრიობას, როგორც აქაური მოძღვრები „კულტურისა“ გვიქადიან თავმოწონებით.


ჩვენ ყოველ ამითი იმის თქმა კი არ გვინდა, რომ ცოდნა მეტი ბარგი იყოს ვისთვისმე და ამიტომ ქვას ვესროდეთ. მთელი დიდება კაცობრიობისა ცოდნის საქმეა, მთელი იგი სიკეთე, რომლითაც სამართლიანად თავი მოსწონს კაცობრიობას, ნაღვაწეცა ცოდნისა, რომელიც ადამიანსა ჰშველის მთელი უტყვი ბუნება თვისდა საბედნიეროდ დაიმორჩილოს და იმსახუროს ხორცისათვის და იძიოს და გამოსახოს სხივოსანი სახე ჭეშმარიტებისა, მშვენიერებისა და სათნოებისა სული-სათვის, ესე იგი სრულჭეშმანს ადამიანი სულითა და ხორციითა. აი იდეალი განათლებულ ცოდნისა და მთელის ეგრედწოდებულ პროგრესისა.

ყოველივე ის სიკეთე და სიდიადე ცოდნისა გვწამს და ჩვენ მხოლოდ იმას ვამბობთ, რომ გულგაუნათლე-

ბელი, მარტო სახვეჭავად მიმართული ცოდნა უფრო მოსარიდებელია, ვიდრე სანატრელი, თუ თავში გაიწია, პირიდან ლაგამი ნამუსისა წამოიყარა და განათლებულმა გულმა სადავე არ აუკრიბა. ცოდნა დაუფასებელი მადლია მხოლოდ მართლა განათლებულ კაცის ხელში. მართალია, განათლება უცოდნელად ძნელად საგულვებელია, მაგრამ მარტო ცოდნა განათლება არ არის. ცოდნა მარტო ჭკუა-გონების თვალის ახილებაა და განათლება კი მასთან ერთად გულისაც, რომელიც სათნოების სადგურია. ცოდნა თუ ცხოვრების გზას გვინათებს, სათნოება გვითბობს. განათლება ჰგავს მზესა, რომელიც ისე არ ანათებს, რომ იმავე დროს არ ათბოს და ისე არ ათბოს, რომ არ ანათოს.

აბა ამ საწყაოთი მივიწყოთ აქაური ინჟინერობა, მკურნალობა და ადვოკატობა – ქართველისა იქნება თუ სომხებისა და მაშინ გამოჩნდება, რა დიდი ხვაი დადგება. ეს შემდეგისათვის იყოს.

[1897 წ.]



## «უსიცოცხლო ცოდნა ხვედრია უნიჭობისა»

ტფილისი, 24 აპრილი

ცარიელი ინჟინერობა, მკურნალობა და ადვოკატობა\*) იმას არ მოასწავებს, რომ კაცი განათლებულია, კაცური კაცია, ერის სულიერ ძალ-ღონის მანიშნებელია და ერთობ ბურჯია, რომელზედაც შესაძლოა ერმა თავისი ნატვრა პირველობისა და უპირატესობისა დაამყაროს. აქ, გარდა დიპლომისა, სხვა საფანელიც უნდა, და ვისაც ეს საფანელი ან არა აქვს, ან არაფრად მიაჩნია, იმან რაც გინდ კუისავით ფეხი გამოჰყოს და ხმამაღლა დღე ყოველ იყვიროს „მეც ნახირ-ნახირო“, სასაცილოდ ავდების მეტს ვერას მოიხვეჭს რა სხვათა ერთა შორის. ერი, რომელიც პირველობას და უპირატესობას სჩემობს ათიოდ, ისიც ჩვენებურ, ინჟინერებით, მკურნალებით და ადვოკატებით, მარტო თავისს თავს ატყუებს და სხვას არავის. სხვას ამისთანა ამბავი სიცილადაც არა ჰყოფნის. ამისთანა ამბავი უფრო ფუქსავატობის ნიშანია, ვიდრე ჭკუა დაჯდომილობისა.

გვეტყვიან: ინჟინერობა, მკურნალობა და ზოგჯერ ადვოკატობაც იმას ხომ მოასწავებს, რომ კაცს უმაღლესი სასწავლებელი გამოუვლია და ცოდნა მიუღია. ეს მართალია. ამის წინააღმდეგ ვერას ვიტყვი. უმაღლესს სასწავლებელში ყოფილს და იქ ცოდნამიღებულს თავისი ფასი აქვს და უარარაობას მაინც ესა სჯობია. მაგრამ ცოდნაც არის და ცოდნაც. ერთნაირი ცოდნაა,

\*) იხილეთ „ივერია“ №75.

რომლის სამზღვრები от селe до селe —ა და კაცი მარტო ამ სამზღვრებში მოიმწყვდევს ხოლმე თავსა და ამას იქით არ მიდის. ვინც მარტო ამისთანა ცოდნას ჰკმარობს, — უმაღლესი სასწავლებელი გამოუვლია თუ უმდაბლესი, — დიდი თაბაუთი არ არის. ორგანვე ამისთანა ცოდნა მკვდარი ცოდნაა და მკვდარი, დიდი იყოს თუ პატარა, ორივე ერთნაირად დასამარხია, ერთნაირად ანდერძ ასაგებელი.

ამისთანა უსიცოცხლო ცოდნა ხვედრია მარტო უნიჭობისა და უნიჭო ბეჯითობას უფრო ეადვილება, ვიდრე ნიჭიერს და ცოცხალს გამჭრიახობასა. ამიტომაც არც საკვირველია, რომ ამისთანა ცოდნის გზაზე მკვდარი ბეჯითობა სძლევს ხოლმე სიცოცხლით სავსე ნიჭსა, რომელიც არ იშვინებს, არ იტანს, რაც კი უსულადოა, უსიცოცხლოა. დარვინები და ლიბინები ზარმაცებად ცნობილ იყვნენ და სასწავლებლებიდან დათხოვნილ უვარგისობისა გამო, რადგანაც მკვდარ ბეჯითობას ეურჩებოდნენ და ერიდებოდნენ. მკვდარი ბეჯითობა შემძლებელია ცოდნის დიპლომამდინაც მიცოდეს, ხოლო რის მაქნისია ამისთანა დიპლომოსილი ცოდნა?

ამ შემთხვევაში დიპლომი მარტო ნიშანია, მოწმობაა იმ ეგრედწოდებულ ოფიციალურ ცოდნა-მეცნიერებისა, რომელიც ჰკმარობს от селe до селe —ს ცოდნას. ესეთი მეცნიერება ძალიან შორს არის ნამდვილ სწავლა-ცოდნაზე. კიდევ ვიტყვი: ამ ოფიციალურს მეცნიერებას კაცი დასძლევს დალაბრებულ ბეჯითობითაც, თვალედახუჭვილ გაზეპირებითაც. ბევრი-ბევრი ამისთანა ცოდნა-მეცნიერებას ეთქმის, რომ უმაღლესი ცოდნაა წერა-კითხვისა. მართალია, სულ არარაობას წერა-კითხვაც კარგი საქონელია. ხოლო საქმე მარტო ამისთანა დიპლომიანი ცოდნა არ არის, როცა მართლა სწავლა-ცოდნაზე ვლაპარაკობთ და ამით თავის მოწონება და პირველობა გვინდა. აქ რაკი ბეჯითი დიპლომს ეღირსება, ხშირად საქმე ამითი თავდება. ამიტომაც ხშირად დიპლომი უფრო მოწმობაა ბეჯითობისა, გაზეპირებისა, ვიდრე ჭეშმარიტის სწავლა-ცოდნისა, რომლის უტყუარი ნიშანი ცხოველმყოფელო-

ბაა, ქმნაა და შემოქმედობა და რომელიც ძლევიტ ჰმოსავს სულთასწრაფვას ადამიანისას პროგრესის გზაზე.

ნათქვამია, ხე ხილისაგან, ხილი ხისაგან იცნობებაო. აბა ერთი ვიკითხოთ ჩვენებიანთ ინჟენერები, მკურნალები და ადვოკატები რა ხილის ხენი არიან? თუ ინჟენერები ასე თავმოსაწონებლად ბევრი ჰყოლიათ, ცოდნა ინჟენერობისა სადღა არის? ან რა ცოდნის ხილი მოუსხამთ? წყალის გამოყვანა ტფილისში გვინდა და უცხოეთიდან ვიბარებთ კაცებს, მოდი, გვასწავლეთ სად მოვნახოთ წყლები, საიდან როგორ წამოვიყვანოთ, თარაზო გაგვიტარეთ, ხარჯი აგვინუსხეთ, გეგმა დაგვიხატეთ და სხვა ამისთანა. აბა ჩვენში დაბადებული, ტფილისის არემარეში მცხოვრებელი აქაური ინჟენერი რომ იძულებულ გვყოფდეს უცხო ქვეყნელს დავეკითხოთ, ამა ტფილისის ახლომანხლოები მოგვიჩხრიკე და გვაჩვენე, სად რა წყლებია, რომ მილით გავიყვანოთო, — და ამაზე მეტი სირცხვილია გინდათ? ჩვენში ჩვენებურმა კაცმა კი არ უნდა იცოდეს ტფილისის ახლომანხლოები და ან გერმანიიდან ან საფრანგეთიდან ახლად დაბარებულ კაცს უნდა ვეკითხებოდეთ? რა ჭკუაა აძლევს ნებას ვისმეს, რომ ამის შემდეგ აქაური ინჟენერი ინჟენერად ახსენოს და მერე ამით თავიც მოიწონოს.

მოვიზნოდეთ და საჭიროდაც დანახულია უწმინდურების სადენად დახურული არხები გაიჭრას ტფილისში და ამით სიმყრალე და ათასგვარი მიზეზი სხვადასხვა სნეულებისა მოსპონ, — და რა გგონიათ? იმ ბევრს ინჟენერთა შორის, რომლითაც თავი მოაქვთ, ერთიც იმისთანა არ გამოჩნდა, რომ ამ საქმეში ან ასე, ან ისე გამოსდგომოდა ტფილისის და ამისათვისაც კაცები უცხოეთიდან დავიბარეთ. ცოდნა თუ არის, რაღა ეშმაკებისათვის ინახვენ და იზოგვენ?

ეს ოცი წელიწადია საჭიროდ დანახულია ტფილისში რიგიანი საყასბო ააშენონ და დღეს-აქამომდე იმ ბევრ ჩვენებიანთ ინჟენერებს ერთი რიგიანი გეგმაც ვერ შეუდგენიათ და ამ მხრით თუ წინ ფეხი წაუდგამს საქმეს, ისიც უცხოელის შველით და შემწეობით და თავს იწონებენ კი, ინჟენერები გვყავსო. ამაებს ვილა სჩივის? ქუჩების ქვით დაგება, ქუჩების

მოკირცხვლა აბა რა დიდი საქმეა, ისიც კი ვერ მოუხერხებიათ ჩვენებიანთ ინჟენერებს და ამისათვისაც სხვაგან ვეძებთ კაცებს, სხვაგნადავ ვიბარებთ და ყოველ ამაებში ვფანტავთ სისხლით და ოფლით მონაგარს ფულებს ტფილისის მკვიდრისას და მერე რამდენს? განა ერთი და ორი ასი თუმანი ფული გადაუყვალაპებიათ უცხოეთიდან დაბარებულ კაცებისათვის, იმათის მისვლა-მოსვლისათვის, საგამრჯელოსათვის, ქუჩების მოკირცხვლამ ხომ, სომხები რომ იტყვიან, „ზაჰლა“ წაიღო, რადგანაც ახლადდაგებულმა ქუჩამ ერთი-ორი კვირა რომ გასძლოს, მესამე და მეოთხე კვირას თითქმის ხელახლავ დაგება უნდება და ილუპება ამოდენა ფული. ნამეტანი ამით შიში ფეხისა და კისერის მოტეხისა აქაურ ქუჩებში მაინც მოშორებიყო ტფილისელს, კიდევ კაცი არას იტყოდა, ხარჯს ჯანი გავარდნოდა.

ყოველ ამას, ჩვენში რომ ვთქვათ, ის от селe до селe –ს ცოდნაც გაუძღვებოდა, რომ იყოს სადმე, მაგრამ ჭირი ეს არის, რომ ეგეთი ცოდნაც არსად არის, როგორც ეტყობა, იმ ბევრ ინჟენერთა შორის, რომელიც თითოთ საჩვენებლად გაგვიხადეს და თავიანთ სასიქადულოდ მიაჩნიათ. ქუჩის დაგების უნარიც რომ არა ჰქონდეთ, ინჟენერები, – ქართველნი იქნებიან, თუ სომხები, – რაღა თითოთ საჩვენებელია და თავმოსაწონებელი! ეს კიდევ არაფერი. აქ ცოტა რისამე დიპლომიანი ცოდნა უნდა. ჩვენ იმის მაგალითებიც ვიცით, რომ მარტო სალი ჭკუა და გამოცდილი თვალი საკმაოა გზა გაიგნოს და აქაური ინჟენერები აქაც, ამაშიაც კი უკაცრად ბრძანებულან. ტფილისში საყასბოს ერთხანად გასუფთავებისათვის აქაურმა ინჟენერობამ თითქმის ხუთასი თუმანი ხარჯი აუნუსხა ქალაქის გამგეობას და ერთი უბრალო უდიპლომო უსწავლელი კაცი გამოვიდა და ას ათს თუმნად საგანგებოდ გასწმინდა და მოაფაქიზა საყასბო. საყასბოს ფაქიზად შენახვისათვის აქაურმა ინჟენერობამ სამასი თუმანი ხარჯი ანუსხა ყოველ წლივ და ას ოცდაათს თუმნად კი უსწავლელმა უდიპლომო კაცმა იკისრა. აქ ხომ დიდი ცოდნა, და მერე დიპლომიანი, არ იყო საჭირო, რომ ესე სასაცილოდ ნახტომი შემლოდათ.

აბა ყოველ ამაებს დააკვირდით და იკითხეთ: სად არის აქ ცოდნა? განა მარტო ცარიელი ბეჯითობა და от селe до селe –ს გაზეპირებით მოპოებული დიპლომი ჯერ კიდევ არ არის ნიშანი ცოდნისა, განათლებას ნულარ ვიტყვით.

მკურნალობაც ჩვენში ესეთივე განძია. ამაზე საუბარს სამერმისოდ გადავდებთ.

[1897 წ.]



## კატარა საშუბარი

სიტყვამან შენმან გამოგაჩინოს შენ, — ნათქვამია. მთესველნი ეგრედ წოდებულ „კულტურისა“ კავკასიაში სიტყვამან მათმან გამოაჩინა და, თუ ცოტას კიდევ დავიცდით, ღმერთი მოწყალეა, სულ გადაგვიშლიან, გულში რა მოძღვრება სდებიათ და რა განმი გამოაქვთ „კულტურისა“, თავიანთ „კულტურულ“ ძალ-ღონის ნიშნად. ამას წინად ხომ გვიღალადეს, ჩვენს დავთარში გვიწერიაო, რომ „ჰუმანობა“, კაცთმოყვარეობა და სხვა ამისთანა „ფლასტი-ფლუსტები“ სულელობააო. რა ვქნათ, რაკი დავთარში ასე სწერებიათ, ამინ და კირილეისონ.

ეხლა სხვა ფურცელი იმავე დავთრისა გადაგვიშალეს და გვეუბნებიან: ვისმე რომ რაიმე წუნი დასდო და თუნდ შერისხო, იმას რაც გინდ ბევრი სიკეთე სჭირდეს, სიკეთე არ უხსენო, თორემ ორთავიანი იანუსი გამოხვალო. რა თქმა უნდა, ისევ ორთავიანი იანუსი სჯობია ორგულსა და ორპირსა, თუნდაც იმიტომ, რომ ძველ საბერძნეთში იანუსი, თუმცა ორთავიანი იყო, მაინც ღირსებით იყო მოსილი, და ორპირი და ორგული კი არ გვეგონია ამისთანა პატივში ყოფილიყოს სადმე და ვისგანმე ოდესმე.

საქმე ამაში არ არის. სხვას რომ ავი რამ შეჰნიშნო, თუნდ შერისხო, რაც გინდ სხვა სიკეთე ჰქონდეს, არ უხსენო, ამას „აბრუნდის“ ეძახიანო. ვის რა ლექსიკონი აქვს, არ ვიცით და აქ კი აზრი ის არის, რომ მართალმოყვარეობაც სულელობა ყოფილა. რაკი კაცს ცხვირი დაუწუნე, თვალებიც უნდა დაუწუნო, რაც გინდ კაი თვალები ჰქონდესო. „კულტურა“, მამ რა ჯანაბა ამისთანა წესების და-

ღადება, ამისთანა ზნემაღლობა მოძღვრობისა. რაკი ამისთანაზე მიდგა საქმე, იმის მაგიერ, რომ კაცმა გამოიძიოს, ცხვირი მართლა დასაწუნებელი აქვს ამასა და ამას და თვალები მოსაწონებელი თუ არა, ცოდვად მართო იმასა ჰხადიან, რომ ერთსავე და იმავეს დასაწუნებელი დაუწუნე და მოსაწონებელი მოუწონე. სიბრიყვე სიბრიყვეა, ხოლო შეიძლება ადამიანი ამისთანა სიბრიყვემდე ჩამოქვეითდეს! მამ მართლმსაჯულეობას თქვენში ადგილი არა ჰქონია რაღა? თუ ესეა, მაგრად შეინახონ თავიანთი „კულტურა“ და, თუ ესე არ არის, უნდა იცოდნენ, რომ პატიოსანთ მტერთა შორისაც კი მოციქული ნამუსია და ეს ნამუსი თხოულობს ყველას თავისი მიუწყო: რაც კარგია, კარგი სთქვა, რაც ავია, ავი. შეიძლება ავკარგიანობის თქმასა და აღნუსხვაში კაცი შესცდეს და აქ გამხილება შეცდომისა საჭირო და არა განკიცხვა, — ავთან კარგსაც რად უხსენებო.

ოქროს ასოებით ჩაიწეროს, ვისაც ეხარბება იმისთანა „კულტურა“, რომელიც ჭკუათამყოფელს კაცს ნებას აძლევს „ჰუმანობა“, კაცთმოყვარეობა სულელობად აღიაროს, ზედ წააკლას მის მიერ უარყოფილი მართლმსაჯულეობაცა და ყოველივე ეს აქადაგებინოს, არამც თუ დასტამბულ სიტყვითა, ზეპირსიტყვევითაც კი.

ზნემაღალი მოძღვრება ამისთანა ყოველ ადამიანურ სიკეთის უარყოფელ „კულტურისა“ ამაზე არ შედგა. იგი გვიქადაგებს, რომ შენიანების ცუდი, რაც გინდ მართლად იყოს, არ უნდა სთქვაო, თვალები უნდა დაიბრმავო, ნურც შენ აიხელ ამაზე თვალსა და ნურც შენიანებს აუხელო. მამ ჩვენი ცუდი, რაკი ჩვენია, დაზღვეულია მხილებისა და განკითხვით განკიცხვისაგან! ეგ რომელს დავთარში სწერია? თუ თქვენს დავთარში, თქვენი დავთარი ჩვენი სახარება ზომ არ არის? და თუ გინდათ თქვენი სახარება ჩვენ თავზე მოგვანვიოთ, შორს ჩვენგან! ჩვენ ჩვენი სახარება გვაქვს, რომელიც ჰკიცხავს იმას, ვინც თავისს თვალში ძელს ვერა ჰხედავს. ჩვენი „კულტურა“ სულ სხვაა. იგი გვასწავლის, რომ „დიდი სიბრძნეა კაცისა, ცნობა თავისა თვისისა“. ჩვენი ჭირისა და ავის ცოდნაც



ერთი დიდი დარგია თავის თვისის ცნობისა და ვინც თავისი ჭირი იცის, იგი საკურნებელ წამლის პოვნის გზაზედა სდგას და ვაი იმას, ვისაც ანდერძად დაუდვია თავისი ჭირი ან ჰმალოს, ან არ იცოდეს!

აქაურ „კულტურის“ მოძღვარნი „ივერიას“ ცოდვად უთვლიან, ქართველებს წუნი დაუნახესო. ამასაც „აბრუნდი“ დაარქვეს. ნამუსი მწერლობისა რას ითხოვდა, რაკი ამაზე ლაპარაკი საჭიროდ დანახული იქმნა? მართლა დაუნახეს წუნი თუ მოიგონეს? აი საკითხი და საძიებელი რა იყო. ამის მაგიერ რას გვეუბნებიან? ავზნეობააო ქართველის მიერ ქართველს წუნი რამ შეამჩნიოსო. ეს, რასაკვირველია, ქართველის სიყვარულით კი არ მოსდით, არამედ შემჩნეველის შესაჩვენებლად. მამ მთელი სახელმოსილობა შჩედრინისა, გოგოლისა, ბარბიესი, სჭივტებისა და ათასის ამისთანაების, რომელნიც თვით თავიანთ ერის ავსა და ცუდს ამხელდნენ, საცა და რაშიაც კი მოასწრობდნენ, ავზნეობა და ერის ღალატი ყოფილა და სხვა არაფერი. გამოდის, რომ ქართველმა ქართველს ყველაფერი უნდა უქოს. აბა, ამაში აზრია რამე გაუთლელ სიბრიყვის მეტი?! სომეხმა რომ სომეხს ყველაფერი უქოს, ჩვენ რა დავა გვაქვს: ჩვეულება რჯულთ უმტკიცესია. ჩვენ ქართველებს კი დაგვეხსნან და მოწყალება მოიღონ, თუ მაგისტანა „კულტურულ“ ანდერძებს არ შევიფერებთ და არც მივიღებთ.

გვეტყვიან და გვითხრეს კიდევ: ის რა ჩვენის „კულტურის“ წარმომადგენელია, რომელიც მაგისტანებს ჰქადაგებსო. „Новое Обищрение“ რაღაა, რომ კინალამ ბ-ნი ველიჩკო ნემსის ყუნწში არ გააძვრინა, რუსთა საზოგადოებას ცუდი რად შენიშნე, როცა პუშკინის გამო საუბარი დაიწყეო. თუ მართლა ცუდია, რატომ არ უნდა შეენიშნა, და თუ მართალი არ არის, რატომ შეცდომა არ გაუსწორა? განა აქაც იგივე ქადაგება არ არის, შენიანებს განკითხვის თვალთ არ უნდა შეხედო და განა ეს ამბავი ცოდვად არ ჩაუთვალა ამ დარბაისელმა გაზეთმაც?

არა, ბატონებო, ჩვენ ცოტადნად გვესმის, რომ ამაების ქადაგება „კულტურა“ კი არ არის, ღვარძლია და:

„ღვარძლის მთესველი ვერ მომკის  
იფქლსა ბასრისა ცელითა“

და სწორედ მოგახსენოთ არც „ანწლი მოგცემთ ყურ-  
ძენსა“.

[1897 წ. 24 აპრილამდე]



## **<ჩვენში დიპლომა ნიშანი მკურნალის ცოდნისა და არა თვით ცოდნა>**

ტფილისი, 26 აპრილი

ჩვენებიანთ მკურნალები ჩვენებიანთ ინჟინერებს შორს ვერ წაუვლენ ცოდნითა. \* რაც ჩვენებიანთ ინჟინერები არიან ინჟინერობაში, იმისთანავე არიან ჩვენებური მკურნალნი მკურნალობაში. აქაც მარტო დიპლომა ნიშანი იმათის ცოდნისა და არა თვით ცოდნა. მარტო უილაჯობით თუ მიეზიდებიან ჩვენში დიპლომიან მკურნალთან, რადგანაც სხვა გზა არ არის და კაცი გაჭირების დროს ხავსსაც ეჭიდება და ამასთან როგორღაც ეთაკილება კიდევ, სინიდისი უმძიმდება, რომ მახლობელი ხელიდამ წაუვიდეს საიქიოს მკურნალის მოუშველებლად, თორემ ვისა სწამს ჩვენში ჩვენებურ დიპლომიან მკურნალთა მკურნალობა, ანუ, უკედ ვთქვათ, მათი ჭეშმარიტი და ზედმიწევნილი ცოდნა? ამ მხრივ თავი არავის გამოუჩენია, ნღობა არავის მოუპოვებია, სახელი არავის მოუხვეჭია. ცოდნა და მცოდნე კაცი რომ იყოს, არ დაიმალებოდა, გამოჩნდებოდა, და თუ ამ მხრით სახელი აქვს ჩვენში ვისმე, ისევე ან რუსს, ან სხვა თესლის მკურნალს.

ჭეშმარიტი ცოდნა მეტად სხივოსანია, მეტად ძლიერი შინაგანის ცხოველმყოფელობითა, რომ ასე თუ ისე არ გამოხეთქოს, არ გამოშვევდეს და შემჩნეულ არ იქმნეს გონებაახილებულ კაცის მიერ მაინცა, თუ სხვისათვის ძნელია ამისი დანახვა. აბა ერთი აქაური მკურნალი გვიჩვენეთ, ქართველი ან სომეხი, რომ კაცს

ალალმართლად თქმა შეეძლოს: აი ცოდნის კაცი, აი მსწავლული მკურნალი, აი მეცნიერებაში დანახული კაცი. ქართველებს რომ ამისთანა მკურნალი არა ჰყავდეთ, ცოტად თუ ბევრად მიეტყვებათ, რადგანაც ცოტა მკურნალები ჰყავთ და ცოტას იმოდენა როგორ მოვთხოვოთ, რაც ბევრსა. ხოლო ბევრში კი რომ ერთი მაინც არ იყოს ამისთანა მკურნალი, ეს ვერაფერი თავმოსაწონებელი ნიშანია, თუ „კულტუროსნები“ არ გვიწყენენ. მართალია, აქ არც ერთს შემთხვევაში არც ერთისათვის არაფერი ნუგეშია, ხოლო რაკი პირისპირ წაყენებაზე მიდგა საქმე, ბევრი უფრო უნდა ჰთაკილობდეს ამისთანა უკაცურობას, ვიდრე ცოტა. ამისდა მიუხედავად, ჩვენებურ „კულტუროსნებსავით“ რომ ჩვეულებად გვქონდეს ბუზი აქლემად ვაქციოთ, იქნება ჩვენში, ქართველებში, ერთი ამისთანა ცოდნის პატრონი და მკვლევარი მაინც დაგვესახელებინა, რომელსაც სამკურნალო მეცნიერებაში საპატიო სახელი მოუპოვებია არამცთუ რუსეთში, ევროპაშიაც, საცა იქაურთა მეცნიერთა ზოგიერთ დასკვნისათვის საბუთად მოჰყავთ იმ ქართველის ძიება და კვლევა. მაგრამ ვიცით, რომ ერთი და ორი მერცხალი გაზაფხულს ვერ მოიყვანს, როგორც 50 ინჟინერი, თუნდ ამდენივე მკურნალი და ამდენივე ადვოკატი, ნამეტნავად ჩვენებურ „კულტუროსნებისა“, მეწამულ ზღვას მოსე წინასწარმეტყველისავით ვერ გააპობს, რომ ერი ხუდაბაშოვებისაგან აღთქმულ ქვეყანაში მიიყვანოს და იქ გააბატონოს.

შესაძლოა ჩვენში ერთი მკურნალი მეორესა სჯობდეს და ერთობ თითოთ საჩვენებელი კი ჯერ არავის უნახავს. ცოდნას ვინა სჩივის? ცნობისმოყვარეობაც კი არავის გამოუჩენია. ცოდნას რომ ცნობისმოყვარეობაც არ აღეძრას კაცში, – გინდ მაღალ სასწავლებლის დიპლომი ჰქონდეს, გინდ დაბალისა, – ის ცოდნა განა ცოდნა? ამიერკავკასიაში მცოდნე მკურნალისათვის ცოტა საქმეა საკვლევი და საძიებელი, თუ გული მართლის ცოდნით გულობს? ამ მხრით ხომ თითქმის ხელუხლებელია ეს ქვეყანა. მთელი ეს მხარე მოდებულა სამკურნალო წყლებითა, მცენარეობითა და აბა ერთი ვინმე გვიჩვენეთ, რომ ცნობისმოყვარეობით შეს-

\* იხილეთ „ივერია“ № 75.

ტოკებოდეს გული და ამ მხრით ეძიებით და გამოერკვიათ რამ, თავიანთ გარემოში დაენახათ ის, რაც მართლად მცოდნე მკურნალისათვის დასანახია. ამოდენა სხვადასხვა ჰავის, სხვადასხვა სითბო-სიცივის, მიწა-წყლის ადგილებია სხვადასხვა სნეულებაში მარგებელი, ან მავნებელი და მოუჩხრეკია ვისმე, უძიებია ვისმე, ან აუწონ-დაუწონია მეცნიერების სასწორზე? ან იციან კი, სად რა მონახონ, სად რა ეძიონ, ან როგორ იძიონ?

დავანებოთ ყოველს ამას თავი, იმიტომ რომ ყოველს ამას მომქმედი ცოდნა უნდა და არა მკვდარი, და მომქმედს ცოდნასთან საჭიროა ჭკუის გამჭრიახობაც, ცოდნის მოხმარების ხერხიც. „კულტუროსანთა“ მკურნალებს რომ ყოველი ეს მოვთხოვოთ, ბედოვლათობაში ჩამოგვართმევენ.

ქართველს ერს აიღებთ თუ სომხისას, ათასის წლების ისტორია აქვთ. ერთსაც და მეორესაც უცხოვრია, უფიქრია, თავისის ჯანმრთელობისათვის უზრუნვია ამოდენა ხნის მანძილზე, კარგი თუ ავი მკურნალობა ამათაც სცოდნიათ და ჰქონიათ. ნუთუ ესეც მისაწვდენი არ არის აქაურ მკურნალთა ცოდნისათვის? ნუთუ ყოველ ამისი გამოჩხრეკა, ძიება, აღმოჩენა და გამორკვევა საკადრისი არ არის დიპლომიან ცოდნის პატრონებისათვის! განკითხვას ყოველ ამაებისას, კრიტიკის თვალთ გაჩხრეკას არ ვიტყვით, იმიტომ, რომ ამისთანაებში დიპლომით შემოწმებულ ცოდნის გარდა სხვა საკუთარი უნარიც უნდა ჰქონდეს კაცსა და სად ეს უნარი და სად ის მკურნალთა დასტა, რომლის სიმრავლით თვალებს გვიხვევენ აქაურნი მოძღვარნი უცნაურ „კულტურისა“. ჩვენ მარტო ხორციელ თვალთ დასანახავს საგნებსა ვჩივით და თითქმის ხელით მოსაგროვებელს ამბებსა და აქაც კი ყოველად უქმნი არიან, ყოველად უღონონი, ყოველად გამოუსადეგნი, ყოველად უცოდინარნი.

გვეტყვიან, რა ბევრს ჭკუას ვისწავლიდით, რომ მაგების გზაზე მომცდარვიყავითო. იქნება ესწავლათ კიდევ, აქ საკვირველი არა არის რა. თუნდ არ ესწავლათ კიდევ, განა ამით რაო? განა ყელში ძვალსავით გაეჩხირებოდათ, რომ თავისის, თუ სხვისა ერის კარგად თუ ავად ნაცადი შეეტყოთ, გაეცნოთ და აენუსნათ!

საქმიანი მკურნალობა, ესე იგი სნეულობის წამლობა უფრო ცდაზე არის აგებული და ნაცადში ჰპოულობს საბუთს ზედმიწევნისას და უებარობის მეტნაკლებობისას. ერთი იმისთანა ახლად ამოჩენილი წამალი არ ვიცით, რომ აღმოჩენელს საჭიროდ არ დაენახოს ჩამოთვლა ნაცადის მაგალითებისა უებარობის საბუთად. გამოცდილება ისეთი სკოლაა, საცა ყოველი ცალკე გაკვეთილი ძვირად უჯდება ადამიანს, მაგრამ მაინც ერთადერთი სკოლაა, საცა უჭკუონიც კი ჭკუასა სწავლობენ, ამბობს ერთგან ფრანკლინი. თუ ესეა, ნუთუ ათასის წლების მანძილზე ნაცადი მთელის ერისა არასფერს სახარბიელოს არ წარმოადგენს ჭეშმარიტ მცოდნესათვის ან საარაოდ, ან საპოოდ!


თუ ვისმეს ყური უთხოვია ცოდნის სიყვარულითა ამიერ და იმიერ კავკასიისთვის, ერთობ ავი და კარგი მკურნალობის თვალთ უსინჯავს და მოუჩხრეკია, ისიც მარტო ან რუსი ყოფილა, ან უცხოელი და იმათი მადლობელნი უნდა ვიყვნეთ.

გვეტყვიან, ჩვენ მეცნიერების მკვლევარნი კი არა ვართ, ჩვენი საქმე სნეულების რჩენააო, საქმიანი მეცნიერება სხვა არის და თეორიული სხვაო. შარკოები და თუნდ ბოტკინები, ზახარინები და ბევრნი სხვანი უფრო ბევრს სნეულებას უვლიდნენ და არჩევდნენ, მაგრამ ცოდნისათვის და მეცნიერებისათვის სამსახურს ეწეოდნენ და არა ერთი და ორი ღვაწლია მათდა სასახელო სახსოვრად. „სწავლა არის სიცოცხლე სწავლულისა, სათნოება – სიცოცხლე ბრძნისა“, ვილაცამა სთქვა და მართალიც არის. თქვენ ჭეშმარიტი მსწავლულობა სთქვით, თქვენ ნიჭი სთქვით, იგი მადლი სთქვით, იგი ცოდნა სთქვით, რომელნიც კაცს ღვთიურ ცეცხლს უკიდებენ ბუნების და ადამიანის საიდუმლოების ძიებისას და იგი ცეცხლი თვით არ მოასვენებს ადამიანს და მარტო რეცეპტების წერაზე არ შეაჩერებს. თუ მკურნალნი მრავალნი ჰყავთ, როგორც ქაღულობენ, და მრავალში ერთი მაინც ამისთანა უნარის კაცი არ აღმოჩნდა, – ეს საგლოვ-სამწუხაროა და არა თავმოსაწონებელი.

რაკი ამით დაიწყებენ თავის მართლებას, რომ ჩვენი საქმე მკვიდრთა ჯანმრთელობის მოვლაა და სნეულთა

რჩენა, დაუფეროთ და ვაპატიოთ, რომ იმ სფერაში, რომელიც ჩვენ ალვნიშნეთ, ჩვენებიანთ „კულტუროსანთა“ მკურნალნი სრულად ურგებნი, უქმნი და უღონონი გამოჩნდნენ. გავუსინჯოთ ეხლა საქმენი შესახებ თუნდ მკვიდრთა ჯანმრთელობის მოვლისა და პატრონობისა. ეს უკეთესი საბუთი იქნება იმისი, თუ — „სწავლა რამოდენად არის სიცოცხლე იმათის მსწავლელისა და სათნოება — იმათის ბრძნისა“. ტყუილად კი არ არის ნათქვამი: საქმემან შენმან გამოგაჩინოს შენო. შორს რომ არ წავიდეთ, ცოდნას და არცოდნას ჩვენებიანთ „კულტუროსნების“ მკურნალებისას აღარ გამოვეკიდნეთ, საკმაო დავასახელოთ მარტო ბ-ნ შაუმოვის „სელდები“ და ბ-ნ არუთინოვის „ტრინინიანი“ ღორები. აქ დავინახავთ, ჯანმრთელობა მთელის ტფილისის მკვიდრთა, ესე იგი ასორმოც ათას ადამიანის სულის სიკვდილ-სიცოცხლე რა დიპლომიან კაცების ხელშია. ამ საზარელის ამბის ყოვლად უტყუარი საბუთები ხელთ გვიპყრია და, რადგანაც გრძლად საუბარი მოგვინდება, შემდეგისათვის გადავდოთ. ეხლა კი ამას ვიტყვით, რომ ეს ჩვენი აღთქმა ამაების გამოძღვლებისა არა ერთსა და ორს აცვლევინებს ფერს და მეორეს მხრით — არა ერთსა და ორს დააკვივლებს: ღმერთო, ეს რა დღეში ვყოფილვართ, ეს ვის ხელში ჩავცვივნილვართო!..

[1897 წ.]



**«ბ-ნ შაუმოვის „სელდების“ და ბ-ნ არუთინოვის „ტრინინიანი“ ღორების და ღორების საქმე»**

ტფილისი, 28 აპრილი

ბ-ნ შაუმოვის\*) „სელდების“ და ბ-ნ არუთინოვის „ტრინინიანი“ ღორების და ღორების საქმე ისეთი თავზარდასაცემი ამბებია, რომ მარტო ამ ამბის თხრობა საკმაო კაცმა იცოდეს და თავზე თმა ყალხზე აუდგეს. ეს ამბები უკვე გამომჟღავნებული იყო აქაურ რუსულ გაზეთებში, იქნება არა იმოდენა სისრულით და სავსებით, როგორც ღირსიყო და როგორც საჭიროა მართლმსჯელობისათვის.

როცა თ. ალ. ზაალ ჩოლოყაშვილი და თ. ვ. ს. მიქლაძე ტფილისის საქალაქო გამგეობაში ხმოსნად იყვნენ, პირველმა სასანიტარო-სამკურნალო ნაწილის დაწესება წარუდგინა ქალაქის საბჭოს აუცილებელ საჭიროებად და მეორემ — საყასბოზე თვალის ჭერისა, რომ საღი და უსნეულო საქონელი იკვლებოდეს და ნამეტნავად ღორი, რადგანაც „ტრინინის“ შიში ძალიან დიდია და ეს საშიშარი საწამლავი მარტო ღორისაგან წარმოსდგება. ტფილისის მკვიდრთა ჯანმრთელობისათვის და ამოდენა ხალხის სიკვდილ-სიცოცხლისათვის, რა თქმა უნდა, ერთიც და მეორეც დიდი საქმე იყო, და საბჭომ ერთიცა და მეორეც დააწესა და ჩააბარა, რასაკვირველია, თავიანთ დიპლომიან მკურნალებსა. ხოლო ეს მართლა-და სამადლო საქმე რა ცოდვად გა-

\*) „ივერია“ №86.

დიქცა „კულტუროსანთა“ მკურნალთა ხელში, ამას ქვევით დავინახავთ.

1894 წლის შემოდგომაზე მეხუთე ნაწილის პოლიციის ბოქაულს ბ-ნ სიტოვსკის შეუტყვია, რომ სამს ტფილისელს ვაჭარს მოსვლია ასტრახანიდამ ბოჭკებით ერთგვარი წამხდარი თევზი, რომელსაც რუსულად „სელდი“ ჰქვია. ამ სამ ვაჭართა შორის ერთი ყოფილა პირველ გილდიისა – არტემ ლაზარეს ძე შაუშოვი, რომელსაც დუქანი დახურულ ბაზარში საკუთარ სახლში ჰქონია და სხვა ორს ვაჭარს – სარაჯოვის ქარვასლაში. რადგანაც ქალაქის მთავრობის ხელქვეითი, მკურნალი ბ-ნი რუდკოვსკი<sup>\*/</sup> ბ-ნს ბოქაულს შინ არ დახვედრია, ქალაქის გამგეობის წევრისათვის უთხოვნია ერთი სასანიტარო ნაწილის მკურნალი გამოგზავნეთო, შეამოწმოს ჩემთან ერთად ასტრახანიდამ მოტანილი თევზიო. წევრს გამგეობისას დაენიშნა სასანიტარო მკურნალი, რომელსაც იმავე წევრის პირით შეუთვლია, – პოლიციის მეხუთე ნაწილის გამგეობაში მომიცადე და მეც მოვალო.

მეორე საათის ნახევარზე ბ-ნი გონიანცი მისულა ხსენებულ პოლიციის გამგეობაში და უთქვამს, მე სარაჯოვის ქარვასლაში კიდევ ვიყავიო და იქ შევიტყე, რომ თევზი ამ დღეებში მოუტანიათო შეკრულ და თავგაუნსნელ ბოჭკებით და იგი თევზი ტფილისში გასასაღებლად არ არის მოსული, ტფილისის გარედ ქალაქებისათვის დანიშნულიაო და ერთობ მე არ მინდა პასუხისგებაში // მივეცე, თუ ვინიცობაა ბოჭკები დაეხსენი და თევზი კარგი გამოდგაო.

ასე ასურათებს ბ-ნი გონიანცის საქციელს ბ-ნი ბოქაული თავის მოხსენებაში, რომელიც მიურთმევეა ბ-ნ პოლიციისტერისათვის და ამაებში პასუხისგებას ჩვენ არა ვკისრულობთ. ეგ ბ-ნი ბოქაულის საქმეა.

როგორ მოგწონთ ყოველივე ეს დიპლომან მკურნალისაგან, თუ ყოველს ამას დავიჯერებთ და ჯერ საბუთი არა გვაქვს, არ დავუჯეროთ ამ ოფიციალურს მოხსენებას. ჯერ ერთი ეს, რომ უბოქაულოდ მისულა

<sup>\*/</sup> ქალაქის მკურნალი მთავრობისაგან არი დაყენებული და ქალაქის გამგეობის მკურნალებში არ უნდა გარიოთ.

გასასინჯავად, მაშინ, როდესაც ბოქაულოთან ერთად უნდა წასულიყო ბოქაულის თხოვნისამებრ; მეორე ისა, რომ შაუშოვის დუქანი საჭიროდ არ დაუნახავს მოჩხრიკა, თუმცა ესეც გასასინჯავად იყო დასახელებული ბოქაულისაგან, მესამე, – შეშინებია, ვაი თუ კარგი თევზი გამოდგესო და როგორ დაეხსნა ბოჭკებით და მეოთხე – ტფილისისათვის ხომ არ არის მოტანილი, სხვა ქალაქებში არის გასაგზავნიო.

დააკვირდით, რა გამოდის ბ-ნ გონიანცის საქციელისაგან? ვთქვათ, ეპატოოს, რომ უბოქაულოდ წასულა გასასინჯავად, ისიც ეპატოოს, რომ შაუშოვის დუქანში გაჩხრეკა თევზებისა საჭიროდ არ დაუნახავს. ეს შიში პასუხისგებისა საიდამლა გამტყვერალა! რაკი ეჭვია მიტანილი, რომ თევზი წამხდარია მოსული გასასყიდად და, მამასადაძე, ხალხის მოსაწამლადა, აქ შიში ხალხის მოწამვლისა და წახდენისა უნდა ასჩენოდა კაცს და არა ბოჭკების გახსნისა, თუ კაცთმოყვარეობა მართლა სულელობად არ არის მიჩნეული „კულტუროსანთა“ მოძღვრებისამებრ. მაშ ვინც ავკაცობას კარდაკეტილში ჩაიდენს, გამოსადიებლად კაცმა აღარ უნდა გაალოს კარი და არ მოსჩხრიკოს იქაურობა იმის შიშით, რომ ვაი თუ ავკაცობა არ აღმოჩნდესო? მაშ გაუნსნელ ბოჭკით რომ საწამლავი შემოიტანოს ვინმემ, ბოჭკა არ უნდა გაისინჯოს იმის შიშით, ვაი თუ საწამლავი არ აღმოჩნდესო! მაგრამ საიდამ შევითყოთ მართალი, რაკი გეში და ეჭვია მიტანილი?

რა აღმოჩნდებოდა და რა არა, ბ-ნ გონიანცის პასუხისგება აქ რა შუაში იქნებოდა? თუ პასუხისგების შიში რამ უნდა ჰქონოდა და, ისევე თავგამოდებულს ბოქაულსა და სხვას არავის, რადგანაც ეჭვი მის მიერ იყო მიტანილი და იგი იყო მიზეზი გაჩხრეკისა და გასინჯვისა. როგორ მოგწონთ: დიპლომანს მკურნალს ხალხის წახდენის შიში კი არაფრად მიუჩნევია და ტყუილ პასუხისგების შიშს კი აუცხაცხახებია. ეს დიდი ცოდვა, რომელიც, შესაძლოა წამხდარის თევზის წყალობით დატრიალდეს ხალხში, კი არაფერია, საფიქრებელი და საზრუნველი არ არის და რაღაც ტყუილი შიში, ყოვლად უსაბუთო და უმიზეზო შიში კი იმოდენად პატივსადებია და ძლიერი, რომ კაცს ხელს აღე-

ბინებს წამხდარის თევზის ბოჭკების გახსნაზე და ამით მართლის აღმოჩენაზე.

ეს კიდევ არაფერი: ის საზარელი საბუთი არ-გაჩნრევისა რაღაა, რომ ტფილისისათვის ხომ არ არის მოტანილი დამპალი თევზი, სხვა ქალაქებისათვის არისო! მაშ ქუთაისი, გორი, თელავი, სიღნაღი და სხვანი თავგებით არიან დასახლებულნი, რომ ისინი გაწყდებიან თუ არა, ტფილისელ დიპლომიან მკურ-ნალისათვის ანგარიშში მოსატანი არ იყვნენ! მოდიტ და შიშით და ზარით ნუ ილაღლებთ: ეს რა ქვეყანაში ვცხოვრობთ, ეს რა კაცების ხელში ჩავცვივებულვართ, ეს რა „კულტუროსნები“ გვეწვივნენ და ეს რა „კულტურა“ ითესება ჩვენში „კულტუროსანთა“ დიპ-ლომიან მკურნალთაგან!

კიდევ ვიტყვი: ჩვენ ყოველივე პასუხისგება ავ-ვიხდია, თუ ბოქაულის მოხსენებაში რამ აღმოჩნდა უმართლო შესახებ ბ-ნ გონიანცის საქციელისა. ჩვენ ვემყარებით ოფიციალურს დოკუმენტს, რომელიც ჯერ არავისაგან გამტყუნებული არ არის. ყოველ ამას ისიც უნდა დავუმატოთ, რომ დღესაც ბ-ნი გონიევი, ანუ გონიანცი, ბედნიერად ასრულებს ისევ იმ თანამდებობას „კულტუროსანთა“ გამგეობის მოწყალეობით და გულკეთილობით.

რაკი ბ-ნი გონიანცი ასე გულგრილად მოჰკიდებია საქმეს და თავი დამ მოუშორებია, ბოქაულს მოუხსენე-ბია პოლიციებისტერისათვის და ამას უბძანებია, — მთავრობის ქალაქის მკურნალი ბ-ნი რუდკოვსკი წაიყ-ვანე და იმას გაასინჯეო. ბ-ნ რუდკოვსკის გაუსინჯავს და აღმოუჩენია, რომ სამს ვაჭართა მიერ მოტანილ თევზთა შორის შაუმივის მთელი ნნ ბოჭკა თევზი დამპალი და საჭმელად უვარგისია. შეუყენებიათ ამაზე ოქმი. ამ ოქმში, რომელსაც ხელს აწერენ დასწრე-ბულნი მოწმეები, თვითონ ბოქაული და მკურნალი რუდკოვსკი, სწერია, რომ გასინჯულ იქმნა სამოცი პატარა ბოჭკა და ხუთი დიდი შაუმივის თევზისა და აღმოჩნდა, რომ როგორც მარილწყალი, ისეც თვითონ თევზი წამხდარია, მყრალი სუნი ასდის, ლაყურები თევზისა ჩამავებულია და ლორწოიანი და სილიანი, თვითონ ხორცი თევზისა დამპალია, ასე, რომ თითებ-

შუა იშლება და ყარს (острый гнилостный запах) აყ-როლებულის სუნითაო. ამ ოქმის ბოლოს თვითონ ბ-ნ რუდკოვსკის თავისის ხელით ჩაუმატებია: ამ ოქმში აღწერილი თევზი შაუმივისა არამც თუ საჭმელად არ ვარგა, პირდაპირ მავნებელია მჭამელთა ჯანმრთელო-ბისათვის და ამიტომ სულ ერთიანად გადასაყრელიაო. ეს ოქმი წაუკითხავთ თვითონ შაუმივისათვის და ამას არ უნებებია ხელი მოეწერა.

ხოლო ცოტა შემდეგ კი ამავე დღეს სასანიტარო-სამკურნალო ინსპექტორის თანამდებობის დროებით აღმასრულებელს ბ-ნ სტეფანიანცისაც გაუსინჯავს იმავე შაუმივის თევზი და შედეგი გასინჯვისა ქალაქით მოუხსენებია ქალაქის მოურავისათვის. იგი აუწყებს ბ-ნს მოურავს, რომ შაუმივის თევზის შესამოწმებლადაო მიმიწვია ბოქაულმა სიტოვსკიმაო, რომელსაც ნნ ბოჭკა ასტრანხანიდამ მოტანილ თევზისა დაუჭერია გადასაყრელადაო. ბ-ნ სიტოვსკის თხოვნით მე ხუთი ბოჭკა გავსინჯეო, სამი ჩემამდე გახსნილი და ორი მე გავსინჯეო, გაუსინჯელი დარჩა ნ1 ბოჭკაო. იმ გახსნილ ხუთს ბოჭკაში მარტო ერთში ვიპოვე წამხდარი თევზი, რომელსაც სუნი უდიოდა, მაგრამ სიღამპლისა კი არაფერი ნიშანი იყო, სხვა ყველა ჩემ მიერ გასინჯული თევზი წამხდარი არ არისო. ამიტომაც იმ ხუთის ბოჭკი დამ გადასაყრელია მარტო ერთი ბოჭკა, რომელ-შიაც მარტო რამდენიმე ცალი თევზი ცუდი აღმოჩნდაო. ეს საქმე ამით გაუთავებია „კულტუროსანთა“ მკურ-ნალს, ხოლო ამას არ დასჯერებია ბ-ნი ბოქაული და მოუთხოვნია კამისსია.

ქალაქის მოურავს, სახელგანთქმულს იზმაილოვს, მოუხსენია რა მოხსენება ბ-ნ სტეფანიანცისა, მიუწერია ბ-ნ პოლიციებისტერისათვის, რომ სასანიტარო-სამკურნალო ინსპექტორმა ბ-ნმა სტეფანიანცმა ის ბოჭკები გასინჯა, რაც ბ-ნ რუდკოვსკის გაუსინჯა და ორიც სხვაგაო და ამ ხუთში მარტო ერთში გამოჩე-ნილა წამხდარი თევზი და სხვა ყველა „доброкачественный“ /?/ გამოდგაო. ამ სახით ბ-ნ იზ-მაილოვს ბ-ნ სტეფანიანცის ფრთხილი სიტყვა „неиспорченный“ გადაუქცევია „доброкачественный“-ად და ერთი ხარისხით მაინც, თუ არ მეტით, მოსაწონე-

ბელიც გაუხდია ბ-ნ სტეფანიანცის „არწამხდარი“ თევზი. არწამხდარი თევზი „не зпокачественн“-ად არის მისაღები და არა „доброчақтественн“-ად. რუსი იტყოდა, отсу́тствие зла не е́сть е́ще прису́тствие добра, მაგრამ ბ-ნ იზმაილოვს აგრე უნებებია.

ასეა თუ ისე, ქალაქის მოურავს უთხოვია ბ-ნ პოლიცმეისტერისათვის კამმისისა შეადგინეო, ხელმეორედ გადასინჯონო, მით უფრო, რომ ბ-ნ სტეფანიანცის სიტყვითაო, თვითონ შაუძოვიც თანახმა არისო. ეს მიკერებული ბოლო ბ-ნ გონიევის საქციელს მოგვაგონებს. მითამ რაო? შაუძოვი რომ თანახმა არ ყოფილიყო, საბუთი კამმისის შედგენისა დაუძღურდებოდა, რაკი საქმე ამისთანა ჰო და არაზედ მიდგა, საქმე ქალაქის მკვიდრთა ჯანმრთელობისა და იქნება სიკვდილ-სიცოცხლისაცა!.. საკვირველია: ჩვენ, ქართველებს, ეს რაღაც ეშმაკი ახალი მოდის „კულტურა“ ისე როგორ გაგვპარვია თვალწინ, რომ ყოველ ამისთანაებში ჯერ შაუძიანცების ნებისრთვა და თანხმობა სჭირებია თურმე და ჩვენ კი გვგონია, საცა ხალხის ჯანმრთელობის სვე-ბედზეა ლაპარაკი, იქ შაუძიანცების და სხვა „იანცების“ ნებართვის და თანხმობის ძებნა და წყურვილი არც მოსაკითხია და არც ანგარიშში ჩასაგდება. მართლა რომ „კულტურა“ და „კულტუროსანნი“ ძალიან დაწინაურებულან და ბევრიც აწი-ოწო ვიძახოთ, ძნელად თუ დავეწვიოთ.

1894 წლის ოქტომბრის 13-სა დღესა შემდგარა ეს კამმისია. წევრად მოწვეულ ყოფილან მთავრობის საქალაქო მკურნალნი: მრეველიშვილი, პროზოროვსკი, რუდკოვსკი, სასანიტარო-სამკურნალოს მკურნალნი გამგეობისანი: ინსპექტორი სტეფანიანცი, ხსენებული გონიევი და თარხანიანცი, ქალაქის ლაბორატორიის გამგებელი ალიბეგოვი. ამ კამმისიას თანადასწრებია გუბერნიის მკურნალიც ბ-ნი ქიქოძე. ამ კამმისიას გაუხინჯავს შაუძოვის თევზისა ჯერ ის ხუთი ბოჭკა, რომელიც წინად გაეხსნათ ბ-ნ რუდკოვსკის და მერე ბ-ნ სტეფანიანცს, და ამ ხუთ ბოჭკაში მარტო ერთი უცვნიათ (годными) საჭმელად ვარგისი, ოთხი – ყოვლად უცილობლად წამხდარიო, აყროლებული და გადასაყრელი. დანარჩენი სამოცდაერთი ბოჭკაც, რო-

მელთა შორის ხუთი გაეტანა დუქნიდამ შაუძოვს და სხვა ბოქაულისაგან ბეჭდის ქვეშ ყოფილა, მარტო სამი დიდი ბოჭკა და ექვსი პატარა ვარგისად უცვნიათ და სხვა ორმოცდათექვსმეტ ბოჭკაში თევზი უპოვნიათ ცოტად თუ ბევრად აყროლებული და, მკურნალთა აზრით, გადასაყრელი გამომდგარა. დაუდგენიათ: დაუყოვნებლივ მოისპოს საჭმელად უვარგისი მავნებელი 61 ბოჭკა თევზი და დამნაშავეს მოეპყრან არსებული კანონისამებრ. იმავე დღეს ბოქაულს სიტოვსკის დაუწვავს ამ დადგინების ძალით სამოცდაერთი ბოჭკა წამხდარი თევზი შაუძოვისა.

როგორ მოგწონთ ეს ამბავი? სასანიტარო-სამკურნალო ინსპექტორის თანამდებობის აღმასრულებელი ბ-ნი სტეფანიანცი უმტკიცებს ქალაქის მოურავს, რომ ხუთში, ჩემ მიერ გასინჯულ ბოჭკაში, მარტო ერთი ბოჭკა გამოჩნდა, საცა მარტო სულ ორიოდ თევზი იყო წამხდარიო და კამმისია კი ამბობს: ამ ხუთში მარტო ერთი აღმოჩნდა ვარგისი და ოთხი წამხდარიო. რა იქმნა ის მაშინდელი ქალაქის მოურავის იზმაილოვსკის „доброчақтественными“, ამას ნულარ ვიკითხავთ. ბ-ნ სტეფანიანცმა დაინახა საჭიროდ დაწვა მარტო ერთის ბოჭკისა და კამმისიამ მთელის სამოცდაერთისა. რა ამბავია ეს?

დააკვირდით, ბატონებო, ამ ამბავსა! დააკვირდით, რა ძვირად ჰღირებიათ ამოდენა ხალხის ჯანმრთელობა და იქნება სიკვდილ-სიცოცხლეც „კულტუროსანთა“ დიპლომიან მკურნალებს. ჩვენ უამისოდაც ვიცოდით ჭეშმარიტი ფასი ცალიერ დიპლომისა და ეს კი, სწორედ მოგახსენოთ, არ ვიცოდით, რომ დიპლომიან ცოდნის უკან ღვენაში შესაძლოა ადამიანს დახშოდეს ხორციელ თვალის ხედვა და ცხვირის ყნოსვა. აბა გულზე ხელი დაიდევით და ისე გვითხარით: ცოდნაა ის ცოდნა, რომელიც ხორციელ თვალსაც აბრმავებს და ცხვირსაც კი ყნოსვას უკარგავს. თევზი დამძალი და აყროლებულია თუ არა, ამისი შეტყობაც თუ არ შეუძლიან დიპლომიან ცოდნასა, სხვა რაღა უნდა მოეკითხოს. რომ პოლიციას ასე თავი არ გამოედო თვისდა სასახელოდ და სასანიტარო-სამკურნალო მკურნალებს თავისის სურვილისამებრ ჩაეფუჩეჩებინათ

ეს საქმე თავისდა სამარცხვინოდ, ეს 61 ბოჭკა დამპალი და აყროლებული თევზი რამდენს ცოდვას დაატრიალებდა ხალხში და, ვინ იცის, რამდენს ადამიანის სულს გამოასალმებდა ამ წუთისსოფელს.

ნურავინ ნუ გევიწყენს, რომ ამისთანა ამბით გულაღშფოთებულმა ვთქვათ: აბა, თუ არა იუდის კერძისაგან, შესადლებელია ამ შემთხვევაში პირიდან ამოუშვას: „ეს ხომ ტფილისისათვის არ არის დანიშნული, სხვა ქალაქებისათვისაა“. აქედამ ის გამოდის, სხვებისათვის თავს რად ავიტკიებო. გაგონილა!

რაცა ვთქვით, აქ ერთი იმისთანა სიტყვაც არ არის, რომ ოფიციალურ დოკუმენტებით არ დავამტკიცოთ, აქ ნაჩვენები საქციელი თვითონვე ჰლაღადებს თავისის თავისას და განმარტება საჭირო აღარ არის.

მარტო ეს გვაკვირვებს, რომ ეს დიდად საკეთილოდ განზრახული წესრიგობა, წესრიგობა დიდის სათნოებისა, ეს სასანიტარო-სამკურნალო დაწესებულება, რომელმაც მთელის ტფილისის ჯანმრთელობა, მისთა მკვიდრთა დღეგრძელობა და სიცოცხლე უშიშარ უნდა ჰყოს, რაც შეიძლება, ყოველგვარ განსაცდელისაგან, — სწორედ ეგ დაწესებულება ლამის შაუმოვებისთანა საქმე არ გამოჰფინოს კი, არ აღმოაჩინოს კი, არამედ უკვე გამოფენილი, უკვე აღმოჩენილი როგორმე ჩააფუჩჩინოს და კალთა გადააფაროს.

ყოველ ამას იმას დავუმატებთ, რომ ბ-ნი გონიევი თუ გონიანცი დღესაც ბედნიერია გამგეობის მიერ მინიჭებულ სამსახურით და დროებით აღმასრულებელი სასანიტარო-სამკურნალო ინსპექტორის თანამდებობისა ბ-ნი სტეფანიანცი უფრო მაღლა დაასკუპეს, ესე იგი ეხლა დროებით აღმასრულებელი კი აღარ არის, თვით ინსპექტორია. როგორ მოგწონთ „კულტუროსანთა“ ბრწყინვალე გამგეობა, რომელმაც ბ-ნი სტეფანიანცს ღვაწლი არ დაუკარგა და ასე დააჯილდოვა. ტფილისელებს ნულარ გეშინიანთ ეხლა ნურაფრისა. გულმოდგინე კაცს აბარია სვე-ბედი თქვენის ჯანმრთელობისა და აქამდე თუ თვალთა ხედვა და ცხვირთა ყნოსვა არა ჰქონდა, ეგ იმიტომ, რომ დღემდე აღმასრულებელი იყო და за такое ограниченное жалование ან ერთს რად გამოიჩინდა, ან მეორეს. ეხლა სხვაა, ეხლა

თითონ არის ინსპექტორი. ნულარც „ტრიხინიან“ ღორებისა გეშინებათ. უმთავრესი ზედამხედლობა ამაებშიაც იმავე ბ-ნს ინსპექტორს სტეფანიანცს აბარია და „კულტუროსანთა“ დიპლომიან მკურნალთა, რილას შიშია?

ამისი პასუხი შემდეგ იყოს, როცა ბ-ნი არუთინოვის და „კულტუროსანთა“ მკურნალ ისპანდარიანცის ამბებს მოვითხრობთ.





## კატარა საშპარი

შაუშოვის „სელების“ სულის საცხონებელი ისტორია უკვე წაკითხული და მოსმენილი გექნებათ. ამ ისტორიიდან დაინახავდით, რარიგი ომი გადაუხდია თავისს სასახელოდ ტფილისის პოლიციას, რომ ცუდკაცობა და ბოროტმოქმედება არ დამალულიყო და არ ჩაეფუჩეჩებინათ და მით ხალხი გადაერჩინა მოწამვლისა და მოშინამვისაგან. ისიც ვიცით, ვინ დაუდგა წინ პოლიციას ამ საქმეში და ვინ სცდილობდა მართალი პოლიცია გაემტყუნებინა და მტყუანი წამხდარი, დამპალი და აყროლებული თევზი გაემართლებინა. ეს წინააღმდეგი მართლისა და მოსარჩლე მტყუანისა გახლდათ, იცით, ვინ? იგი მთელის ქალაქის განსაცდელისაგან სახსნელად დაწესებულება, რომელსაც სასანიტარო-სამკურნალო ჰქვია და რომლის პირველი და პირდაპირი მოვალეობაა სდევნიდეს ყოველს ბოროტმოქმედს ამისთანაებში და თვითონ პოლიციაც კი აფხიზლოს, რომ არავინ შემოაპაროს და სყიდოს ხალხის ჯანმრთელობისა და სიცოცხლის მავნებელი ხორავი და საჭმელ-სასმელი. პოლიცია ამჟღავნებს და აჩენს ამისთანა ბოროტმოქმედებას და სასანიტარო-სამკურნალოს მკურნალნი კი „კულტუროსან“ გამგეობისა კალთას აფარებენ და ყოველ ღონისძიებასა ჰხმარობენ დამპალი და აყროლებული თევზი გაასაღებინონ შაუშოვსა.

დამარცხებული და ამკარად შერცხვენილი სასანიტარო-სამკურნალო „კულტუროსნებისა“ გულს მაინც არ იტეხს: ამ სამარცხვინო ომში დამარცხებულ წინამძღოლებს ბნებს გონივს და სტეფანოვს ჯილდოებსაც აძლევს. აქ პირველისათვის ჯილდო ის არის, რომ თავის თანამდებობაზედვე დაარჩინეს, იქნება იმიტომაც,

რომ ტფილისს ხათრი შეუნახა, რადგანაც აქ ბევრი „კულტუროსანია“ და სხვა ქალაქელები მოიშინამებოდა თუ არა, იმისი ნაღველი სულაც არა ჰქონია, და მეორეს კი პიდაპირი ჯილდო მისცეს, დაამტკიცეს ინსპექტორად, იქნება იმიტომაც, რომ ამას არც ტფილისის ხათრი ჰქონია, არც არავის სხვისა, თავისიანებთან ერთად თანასწორად გულიდამ ამოულია არათავისიანიც, ოღონდ კი შაუშოვსა მყრალი თევზი გაასაღონ და ყველა ერთნაირად წახდინონ სომეხი და ქართველიცა. ამას უფრო დიდი ფარგალი დაუჭერია ხელში ამ შემთხვევაში და, რასაკვირველია, რომ დიდს ღვაწლს დიდი ჯილდოც მოეწყო და ეს ღვაწლი არ დაუკარგა ბრწყინვალე გამგეობამ „კულტუროსნებისა“. ბ-ნი სტეფანიანცი მიდგომით მაინც არ მოქცეულა ბ-ნი გონივისამებრ. ბ-ნი გონივი, რაკი დარწმუნებულა, რომ მყრალი და დამპალი თევზი ტფილისისათვის არ არის მოტანილი და სხვა ქალაქებისათვისაა, მარტო თავისიანები ტფილისისა შეჭბრალეობა, და ბ-ნი სტეფანიანცს კი ერთნაირად გამოუმეტნია სომეხი და ქართველიცა, ოღონდ შაუშოვსა ხელი წარემართოთ და ქონება შეიძინონ: ქონება ხომ კულტურის ნიშანია.

ეჰ, რაც არის, არის და კვლავაც იქნება კიდევ, თუ ღმერთი გაუწყრა ტფილისს და თავისს მკვიდრთა სვებედი, ჯანმრთელობა, დღეგრძელობა, სვებედი თავისის მკვიდრთა სიკვდილ-სიცოცხლისა ხელახლად ამ „კულტუროსანთა“ დასტას ჩააბარა. დიად, ეს სწორედ ჩვენის ცოდვის კითხვა იქნება, ჩვენზე ღვთის წყრომა და ღვთის რისხვა. დავანებოთ ამას თავი და მივინდნეთ ღმერთსა, სხვა გზა არ არის, რადგანაც დიდი ნიშნებია, რომ ტფილისელები თავის მოწამლვას დამპალისა და მყრალის თევზისაგან უფრო ადვილად ჰკისრულობენ, ვიდრე „კულტუროსანთა“ დასტის გამგეობიდან განდევნასა. შავი ჭირი მოდისო და ვშიშობთ, — და ამაზე მეტი სხვა ჭირილა იქნება!

ჩვენ ყოველივე ეს გვათქმევინა აუცილებელმა შიშმა, ყელში მობჯენილმა ნაღველმა, რომ ჩვენ, ჩვენი ცოლ-შვილნი, ჩვენი მახლობელნი ხელახლად ჩავცვივით ამა სახელოვან დასტის ხელში და მათის წყალობით ვინ მოიწამლება აყროლებულის, დამპალის

თევზით და ამნაირივე ხორავით – ეგ მარტო საიქიოს მოიკითხება. ჩვენ აქ ერთი სასაცილო ამბავი უნდა გვეამბნა და ამ შიშმა სიტყვა შორს წაგვალბინა.

საქმე ის არის, რომ შაუშოვის „სელდების“ ისტორიაში ერთი რამ საოცარი ამბავი მოხდა. როცა კამბისიამ გასინჯა შაუშოვის თევზი და აღმოაჩინა 61 ბოჭკა წამხდარი, ამ აღმოჩენილს ზოგიერთი „კულტუროსანთა“ კაცი ეურჩა და არ იჯერებდა თურმე. აღმოჩენელთ, რომ სხვა გზა არ იყო, უჯერონი დაეჯერებინათ, მოიწვიეს გამვლელ-გამომვლელთაგან ორიოდე უცხო მუშა და იმათაც გაასინჯეს. მუშებმა დაამოწმეს თურმე, რომ თევზი წამხდარია. არც ამას დასჯერდნენ უჯერონი და ერთმა მათგანმა სთქვა თურმე: შორს რად მივდივართ, მეცნიერება გვეუბნება, რომ ეგრედ წოდებული ლაკმუსის ქაღალდი თევზის წვენიში ამა და ამ ფრად შეიღებება, თუ წამხდარი არ არისო, – და დავეკითხით ამ უტყუარს მოწამესაო. მიიტანეს იგი ქაღალდი და ამოავლეს ერთს იმ ბოჭკის თევზის წვენიში, რომელსაც ზოგი წამხდარად სცნობდა და ზოგი არა. ქაღალდი იმ ფრად შეიღება თურმე, რომელიც ნიშანია მითამ მარტო სიკარვისა.

წარმომიდგენია უჯეროთა სიხარული, რა ამბავში იქნებოდა! მაგრამ ბოლოს რა გამოვიდა ამ მეცნიერების მოწმად მოწვევისაგან, ამ მართლა-და უტყუარს მოწამეს რა ბუქნა ჩააბუქნებინეს, რომ შავი თეთრად ეჩვენებინა, – ჯერ ამას ვერ გამოვამჟღავნებთ და არც იმ „მეცნიერის“ სახელს დავასახელებთ, რომელმაც ასე გაბედვით მოიწვია მოწმად მეცნიერება და რაც ოინი მოახდენინა.

რა თქმა უნდა, ეს ამბავი კამმისიის ოქმში არ არის მოხსენებული და მინამ უტყუარს საბუთებს არ მოვაგროვებთ, იმ დრომდე ეს ამბავიც ჩვენში დარჩეს. და თუ ჩვენ აქ ეს ამბავი ჯერ მარტო ისე გაკვრით მოვიხსენიეთ, მხოლოდ იმისათვის, რომ იქნება ხსენებულმა „მეცნიერმა“ იმოდენა მოქალაქური ვაჟკაცობა იქონიოს, თვითონვე მოგვითხრას, – რა იყო და რა მოხდა და ჩვენ იძულებულ აღარ გვყოს ამისთანა სამწუნარო ამბებისათვის საბუთები მოგვეგროვებინა.

ისტორია არუთინოვის „ტრიხინებისა“ არანაკლებ საოცარია შაუშოვის „სელდების“ ისტორიაზე. აქაც ყოვლად ბრწყინვალე გამგეობამ „კულტუროსნებისამ“ ინება და თვალი მაშინ გაახილა, როცა სხვამ და არა სასანიტარო-სამკურნალომ ღვითთ ცხონებულ ტფილისისამ ამოაფრთხო ეს საქმე თავისს განსასვენებელ საბუდარიდამ. ამ საქმის მელაბუობას გამგეობამ ჯერ პირველში კუდში ხელის წავლება კარგა ღონიერად მოასწრო. ბოლოს კი რაღაც განგებით და სასწაულით ეს მელაბუობა ხელიდამ გაუსხლტა და თუმცა იქავ სოროში შეუძვრა, მაგრამ ნაწყვეტი კუდისა კი ხელთ შერჩათ ღვითისა და თქვენის წყალობითა.

ისტორია არუთინოვის „ტრიხინებისა“ გრძელია და ვრცელი. ჩვენ ვეცდებით მოკლედ ვთქვათ, ხოლო იმოდენად სავსებით კი, რომ ყველამ აშკარად დავინახოთ: – ხელში შერჩენილი ნაწყვეტი კუდისა რამსიგრძეა და დღესაც როგორ იქნევს ბოლოსა „საკულტუროდ“.

დავიწყით ისტორია იქიდან, რომ სავეტერინარო ზედამხედველობა საყასბოსი და ერთობ სასანიტარო-სამკურნალო დადგენილ იქმნა 1892 წლის დეკემბერში. ყოველივე ეს იმიტომ დანახული იყო აუცილებელ საჭიროებად, რომ ამ სამინისტრო სამკურნალომ და მასთან ერთად სავეტერინარო ზედამხედველობამ უშიშარჰყო ტფილისელნი სხვათა შორის ავადმყოფ საკლავის ხორცისა და წამხდარ ხორავისაგან და იმისთანა ღორის ხორცისა და ღორისაგან, რომელთაც „ტრიხინი“ აქვთ. „ტრიხინიანი“ ხორცი, ხომ მოგეხსენებათ, იმისთანა საშიშარია ადამიანისათვის, რომ ათში თურმე ორი ძლივა ჰრჩება სიკვდილისაგან, ისიც თუ დროზე უშველა თავს. 1893 წელსა „ტრიხინიანი“ ღორების ხორცის, თუ ღორის, აღმოსაჩენად დასახულ იქმნა საყასბოსთან გაემართათ სამიკროსკოპო სადგური, რომ მიკროსკოპის შემწეობით ესინჯათ ხორცი, რადგანაც „ტრიხინი“ იმისთანა პაწიაა, რომ თვალთ ვერ დაინახება.

დაარსდა ეს სამიკროსკოპო სადგურიცა. მთელი ეს მოწყობილება სასანიტარო-სამკურნალო და სავეტერინარო ზედამხედველობა მთელის თავისის მოსამსახურებით კარგა მოზრდილს ხარჯს მოითხოვდა, რასაკვირველია. 1893 წ. იმის სახარჯოდ გამგეობის მიერ გადაღებულ და დახარჯულ იქნა 13.364 მანეთი, 1894 წ. – 16.018, 1895 წ. – 18.658, 1896 წ. – 21.760, აქედამ აშკარად სჩანს, რომ ხარჯი ყოველწლივ ჰმატულობს. ასე, რომ პირვანდელ 13.364 მანეთიდან ავიდა 21.760 მანეთამდე. აშკარაა ამ ხარჯის მატებას უნდა მოჰყოლოდა მატება უშიშროებისა, რომ აი თანდათან შიში ხალხის ჯანმრთელობის წახდენისა და, – იქნება, – შიში ხალხის ხოცვისაც წამხდარ ზორაგისგან, განელდება, კლებასში შევა, თუ სულ არ მოისპობაო.

ჩვენი საგანი რადგანაც ღღეს მარტო ტრიხინების საქმეა, ჩვენ ვეცდებით უტყუარის საბუთებით დავასურათოთ ხსენებულ ხარჯის მატებამ რა ხერი დააყარა ტფილისის მცხოვრებელთა და რამოდენად სძლია ტრიხინებსა. რომ ეს ნამდვილად შევიტყოთ, საჭიროა გამოირკვეს იმ დღემდე, როცა ეს სასანიტარო-სავეტერინარო ზედამხედველობა დაწესდა, რამდენად დიდი იყო ტფილისში შიში ტრიხინისა და ამ შიშმა რამდენად იმატა თუ იკლო მას შემდეგ.

ჩვენ ხელთა გვაქვს, საბუთი მარტო შესახებ 1890 წლისა და სხვა წინა წლებისა, სამწუხაროდ ჩვენდა, არ ვიცით. ამ წლიდან კი 1892 წლის დეკემბრამდე, როცა ხსენებული ზედამხედველობა დაწესდა და დაიწყო თვისი მოქმედება ტფილისში, არც ერთი შემთხვევა არა ყოფილა ღორის ზორცში ან ღორში ტრიხინი აღმოჩენილიყო. მაგალითებრ, 1890 წელს 100 ღორი გაუჩხრეკიათ და იმათში სულ არ აღმოჩენილა ტრიხინი<sup>1)</sup> მაინც სიფრთხილეს თავი არ სტკივაო და კიდევ 1891 და 1892 წლებშიაც უსინჯავთ და უჩხრეკიათ და, სასანიტარო მკურნალის ბ-ნი ვართანიანცის სიტყვით,

<sup>1)</sup> იხ. Доклад управы об организации исследования свиных туш №747ш года 1893-го.

ჩვენებურ ღორის ღორებში უპოვიათ არამცთუ **ძ-ინი**<sup>1)</sup> /ქართულად „გვარი“ ჰქვიან/, არამედ ტრიხინიცა. თუმცა ბ-ნი ვართანიანცს ასე დაურწმუნებია „ტფილისის“ „კულტუროსანთა“ საბჭო, მაგრამ 1891-1892 წლებში ტრიხინის ხსენებაც კი არ არის ამ წლების სიებში, რომელსაც ყოველ წლივ წარუდგენს ხოლმე სასანიტარო მკურნალი ტფილისის გამგეობას, **ძინს** კი იხსენიებს.<sup>2)</sup>

პირველი ტრიხინიანი ღორი აღმოჩენილა მხოლოდ 1893 წლის დეკემბერში, ისიც მარტო ერთი შემთხვევა ყოფილა 6615 ღორში.

ამ სახით, გამოდის, რომ მინამ სასანიტარო-სამკურნალო და სავეტერინარო ზედამხედველობა დაწესდებოდა, ტრიხინისა თითქმის ხსენებაც არ ყოფილა ტფილისში, მართალია, 1890 წინა წლების ცნობანი არა გვაქვს, მაგრამ ამ წლიდან თითქმის 1894 წლამდე ხომ უსინჯავთ, უჩხრეკიათ და არა აღმოჩენილა რა. თუ უწინაც ყოფილიყო, არ შეიძლება ამ სამოთხ წელიწადშიაც ტრიხინას თავი არ ეჩინა ერთხელ მაინც. თავი იჩინა მხოლოდ 1893 წლის დეკემბერში, ისიც მარტო ერთს შემთხვევაში 6615-ისაგან. ეს დავისსომოთ: 1893 წ. ერთი ტრიხინიანი აღმოჩნდა 6615 ღორში ტფილისის საყასბოში.

1894 წელის იანვარში, ესე იგი, ერთი წლის შემდეგ, როცა ჩვენის ჯანმრთელობის პატრონი სასანიტარო-სავეტერინარო ზედამხედველობა დაწესდა, ანაზ-დად გატყვრა ტფილისის საყასბოში ათი ტრიხინიანი ღორი, თებერვალში – 15, მარტში – 3, აპრილში – 1,<sup>3)</sup> სექტემბერში – 1, ოკტომბერში – 4, ნოემბერში – 10, დეკემბერში – 12. ამ სახით, გამოდის რომ 1894

<sup>1)</sup> „ძ-ინი“ ანუ ქართულად „გვარი“ ისე საშიში არ არის, როგორც ტრიხინი

<sup>2)</sup> იხ. ведомость досмотра скота по городской бойн в течение 1891 года.

<sup>3)</sup> უნდა მოგეხსენებოდეთ, რომ მაისიდან ოქტომბრამდე ტფილისის საყასბოში ღორი აღარ იხოცება, თვითნა „კულტუროსანთა“ მკურნალნი ამბობენ, რომ ღორის ხოცვა სექტემბრიდან იწყება. დეკემბერს, იანვარს და თებერვალში ძლიერდება და მერე კლებასში და მაისში კი, ხან აპრილშიაც თავდება სრულიად.

წელს – 56 ტრიხიანი ღორი ყოფილა დაკლული ტფილისის საყასბოში.

1895 წლის იანვარში 18 ტრიხიანი ღორი აღმოჩენილა საყასბოში დაკლული, თებერვალში – 10, მარტში – 2, სექტემბერში – 5, ოქტომბერში – 8, ნოემბერში – 12, დეკემბერშიც – 12, სულ 67 ტრიხიანი ღორი.<sup>1/</sup>

რომ ცხადად იყოს ყველაფერი და თვალწინ და შევიტყვოთ რამოდენად უბარტყნია ჩვენში ტრიხიანს ღორს იმ დღიდან, როცა სასანიტარო-სამკურნალო და სავეტერინარო ზედამხედველობა ჩვენდა საკეთილდღეოდ დაუწესებიათ, საჭიროდ ვხედავთ შემდეგი სქემა აღვნიშნოთ, საცა ვაჩვენებთ რა წელიწადში რამდენი ღორი დაკლულა და იმათში რამდენი ტრიხიანი ღორი ყოფილა.

წელიწადი	დაკლული ღორი	ტრიხიანი
1893	15410	1
1894	16637	56
1895	15475	67
1896	17558	54 <sup>2/</sup>

ამ სახით, გამოდის, რომ მატებას ზედამხედველობის ხარჯვისას ამაოდ არ ჩაუვლია. თუ გასავალს უმატნია, შემოსავალიც არ ჩამორჩენილა უკან: სულ ერთი ღორი ჰყოლიათ 1893 წელს ტრიხიანი და ეს ერთადერთი ტრიხიანი ღორი 1894 56-ად და 1895

<sup>1/</sup> ეს ცნობა სულ თვითონ „კულტუროსანთა“ გამგეობის სიგელებიდანაა გვაქვს ამოღებული. იხ. Ведомость досмотра скота на городской бойн за 1894 и 1895 г.г. და სხვა სარწმუნო წყაროებიდან.

<sup>2/</sup> ნუ გაგიკვირდებათ, რომ ვერე მატებით სვლამ ტრიხიანი ღორებისა უცხად 1896 წელს ვერე ძირს დაიწია, თუმცა დაკლულის ღორის რიცხვმა ამ წელს იმატა სხვა წინა წლებზე, ამას თავის მიზეზი აქვს და თავისს ადგილას და თავისს დროზე დავინახავთ და აი ძაღლის კუდიც აქ არის დამარხული სხვათა შორის.

წელს 67-ად უქცევიათ. მეტი გაძლიერება იქმნება შემოსავლისა ერთი ორმოცდათექვსმეტად და სამოცდაშვიდად აქციოს კაცმა! აი „კულტურაც“ ამასა ჰქვია.

რის „კულტურაო“? იკითხავთ. „კულტურა“ ტრიხინისა. დიას, ტრიხინის გამრავლებასაც „კულტურა“ ჰქვია, ანუ როგორც რუსები იტყვიან: „Культивирование трихины“.

საიღამ დაიწყო ამ „კულტივიროვანიემ“ და როგორ შეიმოსა ძლევიტ, ამას მერმედ მოგახსენებთ. ამას კი გთხოვთ, იცოდეთ, რომ ყოველ იმისი, რაცა ვსთქვით, უტყუარი საბუთებით დამტკიცება შეგვიძლიან.

ტფილისი, 3 მაისი

ჩვენ წინა წერილში<sup>\*)</sup> ვაჩვენეთ, რამოდენად ჰბარტყობდა ჩვენში ტრიხინა იმ დღიდან, რა დღიდანაც დაიწყო თვისი მოქმედება სასანიტარო-სავეტერინარო ზედამხედველობამ „კულტუროსანთა“ მკურნალობა ხელში. დაკლულის ღორის ანგარიშის კვალობაზე რომ ავილოთ რიცხვი ტრიხინიანებისა, გამოდის:

- 1893 წ. – 0,006 %
- 1894 წ. – 0,3 % ცოტა მეტიც,
- 1895 წ. – 0,4 % ცოტა მეტიც,<sup>1/</sup>
- 1896 წ. – 0,3 % ცოტა მეტიც.

მატება ტრიხინიანის ღორისა აშკარაა და დაუჯერებელი, თუმცა ეს ციფრები ჭეშმარიტია. 1893 წელს საყასბოში დაკლულ ასი ათასს ღორში მოდის ექვსი ტრიხიანი, 1894 წ. ათასზედ – სამზე მეტი, 1895 წელს ათასზე ოთხზე მეტი და 1896 წელს ათასზე – სამზე მეტი.

ასეთმა მატებამ მიიქცია ყურადღება მთავრობისა და არც შესაძლოა არ მიექცია, მით უფრო, რომ ტფილისის სამკურნალო ნაწილს გუბერნიის გამგეობისას ყოველ წლივ მისდის სია, საცა ნაჩვენებია

<sup>\*)</sup> „ივერია“ № 85

<sup>1/</sup> ეს მეტები აღარ მოგვყავს, მეტად წვრილი ნაწილებია და ციფრების აჭრელებას ვერიდებით, თუმცა მათი დამატება უფრო აძლიერებს საბუთის ჩვენის დასკვნისას.

სხვათა საკლავთა შორის რამდენი ღორი დაკლულა საყასბოში და და იმათში რამდენი ღორი აღმოჩენილა ტრიხინიანი. ამ მიზეზით, თუ თავისის საკუთარის თაოსნობით, გუბერნიის მკურნალი ბ-ნი ქიქოძე, როგორც მთავრობის კაცი, ერთს მშვენიერს დღეს 1896 წლის მარტში წასულა საყასბოს დასათვალისწინებლად და უნახავს, რომ იქავ საყასბოს ახლოს დგანან ზოგიერთი ყასბები, რომელნიც ღორსა ჰხოცვენ და ღორებს ამზადებენ და ჰყიდებიან. ყველაზე ახლო მდგარი კევორქა, თუ გეურქა არუთინოვი, რომელსაც თურმე საკუთარი სახლი ჰქონია და ბ-ნი ქიქოძეს მოუსურვებია ყველაზე უწინ აქ გამოეკითხა, აქვთ თუ არა ღორის ხორცი და ღორები.

თვითონ არუთინოვი შინ არ დახვედრია და ცოლი და მამა გამოსულან. ბ-ნი ქიქოძეს უკითხავს: ხომ არა გაქვთ სადმე ღორის ხორცი ან ღორებიო? უპასუხნიათ – არაო. აბა საკუჭნაო გააღეთო, უბძანებია და არუთინოვის ცოლი და მამა ჯერ უარზე დამდგარან, რადგანაც თვითონ პატრონი შინ არ არის და გასაღებიც არა გვაქვსო. მერე კი, როცა ბ-ნი ქიქოძესთან ყოფილს პოლიციის ბოქაულს უთქვამს, კლიტეს გავტენ, თუ თქვენის ნებით არ გააღებთო, უკადრიათ და გაუღიათ საკუჭნავო. საკუჭნაოში აღმოჩენილა სამი ბოჭკა მარილში ჩადებული ღორის ხორცი. ამოუღიათ ხორცი და უნახავთ სხვადასხვა ნაჭერი ღორის ფეშხვისა და სხვათა შორის 32 ღორი /Окорок/, რომელსაც არა ჰქონია დამლა ქალაქის საყასბოსი, და ექვსი კი დამლიანი ყოფილა. ბ-ნი ქიქოძეს ერთი უდამლო ღორი გაუსინჯავს საცდელად და იგი ტრიხინიანი აღმოჩენილა. ბ-ნი ქიქოძეს დაუბეჭდია ეს ტრიხინიანი ღორი და რადგანაც გვიან ყოფილა და სხვების გასინჯვა ვეღარ მოუსწრიათ, სულ, რაც ღორები უპოვიათ არუთინოვის საკუჭნაოში, ბ-ნი ქიქოძეს ჩაუბარებია პოლიციის ბოქაულისათვის, შეუკვეთნია გაღიბანოს იქავ საყასბოს სამიკროსკოპო სადგურში და იქ შეინახოს

<sup>1/</sup> არ ვიცი, ეს ამბავი სადმე მოხსენებულია თუ არა და ნამდვილი კია და ყოველ ეჭვარემე.

ხელუხლებლად, ვიდრე ახალს განკარგულებას მიიღებდეს.

მეორე დღეს, თუ ცოტა მერმედ, ეს 32 ღორი, ნაპოვნი არუთინოვის საკუჭნაოში, გასინჯული იქმნა მიკროსკოპის შემწეობით და 32 ღორში აღმოჩნდა 22 ტრიხინიანი, რომელიც შეადგენს  $68 \frac{3}{4} \%$

$$22 \times 100$$

$$\frac{\text{-----}}{32} = 68 \frac{3}{4} \%, \text{ თუმცა ოქმებში კი ნაჩვენებია}$$

$$32$$

65%, ისევე ამ რიცხვებიდამ გამოყვანილი.

ადმინისტრაციამ, რაკი შეიტყო ბ-ნი ქიქოძესაგან ეს ამბები, მაშინვე აცნობა ტფილისის მოურავსა და, რა უჩვენა ნაკლულევანება ტფილისის საყასბოსი და სავეტერინარო ზედამხედველობისა, აღნიშნა, ტფილისის საყასბო აღმოჩნდა ტრიხინების გამრავლების ბუდედო. ამასთანავე დაავალა მიელო ზოგიერთი ზომა წესისა და რიგის ჩამოგდებისათვის. აქ ფრიად შესანიშნავია ერთი გარემოება და ვთხოვოთ მკითხველებს, ყურადღება მიაქციონ და კარგად დაიხსომონ. საქმე ის არის, ადმინისტრაციას მიუწერია ზემოხსენებულ ამბებთან ერთად, რომ, თუ ვინიცობაა, სავეტერინარო ზედამხედველობისათვის კაცები ნაკლები გყავთ და ვერ ასდიან თავისს საქმეს, ადმინისტრაცია მზად არის თავისი ვეტერინარები მოგაშველოთო. იქნება გეგონოთ, რომ ბრწყინვალე გამგეობას „კულტუროსანებისას“ ამისთანა გულმოდგინებისათვის მადლობა შეუთვლია და სიხარულით მიუღია ასეთი შველა და შემწეობა ადმინისტრაციისა? ნურას უკაცრაოდ. გამგეობას დაუდგენია: ცნობილ იქმნას, რომ საჭირო არ არის შევაწუხოთ მთავრობის ვეტერინარებიო, ჩვენებიც საკმაონი არიანო.<sup>2/</sup>

გამგეობამ მოსთხოვა ცნობანი სავეტერინარო ზედამხედველობის უფროსს ისპანდარიანცსა და მიელო რა ეს ცნობანი, დაწვრილებით გამოკვლევა გეურქა არუთინოვის ტრიხინებისა დაავალა გამგეობის წევრს

<sup>1/</sup> ეს უტყუარი საბუთით შეგვიძლიან დავამტკიცოთ.

<sup>2/</sup> როგორც ეს ამბავი, ისეც დანარჩენი სხვები, რაც ქვევით იქმნება, უტყუარ საბუთებზეა დამყარებული.

ბ-ნს ხოსროვეს. ბ-ნმა ხოსროვემა უარი სთქვა და იცით, — რა საბუთით? მე სავაჭრო-სამეურნეო /торгово-хозяйственная/ პოლიცია მბარბაო და რადგანაც არუთინოვს სხვათა შორის ბრალი ედება, რომ ჩუმად უნოცნია ღორი და ეს საგანი საკუთრივ მე მექვემდებარებაო, ამიტომაც შეუსაბამოდ /неудобным/ მიმაჩნია ჩემს ხელქვეითებს მოხელეებზე გამოძიება მევე მოვანდინო და ვთხოვ გამგეობასა დადგინილება თავისი გააუქმოს და სხვა წევრს გამგეობისას დაავალოსო. ეს საბუთი შეუწყნარებია გამგეობას, გაუუქმებია პირვანდელი განაჩენი თვისი და ახალის განაჩენით, გამოძიება დაუვალეობა ბ-ნ ივანენკოსათვის.

ჩვენ არ ვიცით, იქნებ მართლა შეუსაბამო იყოს, უფროსმა მოხელემ უმცროსს საქმეები და მოქმედება გაუსინჯოს, ანგარიში მოქმედებისა მოჰკითხოს, ავკარგიანობა გამოუძიოს. ჩვენ ამაზე ვერას ვიტყვით, იმიტომ, რომ „კულტუროთა“ თესლის კაცნი ვართ, ჩვენ „კულტურა“ ძილში გაგვეპარა იქნება ამ ახალმოდურმა „კულტურამ“ ეს პირდაპირი ვალდებულება უფროსის მოხელისა გარდასცვალა, ან გააუქმა და ჩვენ სად დავინახავდით? ხოლო ეს კი უეჭველია, რომ „კულტუროსანთა“ გამგეობა იმ მართლა და შეუსაბამო მოძღვრების მიმდევარი და მორწმუნე ყოფილა, რომ უფროსის მოხელისათვის შეუსაბამობაა სინჯვა და ძიება უმცროსის მოქმედებისა.

ჩვენ კი ამ „კულტურა“ მოკლებულებს, დღესაც გვკონია, რომ უფროსს მოხელეს არავინ დაემდურება, რომ სხვისაგან დაუვალეობადაც მოქმედება თვისის ხელქვეითისა განიკითხოს. უკან ჩამორჩენა იქნება და ასეთი. მართალნი არიან „კულტუროსანთა“ გაზეთები: ძალიან ჩამოვრჩენილვართ ჩვენ, ქართველნი, „კულტუროსანთა“ მიერ ქალებულს და მოტანილს „კულტურას“!.

ბ-ნი ივანენკო რუსია და ნეტა რუსი რომ არ ჰყოლოდათ, გამოძიებას „კულტუროსან“ არუთინოვის საქმისას, საცა „კულტუროსანთავე“ მკურნალნი ჰფუსფუსებენ, ვინ იკისრებდა დანარჩენ გამგეობის „კულტუროსან“ წევრთა შორის? რა თქმა უნდა, და ჩვენც დარწმუნებულნი ვართ, რომ ამისთანა წევრნიც

აღმოჩნდებოდნენ, მაგრამ ეს წყეული საკითხი, გინდა თუ არ გინდა, ენის წვერზე დაეკიდება კაცს, ყოველ ამის გამგონსა, აშკარაა, უმიზეზოდ და უსაბუთოდ კი.

ბ-ნმა ივანენკომ იკისრა და შეუდგა გამოძიებას. გამოძიება, რომელიც ბ-ნმა ივანენკომ წარუდგინა გამგეობას და მერე გამგეობამ საბჭოს, საკმაოდ საფუძვლიანი გამოძიებაა, იმოდენად საფუძვლიანი, რომ ნასკვი საქმისა დასანახავ იქმნა და საბჭოში, როცა იგი გამოძიება მოახსენეს პირველად, არა ერთმა და ორმა ხმოსანმა საკმაოდ დაინახა საქმე პროკურორს გადაეცეს. გამოძიება ბ-ნის ივანენკოსი ჩვენ ხელთა გვაქვს. ჩვენ იგი საკმაოდ საფუძვლიანად ვიცანით, რადგანაც „მართალი“ ბოროტმოქმედებისა, როგორც „ფაქტი“, უეჭველად დადგინილია. დადგინდა ადმინისტრაციის დასკვნა, რომ ბუდე ტრინინების ბლარტობისა სწორედ ტფილისის საყასბო ყოფილა. ამ გამოძიებას მხოლოდ ერთი ნაკლულევანება შევნიშნეთ: ბოროტმოქმედი ვერ გამოაჩინა. ბოროტმოქმედი დაიკარგა ოთხ სულიერთა შორის: ერთი ბ-ნი ისპანდარიანცია, უფროსი სავეტერი-ნარო ზედამხედველობისა, მეორე ტერ-სიმონიანცი, მესამე გეურქ თუ კევორკ არუთინოვი და მეოთხე იცით ვინ? სასაცილოა სათქმელად: თავგები! დიან თავგები, საყასბოს თავგები, რომელთ ხსენებაც არ არის ბ-ნ ივანენკოს გამოძიებაში. თავგები აქ რა სახსენებელიაო, იკითხავთ? მერე ჰნახავთ რა სახსენებელიც არის. ეხლა კი ამას ვიტყვით: ეგ თავგების მონაწილეობა რომ სცოდნოდა ტფილისის „კულტუროსანთა“ საბჭოს მთელი ერთი წელიწადი არ გააჭიანურებდა ამ საქმეს და იმ მოძღვრობით, რომ მიზეზ-მიზეზ დოს მარილი აკლიაო, ამ თავგებს გადააბრალებდა ყველაფერს და სახელოვანს ტრინინის საქმეს არუთინოვისას პირველჯერვე, ესე იგი, შარშანვე ჩაილურის წყალს გაატანდა და აღარ მოუნდებოდა წელს, ამ ერთის კვირის წინ, დაედგინა: დავიწყებას მივცეთო. ჩვენ ვირჯებით ვითარცა პირუთენელი და მიუდგომელი მკვლევარი საქმისა და ეხლანის დადგინებას საბჭოსას ხელჩასაჭიდებელი და გასამართლებელი საბუთი მოვუნახეთ და ვუპოვეთ კიდევ. თუ რომი, დიდი რომი, ბატებმა დაიხსნეს, ტფილისის საბჭო რომ თავგებმა დაიხსნან —

რასაკვირველია, ან სათაკილო და სასაცილო რად უნდა იყოს!

ბოდიშს ვიხდით, რომ ამ საოცარს საქმეს ტრიხინებისას ესე წვეთ-წვეთად ვაწვდით მკითხველს. ჯერ ისტორიის დასასრული კარგა შორს არის და ვეცდებით ამ ერთს კვირაში გავათავოთ.

ტფილისი, 7 მაისი

ჯერ მინამ ბ-ნ ივანენკოს ნაძიებს გამოვაქვეყნებდეთ, საჭიროა ვიცოდეთ ყოველთ უწინარეს ზოგიერთი რამ, ურომლისოდაც ძნელია კაცმა აზრი რამ შეადგინოს სავსებით შესახებ არუთინოვის ტრიხინების საქმისა. ამ მიზეზით ნუ დაგვემდურებიან, რომ ჩვენს დღევანდელს წერილს ცოტა შორილამ დავიწყებთ.

ტფილისის საბჭოს დადგენილი აქვს – ვინ და რა წესით უნდა განაგებდეს სავეტერინარო ზედამხედველობას ტფილისის საყასბოისას. ამ დადგენილებიდან სჩანს, რომ ქალაქის საყასბოს ზედამხედვლობა აბარია სავეტერინარო მკურნალს ისპანდარიანცსა და მას ახლავან: ა/ თანაშემწე მისი სავეტერინაროვე მკურნალი, ბ/ ორი საყასბოს შემოსავლის ამკრები, გ/ ფერშალი, დ/ ყარაული საყასბოსი.

მეოთხე მუხლი ამ დადგენილებისა ამბობს, რომ როცა თვალად ისინჯება მორეკილი საკლავად საქონელი ფეხზე, ან დაკვლის დროს, ანუ, როცა ისინჯება უკვე დახოცილიცა თანდასწრება ორის სავეტერინარო მკურნალისა და ყველა სხვათა საყასბოსთვის დანიშნულ მოხელეთა სავალდებულოა. ამ სინჯვის დროს საყასბოს გამგებელი /ამ შემთხვევაში ბ-ნი ისპანდარიანცი/ ანაწილებს მოხელეთა შორის საქმესა, რომელიც უნდა სწარმოებდეს მაინც მისდა პირდაპირ ზედამხედვლობის ქვეშ.\*

\* თავისი სიტყვით ნამბობი ყოველთვის მიზეზიანი რამ არის. რომ არავინ შეგვეწამოს გადასხვაფერება ამ მეოთხე მუხლისა, იგი სიტყვა-სიტყვით მოგვყავს რუსულად:

„Во время наружного осмотра скота, убоя, осмотра туш и проч. присутствие (не исключая и праздничных дней) двух ветеринарных врачей и прочих служащих при боине о б я з а т е

მეშვიდე მუხლი ამბობს, რომ უვარგისი ხორცი, ან ნაჭრები, მთელი დაკლული უნდა მოსპობილ იქმნას. რა გზით? ამის პასუხს იძლევა სხვა განაჩენი საბჭოსივე, რომელსაც ჰქვია: სავალდებულო დადგენილებანი შესახებ ღორის ხორცის გასყიდვისა: სნეულიანი /Зараженные туш/ ხორცი ცეცხლში უნდა დაიწვასო.

ქალაქის ხარჯთაღრიცხვაში ცეცხლში დაწვის ხარჯად ყოველწლივ დანიშნულიყო ორმოცი თუმანი.

მაშ დავისხომოთ: ბ-ნს ისპანდარიანცს ნება არ ჰქონია მარტოდ მოეხდინა სინჯვა საკლავისა, თუ დაკლულისა, ღორი იქნებოდა, ძროხა, თუ სხვა საკლავი რამ. თანდასწრება სხვა მოხელეთა სავალდებულო ყოფილა, რაც როცა სინჯავა. ეს ერთი.

მეორე ისა, რომ თუმცა ბ-ნს ისპანდარიანცს ნება ჰქონია საქმე გაენაწილებინა მოხელეთა შორის, მაგრამ თითონ სინჯვა კი არა, არამედ ყოველივე ის, რაც სინჯვისათვის საჭიროა, მაგალითებრ, წესი, რიგი და ჯერი საკლავის სასინჯავად მორეკისა, რომ ერთი მეორეს არ შერევიდა, აღნუსხვა მორეკილის საკლავისა, გასინჯულისა, უვარგისად, ანუ ვარგისად ცნობილისა და სხვა ამგვარი, ერთი სიტყვით, ყოველივე ის, რაც სინჯვისათვის სათანადო და საკუთნოა და რაც მისს ვითარებას და გარემოცულობას, მზადებას შეეხება. თვითონ სინჯვა კი საერთო თანდასწრებით უნდა მომხდარიყო უსათუოდ.

მესამე ის, რომ უვარგისი ხორცი, ან სნეულის პირუტყვისა უსათუოდ უნდა ეწვათ ცეცხლში და ამის სახარჯოთ ორმოცი თუმანი იყო დანიშნული ყოველწლივ.

ბ-ნ ივანენკოს გამოძიებით აღმოჩნდა, რომ ღორის ხორცის და ფეშხობის სინჯვა ერთხელ და სამუდამოდ დაუჩემებია საკუთრად ბ-ნს ისპანდარიანცსა და ამ სინჯვისაგან დაუთხოვნია ყველა სხვა მოხელენი. ამასვე ამტკიცებს თვითონ ისპანდარიანცი თავისს პასუხებში, რომელიც მიუცია, ვკონებთ, ბ-ნ ივანენკო-

л ь н о . При чем работа распределяется между всеми служащими заведывающим бойнями и производится под непосредственным его надзором “.

სათვის. ვამბობთ, „ვკონებთო“ – იმიტომ, რომ ამ პასუხს ზედ აწერია: Об’яснение, და არა სწერია კი ვის აძლევს „Об’яснение“-ს და არც თარიღია აღნიშნული, რა დროს მიუცია, თუმცა ამკარაა, რომ არუთინოვის ტრიხინების გამოა იგი დაწერილი.

ბ-ნი ისპანდარიანცი ამ „Об’яснение“-ში ასე მართლულობს თავსა: საქმე სავეტერინარო ზედამხედველობისა მეტად რთულია და ბევრიო და ამიტომ მე მივინდე საკუთრივ საკლავისა და დაკლულის ღორის სინჯვაო და სხვა ნაწილში ზედამხედველობისაო, სხვა საკლავების და დაკლულების სინჯვა სხვა მოხელებ შორის განვანაწილეო. ჩვენ კი ვიტყვი, სინჯვა ღორისა იქნებოდა თუ სხვა საკლავისა, საბჭოს დადგინების მეოთხე მუხლის ძალით, ცალკ-ცალკე არავის უნდა მიჰნობოდა და დაეჩემნა: სინჯვა უსათუოდ ერთმანეთის თანდასწრებით უნდა ყოფილიყო და არა ერთს ღორის სინჯვა დაეჩემებინა და მეორეს სხვა პირუტყვისა.

ესე მართლულობს თავს ბ-ნი ისპანდარიანცი 1896 წელს, როცა არუთინოვის ტრიხინების საქმემ გამოჰყო თავი, ხოლო 1894 წლის ანგარიშში კი, რომელიც საცა ჯერ არს წარუდგენია, ირწმუნება, რომ თუმცა საყასბოს გამგებელისაგან /ესე იგი, თვითონ ისპანდარიანცისაგან/ საქმე განაწილებულ იყო მოხელეთა შორის, მაგრამ დაკვლასა და სინჯვას კი ყველა მოხელენი უნდა დასწრებოდნენ ყოველ დღეს, თუნდ უქმე ყოფილიყო. ამკარაა, ბ-ნი ისპანდარიანცს პირველში მეოთხე მუხლის ძალა საბჭოს დადგენილებისა ზედმიწევნით გაგებული ჰქონია 1896 წლამდე და მერე კი ეგ ზედმიწევნით გაგება სადღაც გაფრენილა, საბჭოს დადგენილება გაუუქმებია და თავისი საკუთარი წესი შემოუღია საბჭოს ნებადაურთველად.

ხორცი უვარგისად ცნობილი და მათ შორის ტრიხინიანი და ჩინიანი ღორები იშვიათად უწვათ /ჩვენება გოროდოვოისა/, ტრიხინიანი და ჩინიანი დაკლული ღორი უძლევიათ საპნის მხდელებისათვის და იმათ ხარშვით უნდა გამოეცვლევინათ თურმე ქონი. ამას თვითონ ბ-ნი ისპანდარიანციც ამტკიცებს, ხოლო ხსენებულს 1894 წლის ანგარიშში კი ირწმუნება, რომ

„Зараженные туш“ და. მაშასადამე, ტრიხინიან და ჩინიანს ხორცს ღორისას სულ მთლად ვწვადიო. ბოლოს, როცა არუთინოვის საქმის გამო კითხულ იყო, იგივე ისპანდარიანცი ამბობს, რომ დაწვას ვერ ვახერხებდიო, ხან წვიმა-ავდარი გვიშლიდა და მერე იმიტომ, რომ ამისათვის ჯეროვანი მოწყობილება, მაგალითებრ, საწვავე „ფენი“ არა გვქონდა და არც დახურული ადგილიო. ამიტომ უფრო სახერხოდ დავინახეო, ამბობს ბ-ნი ისპანდარიანცი, ტრიხინიანი და ჩინიანი ხორცი ღორისა საპნის ქარხნებში მეძლია ქონის სახდელად. ეს ქარხანაში ძლევა ღორის ჭირიან ხორცისა გამოძიებითაც დამტკიცდა.

ხოლო საკითხავი ეს არის: რა უფლებით შესცვალა ისპანდარიანცმა იგი წესი ჭირიანის ხორცის სპობისა, რომელიც პირდაპირ ავალედა ცეცხლით დაწვასა? ეს ერთი. მეორე ის, რომ თუ არა სწვადა, 1894 წლის ანგარიშში რად არწმუნებდა თვისთა უფროსთა, რომ ვწვაო? მესამე ის, რომ თუ სწვადა, რატომ მაშინ არ უშლიდა წვიმა და ავდარი, ანუ ის გარემოება, რომ დახურული ადგილი, ან „ფენი“ არა ჰქონდა?

„კულტუროსანთა“ ბრწყინვალე გამგებამ მოჰკითხა პასუხი ამ „იყო და არა იყო“-სი სასანიტარო-სამკურნალო ინსპექტორს ბ-ნს სტეფანიანცს, რომელსაც უმაღლესი ზედამხედველობა ამაებისა აბარია, სხვათა შორის, – ეს როგორი ამბავია, ისპანდარიანცი თავისს ანგარიშში და თქვენსაში გვარწმუნებთ, რომ ტრიხინიანი და ჩინიანი ღორების ხორცს ვწვავდითო და ბოლოს კი გამოჩნდა, რომ არ უწვათ და საპნის ქარხნებში უძლევიათ ქონის გამოსაცვლეულად.

ბ-ნი სტეფანიანცი ამაზე ძალიან მოკლე პასუხს იძლევა, როგორც მოგეხსენებათ კანცელიარულ მიწერმოწერის ამბავი, ოღონდ ქალაღლი თავიად მოვიშროო. მეო, ბძანებს ბ-ნი სტეფანიანცი, ჩემი ანგარიში დავამყარე ბ-ნი ისპანდარიანცის 1894 წლის ანგარიშზედაო და არავითარი საბუთი არა მქონდა ეს მისი ანგარიში არ დამეჯერაო. ბ-ნი ისპანდარიანცი არა ერთხელ მარწმუნებდა სიტყვით და ხან, თუ საყასბოში ვიქნებოდი და ჩემს იქ ყოფნის დროს სწვავდნენ უვარგისად ცნობილ ხორცსა, მეც თვითონ ჩემის



თვალთ მინახავს ეს წვაო. ამასთან ისპანდარიანცის ანგარიშში საუბარი 1894 წლის ამბებისა არისო და ეს ამბები კი, რომ არ უწევთ, 1895/6 წლებს ეკუთვნისო. ამითი გაათავა ბ-ნმა სტეფანიანცმა თავისი საუცხოვო პასუხი.

რა თქმა უნდა, არავინ უთხრა ბ-ნს სტეფანიანცს: ვთქვით ეგრეც იყოს, როგორც ბძანებთ, ხოლო რომ გვარწმუნებთ დავდიოდი საყასბოში, ერთხელ მაინც როგორ არ შეჭნიშნეთ ეს უცნაური „იყო და არა იყო რა“ და არ შეგვატყობინეთ, რომ ბ-ნი ისპანდარიანცი გადასულა ჩვენს დადგენილებას და სხვა თავისი წესი შემოუღია წამხდარის ხორცის მოსპობისათვის ცეცხლით დაწვის მაგიერ? თუ ბ-ნმა ქიქოძემ და მერე ბ-ნმა ივანენკომ პირველ მისვლაზევე შეიტყეს იმოდენა ამბები, თქვენ ხომ რამდენჯერმე ჰყოფილხართ საყასბოში და რას აკეთებდით, როცა დადიოდით, თუ არაფერი გითვალისწინებდათ, არაფერი მოგიკითხავთ, არაფერი გინახავთ, არაფერი გაგივინიათ და არაფერი გიძიებდათ? და თუ გიძიებდათ, ის მაინც როგორ არ შეჭნიშნეთ, რომ გაფუჭებული, უვარგისი ხორცი, დადგენილებისამებრ, არ უწევთ და სადღაც საპნის ქარხანაში უძღვევით და თუ შეჭნიშნეთ, რატომ ერთხელ მაინც არ გვაცნობეთ ჩვენმიერ დადგენილის წესის შემლა? პირიქით, ეხლაც გვეუბნებით, როცა კი საყასბოში ჰყოფილხართ და იმ დროს წვა ყოფილა, ე“ წვა ჩემის თვალთ მინახავსო.

მართალია ეს „როცა“ და „იმ დროს“ იმისთანა სახედარია, რომ „ჰოსაც“ აჰკიდებს კაცი და „არასაც“ იმისდა მიხედვით – რა დროს რაა საჭირო, მაგრამ მაინც სანატრელია ვიცოდეთ: რამდენჯერ ყოფილა საყასბოში ბ-ნი სტეფანიანცი, რა უძიებია და რამდენჯერ დასწრებია ჭია-კოკონას? ეს გამოძიებული არ არის და, როგორ გვინიათ, არა ღირდა გამოსადიებლად, რომ შეგვეტყო სავეტერინარო ზედამხედველობას ვინ აღევნებდა თვალს და როგორ?

ეჰ, რაც არის, ამას ნულარ გამოვეკიდებით: წარსული საქმეა და ერთის კვირის წინად დავიწყებას მიცემული „კულტუროსანთა“ გულტკბილ საბჭოსავან. ხოლო მეტი არ იქნება ვიკითხოთ: თუ როგორც ისპან-

დარიანცი და ამასთან გამოძიებაც ამბობს, ტრიხინიანი და ძინიანი ღორი საპნის ქარხანაში მიდიოდა და დაუწვავად ისპობოდა თუნდა მარტო იმ 1895/6 წლებში, რომელთაც ბ-ნი სტეფანიანცი გვანიშნებს, ჰრჩებოდა რამ ეკონომიაში იმ ორმოცის თუმნიდამ, რაც დასაწვავ ხარჯად გადადებულ იყო ყოველ წლივ და თუ ჰრჩებოდა, რა იქნა ასეთი გულმოდგინებული ეკონომია?

მართალია, ეს ფული დიდი არაფერია, მით უფრო, რომ ცალკე კაცის ჯიბიდან, ხომ არ გადის და ვინ გაედევნებოდა უკან, სად მიდის და სად იკეთებს ბინას? ეს ფული ქალაქისაა და ქალაქის ფული აქეთ-იქით ორმოც-ორმოც თუმნობით ფანტვა რა სათქმელია და მერე მისი მოკითხვა რა საკადრისია „კულტუროსანთა“ საბჭოსა და გამგეობისათვის! მაგრამ მაინც სასურველია ვიცოდეთ: რა ჭკუასა სწავლობდა ეს ორმოცი თუმანი, ან მისი მეტ-ნაკლები, თუ რისთვისაც იყო უმთავრესად გადადებული, იმას არა ჰხმარდებოდა და მუქთად კეთდებოდა მესაპნეთავან?

ეხლა დავუბრუნდეთ ბ-ნ ივანენკოს გამოძიებას. ჩვენა ვნახეთ, რომ გუბერნიის მკურნალის ბ-ნ ქიქოძის მიერ მიკროსკოპით გასინჯულმა ღორის ხორცმა არუთინოვის საკუჭნაოში აღმოაჩინა 32 ფეხ-ლორში 22 ტრიხინიანი, ესე იგი, 68 <sup>3</sup>/<sub>4</sub>% და არა 65%, როგორც შეცდომით ნაჩვენებია ამის შესახებ სიგელში. ბ-ნს ივანენკოს თავისი გამოძიება აქედამ დაუწყვია და ამბობს, რომ თვითონ საყასბოს ცნობებიდან კი აღმოაჩნდაო, რომ გარედ მორეკილ ღორებისაგან ტრიხინიანი ღორი 0,23%-ია და იმ ღორებისაგან კი, რომელიც იქავ საყასბოსთან უსუქებიათ და მერე უხოცნიათ 15%. ამ ციფრების მიხედვითაც მატება და ვრცელება ტრიხინისა უნდა მიეწეროს ტფილისის საყასბოსა, რადგანაც სხვაგანდამ მორეკილ ღორში თითქმის ხუთასზე მარტო ერთი ტრიხინიანი ღორი მოდის და საყასბოსთან გასუქებულ და მერე დახოცილებში – ასზე ხუთმეტი.

თუ მართლა საყასბოშივე გასუქებულ და მერე დახოცილ ღორში ტრიხინიანები არ აღემატებოდა 15%, მაშ საილამ აღმოჩნდა 68 <sup>3</sup>/<sub>4</sub>% არუთინოვის საკუჭნაოში? გამოძიება გვაუწყებს, რომ 31 იანვარს 1896 წ.

არუთინოვის მიერ ხუთმეტ დაკლულ ღორში რვა ტრიხინიანი აღმოჩნდა. ბ-ნი ივანენკო ამას ამბობს, რომ ეს რაიმე განსაკუთრებულს შემთხვევას შესაძლოა მიეწეროს, მაგრამ თვით ამ შემთხვევის განსაკუთრებულებამ საჭიროდ დამანახვა გამოძიება, რა წესი და რიგი ზედამხედობისა არსებულა საყასბოში შესახებ ტრიხინიანი ღორის ხოცვისა, სინჯვისა და სპობისაო.

ბ-ნი ივანენკოს უკითხავს არუთინოვის მოჯამაგირეებისათვის და იმათ ჩვენებიდამ სჩანს, რომ არუთინოვს ჩუმად უნოცნია ღორი სავეტერინარო ზედამხედობის შეუმჩნეველად. თვითონ არუთინოვიც მაგრად /СТОЙКО/ ამტკიცებდა ამასვეო, ამბობს გამოძიება. არუთინოვისა და მოჯამაგირეების ნაჩვენებთა შორის ამის შესახებ ცოტა განსხვავებაა და „კულტუროსანთა“ მკურნალის ბ-ნი გონიევის ტენდეციას მოგვაგონებს ცოტად თუ ბევრად. მოჯამაგირეებს უთქვამთ, რომ ჩუმად დახოცილის ღორის ხორცსა ტფილისიდამ გარედ ჰგზავნიდა არუთინოვი: იმ ხორცს არუთინოვი თურმე უგზავნიდა თავის მუშებს სადღაც ტყეში, საცა შემას თურმე უჭრიდნენ.

თუ ერთს შემთხვევაში, როგორც ზევით ვნახეთ, ხუთმეტმა ჩუმად დაკლულმა ღორმა რვა ტრიხინიანი მოგვცა, აქედამ ადვილად საფიქრებელია, რომ მას წინადაც სხვა ჩუმად დაკლულ ღორებშიაც არა ერთი და ორი ტრიხინიანი ღორი გამოჩნდა და თუ სულ ეს ტრიხინიანი ღორის ხორცი მუშებს ეგზავნებოდათ ტყეში, კარგად შეექცეოდნენ საწყალი მუშები. მუშებს ხომ ღონიერი სტომაქი აქვთ, მონიელებდნენ ტრიხინიანსაც!... ნუგეში ის არის, რომ არუთინოვს დაუზოგავს აზიზი კუჭი ტფილისელებისა, თავისიანები არ გაუწირავს და ტფილისის გარედ მცხოვრებს, — მუშები იქნებოდნენ თუ არამუშები, — თუნდ ჯანი გავარდნოდათ, ვინ დაეძებს? მუშა მაიწამლება, მოკვდება თუ დარჩება, რა ანგარიშშია მოსატანი, მით უფრო, რომ „კულტუროსანთა“ თვალში ჰუმანობა, კაცთმოყვარეობა ეხლანდელ დროში ანახრონიზშია, სულელობაა, „კულტუროსანთვე“ სიტყვით.

აქ ერთი რამ არის საოცარი პირველშეხედვით: ასე მაგრად /СТОЙКО/ რად დამდგარა არუთინოვი იმაზე, რომ

მე ჩუმად ვხოცი ღორებსაო? ასე ამბობენ, იმიტომაო, რომ ჩუმად ხოცვისათვის უფრო ნაკლები სასჯელია, ვიდრე ტრიხინიან ღორის გასაღებისათვის. რაკი ჩუმად ჰხოცდა, ტრიხინიანი ღორების გასაღებაში იმით გაიმართლებდა თავს, რა ვიცოდით, რომ ღორი ტრიხინიანი გამოდგებოდა. რაკი არ იცოდა, არც დამნაშავედ იცნობდნენ ტრიხინიან ღორის გასაღებაში, თუნდა ამაში დაეჭირათ კიდევ. არ ცოდნა, ხომ არ ცოდვას!

გარდა ამისა, რაკი არუთინოვს უკისრნია ჩუმად ხოცვა ღორისა და ამაზე მაგრად /СТОЙКО/ დამდგარა, აქ, ჩვენის ფიქრით, ისიც საგულეებელია, რომ ჰცდილა გამოძიებისათვის გზა-კვალი აერია და იგი ბეწვის ხიდი მიემალა, რომელიც რაღაც განგებით გადებული ყოფილა არუთინოვის საკუჭნაოდამ სავეტერინარო საკუჭნაოდმე. ამ სავეტერინარო საკუჭნაოში ინახებოდა ჭინიანი და ტრიხინიანი ღორის ხორცი, მინამ დასწვავდნენ, და გამოძიებამ ერთი უეჭველი შემთხვევა აღმოაჩინა იმისი, რომ არუთინოვისათვის აქედამ უძლევიათ ცხიმიანი დაკლული ღორები მთლიანად.

არუთინოვს ვერ დასჯდომია, როგორც ეტყობა, ალჩუდ ადვოკატურად აგდებული კოჭი. გამოძიებელი მაინც აჰყოლია თვის მიერ ალლოდ აღებულ გზას და ზედ წასწვდომია შემდეგს: არუთინოვს წაუღია სავეტერინარო საკუჭნაოდამ რვა ტრიხინიანი მთელი ღორი, დაკლული 31 იანვარს და დასაწვავად უკვე ცნობილი. ვის მიუცია, როგორ წაუღია და რა ხიდი დებულა არუთინოვისა და სავეტერინარო საკუჭნაოს შორის, ამას შემდეგ მოგახსენებთ.

ტფილისი, 8 მაისი

ბ-ნი ივანენკოს გამოძიებიდამ სჩანს, რომ რაკი ისპანდარიანცს მარტოკას დაუჩემებია ზედამხედობა და სინჯვა საკლავისა და დახოცილ ღორისა და სხვა მოხელენი ამ საქმისაგან დაუთხოვნია /устранил/, სხვათა შორის, ეს წესი უხმარია: ჭინიანი და ტრიხინიანი ღორი იქავ საყასბოში უტყავებია და იქავ საყასბოშივე უცლია ქონი. ჭინიან ღორის ტყავზე ქონით მისით დამლა უდვია და ტყავი და ქონი უძლევია ღო-

რის პატრონთათვის. ქონი ტრიხინიან ღორისა კი უხარშვინებიათ პატრონებისათვის იქავ საყასბოშივე, რომ ხარშვით ტრიხინა უვნებელ ექმნა / в целях обезвреживания / . ამისათვის იქავ საყასბოს კანტორის კედელთან მდგარა ქვაბი, რომელშიაც უხარშავთ ტრიხინიანი ღორი. ამგვარად ქონი უღიათ ან იქავ კანტორასთან, ან ფარდულებში, საცა დაკლული ღორი ინახებოდა ან სხვის ფარდულებში, საცა ყასბები ღორსა ჰხოცდნენ. საქონედ ხარშვა კი ტაროსის მიხედვით, ხან კანტორასთან ყოფილა და ხან ღორის სახოც ფარდულებში, ხოლო ამ უკანასკნელებში, განსაკუთრებულ / исключительно / შემთხვევით მოხდებოდა ხოლმეო, ესე იგი, მაშინ, როცა ავღრის გამო შეუძლებელი იყო გარედ ეხარშათ კანტორასთან ახლო, ცის ქვეშ. ასე უჩვენებია ბ-ნი ისპანდარიანცს. ისპანდარიანცს ამასთანავე უთქვამს, საქონედ ხარშვა არამც თუ მარტო არუთინოვის ფარდულში იყო ხოლმეო, არამედ სხვებსაშიაცა, მაგალითებრ, ბეჟან ქობულაოვის და ავეტიქ ბატიევისაშიო. ქონის პირდაპირ აღება და გატყავება, თუ კარგი დღე იყო, იქავ კანტორის კედელთან მოხდებოდა ხოლმე, საცა ქვაბი იდგა, თუ ავი დარი – თვით საკუთარ ფარდულში. როცა საკუთარ ფარდულში ბევრი დაკლული ღორი გროვდებოდა და ალაგი არ იყო, არუთინოვის ფარდულში უცლიათ ქონი და უტყავებიათ. ქონაცლილი და გატყავებული ტრიხინიანი ღორი უნდა უკანვე მოეტანათ და იმ ფარდულში დაეწყეთ, რომელიც ამისთანებისათვის იყო დანიშნული. გამოძიება ამბობს, რომ იგი დაკლული ღორი, რომელსაც ქონს აცლიდნენ იქავ კანტორის კედელთან, უკლებლივ მოჰქონდათ უკანვე ფარდულში დასაწყობად. აქ ქონის აცლას ყველა ჰხედავდა კანტორაში შემსვლელი და გამომსვლელი და თვალყური გარადავოისაც სჭერია და ამიტომ აქედამ უკან დაბრუნება ტრიხინიან ხორცისა მთლად საიმედო იყოვო (в полне обезпечен), ამბობს გამოძიებელი.

სულ სხვა გარემოებაში ყოფილა იგი ხორცი, რომელიც არუთინოვისათვისაო, დასძენს ბ-ნი ივანენკო.

ვინც ამ საგანზე კითხული ყოფილა ბ-ნი ივანენკოსაგან, მაგალითებრ, თანაშემწე ბ-ნი ისპანდარიანცისა ბ-

ნი დედაბრიშვილი და გარადოვოი, რომელსაც, ბ-ნი ისპანდარიანცის ბძანებით, თვალყური ეჭირა ამ ქონიან და ტრიხინიან ღორების წაღებ-წამოღებასა და საქონედ ხარშვაზე, ამბობენ, რომ არუთინოვის ფარდულში საქონედ ხარშვა ტრიხინიან ღორისა პირველად გვესმისო. მაშ რილასათვის უძლევიათ არუთინოვისათვის ტრიხინიანი ღორები? თვითონ ბ-ნი ისპანდარიანცი ამის გამო ამბობს, რომ ბ-ნი დედაბრიშვილს შესაძლოა არ სცოდნოდეს, რადგანაც ეს მარტო ჩემის ზედამხედლობის ქვეშ იყოვო, მაგრამ გარადოვოის უნდა სცოდნოდაო და თუ ამბობს პირველად ეხლა მესმისო, იქნება იმ რვა ტრიხინიან ღორზე ამბობს, რომელიც 31 იანვარს დაიკლა და რომელიც ტერ-სტეფანიანცს /ყარაულს/ მიუცია არუთინოვისათვის დილა ადრიანად, ვიდრე გარადოვოი მოვიდოდაო.

როგორ? ბ-ნი დედაბრიშვილს, რომელსაც, ვითარცა თანაშემწეს ბ-ნი ისპანდარიანცისას, ვალად სდებია თავისის უფროსის მაგიერობა, როცა საჭიროება მოითხოვდა, არ უნდა სცოდნოდა არუთინოვის ფარდულში საქონედ იხარშება თუ არა ტრიხინიანი ღორი? ეს რა დასამალავი იყო, რომ არ უცოდინებია ბ-ნი ისპანდარიანცს, ან სხვას ვინმე! გარადოვოი, რომელსაც ბ-ნი ისპანდარიანცისაგან დავალებული ჰქონია ამისთანაებში თვალყურის ჭერა, იძახის, რომ პირველად მესმის, რომ არუთინოვს ეხარშოს საქონედ ტრიხინიანი ღორიო და რა გამტყუნებაა მისი “იქნება გარადავოი სხვას ამბობდესო” და არა იმას, რაც ესე გადაჭრილად უთქვამს, „პირველად მესმისო“?

მოდით და ამის შემდეგ ნუ იტყვით, რომ აქაც უცნაური „იყო და არა იყო რაა“. ამკარადა სჩანს, რომ არუთინოვისათვის მითამდა საქონედ ძლევა ტრიხინიან ღორისა რაღაც უცნაურ ყინულზეა დაწერილი და ჯანდით და ბურუსით მოცული. ეს დავინსომოთ და ამასთან ისიც, რომ თვით ბ-ნი ისპანდარიანცის სიტყვით დადგენილია და ბ-ნი ივანენკოს გამოძიებითაც დამტკიცებული, რომ არუთინოვისათვის თვით ბ-ნი ისპანდარიანცსაც უძლევია ტრიხინიანი ღორი.

გარდა ამისა, გამოძიება იმასაც გვარწმუნებს, რომ არუთინოვს ბ-ნი ისპანდარიანცის დაუკითხავადაც უზიდ-

ნია ტრიხინიანი ღორი თვით სავეტერინარო საკუჭნაო-  
დამ. ავი ენა იტყვის, ეს რა შინაური კაცი ყოფილა  
არუთინოვი, რომ ამისთანაები უხერხებია? ვერე ზო-  
გადად თქმა უსამართლო იქნება, ხოლო ეს კი შეეჭვე-  
ლია და თვით ბ-ნი ისპანდარიანციც ამტკიცებს, რომ  
31 იანვარს არუთინოვს 15 ღორი დაუკლავს და იმათ-  
ში, რვა ტრიხინიანი გამოჩენილა. რა თქმა უნდა, ჩა-  
მოურთმევიათ, სავეტერინარო საკუჭნაოში დაუკეტნიათ  
და მეორე დღეს დილა აღრიანად ეს რვა დაკლული  
ღორი ისევ არუთინოვის საკუჭნაოში მისულა და დილა  
მშვიდობისა მოუხსენებიათ. როგორ უნდა მომხდარიყო  
ეს?

ჯერ არუთინოვს ეს ამბავი უარუყვია და მერე კი  
გამოძიებას გაუმტყუნებია. აი როგორ ყოფილა ყველა  
ეს: ბ-ნ ისპანდარიანცს, როცა „В целях разделения  
труда“ ღორის ხორცის ზედამხედლობა თვით დაუჩემე-  
ბია და ამ საქმიდამ დაუთხოვნია თვისი თანაშემწე დე-  
დაბრიშვილი, ფერშალი და სხვა მოხელენი, ყარაული /  
сторож / საყასბოსი ტერ-სტეფანიანცი იმოდენად სანდო  
კაცად უცვნია, რომ თვის მიერ დაჩემებული ნაწილი  
ზედამხედლობისა მარტო იმისთვის გაუმეტნია. როგო-  
რათ? იკითხავთ, ისე, რომ ტრიხინიან და ჩინიან ღო-  
რის საკუჭნაო თვითონ ისპანდარიანცს კლიტით უკეტ-  
ნია და ყარაულს ტერ-სტეფანიანცს კი უღია.  
Разделения труда, თუ გნებავთ, ამასა ჰქვიან. გალება  
კიდევ არაფერი, უღია და თავისის ნებით უძლევი  
ტრიხინიანი ღორი არუთინოვისათვის და სხვებისათვი-  
საც. გამოძიება მარტო ორს მაგალითს გვიჩვენებს, რო-  
მელთაც ბ-ნ ისპანდარიანციც ამტკიცებს: ერთხელ რვა  
ტრიხინიანი ღორი არუთინოვისათვის მიუცია 31 იან-  
ვარში დაკლულებისა და ოთხიც სხვებისათვის 15 თე-  
ბერვალში დაკლულებისა. ამ ოთხიდან ერთი კიდევ  
მაინც არუთინოვს ჰრგებია.

აქ ჩვენთვის საყურადღებოა მარტო პირველი მაგა-  
ლითი იმ მხრით, რომ აქ სჩანს ნასკვის წვერი იმისი,  
თუ საიდან და როგორ აბარტყებდა ტფილისის საყასბო  
ტრიხინასა.

აქ ამ მაგალითის გამო ბ-ნი ისპანდარიანცი ამბობს,  
რადგანაც ერთადერთი საკუჭნაო მქონდა, იძულებულ

ვიყავ აქ, ამ ერთს საკუჭნაოში მეთავსებინა დაკლული  
ღორი, ტრიხინიანი, ჩინიანი, ქონაცლილი, ქონაუცლე-  
ლი, უკვე გასინჯული, გასასინჯავი და სხვა ამისთანა.  
ამიტომაც საჭიროდ დავინახე გასაღები საკუჭნაოსი  
მებარებინა ტერ-სიმონიანცისათვის, რადგანაც ყასბებს  
ღამით დაკლული ღორი დილა აღრიანად უნდა შეეტა-  
ნად გასაჩხრეკად და რომ ივინი არ შემეფერხებინა,  
ტერ-სიმონიანცს მივანდე საკუჭნაოს გაღებაო. როცა 1-  
ს თებერვალს მივედი საყასბოში, ტერ-  
სიმონიანცისაგან შევიტყე, რომ ჩემს მისვლამდე მას  
მიუცია რვა ტრიხინიანი ღორი არუთინოვისათვის და  
მაშინვე წავედი არუთინოვის ფარულში და ვნახე,  
რომ სამის ღორისაგან უკვე ქონი აუღია და ქონა-  
ცლილი ხორცი იმის მაგიერ, რომ უკან მოეტანა ჩვენს  
საკუჭნაოში, იქავ საყასბოს ფერდობზე გადაუყრია და  
სხვა ხუთი ღორი კი იქავ ეწყო და იქავ განკარგუ-  
ლება მოვანდინეო, რომ ეს ხუთი ღორი ჩვენს საკუჭ-  
ნაოში მიეტანათ და ტერ-სიმონიანცისათვის ჩაებარები-  
ნათ მას შემდეგ, რაკი გაატყავებდნენ და ქონს აა-  
ცლიდნენო. ესლა აღარ მანსოვსო, მიიტანეს და ჩააბა-  
რეს ეს ხუთი ღორი თუ არაო, რადგანაც იმ დღეს ბე-  
ვრი საქმე მქონდა და ვერ მოვიცალეო.

გამოდის, რომ არუთინოვს ტრიხინიან ღორის  
ხორცის ნარჩენი იქავ საყასბოს ფერდობზე უყრია და  
რადგანაც საყასბოში და საყასბოს ფერდობზე ყასბების  
ღორს ერეკებოდნენ გასასუქებლად ნაყარის ჭმევითა,  
ადვილად წარმოსადგენია, საიდან გამრავლდა ტრიხინა:  
ღორი ნაყარსა სჭამდა და ტრიხინას შეიყრია. მარ-  
თალია, სამის ღორის ხორცი ბევრს ღორს არ გადას-  
დებდა ტრიხინას, მაგრამ ვინ გვითავდებებს, რომ არუ-  
თინოვი ან სხვები ტრიხინიან ღორის ხორცის ნარჩე-  
ნებსაც ესე არ ექცეოდნენ.

გამოძიება ამის შესახებ აი რას გვეუბნება. როცა  
საკუჭნაოში ჰგროვდებოდა რამდენიმე ტრიხინიანი და  
ძალიან ჩინიანი ღორი, უქონო და გატყავებული, იშ-  
ვითი იყო, რომ ყოველი ეს ეწვათ, ამაებს უფრო ხში-  
რად ჰგზავნიდნენ ტერ-მინასოვის საპნის ქარხანაში,  
სადაც გარადავოის თანადასწრებით, ხარშვით უნდა  
მოესპოთო. არც იმის განსაზღვრული ანგარიშია —

რამდენი ტრიხინიანი და ძინიანი ღორი უძლევიან ქონის ასაცლელად და ამათვანი რამდენი დაუბრუნებიათ უკან, არც იმისი – რამდენი უწვათ და რამდენი მოუსპიანთ საპნის ქარხნებში ხარშვითაო, ამბობს გამოძიება, და თვით ისპანდარიანციც ამტკიცებს, ცალცალკე ამისი ანგარიში არ გვიწერიაო.

ტერ-მინასოვის სიტყვით კი აღმოჩნდა, რომ ღვინობისთვის მარტამდე სულ 50 ღორი მიუტანიათ მის ქარხანაში. სავეტერინარო ზედამხედველობის დავთრებიდან კი სჩანს, რომ ოქტომბროდამ მარტამდე 66 ტრიხინიანი ღორი ყოფილა და 60 ძინიანი. ვთქვათ ორმოცდაათი სწული ღორი ტერ-მინასოვს მოუსპია ხარშვითა, დანარჩენი რა ქნია? გამოძიება და გარადოვოი ამტკიცებს, რომ იშვიათად უწვათ სენიანი ღორი. თვითონ ბ-ნი ისპანდარიანციც გვარწმუნებს, რომ უფრო ბევრი და მომეტებულადაც ბევრი ტერ-მინასოვის საპნის ქარხანაში იგზავნებოდა და იქ ჰხარშავდნენ და ამით სპობდნენო. ბ-ნი ივანენკო ანგარიშობს, რომ ასს ძინიან ღორში ათი მაინც იქნებოდა ძლიერ ძინიანი /усилено зараженныя/. მაშასადამე, მოსასპობელი ღორი ყოფილა ტრიხინიანი 66 და ძინიანი 60 მაინც – სულ 126. ორმოცდაათი ტერ-მინასოვს მოუსპია და დანარჩენი 76 არა სჩანს, სად და როგორ გამქრალა. უნდა ვიფიქროთ, როგორც ბ-ნი ივანენკოც ამბობს, რომ საყასბოს ფერდობზე გადაყრას იშვიათი ადგილი არ უნდა ჰქონებოდა მთელს ამ ისტორიაში. რაკი ესეა და რაკი უკვე ვიცით, რომ არუთინოვს და სხვა ყასბებს ამ ფერდობზედ ურეკიათ ღორი გასასუქებლად გადაყრილ ხორცის ჭმევითა, რალა ეჭვია, რომ აქა ყოფილა საბუდარი ტრიხინისა, რომ აქ ჭმეულს და გასუქებულს ღორს ასში ხუთმეტს, თუ მეტს შესწევია ტრიხინა მაშინ, როდესაც თითქმის ხუთასს გარედამ მორეკილს ღორში მარტო ერთი ძლივს უნახავთ ტრიხინიანი.

ეს ცოტაოდნად იმითაც მტკიცდება, რომ 1895 წ. სულ 15.475 ღორი დახოცილა ტფილისის საყასბოში და ტრიხინიანი 67 ყოფილა, 1896 წელს კი 17.558 და ტრიხინიანი 54-ზე ჩამომხტარა. ეს ღიდი განსხვავებაა შედარებით და იმითი თუ აიხსნება, რომ რაკი ბ-ნმა

ქიქოძემ 1896 წლის მარტში ეს არუთინოვის ტრიხინის ამბავი შეიტყო, სასტიკი ყურადღება იყო მიქცეული, რომ სენიანის ღორის ხორცი არ ეყარათ საყასბოს ფერდობზედ და ამით არ ემრავლებინათ ტრიხინა. იმიტომ ვთქვით წინად, რომ ძალის კული, სხვათა შორის, ამ 1896 წლის ციფრებში მარხია. 1896 წელს ორი ათასზე მეტი უფრო ბევრი ღორი დაიკლა, ვიდრე 1895 წ., და ნაკლები ტრიხინიანი აღმოჩნდა, განა ეს გარემოება არაფერს გვანიშნებს?

ისიც საკითხავია, არუთინოვს სულ ფერდობზედ უყრია სავეტერინარო საკუჭნაოდამ ზიდული ტრიხინიანი ხორცი, თუ სხვაფრივადაც მოუხმარებია? ამაზედ გადაწყვეტილს ვერას ვიტყვით, მხოლოდ ერთი რამ არის საოცარი. ბ-ნი ქიქოძეს არუთინოვის საკუჭნაოში 32 ფეხი უპოვნია სალორედ მარილში ჩადებულნი, აქედამ 22 ტრიხინიანი აღმოჩენილა. ეს იყო შარშან მარტის პირველ რიცხვებში. გამოძიებაში მოხსენებულა, რომ არუთინოვმა ყველიერებში დაიწყო სალორედ ჩადება ღორისა მარილშიო. შარშან ყველიერები იყო 29 იანვრიდამ დაწყებული 5-ს თებერვლამდე. 31 იანვარს რვა ტრიხინიანი ღორი წაულია არუთინოვს სავეტერინარო საკუჭნაოდამ, რვა ღორს სწორედ 32 ფეხი აქვს და 32 ფეხი სალორედ ჩადებული უპოვნია ბ-ნი ქიქოძეს და ამათში 22 ტრიხინიანი. იქნება ეს შემთხვევის საქმეც იყოს, მაგრამ საოცარი კია ასეთი ტოლ-ამხანაგობა ამ ხმაამოულრებელ ციფრებისა!

არა ნაკლებ საოცარია, რომ 7 აპრილს 1894 წლისას გეურქ არუთინოვს ქალაქის მოურავისათვის მიურთმევეა თხოვნა, რომ 18 ჩემ მიერ დაკლული ღორი ტრიხინიანი გამოდგა და დამიწვესო და გთხოვთ თითო ღორში 19 მანეთი და 20 კაპ. მიბოდოთო და სულ 345 მანეთი და 60 კაპ. თქვენ თვითონ მოგეხსენებათ, რომ ტრიხინიანს ღორს იმისთანა ნიშნები არა აქვს, რომ უტრიხინიან ღორისაგან შემძლებოდა გამერჩია და არ მეყიდნაო საკლავად. გამეგობას უარი უთქვამს, მაისის 31-ს ხელახლად უთხოვნია და აქ ზედმიწევნითი ცოდნა გამოუჩენია კანონების მე-XIII ტომისა და იმისი თუ, – რა მოწყობილობა უნდა, რომ კაცმა შეატყოს ღორი ტრიხინიანია, თუ არა. ყასაბი არუთი-

ნოვი დიდი „სპეციალისტი“ ყოფილა ამისთანაებში. როგორც მის თხოვნას ეტყობა პირდაპირ.

აქედამ აშკარად ცხადია, რომ არუთინოვს არა ერთხელ და ორჯერ დაუჭერია საქმე ტრიხინიან ღორებთან 1894 წელსა და ამ წლიდამ 1896 წლამდე ვინ შეუშლიდა ხელს, რომ ეს დაეშალა და აქედ-იქით ამისათვის არ მიმდგარ-მომდგარიყო, როგორც “კულტუროსანს” ვაჭარს შეშვენის. მერე კანონებიც კარგად სცოდნია და ტრიხინიანების მოჩხეკის საქმეც!

ასე გამოდის, რომ რაკი არუთინოვს უარი მიუღია, თითქო სხვა გზას შესდგომია, რომ ტრიხინიანი ღორები ისევ იმასთან დახოცილნი მისულიყვნენ და ზარალს ამ გზით გადარჩენოდა. თუ ისეა, ბედიც შესწევნია, რადგანაც ტერ-სიმონიანცი შეხვედრია ტრიხინიან ღორის საკუჭნაოს მცველად და თითქმის გამგებელადაც: ეს თხოვნა ხომ 31 მაისს მიუერთმეგია არუთინოვს. არ ვიცით კი ამასთან რა კავშირში აქვს, ხოლო უნდა კი ვსთქვათ საქმის სავსებისათვის, რომ არუთინოვს 16 ივნისს 1894 წელს ქალაქის სავეტერინარო მკურნალის მხიტარ ოპანჯანის ძის ისპანდიაროვისათვის ვექსილი მიუცია ორმოცდაათის თუმნისა, ვექსილი დამტკიცებულა იმავე თარიღს ნოტარიუსისაგან № 5067. პირველს მკათათვეს 1895 წელს. მეორე ვექსილიც მიუცია იმავე ისპანდიაროვისათვის სამოცის თუმნისა. ნოტარიუსისაგან დამტკიცებული № 5770.

ვინ იტყვის აქ ცუდს რასმეს? განა შესაძლო არ არის, რომ ბ-ნ ისპანდიაროვს თავისი ალალი ფული ესესხებინოს? ძალიან შესაძლოა, მით უფრო, რომ ყველა “კულტუროსანი” მცდელი და გამრჯელია და ამის გამო ფულიანიცა. მაგრამ აქ ყურს როგორღაც ეხამუშება ერთის მხრით არუთინოვის ხსენება, რომელსაც ტრიხინიან ღორებთან რაღაც დამოკიდებულება ჰქონია, და მეორეს მხრით სავეტერინარო მკურნალის სახელი და მერე საყასბოს ზედამხედავისა, რომელმაც საკუთრივ დაიჩემა ტრიხინიან ღორების თვალყურის დევნა და სხვა მოხელენი კი სხვა საქმეებზე დააყენა „В целях разделения труда“.

მერე რაო? იკითხავთ, მერე ისა, რასაც შემდეგ მოვასხენებთ და მით გავათავებთ ამ ტრიხინის ისტორიას.

ტფილისი, 10 მაისი

დღეს საჭიროდ დავინახეთ ავნუსხოთ ის, რაც ჯერ ბ-ნ ქიქოძეს აღმოუჩენია და მერე ბ-ნ ივანენკოს გამოძიებას ტფილისის საყასბოში არსებულ ავკარგიანობისა საზოგადოდ და ტრიხინების ჩეკისა საკუთრივ.

ბ-ნ ქიქოძეს უნახავს:

1/. არუთინოვის საკუჭნაოში 32 ფეხი ღორი, რომელთ შორისაც 22 ტრიხინიანი ყოფილა. აქ შესანიშნავია, რომ ჯერ დაუძალავთ აქ ღორის ხორცი არ არისო და მერე საკუჭნაოს გაღებაზე უარზე დამდგარან, ვიდრე პოლიცია არ დამუქრებია, კლიტეს გავტეხთ, თუ არ გააღებთო.

2/. სავეტერინარო ზედამხედავობის საკუჭნაოში ჭუჭყიან და უწმინდურ დაზგაზე სამი დაკლული ტრიხინიანი ღორი, უკვე გახრწნილებაში შესული, და დაზგის ქვეშ გამოღრღნილი ძვლებამდე თავგებისაგან ტრიხინიანივე ღორები.

3/. მთელი საყასბო და მისი არემარე ისე მოკლებულია სანიტარულ უბრალო რიგსა და წესსა, ისე უწმინდური, რომ სუნი აყროლებულის სისხლისა, ნაყარის ნაჭრებისა, შიგნეულობისა საყასბოდამ ერთს ვერსტზე ისმოდა.

4/. საყასბოში დაკლული პირუტყვი უჭრიათ ფეშხოებად და უტყავებიათ პირდაპირ ჭუჭყიან და უწმინდურ იატაკზე, რომელიც გაუქნთილი ყოფილა დამპალის ნაყარისაგან და ამის გამო ხორცი, მინამ საყასბოდამ გავა გასასყიდად, იქავ საყასბოშივე იმ თვისებისად ჰხდება, რომელიც ხელს უწყობს ხორცის გადაქცევას კაცის მავნებელადად.

5/. განავალი ფაშვებისა და ნაწლავებისა სისხლთან ერთად უღვრიათ იქავ საყასბოს ფერდობზე და ამ მოსქო მყრალ აუარებელ თხლეში დადიან და იკვებე-

ბიან ფარა ღორისა, რომელიც მერე საკლავად მიდის საყასბოში, და მშიერ ძაღლების ხროვა.

ბ-ნ ივანენკოს გამოძიება გვეუბნება:

1/. ბ-ნ ისპანდიარიანცმა მარტომ დაიჩემა და ისიც მხოლოდ საკლავ ღორებისა სინჯვა და ზედამხედლობა როგორც დაკვლამდე, ისეც დაკვლის შემდეგ და, რაც ღორების საქმეს შეეხებოდა, იგი სულ მთლად მისს საკუთარ განკარგულების ქვეშ ყოფილა და სხვა მოხელენი ამ საქმიდამ გამოუწირავს.

2/. არუთინოვისათვის სავეტერინარო საკუჭნაოლად უძღვევიათ ტრიხინიანი ღორი, როგორც თვით ისპანდიარიანცს, ისე საყასბოს ყარაულს ტერ-სიმონიანცს ისპანდიარიანცის დაუკითხავად. აქ შესანიშნავია, რომ არუთინოვს უარი უთქვამს არც საყასბოლად, არც სავეტერინარო საკუჭნაოლად მე ერთადერთი ტრიხინიანი ღორიც არ წაძილიაო.

3/. არუთინოვს ჩუმადაც უზოცნია ღორი ზედამხედლობის დაუკითხავად და ნებადაურთველად.

4/. ისპანდიარიანცის სიტყვით, არუთინოვისათვის უძღვევიათ ტრიხინიანი ღორი მითამ მარტო ქონის გამოსახდელად ხარშვით და მით უვნებელ საქმელად და ამისი ზედამხედლობა დაუვალვებია გოროდოვისათვის, ხოლო გოროდოვი გადაჭრილად ამბობს, არუთინოვის ფარდულში ტრიხინიანი ღორის ხარშვა საქონედ პირველად დღეს მესმისო და თანაშემწეც ისპანდიარიანცისა ბ-ნი დედაბრიშვილი ამბობს გადაჭრილადვე, რომ მე არუთინოვის ფარდულში ხარშვა არ გამიგიაო.

5/. რვა ტრიხინიანი ღორი, რომელიც დაუკლავთ 29 იანვარს, სწორედ წაუღია არუთინოვს სავეტერინარო საკუჭნაოლად და მარტის პირველ რიცხვებში კი უპოვიათ მარტოში ჩადებული სალორედ 32 ფეხი, სწორედ იმდენი რაც რვა ღორს ბუნებითად აქვს. მართალია ამ 32-ში მარტო 22 აღმოჩენილა ტრიხინიანი, მაგრამ დანარჩენისა არ ვიცით თვით ბ-ნ ქიქოძესაგან იყო გასინჯული, თუ სხვისაგან ისე ალაღბედად, როგორც შაუმოვის სელები ბ-ნ სტეფანიანცისაგან. გამოძიება ამისას არას გვეუბნება. ასე, რომ ეს ტოლამხანაგობა ციფირებისა თუ ხელ მოსაჭიდებელი

საბუთი არ არის, გეში მაინც არის და, ჩვენის ფიქრით, უნდა გამოძიებულიყო.

6/. ტრიხინიანი ღორის ნარჩენი უყრიათ იქავ საყასბოსთან ფერდობზე და ამ ფერდობზე საკლავი ღორი დადენილა საჭმელად და ამ გზით უსუქებიათ.

7/. ტრიხინიანი და ძინიანი ღორი ან სულ არა, ან იმდენი არ უწვავთ სავეტერინარო ზედამხედლობის მოხელეთა, რამდენიც დასაწვავად გადაღებული ყოფილა. საქონედ ხარშვით მითამ ტრიხინიანი ხორცი უსპიათ და როგორ ყოფილა ეს სპობა, ხორცი ხომ მაინც დარჩებოდა და ეს ხორცი ხარშვის მერე რა ქმნილა, ეს გამორკვეული არ არის. შესაძლოა, სულ ფერდობზე უყრიათ ღორის სასუქად.

8/. საქონედ ხარშვა იქავ საყასბოსთან კი არ ყოფილა, საცა ამისათვის საკუთარი ქვაბი სდგომიათ, არამედ სხვებისათვისაც უძღვევიათ, რომ თავის ქარხანაში წაეღოთ და იქ ეხარშნათ. ბ-ნ ისპანდიარიანცის სიტყვით, უფრო ბევრი და შესანიშნავად ბევრიც ასე უმორებიათ თავიდან და ეს წაღებ-წამოღების და ხარშვის ავი და კარგი დავალებული ჰქონია გარდავოის.

9/. ტერ-მინასოვს ოკტომბრიდან 1895 წ. მარტამდე 1896 წ. სულ 50 ღორი წაუღია საქონედ და რა ქნილა ანგარიშით გამოყვანილი დანარჩენი 76 ღორი, ამისი საბუთიანი პასუხი ვერ მიუღია გამოძიებულს ვისგანაც ჯერ არს.

10/. სია არა ჰქონიათ იმისი თუ რამდენი ხორცი უყრიათ ფერდობზე, რამდენი უგზავნიათ საპნის ქარხანაში და რამდენი უწვავთ თვითონ საყასბოში. ამაებისათვის მარტო ერთი საზოგადო სია ჰქონიათ ერთობ ამ გზით, თუ იმ გზით სპობისა. არც ზედმიწევნილი სია ჰქონიათ რამდენი ქონაცლილი ხორცი უკანვე მოუჭანიათ ზედამხედლობას საკუჭნაოში.

საჭიროდ ვრაცხთ, ყოველ ამას ჩვენის მხრით დაუვმატოთ, რომ სპობას წამხდარ ხორცისას, — ღორისა იქნება, თუ სხვა რისამე, — ბ-ნ შიდასაქმეთა მინისტრის 29-ს ივლისისა 1895 წ. № 464 ცირკულიარის მოთხოვნილებითა, უნდა მოჰყვეს ოქმის შედგენა და ხელმოწერილ იქმნას სავეტერინარო მკურნალის მიერ

და, გარდა ამისა, საბჭოს წარმომადგენელისა და პოლიციის მიერ.

ბ-ნ ივანენკოს გამოძიება არას ვეუბნება სავეტერინარო ზედამხედლობის საკუჭნაოსას, რომ იქ იმდენს ხანს ჰქონიათ შენახული ტრიხინიანი დაკლული ღორები, რომ გახრწნილებამდე მისულან კიდეც და ზოგიც ძვლებამდე უხრავთ თავგებსა.

ჩვენა გვგონია, რომ ეს გარემოება ჰღირდა გამოსადიებლად, იმიტომ რომ ეგ ცხადი გეშია, რომ ტრიხინიანი ღორი ან სულ არ უწვათ, ან ძალიან უგვიანებით. გარდა ამისა თავგების საღრღნელად დაგდება ტრიხინიანის ღორისა იქნება ახალი ხერხი იყოს სპობისა და რადგანაც უხარჯოა, ერთის მხრით მოსაწონიც არის. თუნდ ეგეც არ იყოს, ეგ ღრღნა ტრიხინიან ღორისა დიდი საბუთია, რომ არც არუთინოვს, არც ისპანდიარიანცს, არც საყასბოს, არც საბჭოს და არც არავის სხვას ბრალი არ დასდებოდა ტრიხინების ჩეკისა და ბლარტობისა სავეტერინარო-ზედამხედლობის წყალობითა და შეწვევითა.

„კულტუროსანთა“ საბჭომ ეს ტრიხინების საქმე ხომ ეხლახან „დავიწყებას მიეცა“, და, სწორედ მოგახსენოთ, ამ დავიწყებას არავითარი ჭკვადმისაღებელი საბუთი არა უდევს რა, მაშინ, როდესაც ჩაფუჩჩებების სურვილი დიდი ჰქონიათ.

საბუთი კი ცხვირწინ სდებიათ და ბ-ნს ივანენკოს ეს არ დაუნახებია საბჭოსათვის. აი როგორ: თავგებს უჭამიათ ტრიხინიანი ღორები და, რასაკვირველია, გასუქდებოდნენ. ღორი, ხომ მოგეხსენებათ, მსუნაგობით გათქმულია და ცხვირზევით არ იცილებს მჭლე თავგესაც. თორემ აზიზად გასუქებულს საკუჭნაოში ვილა იტყვის, თუკი სადმე მოასწრო. ტრიხინიანით გასუქებული თავი, თავი, რა თქმა უნდა, ნავარდზე წავიდოდა, და, იმედია, საყასბოს ფერდობზედაც გაისეირნებდა სხვათა შორის. აქ მთელი ფარა ღორებისა ტრიალებულა, როგორც ვიცით. ტრიხინიანი ღორი ხომ თავგს უჭამია, ახლა ტრიხინიანი თავგს ღორი შესჭამდა, მერე ღორს ისევ თავგი, თავგსა ისეც ღორი და ბოლოს გამოვიდოდა ბავშურ სიმღერის მსგავსი “თხამ ვენახი შესჭამაო” და ნასკვიც ტრიხინების ბლარტობისა და გამ-

რავლებისა ხელთ ექნებოდათ. აღარც არუთინოვი, აღარც ისპანდიარიანცი, აღარც სავეტერინარო ზედამხედლობა, აღარც საყასბო, აღარც ძერდობი, მიზეზი ის იქნებოდა რომ თავგმა ღორი, ღორმა თავგი, თავგმა ღორი შესჭამაო, სულ თავგების ბრალი იქნებოდა და მოლით და ამის შემდეგ დავიწყებას ნუ მიცემდით! აბა თავგებს ვინ რას გადაახდევინებდა, რომ ტრიხინიან ღორს არ ერიდება, ან ღორს, რომ ტრიხინიან თავგს მიირთმევს, თითქო ბარიბარში გამოსვლა უნდათო.

ასეა თუ ისე, ეხლა ხელთა გვაქვს ანუსხული თითქმის ყველა ის ამბავი და გარემოება, რაც ამ საქმის ვითარებას შეადგენს. ეხლა მარტო ისლა დაგვრჩა გამოვარკვიოთ, შესაძლო იყო თუ არა ამისთანა ამბებით და გარემოებით აკიდებული საქმე დავიწყებას მიეცეს, და ამით გათავდეს ეს დიდი აყალმაყალი პატარა ტრიხინიანებისა!

ტფილისი, 15 მაისი.

ჩვენ წინა წერილში\* მოკლედ ავანუსხეთ ყოველივე ის, რაც აღმოაჩინა ბ-ნმა ქიქოძემ და რაც მერე მისის მიზეზით გამოარკვია ბ-ნ ივანენკოს გამოძიებამ. კაცი რომ ჩაუკვირდეს და კარგად ჩაუფიქრდეს ყოველს გარემოებას არუთინოვის ტრიხინების საქმისა, არ შეიძლება არ გამოენასკვოს ის უეჭველი აზრი, რომ ტფილისის საყასბოში უსათუოდ უნდა არსებულიყო რაღაც ბოროტმოქმედება, განგებ თუ დაუდევრობით და უგულობით ხელშეწყობილი სავეტერინარო ზედამხედლობის მიერ ცალკე და სასანიტარო-სამკურნალოს მიერ საერთოდ. ვამბობთ „ხელშეწყობილი“, იმიტომ, რომ შეუძლებელია აქ ან ერთი, ან მეორე, ან ორი ერთად ასე თუ ისე, ამა თუ იმა მიზეზით თვალდახუჭული არ ყოფილიყო, თორემ ერთხელ მაინც როგორ არ უნდა დაენახათ, რაც ასე ამკარად ბოროტმოქმედებდა, რომ პირველ მისწრო-

\* იხ. “ივერია” № 90



ბაზევე აღმოჩნდა სხვათაგან და არა სასანიტარო და სავეტერინარო ზედამხედლობისაგან.

რაკი ბოროტმოქმედება უეჭველად დადგენილ იქნა, აქ რაღა ჭრა და ხევა უნდოდა „კულტუროსანთა“ გამგეობას და საბჭოს? ჩვენის ფიქრით, ბოროტმოქმედების ამ ცხადად დადგენის შემდეგ, ერთისა და მეორის საქმე ისლა იყო, რომ გამოძიება და ყოველივე, რაც გამოირკვა, სულ ერთიანად უნდა აეღოთ და წარედგინათ ადმინისტრაციისათვის, ან სამსაჯულოსათვის და იმათ იცოდნენ რა გზასა და სვლას მისცემდნენ.

ასე არ მოიქცა არც გამგეობა, არც საბჭო და ერთმაც და მეორემაც მიიჩნემა იგი უფლება, რაც მას არაგზით არ ეკუთვნოდა. მოსპობა საქმისა და დავიწყებას მიცემა, რაკი ბოროტმოქმედებაა, სამსაჯულოს საქმეა და არა „კულტუროსანთა“ საბჭოსი. ბოროტმოქმედება მთელის თავისის საზარო სახით თვალწინ დაუყენეს და ისინი კი კევის ლეჭვას მოჰყვნენ, თითქო ამითი უნდათ როგორმე გააქარწყლონ საქმე, რომელიც ამდენს უბედურებას უქადის ჯანმრთელობას და სიკვდილს-სიცოცხლეს ადამიანისას ტფილისში და თუნდა მარტო ტფილისის გარედ. ხომ აშკარაა, რომ მთელი ეს ტრადიკომედია ტრიხინებისა გამართული იყო იმისათვის, რომ იეფად, ან მუქთად ჩაგდებული ტერსიმონიანცისაგან, თუ სხვებისაგან ტრიხინიანი ხორცი ან ხორცად ან ღორად ჰყიდონ და ასაღონ ტფილისში, თუ ტფილისის გარედ. თუ ეს არა, სხვა რა აზრი და განზრახვა უნდა ჰქონოდათ? სასაცილო არ იქნება განა ვიფიქროთ, რომ ყველაფერი ეს მარტო ტრიხინების პლატონურ სიყვარულით მოსდიოდათ და ამიტომ მარტო მისს გამრავლებას და პატივით შენახვას სცდილობდნენ? ტრიხინა რა იმისთანა სასურველი განძია, რომ ასე მოქცეულიყვნენ? აშკარაა, ტრიხინა უმრავლებიათ და ტრიხინიანი ხორცი უსაღებიათ სარფისათვის.

არც გამგეობამ, არც საბჭომ არ მოისურვა ბოროტმოქმედებას ბოროტმოქმედების კარამდე მიჰყოლოდნენ. ამისი ბრალი, ცოტა არ იყოს, ბ-ნ ივანენკოს ედება. მან არამც თუ მეტისმეტად მოარბილა შედეგი თავისის გამოძიებისა, არამედ თვალი აუქცია თვით ბოროტმო-

ქმედებას და მარტო იმაზედ მიახედა თავისს დასკვნაში გამგეობა და საბჭო, რომ ისპანდარიანცს არ უნდა დაეთხოვნა სხვა მოხელენი ღორის ხორცის ზედამხედლობისაგან და თუ დათხოვა, თითონ უნდა ჰქონოდა ზედამხედლობა და შესაფერისად მოეწყო; ანგარიში უნდა ჰქონოდა, რამდენი ღორია ტრიხინიანი, უტრიხინო, რამდენი სხვისთვის უძლევიათ, რამდენი უკან დაუბრუნებიათ და ეს ანგარიში არ ჰქონდაო; უნდა ყოველთვის თავის ანგარიშებში გამოეცხადებინა, რა გზით და ღონისძიებით ჰსპობდა ტრიხიან ღორის ხორცსაო; მისს თანაშემწეს დედაბრიშვილს უნდა სცოდნოდა წესი ზედამხედლობისა, როგორ ინახავდნენ სენიან საკლავის ხორცსა, როგორ სპობდნენო: ყარაულ ტერ-სიმონიანცისათვის უნდა ეცოდინებიათ, რა ბოლო მოსდევს, თუ მუყათად, ან კეთილსინდისიერად არ მოიქცევა ტრიხინიან ღორის ხორცის ყარაულობაშიო. ის ბოროტი კი, რომელიც აშკარად სჩანს ამ საზარელ საქმეში, რა იქნა, სადღაა? ამაზე ბ-ნი ივანენკო თავის დასკვნაში არას ამბობს, თითქო აქ საქმე მარტო იმაზედ იყო მიყენებული, რომ კანცელიარული ფორმები უსრულებია თუ არა სავეტერინარო ზედამხედლობას და სხვა არასფერზე?

12 აპრილს 1896 წ. ეს გამოძიება ბ-ნ ივანენკოსი მოხსენდა „კულტუროსანთა“ გამგეობას, რომელმაც დაადგინა, მთლად ვეთანხმებითო დასკვნას ბ-ნ ივანენკოსას და რადგანაც აქ ბოროტმოქმედებას საყასბოს ადმინისტრაციისას არა ვხედავთ, წინადადება მიეცეთ სასანიტარო სამკურნალო ინსპექტორის თანამდებობის აღმასრულებელ დოქტორს სტეფანოვს „ქაქტიური“ ზედამხედლობა იქონიოს მასზე, თუ როგორ ინახვენ და სპობენ ტრიხინიან ღორის ხორცსა, გამგეს ქალაქის საყასბოისას სავეტერინარო მკურნალს ისპანდარიანცს ცხარე საყველური ეთქვას, „за выяснившуюся небрежность его по надзору за хранением и уничтожением трихинозных туш“, და ამასთანავე ეუწყოს, თუ კიდევ შეემჩნევა ამისთანეები, შესაძლოა დათხოვნილ იქნას თანამდებობისაგანო, შენიშვნა მიეცეს ისპანდარიანცის თანაშემწეს დედაბრიშვილს, რადგანაც საკმაო ყურადღებით არ მოჰქცევიან თავისის

სამსახურის მოვალეობას და ყარაული ტერ-სიმონიანცი დათხოვნილ იქმნას, რადგანაც ტრიხინიანი ღორის ხორცი უძლევი საყასბოს ადმინისტრაციის დაუკითხავდაო.

სხვაო? იკითხავთ. სხვა არაფერი. ხალხის ჯანმრთელობა ხალხის სიკვდილ-სიცოცხლე?! აბა ესენი რა საკითხი და რა სათქმელია!

ეს განაჩენი „კულტუროსანთა“ გამგეობისა და მთელი გამოძიება ბ-ნ ივანენკოსი 10 მაისს 1896 წელს მოხსენდა “კულტუროსანთავე” საბჭოს. საბჭოში, რა მოისმინეს ყველაფერი, სამნაირი აზრი დაიდრა. ერთი წყობა ხმოსანთა იმას ამბობდა, რომ აქ თვითონ გამგეობაა დამნაშავეო, რადგანაც ბ-ნს ისპანდიარიანცს არაერთხელ უთხოვნია გამგეობისათვის ეს საყასბოს ყოფა-მდგომარეობა ასე თუ ისე განაკარგეთო, თვითონ გამგეობაც ამბობს, საყასბო იმისთანა გვაქვსო, რომ შეუძლებელია ზედამხედლობის საქმე რიგიანად მოეწყოსო და აქამდის კი არა უზრუნვია რა ახალის საყასბოს ამენებისათვისაო. ყოველ ამის გამო იგი წყობა ასკვნის, რომ გამგეობის ასე სასტიკი განაჩენი ზედამხედლობის მოხელეთა შესახებ საბუთიანი იქნებოდა, თუ თვით გამგეობას კარგი საყასბო ჰქონებოდაო.

სამართალი ითხოვს ვთქვათ, რომ ამისთანა ლათაიამ ყველაზე არ გასჭრა და აქ საბჭოში ხუთი-ექვსი კაცი აღმოჩნდა, რომ შეეზარათ ეს ტრიხინების ამბავი. ამისთანანი იყვნენ ხმოსნები: ბ-ნები ავთანდილოვი, კუჩარიანცი, ვართანოვი, თამამშოვი, ევანგულოვი და ყველაზე უფრო გულამღვრეული და სასტიკი ბ-ნი ოპოჩინინი აღმოჩნდა. პირველნი ხუთნი, რომელთაც აღიარეს, ცოტად თუ ბევრად აშკარა ბოროტმოქმედება, იმ აზრზე დადგნენ, რომ ამოვიჩიოთ კამისია და იმას მივანდოთ დაწვრილებით გამოიძიონ ეს საქმე და მერე ვნახოთ რა გზა მივცეთო მთელს საქმესაო. ამათი საუბარი არ მოგვყავს, რადგანაც უამითოდაც მეტად გავვიგებელდა ამ საგანზე ლაპარაკი. ხოლო არ შეგვიძლიან ბ-ნი ოპოჩინინის მაშინდელი წყრომარისხვა სიტყვასიტყვით არ მოვიყვანოთ, რომ დავინახოთ ერთმა და იმავე საქმემ რა ათქმევინა შარშან 10 მაისს ბ-ნი ოპოჩინინს და მერე 28 მაისს წელს როგორ

გადაათქმევინა ნათქვამი. 10 მაისს 1896 წელს ბ-ნი ოპოჩინინი ამბობდა:

„გარემოებანი, აღმოჩენილნი გამოძიებითა, არ შეეფერება სასჯელს, რომელიც გამგეობას დაუდგენია. ეს გარემოებანი წარმოადგენენ მთლად დამთავრებულს მასალას, რომელიც აღარ საჭიროებს ახალ გამოძიებას განსაკუთრებულ კამისიისას და გვადლევეს ხელთ საბუთს, ვიფიქროთ, ცოტა თუ ბევრის გულდაჯერებით, რომ ამ საქმეში ბოროტმოქმედება ყოფილა. ჯერ ესა, რომ გამგეობის აზრით, არსებობა არუთინოვის საკუჭნაოსი რალაც შემთხვევის საქმეა ვითომ, მაშინ როდესაც გამოძიებამ აღმოაჩინა რალაცა კავშირი ამ საკუჭნაოსა და ქალაქის საყასბოს შორის. თუ ეს არა, უნდა ვიფიქროთ, ამ საკუჭნაოში მიდიოდნენ ტრიხინიანი დაკლული ღორები რალაც განსაკუთრებულ მიმზიდველობის ძალითა.

„მეორე ისა, რომ რადგანაც არუთინოვი მედგრად დამდგარა იმაზე, ვითომ ჩუმად უხოცნია ღორი, საბუთს გვადლევეს ვიგულვოთ, რომ მისს საკუჭნაოს პირდაპირი კავშირი ჰქონია საყასბოსთან. აშკარაა ამით არუთინოვს სდომებია ამ კავშირის გეში მოესპო, რადგანაც სცოდნია, რომ ჩუმად დახოცვისათვის უფრო ნაკლები სასჯელია, ვიდრე ტრიხინიანი ხორცის გასყიდვისათვის. ყველა ეს გარემოება მიზეზს გვადლევეს შემდეგიც გამოძიებულ იქმნას, ხოლო ჩვენის კამისიის მიერ კი არა, არამედ სათანადო /компетентная власть/ მთავრობისაგან. ვიცით რა, რომ მთელი ეს საქმე უნდა წარედგინოს ბ-ნს გუბერნატორს, მე მგონია საბჭომ თავისის მხრით არავითარი განაჩენი არ უნდა დაადგინოს. და იცადოს რას იტყვის გუბერნიის მთავრობა“.

მერე, როცა პირველის წყობის ხმოსნები მაინც თავისას არ იშლიდნენ, ყველაფერს საყასბოს უკეთურებას აბრალებდნენ და ამბობდნენ, არ გვესმის ან ახალი კამისია რა საჭიროა, ან გუბერნატორის, თუ პროკურორის ხელში საქმის გადაცემა, ბ-ნმა ოპოჩინინმა ასეთი პასუხი მისცა:

„ჩემის აზრით, საბუთები, გამოძიებით აღმოჩენილი, საკმაოა, რომ სავეტერინარო მკურნალი

სამართალში მიეცეს და თუ გირჩევთ საქმე მთავრობას გადაეცით-მეთქი, იმიტომ რომ გამგეობას უამისოდაც ბევრი საქმე აქვს და სადა აქვს დრო გამოსადიებელ საქმეების უკან დევნისაო“.

ბოლოს ოპოზიციის მიუღია იმ აზრს, კამისია აღმორჩეულ იქმნას. საბჭოთა აილო და კამისიას გადასცა ეს გამონადიები ბ-ნი ივანენკოსი და დაავალა უფრო მტკიცედ შეამოწმოს აღმორჩენილი და აღინიშნოს, რა გზა და მიმართულება უნდა მიეცეს თვით საქმესა. ეს მოხდა შარშან 10 მაისს.

მას აქედ ამ წლის 28 მაისამდე კამისიას დამში ელო ეს საქმე. მთელი ერთი წელიწადი კარგა დიდი მანძილია. ბოროტი ენა იტყვის: ამ ხნის განმავლობაში ის გეშები და ნიშნები ბოროტმოქმედებისა, რომელიც ბ-ნთ ქიქოდის და ივანენკოს გამოძიებით აღმორჩენილ იქმნა, თავისს კვალსა და ნავალს წაიშლიდა, ახალი გეშნი და ნიშნებიც ხელიდამ გაუსხლტებოდათ და საქმე თუ იმ საბუთიანობასაც არ დაჰკარგავდა, რაც უკვე ხელთა ჰქონდათ, სხვას არას შეიძენდა. სწორედ ისეც მოხდა. შარშან 26 სექტემბერს თავმა და თავმა მოქმედმა ამ საქმისამ ისპანდიარიანცმა თავი მოიკლა და ბევრი საიდუმლოება თან გაიყოლია, მერე კამისიამ ეს საქმე სჭიმა და სჭიმა და ძლივს წელს 28 მაისს წარუდგინა გასასინჯად საბჭოსა. რა აღმოაჩინა ამ კამისიამ? ახალი, რასაკვირველია, სულ არაფერი, ძველიც კი უგეშურად ჰქვავდა და გაანელა კი თუმცა, ერთი სიტყვაც ძველის აღმონაჩენისა არ შეუშლია, არ უარუყვია, ყველაფერი მართალი გამოდგარა. „კულტუროსანთა“ საბჭოსაც თითქო მარტო ესა სლომებია, როგორც ბოლოს აღმოჩნდა. აილო საბჭომ და ერთხმად გადასწყვიტა: ეს საქმე დავიწყებას მიეცესო. და იცით ვინ იყო თავდაპირველი მიზეზი ამნაირის გადაწყვეტისა? იგივე ბ-ნი ოპოზიციის, რომელსაც შარშან 10 მაისს ისე აუშფოთა გული ამ საქმემ და რომელსაც წელს 28 მაისს იგი გული ასე დაუაძა და მოუტკბილა იმავე საქმემ, რომელსაც შარშანდელს აქედ არც არა მოემატა რა. აკი ერთისა და იმავე მიზეზისაგან შესაძლოა მარტო ერთი და იგივე შედეგიო. სტყუის, ვისაც ეს უთქვამს და ვსცდებოდით,

ვინც დღეს აქამომდე ამას ვიჯერებდით. სჩანს, ახალს „კულტურას“ ეს აზრიც გაუმტყუენებია და „კულტუროსანთა“ გარდა სხვაც ბევრი უზიარებია თავისის „კულტურის“ ზიარებითა.

ვთქვით ბ-ნი ოპოზიციის ასე გარდაჰქმნა ამ ახალის მოდის „კულტურამ“ და საკვირველიც არ არის. „კულტურის“ ძალმომრეობას ძნელია კაცმა გაუძლოს, ნამეტნავად მაშინ, როცა ჰუმანობა, კაცური კაცობა ანახრონიზმად მიღებულა. ის სხვანი ხმოსნები რაღა იქმნენ, რომ ერთობილად მიემხრენ „დავიწყების“ განაჩენს, მაშინ, როდესაც შარშან ისეთის პატიოსანის გულისწყრომით მოეკიდნენ ამ საქმეს? კამისიის მიერ ახლად გამონადიებში რა ჰნახეს იმისთანა, რომ შარშანვე დანახული ამკარა ბოროტმოქმედება, რომელსაც უსათუოდ თანმოჰყვებოდა მოწამვლა, მოშხამვა და სიკვდილიც ხალხისა, ეგრე დაივიწყეს წელს და გულიდამ ამოიღეს, თითქო აქ თავგვებზეა ლაპარაკი და არა ადამიანებზე.

დავანებოთ ყოველ ამას თავი და ვთქვით ისპანდიარიანცი დღეს აღარ არის, განა სხვანი სულ მართალნი არიან? ერთი ვიკითხოთ: რა და ვინ დაივიწყეს?

1/. დაივიწყეს, რომ ტფილისის საყასბო ტრიხინების საბუდარია სავეტერინარო და სასანიტარო-მკურნალთა წყალობითა და უვარგისობითა.

2/. დაივიწყეს, რომ არუთინოვი და სხვა ამისთანები თითქო განგებ აშენებდნენ ტრიხინას, ტრიხინიან ღორის ხორცს მუქთად ეზიდებოდნენ სავეტერინარო საკუჭნაოდამ, ხან ხორცად, ხან ღორად ჰყიდნენ და, ვინ იცის, რამდენი ადამიანის სული გაისტუმრეს საიქიოს, რამდენი ღარიბი ოჯახი გააუბედურეს, რამდენი კაცი მოწამლეს. ნუ დაივიწყებთ, რომ მკურნალის ბ-ნ ხუდადოვის სიტყვით, ოცს ღორს შეუძლიან ორი ათასი კაცი მოსწამლოს და მოშხამოს სასიკვდილოდ და ერთს უეცარს მისვლაზე ისიც ბ-ნმა ქიქოქემ მოასწრო და იპოვა მარტო არუთინოვის საკუჭნაოში 22 ტრიხინიანი ღორი და მამასადამე მარტო არუთინოვს შეეძლო ორი ათას ორასი კაცი მოეწამლა და მოეშხამა სასიკვდილოდ.

3/. ვსთქვათ, ბ-ნი ისპანდარიანცი და სხვანი მოხელენი ყურს არ უგდებდნენ ამ საქმეს, სასანიტარო-სამკურნალო ინსპექტორი სადღა იყო? ესეც დავიწყებას მისცეს.

4/. დავიწყებას მისცეს, რომ სასანიტარო-სამკურნალოს ინსპექტორი თანამდებობის აღმასრულებელი ბ-ნი სტეფანიანცი დადიოდა საყასბოში, როგორც თვითონ არწმუნებს გამგეობას, და ერთხელაც არ გამოუკითხავს, ერთხელაც არავისათვის არ გაუსინჯავს საკუჭნაო, საყასბოს გარეშემოც კი არ დაუთვალიერებია, რომ შეენიშნა იგი, რაც პირველ მისვლაზევე შეჰნიშნა ბ-ნმა ქიქოძემ და აღმოაჩინა. ან თვალი სადა ჰქონდა, ან ყური სადა ჰქონდა, ან გულმოდგინება საქმისა, რომ ყოველივე ეს არ დაუნახავს, არ გაუგონია, არ უძიებია? მამ რისთვისღა დადიოდა და თუ არ დადიოდა, რის ინსპექტორიღაა, რომ ამისთანა მძიმე საქმე ასე უყურადღებოდ უტოვებია?

5/. დავიწყებას მისცეს, რომ, სავალდებულო წესისამებრ, 1895/6 წლებში ან სულ არ უწვაავთ სენიანის საკლავის ხორცი, ან ძალიან ცოტა და ამ გზით ხელი შეუწყვიათ ტრიხინებით ხალხის წახდენისათვის.

6/. დავიწყებას მისცეს, რომ ბ-ნი სტეფანიანცი ერთის მხრით არწმუნებს გამგეობას და საბჭოს, რომ რადგანაც „განსაკუთრებული კარგად მოწყობილი ფეჩი“ არა ჰქონდა სავეტერინარო ზედამხედლობას, დაწვა სენიანის საკლავის ხორცისა შეუძლებელი იყოვო და იგივე ბ-ნი სტეფანიანცი უმტკიცებს იმავე გამგეობას, ისპანდარიანცის სიტყვით, რომ 1894 წელს სულა სწავდნენ სენიან ხორცსაო. ხომ არც 1894 წ. ჰქონიათ ხსენებული „ფეჩი“ და მაშინ შესაძლებელ როგორ ყოფილა წვა უფეჩოდ იმისი, რაც შეუძლებლად გარდიქმნა 1895/6 წლებში? ამასთან უნდა გვახსოვდეს, რომ 1894 წელს დაუწვაავთ, როგორც ანგარიშიდგანა ჰსჩანს, 441 მთელი ტანი სენიან საკლავის და 46.909 სხვადასხვა ნაჭერი და შიგნეულობა. რომელი ერთი დაუჯერეს ბ-ნი სტეფანიანცს? 1894 წლის ამბავი თუ 1895/6 წლებისა? ხომ ამ ერთ-ერთში ერთი უეჭველად ზღაპარია? მე ვუჯერებდი და საბუთი არა მქონდა არ დამეჯერა ისპანდარიანცის 1894 წლის

ანგარიშიო და საბუთადაც ის მოჰყავს, ზოგჯერ ჩემის თვალითაც მინახავს, რომ სწავდნენო. თუ ესეა, მაშინ თავისს ჭკუას რაღად უჯერებდა, რომ წვით სპობა სენიან ხორცისა შეუძლებელიაო და თუ თავისს ჭკუას უჯერებდა, განა საბუთი არ იყო, შეუძლებელი არ დაეჯერებინა? აქ აშკარაა, რაღაც უცნაურ „იყო და არა იყოს“-თანა გვაქვს საქმე.

7/. დავიწყებას მისცეს, რომ სასანიტარო-სამკურნალო ინსპექტორმა ერთხელ არ მოჰკითხა ზედამხედლობას დავთარი, საცა უნდა წერებულყო რამდენი სენიანი საკლავია, რამდენი მოსპობილია, რამდენი დაუწვაავი, რამდენი სად უძლევიათ და რამდენი უკანვე მოუტანიათ.

8/. დავიწყებას მისცეს, რომ შიდა საქმეთა მინისტრის ცირკულიარით ყოველთვის უნდა ყოფილიყო შემდგარი ოქმი – რამდენი სენიანი ხორცი ისპობა, რამდენი არა და ამ ოქმზე ხელი უნდა ეწეროს სავეტერინარო მკურნალს, პოლიციის და გამგეობის წარმომადგენელს და მოუკითხავს ერთხელ მაინც ბ-ნი სტეფანიანცს ეს ოქმი, ან შემდგარა ამისთანა ოქმი როდესმე?

9/. დავიწყებას მისცეს, რომ სავალდებულო წესნი საბჭოსი უბძანებდნენ სავეტერინარო ზედამხედლობას, უსათუოდ სწვითო სენიანი ხორცი და ისპანდარიანცმა ეს დავიწყებას მისცა და ვილაცეებს აძლედა სახარშავად აშკარად, ცხადად და ბ-ნი ინსპექტორი სტეფანიანცი ამ წესის გარდაცვლას არა ჰხედავდა, თუმცა ირწმუნება საყასბოში დავდიოდიო.

10/. თუ არა სწავდნენ, ინსპექტორმა სტეფანიანცმა რატომ ერთხელ მაინც არ მოიკითხა, სად მიდიოდა ის ორმოცი თუმანი, რომელიც წვისათვის დანიშნული იყო ყოველწლივ.

11/. დავიწყებას მისცეს, რომ ხალხის ოფლით მონაგარი ფული 22000 მანეთამდე ხალხისავე ჯანმრთელობის უშიშარყოფისათვის იხარჯება და ამის მაგიერ გამოდის, რომ აქამდე თითქმის არყოფილი ჩვენში ტრიხინა გააჩინეს, გაამრავლეს, გააძლიერეს და, მაშასადამე, ჯანმრთელობას ტფილისის მცხოვრებთა უფრო მეტი მტერი აუჩინეს და მშვილობა და დღეგრძელობა

მკვიდრთა სახლობისა, ცოლშვილისა უფრო მეტს განსაცდელში ჩააგდეს.

12/. დავიწყებას მისცეს, რომ სავეტერინარო ერთობ სასანიტარო-სამკურნალო და სავაჭრო-სამეურნეო ზედამხედლობა, ანუ უკედ ვთქვათ, არამხედლობა იმოდენად გულმოდგინედ ყოფილა, რომ არამც თუ მარტო ტრიხინიანი ღორის შიში უნდა გვქონოდა, არამედ სხვა საღის საკლავის ხორცისაც, რადგანაც საკლავი იგი უტყავებიათ, უჭრიათ იმისთანა უწმინდურ და აყროლებულის სისხლით გაჟღენთილ ადგილზე, რომ, გუბერნიის მკურნალის ბ-ნ ქიქოძის სიტყვით, საყასბოლამვე გაიყოლებდა ხალხის ჯანმრთელობისათვის მავნებელ თვისებასა და ამ სახით, ქალაქს იმედი არც იმისი უნდა ჰქონოდა, რომ ქალაქის ბაზარში საღის საკლავის ხორცი მანც უვნებელი იქნება.

13/. დავიწყებას მისცეს, რომ უფრო ამ არამხედლობას, ვიდრე ზედამხედლობას კანონით противозаконное бездействие власти ჰქვიან, რომელიც არამც თუ граничит с преступлением, არამედ თვით „პრესტუპლენიაა“, რადგანაც ადვილად შესაძლოა ამ „бездействие“-ს დიდი უბედურება მოჰყოლოდა, თუ უკვე არ მოჰყოლია, ტფილისის მცხოვრებთათვის განურჩევლად დიდისა და პატარისა.

ბევრი კიდევ სხვაა ამისი მაგვარი, მაგრამ ვინ ჩამოსთვლის. ესეც საკმაოა, რომ ჩვენი აზრი შევადგინოთ მასზე თუ – ვის ხელშია ჩვენი თავის, ჩვენი ცოლშვილის, ჩვენი სახლობის ჯანმრთელობის და სიკვდილ-სიცოცხლის საქმე. ნუ დავივიწყებთ, რომ ჩვენ ხორცისაგან უვნებლად ყოფისათვის, ყოველწლივ ვინდით თითქმის 54,000 მან. ხარჯს. აქედან 22,000 მანეთამდე იხარჯება ამ სასანიტარო-სამკურნალო ზედამხედლობის მოწყობასა და მოხელეობაზე და რას ვხედავთ? ინსპექტორიდან დაწყებული სავეტერინარო საკუჭნაოს ყარაულამდე სულ ყველას თვალებზე ხელები უფარებიათ, რომ არ დაენახათ, ვინ როგორ ცდილა ხალხის მოწამვლისა და წახდენისათვის. დამნაშავე არავინ აღმოჩნდაო? ვთქვათ ამ განსვენებულს ისპან-

დიარიანცს შენდობის მეტი აღარა ეთქმის რა. ხოლო იგი противозаконное бездействие ანუ თუნდ „небрежность“-ის რომელიც ერთის ხმოსანის სიტყვით, граничит с преступлением, და რომელიც ასე აშკარად ემჩნევათ ყველას ინსპექტორიდან დაწყებული საკუჭნაოს ყარაულამდე, არაფერია და დავიწყებას უნდა მიეცეს?

რალას ეუბნებით ხალხის ჯანმრთელობას, სიკვდილ-სიცოცხლეს! ამოდენა თავისის ოფლის მონაგარს ფულს იხდის ხარჯად მარტო იმისთვის, რომ უშიშარ-მყავ მავნებელ ხორცისაგან და ამის მაგიერ დღე და დღე უფრო მეტს ტრიხინიან ღორსა ვხოცთ, ჩვენს საყასბოშივე ტრიხინით ჭმეულს საკლავისას, უფრო მეტს განსაცდელში ვაგდებთ თვითვეულს სახლობას ტფილისში, თუ ტფილისის გარედ, მოსაწამლავად და სასიკვდილოდ შემთხვევას ვუძლიერებთ, ვუმატებთ და ყოველ ამის შემწყობს, განგებ არის, თუ „по небрежности“ მოხელეა, თუ ვაჭარი ხელს უნდა აბანებდეს, მერე ვინ? საბჭო, ჩვენგანვე ამორჩეული და ჩვენგანვე ჩვენს პატრონად და მზრუნველად დაყენებული ამისთანაებში? მეტი „კულტურა“ და გინდათ! „დავიწყებას მივცეთო“! მეტი სასაცილოდ აგდებაა გინდათ ყველაფრისა, რაც კი კაცს მოუგონია თავისის თავის საფარად, სახსნელად და სამშვიდობოდ. თ-დ ჩოლოყაშვილს და მიქელაძეს თუ სცოდნიათ, რომ ეს სასანიტარო სავეტერინარო ზედამხედლობა, რომელიც მათ ხალხის საკეთილდღეოდ პირველ განიზრახეს, ხალხის საწამლავად გადაიქცეოდა, უწინ წყალში ჩაცვიოდნენ, ვიდრე ამას მოინდომებდნენ.

„დავიწყებას მივცეთო“! არა, ბატონებო, თქვენ ყველაფერი დავიწყებისათვის არ მიგიციათ. კარგად დაგხსნომებიათ დასაჯილდოებლად ღვაწლი ზოგიერთისა. მაგალითებრ, სასანიტარო-სამკურნალოს ინსპექტორის თანამდებობის აღმასრულებელს ბ-ნ სტეფანიანცს ჯილდოც მიეცით, რადგანაც ინსპექტორად დაამტკიცეთ. დავიწყებას მარტო ტფილისის მკვიდრნი მიეცით, იმათი ჯანმრთელობის უშიშრობა, იმათის სიკვდილ-სიცოცხლის განსაცდელი, ქვეყნის წახდენა, ქვეყნის მოწამვლა. თქვენ ის დავიწყებული გქონდათ პირველ

\* 339 стр. улож. о наказ.

დღიადმევე, როცა შემოიღეთ ეს სასანიტარო-სამკურნალო ზედამხედლობა, ზედამხედლობა კი არა, ეს ავკაცური, სწორედ ავკაცური /преступное/ არამხედლობა. ბ-ნი ქიქოძე რომ არ ყოფილიყო ელდა უნდა ეცეს კაცს და ელდაცემული უნდა ჰკითხულობდეს: რა გვეშველებოდა?

მართლა და რა გვეშველებოდა, რომ ბ-ნი ქიქოძეს, ჩვენს „კულტუროსანთა“ საბჭოსა და მკურნალთაებრ, ამ საქმისათვის ყური არ ეთხოვებინა და ეს საქმე არ წამოეყენებინა მთელის თავისის საზარო სახითა! ვინ იცის, რამდენი ადამიანის სული დაიღუპა, რამდენი სახლი დაობლდა და რამდენი კვლავ დაიღუპებოდა!

რა თქმა უნდა, თვითონ ხმოსნები და ერთობ მდიდარი ხალხი ტფილისისა ამისთანა განსაცდელისაგან უშიშარია. აბა იმათ ვინ გაუბედავდა ტრიხინიან ხორცის მიჩეჩებას! ვაი საცოდავს დაბალ ხალხსა, რომელიც ყოველ ამისთანაებში მარტო იწვის ხოლმე ტაფაში. საცოდავი ორიოდე გროშს ჩაიგდებს თუ არა, სიხარულით მირბის არუთინოვთან, იქნება ორი გირვანქა ღორის ხორცი შინ შეუტანო სახლობასა და წვრილშვილი გავახარო და, ვინ იცის, იქნება შინ საწამლავიც შეაქვს საზრდოების მაგიერ. ვის რა დაემართა ამ ტრიხინიან ხორცისაგან, ვინ მოკვდა, ვინ გადურჩა, ვინ რას შეიტყობს, ვინ რას გაიგებს! სასანიტარო-სამკურნალოს „კულტუროსანთა“ მკურნალი, ღმერთმანი, მოწმობას არ დასწერს – თავისის წერისაგან ჩაბარდა პატრონსაო და გათავდა საქმე, წავა საწყალი და საფლავში ჩაიტანს საიდუმლოებას არუთინოვის და სხვა ამისთანაების ტრიხინებისას.

ღიად, ამისთანა საქმე დავიწყებას მისცა „კულტუროსანთა“ საბჭომ და ამისი უმთავრესი ზედამხედავი ბ-ნი სტეფანიანცი ერთის ხარისხით მაღლა აასკუბა უქმად ყოფნის ბარაქალობისათვის. კარგი იქნებოდა, რომ თვითონ არუთინოვსაც ჯილდო რამ მიეღო! განა ღირსი არ იყო? იქნება კაცს ზუთის გროშის ტრიხინიან ღორის ხორცს აძლევს და ამ ზუთი გროშისათვის იმეტებს სასიკვდილოდ მთელს მისს სახლობასა. ეს ისეთი ვაჟკაცობაა „კულტუროსანთა“ ვაჭრისაგან, რომ ყოველის ჯილდოს

ღირსია, თუ თქვენც იტყვით. ეჰ, მართლა რომ კაცთ-მოყვარეობა სულელობა ყოფილა, თორემ არც ესე თავს გავიდოდნენ და დაწინაურდებოდნენ „კულტუროსანნი“. მდიდრები ვართო, მაშ რა იქნებით? თუ ტრიხინითა ადამიანის სიცოცხლე ითრგუნება და საფლავების შინათა ფული იხვეჭების.

ვთქვათ „კულტუროსანთ“ ამისთანა ამბები, როგორც დავიწყებაა ამ ტრიხინების საქმისა, არაფრად მიაჩნიათ, ოღონდ ჩვენ ვიყვნეთ და ქვა ქვაზედაც ნუ დარჩებაო. ეს ადმინისტრაცია რაღას მღუმარებს დღეს აქამომდე? მართალია, „კულტუროსანთა“ სუტ-ლიბერალური გაზეთი „Новое обозрение“ რეტროგრადობას შეგვწამებს, აგე „ივერია“ მთავრობასა სთხოვს შეველასაო. ღიად, ბატონები, მთავრობასა ვსთხოვთ, რომ ეგრე უღმერთოდ ჩაფუჩეჩებული ბოროტმოქმედება, რომელიც მომასწავებელია მთელის ტფილისის მოწამვლისა და ტფილისის გარეთისაც, თქვენის სუტ-ლიბერალობისამებრ დავიწყებას არ იქმნას მიცემული. აქ ხალხის საცოდავობა ჰლადადებს, ხალხის სიკვდილ-სიცოცხლის საქმეა და ლიბერალობა იმაში არ არის, რომ ამისთანა ბოროტმოქმედება, თქვენის საბჭოს მოწყალებით, დავიწყებას მიცემულ იქმნას ქვეყნის სავალლოდ.

ეს ღაღადი დაწვრილებით გამოძიებას თხოულობს და არა ტყუილ-ლიბერალობის ღრეჭასა და ღმეჭასა.

ჩვენ ადმინისტრაციის მღუმარებას ამ საქმეში იმითი ვხსნით, რომ უთუოდ ელოდდა, რას იტყოდა საბჭოს კამისია და მერე თვითონ საბჭოც. ესლა ერთიცა და მეორეც ცნობილია უკვე და ადმინისტრაციამ თვითონ იცის, რას იზამს.

[1897 წ.]



**<საგაზეთო ფენიფენები ტფილისის  
ქალაქის გაგებობის მიმდინარე  
საქმეზე>**

ტფილისი, 16 მაისი/

ხვალ, 18 მაისს, განკითხვის დღეა. განკითხვის დღეა იმისი თუ, – ვინ უნდა მოუაროს, ვინ უნდა უპატრონოს ტფილისს ამ ოთხს წელიწადს და ვინ უნდა იზრუნოს და ისაქმოს ადამიანურის გულისტკივილითა და გულმოდგინებით ჩვენის კეთილდღეობისათვის, ჩვენის ავკარგიანობისათვის.

აქამდე თუ ხმოსნების ამორჩევას საბჭოსათვის ყურს არ ვათხოვებდით და გულგრილად ვეკიდებოდით, დიდი შეცოდება იყო ჩვენ მიერ ტფილისისა და მისთა მკვიდრთა წინაშე. ეხლა სულ სხვა დროა. ტფილისი ჩვენი მშობელი ქალაქია, ყველანი, ვინც აქა ვშობილვართ, აქა ვცხოვრობთ, აქა ვტრიალებთ, – რა მილეთისაც გინდ იყოს კაცი, – მისი შვილები ვართ და სამსახური უნდა გაეუწიოთ ერთნაირის გულისცემითა, ერთნაირის ნატვრითა, რომ ჩვენი დედაქალაქი გამოკეთდეს, გამოფაქიზდეს, მოჯობინდეს, მოჯამრთელდეს. ღმერთმა არა დაიშურა რა ჩვენის დედაქალაქისათვის. ჰაერი, წყალი, ადგილი – ყველაფერი, რითაც ბუნება მოსაწონებლად ჰქმნის ადამიანის საცხოვრებელს, იმოდენად კარგი გვაქვს, რომ ბევრი უცხოელი შემოგვნატრის. თუ რამ ცუდია აქ, და ბევრი რამაც არის ცუდი, სულ იმისი ბრალია, რომ დედაქალაქს შვილობას არ ვუწევთ, გულდადებით არ ვექცევით, სიყვარულით, სიყვარულით არ ვპატრონობთ.

კანონმა ნება მოგვცა ჩვენს დედაქალაქს ჩვენვე მოუვართ, ჩვენვე უპატრონოთ ამ მხრით. ჩვენც საკ-

მაო ხარჯს ვიხდით, რომ ეს პატრონობა, ეს მოვლა ყინულზე დაწერილი თამასუქი არ იყოს, ხარჯიც ტყვილუბრალოდ არ იქსაქებოდეს, საქმე ჩვენდა საკეთილოდ კეთდებოდეს და კეთილი დღედაღლე ემატებოდეს ჩვენს მშობელს ქალაქსა.

ყველამ ერთად, რომ პატრონობა და მოვლა მოვინდომოთ, შეუძლებელია. კანონმა ეს კარგად იცოდა და დაგვიწესა უკეთესნი კაცნი რიცხვით ოთხმოცი ამოირჩიეთ თქვენ შორის და იმათ მიანდეთ ეგ პატრონობა და მოვლაო. და აი ხვალ ამისი განკითხვაა. რომ ჩაუფიქრდეთ, თქვენვე იტყვით ჩვენთან ერთად, რომ ეს სახუმარი საქმე არ არის. ერთი გულმრუდობით აქედ თუ იქით წასული კენჭი შემძლებელია იმისთანა კაცები დასვას საბჭოში, რომ მერე თქვენი მშობელი ქალაქი, თქვენ თვითონ, თქვენი ოჯახი, თქვენი ცოლ-შვილი თავსა და პირს იხოკდეს, – ეს რა ღმერთი გაგვიწყრა, როგორ ამოვირჩიეთ ეს ჩვენი წამწყმედელნი და დამლუპავნიო? იცოდეთ, დიდი ცოდვა-მადლი თანა სდევს არჩევანსა და ვიდრე ხელი კენჭის ჩასაგდებად დაიდროდეს, თქვენს ნამუსს, თქვენს სინდისს, თქვენს გულს, თქვენს ჭკუას რამდენჯერმე დაეკითხეთ – ვინ არის ღირსეული და ვინ არა, განურჩევლად დიდისა და პატარისა.

იცოდეთ, თქვენ გინდათ კაცი, რომელსაც თქვენი სიკეთე, თქვენი სიყვარული, თქვენთვის გულშემატკივრობა სულელობად არ მიაჩნია.

თქვენ გინდათ კაცი, რომელსაც უნდა ებრალებოდეს თქვენი თავი, თქვენი ცოლ-შვილი და თქვენის ოფლით მონაგარს ფულს, ხარჯად თქვენს მიერ გაცემულს, თქვენს კეთილად ცხოვრებას, თქვენს მშვიდობით და უშიშრად ყოფნას ახმარებდეს, რამოდენადაც ყოველივე ეს შესაძლოა.

თქვენ გინდათ კაცი, რომ მდიდარს განგებ არ აკლებდეს ქალაქის ხარჯსა და ხმაამოულებელს შეუძლებელს განგებვე არ უმატებდეს, და რაც მდიდარს დააკლეს, ღარიბს არ ახდევინონ.

თქვენ გინდათ კაცი, რომ თქვენი მიყრუებული უბნები ტალახისა და ტყლაპობისაგან არა ჰყარდეს და

მარტო მდიდართა ქუჩები არა ჰლაპლაპებდეს სიფაქიზითა.

თქვენ გინდათ კაცი, რომ ხორავი, საჭმელ-სასმელი, ქალაქის ბაზარში კარგი და სალი იყოს და თქვენ არ გახდენდნენ, არ გაფუჭებდნენ და ამ მხრით უშიშარ იყვნეთ.

თქვენ გინდათ კაცი, რომ პურს, ღვინოს, საჭმელ-სასმელს ჩარჩები თუ სხვა ვინმე განგებ მამასისხლად არა ჰხდინდნენ და ამით თქვენ და თქვენს ცოლ-შვილს არ უძვირებდნენ საჭირო საზრდოს და საკვებსა.

თქვენ გინდათ კაცი, რომ ქალაქის მოხელეებს ხელსა და კალთას არ აფარებდნენ, როცა ივინი არ ვარგანან და ტყუილუბრალოდ სჭამენ თქვენის ოფლით მონაგარს ფულსა ჯამაგირების სახითა.

თქვენ გინდათ კაცი, რომ ბუნებითად კეთილი ჰაერი თქვენის ღელაქალაქისა არ იშხამებოდეს უწმინდურების სიყრალითა და არა გშხამვიდეს თქვენ, თქვენს ოჯახს, თქვენს წვრილშვილსა.

თქვენ გინდათ კაცი, რომ წყალი უვნებელი და მოუწყვეტელი გქონდეთ და ამასთანაც, რაც შეიძლება იეფი.

თქვენ გინდათ კაცი, რომ რაკი ხორავს თუ სასმელს ბაზარში ჰყიდულობთ, დახათრიჯამებული იყვნეთ, რომ წამხდარს და მოწამლულს არ შემოგაპარებენ.

თქვენ გინდათ კაცი, რომ თქვენს წვრილშვილებს სწავლა-განათლების გზა და სახსარი მისცეს, გული კეთილს შეუჩვიოს, ჭკუა სჯასა და მოსაზრებასა, რამდენადაც შესაძლოა.

თქვენ გინდათ კაცი, რომ თითქმის ორ მილიონამდე ყოველწლივ შემოსავალი ქალაქისა, თქვენგანვე ხარჯად აღებული, თქვენვე და თქვენს ქალაქს საერთოდ ჰხმარდებოდეს გამოზოგვითა და ცოდნითა და არა აქეთ-იქით იქსაქსებოდეს გულდაუდებლობით და უთავდარიგობითა.

ერთის სიტყვით, ბევრი სხვაც არის, მაგრამ ყველას ჩამოთვლა შორს წაგვიყვანს. ესეც საკმაოა, თუ ღმერთმა გვაგონა, და ამაებს მაინც ხვალ შესაფერი კაცები ამოვურჩიეთ.

ამიტომა ვთქვით ზევით, რომ ხვალინდელი დღე სახუმარი დღე არ არის. სიმძიმე და სიდიდე იმ მოვალეობისა, რომელსაც ხვალ კისრად ვლებულობთ და ასე თუ ისე ავასრულებთ, წინ უნდა წაიმძღვაროს ყველამ და ისე მივიდეს კენჭის მისაცემად. აქ ვინც უმტყუვნებს და ულალატებს იმას, რასაც სინიღისი, ნამუსი, კაცური კაცობა ამხელს, იგი უმტყუვნებს, იგი ულალატებს თავისს თავს, თავისის ცოლ-შვილის, ოჯახის ბედნიერებას და კეთილდღეობას.


ვისაც ხელი მიგიწვდებათ, ყველანი უნდა მიხვიდეთ არჩევანზე და თქვენი მოქალაქური, კაცადკაცური მოვალეობა გადაუხადოთ თქვენს მშობელს ქალაქსა.

იცოდეთ, რომ ვისაც ხვალ ჩააბარებთ საბჭოში ხმონსობას, იმას აბარებთ მთელის ოთხის წლის თქვენს საერთო სვე-ბედსა, თქვენის ოჯახობის საერთო კეთილსა და ბოროტსა. ოთხი წელიწადი ბევრის რისამეა შემძლებელი, ავიც შეიძლება ბევრი მოგვაყენოს კარს და კარგიც.

გულს ნუ გაიმრუდებთ, სულს ნუ წაიწყმედავთ! იცოდეთ, ეს დიდი საქმე თქვენს ნამუსს, თქვენს სინიღისს, თქვენს პატიოსნებას აბარია. ახსენეთ ღმერთი, და ღვთისა და მართლის სახელით, შეუდევით არჩევანის დიდს საქმეს და მარჯვენას თქვენსას ის არ აქმნევინოთ, რასაც გული და სინიღისი არ გეუბნებათ.

[1897 წ.]





## **<საზოგადოებრივი ცხოვრების ნაკლნი და მისი ეკონომიური მიზეზები>**

ტფილისი, 12 სექტემბერი

წლებადელი წელიწადი განსაკუთრებით შესანიშნავია მით, რომ მეტად განხილდა ჩვენში ავაზაკობა დარცვა-მტაცებლობისათვის, არამცთუ დიდს შარაგ-ზებზე, არამედ შივ სოფლებშიაც, ქურდობას და ქურდ-ბაცაცობას ხომ ნულარ იტყვიო. ავაზაკობამ, ზოგჯერ კაცისკვლამაც, შეერთებულმა დარცვა-მტაცებლობასთან, ისე გაბედვით გამოიღო თავი ჩვენში, რომ არც ერთი კუთხე არ დარჩა ამიერ კავკასიაში, — ავაზაკთა სარბიელად არ გამხდარიყოს. ძნელად გადის ისე დღე, ან იქიღამ, ან აქიღამ ამბავი არ მოდიოდეს, რომ ავაზაკები დახვდნენ, გაძარცვეს მგზავრად მოდენილები შარაგ-ზაზე, ან ამასა და ამას შეუცვივდნენ სოფლად სახლში, წაიღეს რაც შეეძლოთ და ზოგჯერ დახოცეს კიდევ, ვინც კი გაბედა და დააპირა თავს როგორმე უშველოსო. ესეთს თამამს და კადნიერს ავაზაკობას, დარცვა-გლეჯვას, როგორც ეხლაა, ესე ყველგან მოდებულს და თავალებულს, ძნელად თუ ვინმე მოსწრებია უწინ.

ამნაირმა შეუწყნარებელმა და აუტანელმა მდგომარეობამ მიიქცია ყურადღება მთავრობისა და შეადრწუნა თვით საზოგადოება და მკვიდრნი. აქაური ჟურნალ-გაზეთები ჰცდილობენ უპოვონ თავი და ბოლო ამ მწვავს და შემადრწუნებელს ვითარებას და წამალი რამ დასდონ, მაგრამ, რადგან ხელთ არა აქვთ არავითარი გამონადიები და გამონარკვევი ამ მხრით, არავითარი ცნობა მისი, თუ სად და როგორ მოწყობილნი

არიან მკვიდრნი საშინაოდ და საგარეოდ, რა აიძულებთ საავაზაკოდ და რა არა, რა აქეზებს და ხელს უწყობს ავაზაკობის თარეშობასა, რომელი ადვილი და თესლი ერისა იძლევა ავაზაკსა და მძარცვა-მტაცებელს, — ყოველივე მეცადინეობა უქმად იხარჯება და როგორც მიზეზი, ისეც წამალი ავაზაკობისა გამოურკვეველი ჰრჩება სამწუნაროდ, თვითვეული, რომელიც მოწადინებულია ამ საქმეს რითიმე უშველოს და შეეწიოს, რითიმე ახსნას, თავი და ბოლო გაუგოს, იძულებულია ვინიცობის ბარდებში გაებას და იქ ეძიოს პასუხი ამ მწვავის და აუტანელის ვითარებისა.

რა თქმა უნდა, ამისთანა ძიებისაც, ჰო-არაობით სვლას ამ ბინდბუნდში, რომელიც ჩვენებურ ავაზაკობას გარს ახვევია, თავისი ღირსება და ფასი აქვს, მაგრამ უებარ წამლობისათვის ამისთანა გამონადიები, გამონარკვევი, ვერაფერს მასალას ვერ იძლევა. აქ საჭიროა ნამდვილი შინაგანი ავკარგიანობა საქმისა, რომ საზრისს თვისი ჭეშმარიტი და უეჭველი საბუთი ჰქონდეს, და რაკი ამ გზით მიზეზი აიხსნება, წამლის პოვნაც შესაძლო გახდება.

თვითონ საზოგადოებაშიც და მკვიდრთა შორის დიდი მითქმა-მოთქმაა მიმართული იმაზე, რომ გამოიცნონ მიზეზი ამისთანა მოვლენისა და ღონე რამ იღონონ მისის აცილებისათვის. არიან იმისთანა ბრძენნიც, რომელნიც არც აციებენ, არც აცხელებენ და ამ გაძლიერებას ავკაცობისას აბრალევენ აქაურ მკვიდრთა ბარბაროსობას, дикое население, дикая страна, და თითქო ამერიკა აღმოაჩინესო, კმაყოფილებით და თავმოწონებით ხელებს იფშენებენ. ესეთი ქვიშაზე აგება საბუთისა მეტად ადვილია და იმათ, ვისთვისაც ღმერთს არ უღირსებია უნარი ჭკუათა მოძრაობისა და საქმის ღრმად სინჯვისა, და საღერღელი კი თავის გა-მოჩენისა მოსვენებას არ აძლევს, სხვა რა უნდა ჰქმნან, თუ ფონს არ გავიდნენ ამისთანა გაცვეთილ ლათაიებითა.

მართალია, აქაური მკვიდრნი სხვებზე უკან ჩამორჩენილია ძალიან, ბევრი რამ აკლია, ბევრი რამე აქვს სანატრული თვისის ნაკლის შესავსებლად, მაგრამ ბარბაროსობასა და ველურობაზე ძალიან შორს არიან წინ

წასულნი. სხვა რომ არა ვთქვათ რა, მარტო ის ამბავი, რომ აქაურმა ერმა პურისა და ქერის ხვნა-თესვის გარდა ვაზის მოვლა მაინც იცის კარგად თუ ავად, იცის ღვინის დაყენება, ჰქმნის ამ ერს სხვასთან შედარებით, თუ სხვა ყოველი გარემოება ერთნაირია, უფრო წინ წასულად გონებითად და აქედამ ზნეობითადაც. ვაზი, ვენახი, ვით ხვნა-თესვაზე უმაღლესი და ურთულესი კულტურა მიწათ მოქმედებისა, და ამასთან შეერთებული ღვინის დაყენება, უფრო მეტს გონების გარჯას და მოხერხების ძალას ჰთხოვს, ვიდრე ხვნა-თესვა პურისა და ქერისა. ამ გონებას, საზრიანობას, ხერხის უნარსა უფრო მეტი სარბიელი აქვს ვარჯიშობისა და აქედამ განსნისა და წარმატებისა.

გარდა ამისა, ვენახი ხომ ერთის დღისა და წლის საქმე არ არის. იგია ნაყოფი დიდის ხნის ჯაფისა და შრომისა, იგია თავნი, ნელ-ნელა მოგროვილი მამა-პაპის ოფლის ღვრითა და თითქმის უტყვი ისტორიაა მთელის ოჯახის ეკონომიურ ყოფა-ცხოვრებისა და ნაშრომ-ნაღვაწისა. აქაური გლეხკაცი შეჭხარის ვენახს ჯერ როგორც თავისთავად ძვირად ღირებულს ქონებას და მერე როგორც მამა-პაპის ნაშრომ-ნაღვაწის სახსოვარს და ნაშთსა. ეს ქონებრივი და ზნეობრივი ღირსება ვენახისა, ერთად შეერთებული, უეჭველია კარგად უნდა ზედმოქმედებდეს აქაურ გლეხკაცობის ავკარგიანობაზე, მისის ხორცისა და სულის მოძრაობაზე. ამიტომაც გრძნობა საკუთრების დანდობისა და პატივებისა აქ უფრო მეტს საზრდობას უნდა ჰპოვებდეს, ვიდრე იქ, საცა უძრავი ქონება მოკლებულია ამ ორნაირ, ადამიანთა მიერ სამართლიანად პატივსაცემს, ღირსებას.

იმ ერს, რომლის შინაური მოწყობილება ამისთანა ვითარებას წარმოადგენს, ვერ შეეწამება ბარბაროსობა და ველურობა იმოდენად მაინც, რომ ამით გამოიხსნას ნასკვი იმისთანა ავზნეობისა, რომელიც კაცს ავაზაკად ჰქმნის.

მიზეზი სხვაგან უნდა მოიძებნოს. ზოგიერთი აქაური გაზეთები მიზეზად ავაზაკობისას ასახელებენ მამულების ნაკლებობას და უქონლობას, რა თქმა უნდა, თავი და ბოლო ავკაცობისა, რომლის შედეგი მარცვამტაცებლობაა, ეკონომიური ჭირბოროტი და გაჭირება

არის, საზოგადოდ რომ ვთქვათ. ხოლო ნაკლებობა და უქონლობა მამულისა ერთი დღის საქმე ხომ არ არის და არც იმისთანა რამ არის, რომ დღეს წავიდეს და ხვალ მოვიდეს. თუ მამულის უქონლობას, ან ნაკლებობას, აქ ადგილი აქვს, ის გარემოება როგორღა აიხსნება, რომ ერთს წელს უფრო ხშირდება ავაზაკობა და მეორე წელს ჰკლებულობს? მაგალითებრ, წელს უფრო გაძლიერდა და განშირდა ავაზაკობა, ნუთუ მარტო წელს უცბად შეუცოტავდათ აქაურებს მამულები და უილაჯობით ხელი მიჰყვეს მარცვამტაცებლობას! შეუძლებელია ასეთი უცბობა ვიგულისხმოთ და, მაშასადამე, შეუძლებელია მიზეზი ავაზაკობისა, და ნამეტნავად მისის განშირებისა, მამულის ნაკლებობაში დავინახოთ.

მართალია, საზოგადოდ სხვის ქონების პარვამტაცებლობა შეიძლება მიეწეროს, სხვათა ეკონომიურთა გარემოებათა შორის მამულის უქონლობასაც, რომელიც მკვიდრს უილაჯოდ ჰქმნის ლუკმაპურის შოვნისათვის, მაგრამ ჯერ, მინამ ამ გარემოებას დავიჯერებთ, საჭიროა გამოძიებულ იქმნას – რა ადგილები იქნა გამოდიან ავაზაკნი, იმ ადგილებში რავგარად არის მორიგებული მამულები მკვიდრთა შორის, რა მეტნაკლებობაა მამულებისა და რა ჯურის მკვიდრნი უფრო ეტანებიან ავკაცობას. ვიდრე ყოველივე ეს გამორკვეული არ იქნება, ძნელია კაცმა გულდაჯერებით მიიღოს მამულის ნაკლებობა მიზეზად ავაზაკობისა.

უფრო ჭკუას ახლოა პირველ შეხედვით სხვა აქაურ გაზეთებისაგან სხვათა შორის ნანიშნი მიზეზი. იგი გაზეთი ამბობს, რომ კატორღიად და ციმბირიად გამოქცეულნი, აქედამ ავკაცობისათვის სასჯელად გაგზავნილნი, მოდიან და აქ ავაზაკობენო. ადვილად დასაჯერებელია, რომ ამ გზით რაზმი ავაზაკობისა ჰმატულობდეს. ხოლო ერთი ეს ვიკითხოთ: მინამ იმათ კატორღაში თავს უკრავდნენ და მერე იქიდან გამოიპარებოდნენ, მათი ავკაცობა ხომ აქვე უნდა გაჩენილიყო და არსებულებოდა, უამისოდ კატორღაში რად ამოაყოფინებდნენ თავს. მაშასადამე მიზეზი ავკაცობისა აქ, ჩვენში, ფეხის ადგმისა, აქვე შინ უნდა მოიძებნოს, აქვე

უნდა ჰბუღობდეს ის სენი, რომელიც აჩენს ჩვენში ავაზაკობას.

ჩვენ ვეცდებით შემდეგს წერილში ეს მიზეზნი ავ-  
ნუსხოთ და ჩამოვთვალოთ, რამოდენადაც ივინი ჩვენს  
თვალში იხატებიან მოსაზრებით და არა გამონადიებით  
და გამონარკვევით, რადგანაც ნადიები და გამონარკვევი  
სრულად არსად მოიპოვება ჩვენში.

ტფილისი, 13 სექტემბერი

ამიერკავკასია დასახლებულია მრავალგვარ თესლის  
მკვიდრთაგან. ერთის თესლის მკვიდრი განირჩევა მეო-  
რისაგან ყოველისფრით, რაც ადამიანის შინაგანს და  
გარეგანს კუთვნილებას შეადგენს, მისს ვინაობას  
სულიერად და ხორციელად. ივინი განირჩევიან ზნითა,  
ჩვეულებითა, ხასიათითა, მიდრეკილებითა, რჯულითა,  
საადამიანო და საოჯახი ანდერძითა, საეკონომიო,  
სამეურნო აგებულებითა და იმ მრეწველობითაც,  
რომლითაც თავს ირჩენს აქაური მკვიდრი და რომელიც  
შედევია ჰავისა და მიწის საოცარ სხვადასხვაობისა.

ამიტომაც ავაზაკობის მიზეზთა ახსნისათვის ბევრს  
რასმეს სახელმძღვანელოს შევიძინდით, რომ გამორკ-  
ვეულ ყოფილიყოს ვინაობა ავაზაკისა იმ მხრით თუ, —  
რა თესლისა და რა ადგილის კაცია. ჩვენდა სამწუხ-  
აროდ, ჩვენ ყოველ ამისათვის უღონონი ვართ, რადგა-  
ნაც ამ მხრით გამოძიებული და გამორკვეული არა  
არის რა ჩვენში და ჩვენ მარტო ისლა დაგვრჩენია, აზ-  
რით მივაგნოთ მიზეზსა, ისიც სავინიცობიოდ, იმ  
თითო-ოროლა ცნობების შემწეობით, რომელთაც აქა-იქ  
კაცი ყურს მოჰკრავს შემთხვევით.

იმ ავაზაკთა სახელწოდებას და გვარებს რომ და-  
ვაკვირდეთ, რომელნიც ასე თუ ისე საზოგადოების  
ყურამდე არიან მისულნი, დავინახავთ, რომ ჩვენში  
ავაზაკობენ ბევრწილად ოსები და თათრები. ეს ორის  
თესლის ხალხი მომეტებულს, თუ არ მთელს, ნაწილს  
ავაზაკებისას იძლევა. ძნელად შეხვდებით და ძალიან  
იშვიათად ყაჩაღად გავარდნილს ქართველს, ან სომეხს.  
რა აიძულებს ოსებს და თათრებს ამისთანა ავკაცურ  
ხელობისათვის, როგორც იარაღით ხელში დახვედრა

და ძარცვა და ზოგჯერ ამისათვის კაცისკვლაც? ნუთუ  
იგი ზნეჩვეულება, რომელიც ტაცებას სხვის ქონებისას  
და თუნდ კაცის კვლასაც ცოდვად არა სთვლის? ნუ  
თუ იარაღით ხელში ტაცება სხვის ქონებისა და  
კაცისკვლა ან ოსს, ან თათარს სასახლო ვაჟკაცობად  
მიაჩნია და იმიტომ ხელსა ჰკიდებს ავაზაკობას?

მართალია, ბევრნი არიან იმისთანა ბრძენნიც, რო-  
მელნიც ამისთანა სასაცილო საბუთებით თავიდან  
იმორებენ ამ მწვავის საქმის ვითარებას და ამ  
საბუთებზე ფენმოკეცილნი სხედან, მაგრამ ეს ასე არ  
არის. ბუნება ადამიანისა არც ისეა წამხდარი, რომ  
ქურდობა, ძარცვა და ნამეტნავად კაცისკვლა ესამოვ-  
ნებოდეს, ეხალისებოდეს და ყოველივე ეს სამარცხვი-  
ნოდ არ მიაჩნდეს, როგორც შინ, ისე გარედ. ეს კია  
შესაძლო, რომ ამისთანა სამარცხვინო საქმე ერთს  
უფრო ეადვილება, ვიდრე მეორეს, მაგრამ რომ ამას  
ტაში ქებისა დაჰკრას თვით იმ წრემ, საიდანაც ავაზაკი  
გამოდის, არა გვგონია, ჭკუათა მყოფელ კაცისაგან  
დასაჯერი იყოს. თუ ეს ასეა, მაშ რა ხელი უნდა  
ჰქონდეს ავაზაკობაში ვაჟკაცობის სახელის მოპოების  
სურვილსა? სახელი სხვა რა არის, თუ არ ქების ზმა  
ერისა, და ავაზაკმა, სხვის ქონების მტაცებელმა, სად  
და ვისგან უნდა მოიპოვოს სახელი და ან რად უნდა  
ეგ სახელი, რომლის წყალობითც მელა-ტურასავით  
ტყეში უნდა ემალებოდეს ყოველს კაცსა და მე-  
ზობელს? ან სად და რა ზნეჩვეულებაში უნდა იბადე-  
ბოდეს და ინასკებოდეს ეგ წყურვილი ვაჟკაცობისა?  
ვის რად უნდა, რის მაქნისია თავის თავად?

ავკაცობა, მიმართული სხვის ქონების მოსატაცე-  
ბლად, ყოველგან და ყოველისაგან ცოდვად და  
სამარცხვინოდ არის მიჩნეული. იმისთანა გარეულ და  
ველურ ხალხსაც კი ძნელად სადმე გვიჩვენებთ, რომ  
მაგ სამარცხვინო ხელობას ქება-დიდებათ ახალისებდეს,  
და რაღა ოსები და თათრები არიან ამისთანანი? ვის რა  
საბუთი აქვს ამნაირ დასკვნისათვის?

თათრებზე ამბობენ, ვითომც რჯული და ფა-  
ნატიკობა აქეზებდეს ავაზაკობისათვის. ეს ისეთი სა-  
საცილო ზღაპარია, რომ სიტყვის შებრუნების ღირსიც  
არ არის. სხვა რომ არ ვთქათ რა, განა ერთი და ორი

მაგალითია, რომ თათარი ავაზაკი თვით თათარსვე ერჩის, სძარცვავს და ზოგჯერ ჰკლავს კიდევ. აქ რჯული და ფანატიკობა რა შუაშია? თუ ქრისტიანს ემტერება თათარი თავისიანს რატომ აღარ ინდობს და რად იმეტებს?

ზოგი აქაურს ავაზაკობას აბრალებს იმას, რომ აქაურები ვითომ აზიის ხალხია და აზიელნი ხომ სისხლისმღვრელნი და სისხლისმსმელნი არიან, თითქო მართლა სისხლისღვრა და სისხლისსმა აზიელთა თანდაყოლილი თვისება იყოს. ჩვენ არც ამ სასაცილო სიბრძნეს მივაქცევთ ყურადღებას და სიტყვაშეუბრუნებლად ვტოვებთ. ამას კი ვიტყვით, რომ სხვის ქონების ტაცობა და ნამეტნავად კაცისკვლა იმოდენად წინააღმდეგია ადამიანის ბუნებისა, ევროპიელი იქმნება, თუ აზიელი, რომ თუ არ უძლეველი ძალმომრეობა გარემოებისა, სხვა რამ ძნელად თუ გააბედვინებს კაცს ხელი მიჰყოს ავაზაკობის ხელობასა. აქ საქმე იმაშია, — რამოდენად ძლიერია ზედმომქმედი გარემოება და რამოდენად მაგარი ხასიათი შეხვდა, ამ გარემოების ძალმომრეობას გაუძლოს და არ წაეღებინოს.

ამ მხრით რომ გავსინჯოთ ოსებისა და თათრების ზნეობრივი და ქონებრივი ავკარგეობა და თან შევეწონოთ გარემოებანი ბინადრობისა ცხოვრებისა და ეკონომიურ მეტნაკლებობისა, ბევრს რასმე საყურადღებოს შევნიშნავთ. მაგალითებრ, ოსი ბეჯითი და გამრჯელია, თუ თავისის თავისათვის ირჯება და ადვილ-მამული ხელს უწყობს იმუშავოს, აკეთოს რამე და თავი ისე ირჩინოს. თუ ყოველ ამას მოკლებულია, ადვილად საშოვარს ადვილად ეძლევიანება, რადგანაც ცუდლუტია, სუსტი ხასიათისაა და ძნელად უძლებს მაცდურებას, თუ სადმე ადვილად ასაღები და ჯიბეში ჩასაღები რამ შეიგულა. იგი უფრო ქურდბაცაცობას მისდევს, ვიდრე დიდს შარავზაზე მარცვა ტაცებასა, რადგანაც ბუნებრივად მხდალია და გულდაგულ დახვედრას და შეტევით გამარცვას ძნელად თუ გაჰბედავს. ქონების შესახები დანაშაულობა რომ გავუსინჯოთ ოსს, დავინახავთ, რომ იგი უფროს ერთში ხბოს, ძროხის და ერთობ საკლავის მოპარვით იწყება და თავდება.

ყოველ ამასთან ოსი წიწლაკიანია, მალე ჰფიცხდება და შეგულიანდება ხოლმე და თუ მთვრალია, მაშინ გამბედავიც არის თავის დავიწყებადღე. თუ ოსი სათარეშოდ წავიდა გულდაგულ ვისიმე დასახვედრად, არა გვგონია ისე წავიდეს, რომ არაყით ან ღვინით არ შეფიცხდეს, არ შეგულიანდეს. ვაჟკაცობა ოსისა ნამეტნავად საქართველოს ოსისა, არსად ცნობილი არ არის, მაგრამ თუ ყაჩაღად გავარდა და პირდაპირ ავაზაკობა დაიწყო, მეტისმეტი გაბედულია, თავზეხელაღებული და მოურიდებლად კადნიერი. თითქო იცის, რომ იგი ანდერძაგებულია, დღესა თუ ხვალე სადმე თავი უნდა შეაკლას, სადმე უნდა ტყვიამ მღვერისამ იპოვოს, ან დაიჭირონ, გადაჰკარგონ და ამიტომ თავისი სიცოცხლე თითქო წინაღვე გულიდამ ამოღებული აქვს და მინამ პირში სული უდგას, არაფერს ერიდება, ოღონდ, მინამ ცოცხალია, თავი იკვებოს უშრომოდ და გაურჯელად, ილხინოს და თავისუფლობდეს.

საქართველოს და ერთობ ამიერკავკასიის ოსი, თუმცა სახელით მართლმადიდებელია, მაგრამ რჯულისა და სარწმუნოებისა არა იცის რა და არც არავითარი ღონისძიება მიღებული, რომ იცოდინოს რამ. თითქმის ერთი სოფელი არ არის ოსისა, ბარელისა თუ მთიელისა, რომ სკოლა ჰქონდეს. არა გვგონია, სოფლის მკვიდრთა შორის თუნდ ერთი ოსი მოიპოვებოდეს, რომ იცოდეს წერა-კითხვა. მიუხედავად ყოველ ამისა, გრძნობა საკუთარის ღირსებისა ოსს იმოდენად დახშული არა აქვს, რომ არ იწყინოს ქურდად და ავაზაკად ხსენება. ოსსაც ისე ეთაკილება ეს სამარცხვინო სახელები, როგორც სხვას, უფრო უკეთესს მღვთმარეობაში მყოფს. აგრე ავად ხსენება ოსსაც იმოდენად შეაგულიანებს ხოლმე, რომ ხშირად ხელსაც გამოაღებინებს შემგინებელის სამტროდ. ამისი მაგალითი ბევრია.

აი მოკლედ ჩამოთვლილი ზნეობური ავლადიდება ოსისა, რომელიც წინ უნდა დაუდგეს ზედმოხუცს გარემოებას ცხოვრებისას და არსებობისას, ხშირად ცალკე ღონისათვის უძლეველს და სუსტს ზნეობის კაცის ავკაცად გარდამქნელსა. მართალია, ესეთი ზნეობური ავლა-დიდება დიდი ციხესიმაგრე არ არის,

რომ კაცმა გაუძლოს ძალმომრეობის განსაცდელისას და პატიოსანი უქონლობა ირჩიოს უპატიოსნო ქონებასა, მაგრამ არც ისეთი უღონოა, რომ თუ არ დიდმა რამ განსაცდელმა, სხვამ, მცირე რამე მიზეზმა ადვილად აიძულოს კაცი საავკაცოდ და საავაზაკოდ. ამაზე ამის შემდეგ მოვილაპარაკებთ.

ტფილისი, 18 სექტემბერი

პირაქეთელი ოსები ჰბინადრობენ გორის მაზრაში და ღუშეთისაში და ეს ორი მაზრაა სარბიელი ოსთა ავაზაკობისა და ქურდობისათვის. ძნელად გაიგონებთ, რომ ოსი სხვა მაზრაში გავიდეს საავკაცოდ, ან უკედ ვთქვათ, სხვაგან სადმე ფეხი მოიკიდოს ძარცვა-სატაცებლად.

ოსი ფრთხილია, უნდოა და ერიდება ავაზაკთა ამხანაგობას. კრებულად ავკაცობა, ავაზაკობა, დიდ მორჩილებას, დიდს დისციპლინას ჰთხოულობს. იქნება დისციპლინა ისე საჭიროდ არსად იყოს, როგორც კრებულად ავაზაკობაში, საცა მარტო ხმაამოუღებელს მორჩილებას და ერთის უფროსის კაცის ნებას შეუძლიან თავი დააჭერინოს კრებულად ავაზაკობასა და სული ჩაუდგას. ოსი ამისთანა უღელს ვერ იშენებს, იგი ხელალებით [არ] ემორჩილება თავისავე თანასწორს კაცსა. დისციპლინა ოსისათვის უჩვევი ამბავია. ამიტომ იგი უფრო მარტო ჰთარეშობს და ძნელად თუ ამხანაგად გაიხდის ვისმე, და თუ გაიხდის – იმისთანას, რომელიც ძალიან გამოცდილი ჰყავს ერთგულობაში და ამასთან იმისთანა დანაშაული ჩაუდენია, რომ მთავრობას შემჩნეული ჰყავს და მთავრობისაგან დევნილია. გაცემა და ღალატი ამხანაგისა ოსს ძალიან ეადვილება, თუ მოხერხებული კაცი შეუჩინეს, პატიობა აღუთქვებს, ან ფულით დაანარბეს. თუნდ ესეც არ იყოს, ადვილად იცის ამხანაგთან ჩხუბის ატენა დავლა-ნადარცვის გაყოფაში, ჩხუბს წყენა მოსდევს და ზოგჯერ წყენას გაცემა და ღალატი. ოსი შურისმძიებელია და თუ კაცმა აწყენინა რამ, ძნელად ივიწყებს და როცა იქნება კლანჭს გამოჰკრავს, თუნდ თვითონაც ზედ გადაეგოს.

იქნება ყოველივე ეს იყო მიზეზი, რომ ოსი-ავაზაკი ამხანაგობას ერიდება და მარტოობას ჰრჩევს. ეს იმას არა ჰბინანავს, რომ ოსს-ავაზაკს ხელშემწყობი და მეშველი არა ჰყავდეს და თავისიანებში არავინ აძლევდეს ბინას და საფარს ნადარცვის სამალავად, ან არა ჰყვანდეს ვინმე, ამბის მიმტან-მომტანად. უამისოდ ვერც ერთი ავაზაკი, ოსია თუ სხვა ვინმე, გარედ თარეშობას და ავკაცობას ვერ გაჰბედავს. ბინის მიმცემი და საფარავისა ხშირად მახლობელი ნათესავია, ან საყვარელი ქალი და რასაც ავაზაკი ჰშოულობს, მარტო ამათთვის ემეტება და ამათთვის მოაქვს უანგარიშოდ. აქ ან ჩხუბს, ან სამღურავს ერთმანეთში თითქმის ადგილი არა აქვს და, მაშასადამე, ამისთანა რამ არ აიძულებს აქ კაცმა კაცი გასცეს, თუმცა აქაც კი თითო-ოროლა მაგალითია ღალატისა, მაგრამ ძალიან იშვიათად.

პირაქეთელ ოსთა შორის საავაზაკოდ გამოდიან თითქმის მარტო მთიელნი ოსნი. ცივი ჰავა მთისა, სიმწირე მამულ-დედულისა უილაჯოდ ჰქმნის მთიელს ოსს სარჩო-საბადებლის შესაძენად. მიწა და ჰავა არას იძლევა ქერის მეტსა და იქაური ოსი მარტო ქერის ზვნა-თესვაზეა მინაბრებული, მთიელის ოსის საჭმელი მარტო ქერის პურია და სასმელი ლუდი, რომელსაც ქერისაგან ჰზდის. ამითი უნდა გაუძღვეს იგი ცოცხალსა და მკვდარს, სახელმწიფოს და სოფლის ხარჯსა და გადასახადსა და ხშირად მამულის ღალასაც. კაცმა მარტო ის რომ წარმოიდგინოს, რა უჯდება ოსს მკვდრის სამღვთოს გაუთავებელი წესრიგი, რომელსაც უძღვევლი მამა-პაპური ჩვეულება მისგან ჰთხოულობს და რომელსაც ოსი ვერ უღალატებს უიმისოდ, რომ სამარცხვინოდ თითოთ საჩვენებელი არ გახდეს სოფელში, – ვამბობთ, მარტო ეს მკვდრის სულის დაურევბისათვის ხარჯი კაცმა რომ წარმოიდგინოს, გაუკვირდება, რითღა ცოცხლობს ოსი და მისი სახლობა. ახლა ამას ზედ დაურთევით ხარჯი სახელმწიფო და სასოფლო და სხვა ამისთანა აუცილებელი გადასახადი და გასავალი, და ის გარემოებაც გაითვალისწინეთ, რომ ყოველი ეს უნდა გაისტუმროს თითქმის მარტო ქერის მოსავალმა, და მაშინ წარმოიდგენთ იმ

გაჭირებულ ყოფა-ცხოვრებას, რომელიც ბედს მთიელ ოსისათვის შეუხვედრებია.

მართალია მთიელს ოსს მოცადი პირუტყვიცა ჰყავს. ცხვარი, ძროხა, მხოლოდ იმოდენა არა, რომ სათქმელი იყოს და დიდს ანგარიშში ჩასაგდები: წველა, საკლავი საოჯახოდ ძლივა ჰყოფნის და გარედ გასატანად ბევრი არა ჰრჩება რა აქედამაც; გარდა ამისა, ვინ არ იცის, რომ პირუტყვთშენებას დიდი და ფართო საძოვრები უნდა და ეხლა სადღაა იგი გაშლილობა და სიფართოე, რაც წინად იყო. ეხლა ხალხის გამრავლების გამო, საცა კი სახნის-საკვეთი მისწვდება, საძოვრები სახნავადა კეთდება და საბალახოც დღედაღლე კლებაშია და პირუტყვთშენებაც შეცოტავდა უადგილობისა და სიძვირის გამო. ეხლა გლეხს სამუშაო საქონლის შენახვაც უჭირდება და სანაშენოდ ვილა რასმეს გაჰბედავს ხელი გასძრას და თავი აიტკივოს.

ყოველ ამას ზედ დაუმატეთ უგზოუკვლობა, რომლის გამო გამოტანა რისამე მთიელ ოსს უფრო ძვირად უჯდება, ვიდრე გამოტანილი ჰღირს, და მაშინ სრული სურათი მთიელ ოსის უილაჯობისა თვალწინ წარმოგიდგებათ მთელის თავისის უძლეველის სახითა.

მინამ ფულის საჭიროება ჩვენში გაძლიერებული არ იყო, ვიდრე სახელმწიფოს და სხვა ამისთანა ხარჯს აქაური მკვიდრი მიწის მოსავლით უძღვებოდა, ქერით, პურით იხდიდა, მთიელი ოსები, როგორც იყო, სულს იბრუნებდნენ. ეხლა ყველაფერი ეს ფულსა თხოულობს. გარდასახადმა და ერთობ გასავალმა სახე იცვალა, ფულად იქცა, და შემოსავალი, მოსავალი კი არამც თუ უცვლელად დარჩა, უფრო უარეს დღეში ჩავარდა, ბაზრობა რომ გაუუსინჯოთ. ბაზრობა ვამბობთ, იმიტომ რომ ერთადერთი წყარო ფულის მოვნისა ბაზარია.

რკინისგზამ შუა გასჭრა ქართლი, ესე იგი, გორის მაზრა, და ზღვიდამ ზღვამდე გაუადვილა სიარული, ნაშრომ-ნაღვაწის ზიდვა-გატანა, საქართველოს სამხედრო გზამ დუშეთის მაზრას თავიდაც ბოლომდე გაუარა, გზატკეცილმა ბორჯომიდან აბასთუმამდე ახალქალაქის და ახალციხის მაზრა მოუახლოვა ბაზარს; სხვა აქედ-იქითი გზები კი ასეთი არ არის, რომ მათზე სიარული ერთი ჭირი და ბოროტია, ნამეტნავად

გასასყიდად დანიშნულის საზიდავად და გადასატან-გადმოსატანად. რკინისგზებსა და გზატკეცილებზე ახლომხლო მცხოვრებლთ, რა თქმა უნდა, ბედი გაეხსნათ: კარგი გზა ბაზარს თითქმის ხელში აძლევს. ამ გარემოებამ იმოდენად გაუადვილა ჭირნახულის გატანა ბაზარში, იმოდენად გაუიფა ჭირნახულის საზიდი ხარჯი, იმოდენად შეუშოკლა დრო და გარჯა მისვლა-მოსვლისათვის და გადატან-გადმოტანისათვის, რომ ამ კაი გზებზე მოშორებით მცხოვრებლმა ვეღარ გაუწია ცილობა და ძალაუბრად პირში ჩალაგამოვლებული დარჩა და ბაზარს და ბაზრობას გამოეთხოვა; როცა გზების უვარგისობა საყოველთაო იყო, ერთსა და იმავე ტაფაში იწვოდნენ ყველანი, ნაშრომ-ნაღვაწის გასასყიდად გატანაში თითქმის ერთსა და იმავე გარემოებაში იყვნენ და მარტო მანძილი და სიგრძე გზისა თაბაუთსა ჰმვრებოდა ისეთის მეტნაკლებობით, რომ ცილობა ფასის აწევ-დაწევაში მაინც კიდევ შესაძლებელი იყო და გაყიდვა ბაზარში მიტანილისა ცოტად თუ ბევრად სახეირო.

ეხლა სულ სხვაა. კაი გზებზე მახლობელთ ნამეტნავად გაუადვილდათ და გაუიფდათ ბაზარში მიტანა საქონლისა, და შორებულებს კი, უგზოუკვლობისა გამო, მეტისმეტად დაუძიმდათ და გაუძვირდათ. უგზო-უკვლოდ დაშთენილთაგან და კაი გზებზე დაშორებულთაგან ბაზარში გატანა საქონლისა ასეთს ხარჯსა ჰთხოულობს, ასეთს დროსა და ტანჯვა-წვალებასა, რომ ფასი გაყიდულისა ძლივს აყენებს ხოლმე მარტო ამაების ხარჯსა. პური, ქერი, სიმინდი და სხვა ამისთანა, რომელიც საზიდადაც დიდია, როგორც საპანე, და მძიმეც, ვეღარ იტანს გზისა და საზიდავის ხარჯსა და ამიტომაც ამაებისაგან ფულის გამორჩენა კარგს გზებზე დაშორებულ მკვიდრთათვის უზარალოდ შეუძლებელია.

გარდა ამისა, 1891 წელს რომ რუსეთში შიმშილი იყო და აქაურებს აუკრძალეს სიმინდისა და პურის სამზღვარ-გარედ გატანა, ამ გარემოებამ ისეთი ამბავი დააწია ჩვენს მხარეს, რომ მისი შედეგი დღესაც თავში გვცემს. საქმე ის არის, რომ პური და სიმინდი შინ შეგუბდა ამ აკრძალვის გამო, შინაურმა ბაზარმა ვერ

დაიბნა და ამის გამო ფასი ისე დაფოლდა, რომ მას აქედ სულ კლებაშია და ვეღარ აიწია. ბევრმა ხელი აიღო ხვნა-თესვაზე, რადგანაც ხელს არ აძლევდა და თუ ხნავდა და სთესავდა, მარტო იმოდენას, რომ შინა ჰყოფნებოდა. გარდა სხვა გარემოებისა, მარტო ეს ფასების დაფოლება რომ სახეში მივიღოთ, საკმაოა წარმოვიდგინოთ, რა გაჭირვებაში უნდა ჩაგვიყვანოს იგი მკვიდრნი, რომელთა ავლა-დიდება და ერთადერთი სარჩო-საბადებელი მარტო ხვნა-თესვაა ამა თუ იმ მიზეზით. ჰურს ფასი არა აქვს, ქერსა და სიმინდსა, და რითღა უნდა გაუძღვეს ჭირსა და ბორბოტს წუთისოფლისას მარტო ხვნასა და თესვაზე მიჩემებული მკვიდრი? თუნდ რომ ფასიც ჰქონდეს, რაკი გზა არა აქვს რომ გატანა ჭირნახულისა შესაძლებელი იყოს, რაში გამოიყენოს ნამეტანი თვისის ჭირნახულისა, რაც მისს შინაურს გაჭირვებას და ოჯახს გადარჩება? რისთვის იღვაწ-იშრომოს ნამეტანისათვის? ჯერ ზომ მის ჭირნახულს ფასი არა აქვს და მერე თუნდაც ფასი ჰქონდეს, ბაზრამდე ხელი არ მიუწვდება უგზოუკვლობის გამო. ამ ორ გარემოების გამო იგი კარგ გზებზე დაშორებულნი ადგილები, საცა მარტო ხვნა-თესვაა, იგი მკვიდრნი, რომელნიც მარტო ამ ხვნა-თესვას შეჰყურებენ, უნუგემოდ და უილაჯოდ დარჩენილნი არიან და ფულის შოვნის გზა და კვალი დახშული აქვთ, ფული კი საჭიროა, თუნდ მარტო იმისათვის, რომ სხვადასხვა ხარჯი და გადასახადი ყელში თოკს უჭირებს და სახლ-კარს უწიოკებს, თუ დროზე არ მოიხერხა. აი, ჩვენის ფიქრით, იგი გაჭირების თორნე, რომელიც აცნობს ჩვენში ქურდობას და ავაზაკობას, სხვის საკუთრებაზე მიმართულს. საზოგადოდ ქურდობის და ავაკაცობის ძირეული და მუდამი ბუდე ეს გაჭირებაა, რომელიც კაიკაცობას ხელს უცრის და ავაკაცობას აბედვინებს.

აი, ჩვენის ფიქრით, იგი უძლეველი გარემოება, რომლის შემოქმედებას ვერ გამკლავებია უვიცი გონება და ვერ უძლებს სიმაგრე ხასიათისა ყოველ მხრით უნუგემოდ დარჩენილ მთიელ ოსისა, იქნება ვცდე-ბოდეთ, და ჩვენ კი ამ გარემოებაში ვხედავთ თავდაპირველს მიზეზს, რომ მთიელი ოსი ქურდობასა

და ავაზაკობას ხელსა ჰკიდებს. რასაკვირველია, გაზეთის წერილებით ვერ გამოირკვევა საკმაო სავსებით ეს რთული საქმე, დღეს სავინიცობოდ გამხდარი, რადგანაც გამოძიებული საბუთი რამ ხელთ არა გვაქვს, ხოლო კი ვიტყვით, რომ ამ ძირეულს და ზოგადს მიზეზს მიგვაგნებინა იმ გარემოებამ, რომ ჩვენში მარტო ხვნა-თესვის ადგილებიდან გამოდის უფროს ერთი ავაზაკი და საცა სხვა ხელობაა გავრცელებული, მაგალითებრ, მევენახეობა და ამისთანა რამ, იქიდან ავაზაკად კაცის გავარდნა ან სულ არ არის, ან ძალიან იშვიათია, თუ ეს ასეა, ცხადია, რომ მეტნაკლებობას გამორჩენისას ხვნა-თესვისაგან და ამ ხელობის ავაზაკად მოწყობილებას საშინაოდ და საბაზროდ, თუ პირველი არა, დიდი ადგილი უნდა ეჭიროს ჩვენში ავაზაკობის მრავალგვარ მიზეზთა შორის. ამისი მაგალითი თვით ქუთაისის გუბერნიაშიც არის, საცა ავაზაკობამ თავი იჩინა უფრო მას მერმედ, რაკი ვაზის სხეულებამ, ბამბისა და აბრეშუმის ჭირმა და ვაგლანმა ხელი ააღებინა იქაურ მკვიდრთ ამაების მუშაობაზე და მიაჩნდა მარტო იმას, რაც ხვნასა და თესვას მოაქვს და რაც ფულის გამორჩენისათვის და ერთობ ხეირისა და სარფისათვის პირველებზე მეტად შორს არის, ან სრულიად უილაჯოა. ამასვე გვანიშნებს ჩვენებურ თათრობის ეკონომიური მდგომარეობა. შემდეგ წერილში ამ მხრითაც გავსინჯავთ ამ საქმის ვითარებას თათრების შესახებ და ბოლოს სხვა მიზეზებსაც ჩამოვთვლით.

ტფილისი, 20 სექტემბერი

ჩვენებური თათარი უფრო ეული კაცია, ვიდრე ფეხმოკიდებული მკვიდრი ბინადარი. ყოველივე მისი ჩვეულება, მიდრეკილება, ავი და კარგი სახეიო, თუ საეკონომიო, სულ ამ ეულობაზეა აგებული და დამყარებული. სულ აქედამ არის წარმომდინარი. თათარს ტანტალი, ხშირად აქეთ-იქით უსაქმოდ სიარული, ადგილიდან ადგილზე გადასვლა, ერთის ბინიდან აყრა, მეორეზე ხელახლად დაბინავება არამც თუ ეადვილება, თითქმის ჩვეულებაა აქვს გამხდარი. ეს გაადვილებული აყრა-დაყრა ხშირად იქამდე მიდის, რომ

მთელი სოფელი დღეს რომ აქ არის, ხვალ იმ ადგილას სოფლის ნატამალიც არა სჩანს, აყრილა და სხვაგან გადასულა დედაბუდიანად. არა ერთხელ და ორჯერ შეუნიშნავს ეს ამბავი ადგილის პოლიციას და პოვნა აყრილ სოფლებისა გასჭირებია, როცა მთავრობას მოუკითხნია.

ეს ეულობა, ბინამოუკიდებლობა, ეს თითქმის ბოგანად სიარული, რა თქმა უნდა, ვერ გამოუნასკვავს ადამიანს იმისთანა ხასიათს, რომ დამჯდარი, დადგრომილი და მუდმივი მუშაკაცი გამოვიდეს. ამიტომაც თათარი უფრო მწყემსია, გარედ მოარული, ვიდრე შინ მჯდომი მუშაკაცი. თათარი მწყემსად გადის მთელის თავისის სახლობით, წვრილშვილით, დედაწულით. საცა სამწყსოს საძოვარია, იქ იმისი ბინაა, ოჯახისშვილობა, ეკონომიური წელმაგრობა, ბინის მკვიდრად ერთს ადგილას მოკიდება, რომელიც ქართველ გლეხკაცისათვის იდეალია ცხოვრებისა, თათარს გუნებაშიაც არ გაუვლის. იგი მძიმე საქმის მუშაკაცი არ არის. ხანგრძლივსა და გაუწყვეტელს გარჯას, შრომას გაურბის, არც უყვარს. მიწაში ოფლის ღვრას, მიწის ხანგრძლივს მუშაობას ბინისა და მიწის სიყვარული აქეზებს. თათარს არც ერთი მიაჩნია საძუდამოდ, არც მეორე და რამ უნდა შეაყვაროს დღეს ის, რასაც ხვალ ესე ადვილად თავს ანებებს უტკივარად, დაუნანებლად?

ბინისა და ადგილის უსიყვარულობა თათარს შინ ჯდომისათვის გულს უცრუებს, გული გარედ ეწევა. ამიტომაც თათარის თავმოსაწონებელი ცხენია და თოფიარალი. რაკი თათარს ცხენი ჰყავს, თოფიარალი აქვს, იგი კაცად იხსენება სოფელში, თუნდ შინ, ოჯახში, ნაღისუსალიც ასდიოდეს. ეულკაცობა, აქედ-იქით გარედ სიარული თათარს უფრო მეომარ კაცად აჩვენის, ვიდრე მშვიდობიან მუშად. იგი კარგი ცხენოსანია, პატარაობითვე იწვრთნება ცხენოსნობასა და თოფიარალის ხმარებაში. გარედ სიარული მთელის ოჯახობით ამას ხელს უწყობს. თათარი ვაჟკაციც არის, გულადია. ამასთან ტკბილი მოუბარია და საბუთიანი, წინადაწონილი სიტყვა-პასუხი იცის, ადვილად წაიტყუებს და აიყოლიებს კაცს, თუნდ საავაზაკოდ. იგი ხერხიანიც

არის. სისხლის სამართლის ნაკლი საკმაოდ კარგადა აქვს შემჩნეული. იცის გზები, როგორ და რით დაიძვრინოს თავი, თუ ვინიცობაა დანაშაულობასა და ავკაცობაში როგორმე მოამწყვდია კანონმა. ფორმალური ფიცი სასამართლოს წინაშე თათარს არაფრად მიაჩნია. ამიტომაც უფროს ერთი საქმე, რომელიც მოწმეებზე დამოკიდებული, გამოურკვევი რჩება და დამნაშავეც ხელიდამ უსხლტება მართლმსაჯულებას. ერთი სიტყვით, თუ კანონი, ბენტამისა არ იყოს, მართლა გაჭიმული თოკია, რომელსაც დიდი ზედ გადაახტება ხოლმე და პატარა ქვეშ გაუძვრება, თათარი კიდევ იგი პატარაა, რომელიც ზოგჯერ მოახერხებს ხოლმე ქვეშ გაუძვრეს. ამას ისიცა ჰშველის, რომ თათარებმა ერთმანეთის ხელის დაფარება ხშირად იციან. თათარებში ამისთანა ამბები სესხი და ვალია. წინადავე მომზადებული და გაფიცულნი მოწმეები იშვიათი არ არის თითქმის ყოველ თათარის სასისხლო სამართლის საქმეში.

თათარმა თუ მიინდო ვინმე, ან თვით მიენდო, ძნელად თუ ღალატი და გაცემა მოუხდეთ ერთმანეთისა. თათარი ადვილად ეძიონება მას, ვინც მისს თვალში უფრო ჭკვიანია, გამოცდილი და ვაჟკაცი. თუ ბრძანებლად მიიჩნია ვინმე, თათარი მისი ხმაამოულებელი, ყურმოჭრილი ყმაა. კრებულად მოქმედებისათვის ეგ ხმაამოულებლობა და ყმობა დიდი ციხესიმაგრეა.

ამიტომაც კრებულად ავაზაკობა თათარისათვის ადვილად შესაძლებელია და ჩვეული ამბავიც არის. ძნელად შეჰხვდებით თათარს, რომ მარტოკა ჰთარემობდეს. თვით წვრილმანი ქურდობაც კი სხვებთან ერთად იცის. ძნელად თუ მარტოკა გავა საქურდლად და საპარავად.

თათარი, როგორც ოსი და ერთობ უფროს ერთი სამხრეთის კაცი, გულფიცხია. ისე კაცთან შესაყრელად დინჯია, თავდაჭერილი და, თუ გნებავთ, თავაზიანიც. ხოლო თუ რამ აწყენინეთ, მალე აიძვრევა და ხანჯალსა და თოფს მისწვდება. ჯავრის გულში ჩარჩენა იცის და ჯავრის ამოყრაცა. იგი ცოტად თუ ბევრად თავმომწონეა, მეზობელს, თანასწორს, არ დაეძღვინება, თუ ბედმა ერთმანეთს სადავიდარაბოდ



შეახვედრა. როგორ თუ იმან დამძლიაო, დამიბრყვაო, ამის ჯავრსა და სირცხვილს ადვილად ვერ იტანს. წვა და გადაბუკვა ძნებისა, თივებისა და ზოგჯერ სახლ-კარისა ჩვეულებრივი საქმეა ჯავრის ამოყრისა და ნიშნ-მიგებისათვის. თუ გაჭირდა, არც კაცისკვლას მოერიდება გულზე მოსული და გაბრაზებული თათარი. ხშირად ამისთანა დანაშაული, სულ უბრალო საქმისაგან გამოწვეული, იძულებულ ჰხდის თათარს ავაზაკად გავარდეს, რადგანაც კანონის დევნისა და შიშისაგან შინ აღარ ედგომინება და სხვა გზა არა აქვს, თუ არ იავაზაკოს და კანონს გარედ არ დასდგეს. ამ მიზეზით ყაჩაღად გავარდნა იშვიათი არ არის ჩვენში.

ჩვენა ვთქვით, ჩვენებური თათარი უფრო გარედ მორაული კაცია, ვიდრე შინ მჯდომი. ამიტომაც თათარს, რაც გინდ ღარიბი იყოს, კაი ჩაცმა-დახურვა უყვარს, კარგი იარაღი, კარგი ქამარ-ხანჯალი და ერთობ კარგი მორთულობა, რომ შნო და ღაზათი ჰქონდეს სხვის თვალში. ერთნაირის შეძლების კაცი რომ ავიდოთ სხვა თესლისა, ქართველისა, სომხისა, თუ ოსისა, მორთულობით, მოკაზმულობით თათარი ყველას აჯობებს. რასაც თათარი მოანდომებს მოკაზმვას და მორთულობას, იმის ნახევარსაც ძლივ გამოიმეტებს სხვა თესლის კაცი. ხშირად ჰხანავთ თათარს ვერცხლით შემოსილ იარაღში ჩამჯდარს, ვერცხლის ქამარ-ხანჯლით გაწყობილს. ამ მხრით თათარს უფრო მეტი საჭიროება აქვს, რომელიც უფრო მეტს ხარჯსა და გასავალს ჰთხოულობს, მეტს სარჩო-საბადებელს. ხოლო საკითხი ეს არის, – საიდან რას ჰმოულობს თათარი, რომ სხვასთან ერთად უღელიც სწიოს წუთისოფლისა და ნამეტანისათვის სხვაზე მეტი ჰხარჯოს! ამისი პასუხი მერე იყოს.

ტფილისი, 25 სექტემბერი

ჩვენებურ თათრებს ზამთრის საცხოვრებელი ცხელ ადგილებში აქვთ. მართალია, ამ ადგილებში, თუ სარწყავად წყალი იშოვება, ყოველგვარი მეურნეობა შესაძლებელია. მიწა ცოტად თუ ბევრად მომცემია და ჰავაც რისამე მოსაყვანად ხელის შემწყობია. აქ ხენა-

თესვის გარდა, ვენახიც ხელს მისცემს, ბოსტანი და ბაღიც. მაგრამ ვენახის შენებას ღვინისათვის თათარს რეჟული ნებას არ აძლევს. თუნდ ესეც არ იყოს. ვენახს თითქმის მთელს წელიწადს დღემუდამ შიგ ტრიალი უნდა მუშახელისა და თათარი, რომელიც თითქმის მთელი ნახევარი წელიწადი მთაშია, ამას ვერა იქმს, ზაფხულობით მთაში ყოფნა დედაბუდიანად შეუძლებლად ჰხდის ან ბოსტანს, ან ბაღს ხელი მოჰკიდოს თათარმა. დარჩა ხენა-თესვა და პირუტყვთმენება.

თათარს ხენა-თესვა, თუმცა ეულობს ზაფხულობით, მაინც ეხერხება. ანეულად შემოდგომაზე, საზაფხულოდ გაზაფხულზე ჰხნავს და სთესავს. ცხელ ადგილებში ადრე მოდის ნათესი, თათრის მთაში წასვლამდე მოსავალი შემოდის. იგი მკის, ძნებსა სდგამს, და მერე მთაში მიდის. მთიდან რომ ჩამოვა, შემოდგომის პირს, მაშინ ჰლევავს და შემოაქვს სახლში მოსავალი. ჯერ ეს გარემოება, რომ უკეთესს დროს ლეწვისას თათარი მთაში ატარებს და მერე ის, რომ შემოდგომით დაწყება ლეწვისა, პირდაპირ გვანიშნებს, რომ თათარი დიდს ხვნასა და თესვას ვერ შეუდგება, რადგანაც დიდს ხვნასა და თესვას დიდი დროც უნდება სალევად და შემოდგომიდან მაგდენი დრო აღარ არის, – ეს გარემოება უტყუარად გვეუბნება, რომ ძნელად თუ თათარს ხორბლეულობა იმ ნამეტანობით მოჰყვანდეს, რომ ოჯახიც ჰკვებოს და ბაზარშიაც გაიტანოს გასასყიდად და ფულის შესაძენად.

თუნდ ესეც არ იყოს, ჩვენ ხომ წინა წერილებში მოვიხსენიეთ რას იძლევა ხენა და თესვა ჩვენში საზოგადოდ. ეს რამდენიმე წელიწადია, რაც ხორბლეულობის ფასმა პურისამ, ქერისამ, სიმინდისამ, ზედიზედ ისე დაიწია, რომ მოსავალი თითქმის ხარჯს არ აყენებს. უგზოუკვლობამ ხომ ბაზრის კარი სრულებით დაუხშო. ვლადიკავკასიდან პურის მოტანა უფრო იაფად ჰჯდებოდა და ჯდება, ვიდრე ბორჩალოს თათრების ზოგიერთ ადგილებიდან, რომელთაც არამცთუ ტფილისამდე, კარგს გზებამდე გამოტანის ილაჯიც არა აქვთ უგზობის გამო. ხორბლეულობის ფასმა ძალიან უნდა აიწიოს, რომ მისმა მოტანამ ტფილისში მომტანს

ხარჯი გზისა აუყენოს. ძნელად საფიქრებელია ეხლანდელ დროში, რომ ეს ასე მოხდეს და ფასმა საკმაოდ აიწიოს. ოდესიდამ და შავი ზღვის ნავთსადგურებიდამ, საცა რუსეთის პური გამოდის, პურის მოჭანა უფრო იეფად ჰკვდება, ვიდრე ჩვენის გუბერნიის ზოგიერთ ადგილებიდან, და ეს გარემოება ყოველთვის წინ დაუდგება ხორბლის ფასის აწევას ჩვენში, თუ რუსეთსაც მეტისმეტად არ გაუჭირდა. გაჭირება რუსეთისა იმაზე დიდი ძნელად იქნება, რაც 1891 წელს შიმშილობის დროს შეემთხვა, როცა პური ამერიკამაც კი მოაშველა რუსეთს. მაშინაც კი აქაური მხვინელ-მთესველი ვერაფერს ვერ გამოჩინა თავისს ნაშრომ-ნაღვაწსა. ვამბობთ ვერ გამოჩინაო. ვერ გამოჩინა კი არა, უფრო ცუდ დღეში ჩავარდა და შედეგი იმ დღისა დღესაც თავში სცემს. აკრძალეს მაშინ საზღვარგარეთ გატანა ხორბლეულისა იმის შიშით, რომ ვაი თუ შინ დაგვჭირდესო და ისე კი მოხდა, რომ აღარც შინ დასჭირდათ და აღარც გარედ გაატანინეს. დარჩა მხვინელ-მთესველი სახტად გაოცებული, — ეს რა დაგვემართა, ნურც შენ და ნურც მეო. შეგუბდა, როგორც წინადა ვთქვით, მოსავალი და მოაწყდა მარტო შინაურ ბაზრებს. სხვა რა მოჰყვებოდა ამისთანა ამბავს, თუ არ დაფოლება და დაწევა ფასებისა. ვიმეორებთ, ესეც მოხდა იმ დღიდან დღემდე ფასი დაეცა და ვეღარ აიწია იქამდე, რომ კაცი თავისს ოფლს გამოჩინეს რასმე. მართალია, ეს აკრძალვა მარტო დროებითი იყო და, მაღლობა ღმერთს, მალე მოისპო, მაგრამ შედეგი მისი დღესაც მუშაობს და მოქმედობს ჩვენში იმ მხრით, რომ მხვინელ-მთესველი შეუშინდა ხვნა-თესვას, მას აქედ წელში ვეღარ გაიმართა და ხვნა-თესვაზედ გული წაუხდა: ნამეტანობა ხვნა-თესვისა საბაზროდ დღესაც ხელს არ აძლევს.

ასეა თუ ისე, ჩვენებური თათარიც იმავე დღეშია, რაშიაც მთიელი ოსი: ხვნა-თესვიდამ არავითარი გამოჩინა არა აქვს თითქმის, თუმცა სხვადასხვა ჰავასა და ადგილებში სცხოვრობენ და სხვადასხვა თესლისაგან არიან. მაშ თათარმა საიდან რა იშოვოს, რომ ფულის ხარჯს გაუძღვეს და თავისის ცხოვრების მეტ-ნაკლებობას კბილი მოსჭრას? გვეტყვიან, პირუტყვი-

შენება ხომ ხელთა აქვთ და მწყემსობაც კარგად იციანო. ეს ყოველივე მართალია, ხოლო ამ მხრით თათარის ავლა-დიდება რომ გავსინჯოთ, არც აქ არის ბევრი რამ სახარბიელო. ამას მერე ვნახავთ, შემდეგს წერილში.

ტფილისი, 27 სექტემბერი

არიან თათრებ შორის იმისთანანი, რომელთაც იმოდენა მოცადი პირუტყვი ჰყავთ, რომ მისის შემოსავლით თავს ირჩენენ. ხოლო ამისთანანი ერთი-ორი თუ მოაბოვება მთელ ჩვენებურ თათრობაში. უფროს ერთი თითო-ოროლა ძროხისა და ცხვრის პატრონია, ისიც ათში რომ ხუთსა და ექვსსა ჰყვანდეს, დიდი საქმეა, სხვა დანარჩენნი თითქმის ხელალებით უარაონი არიან, თუ უწინ მოცადის საქონლის ყოლა დიდი იყო, ეხლა ამასაც საძუე შემოაწყდა თათრებშიც, საძოვარი დაცოტავდა, დაძვირდა. პირუტყვის შენახვა ზამთარ-ზაფხულ გაჭირდა. ამ გარემოებამ ძალიან შეაცოტავა პირუტყვთმომენება, სადღაა ეხლა ის ცხენის ჯოგები, რომლითაც ასე განთქმული იყო წინათ ყაზახ-ბორჩალო? დღეს ყაზახ-ბორჩალოში ცხენის ჯოგის ხსენებაც არ არის, თუ ჰყავს ვისმე, ისიც დიდს ვისმე მებატონეს, ვისაც თავისი საკუთარი საძოვრები აქვს და ამისთანანი ერთი და ორია, ისიც მაღალ წოდების კაცი. დაბალი კაცი წელებზე ფეხს იდგამს და თითო-ოროლა ცხვარსა და ძროხას ისე ინახავს. მერე როგორ? შემოდგომაზე, ელი ჩამოვა თუ არა მთიდან, საქონლის პატრონი თათარი მთელს ტფილისის გუბერნიაში წინა და უკან დაძრწის, რომ საქონელს ბინა გაუჩინოს სადმე საზამთროდ. ამისათვის იგი ჰცდილობს საძოვრის პატრონს ან თავადს, ან აზნაურს ვისმე შეეკედლოს. ეძებენ უფრო იმისთანა გავლენიანს კაცს, რომლისაგან გამოელიან შეველას, თუ ვინიცობა დანაშაულში რაშიმე ფათერაკმა გააბა, ან საკუთარმა სიხარბემ წაიტყუა სხვის საკუთრებაზე ხელის მოსათბობლად.

ოსსა და თათარს ჩვენში ქურდობის სახელი აქვთ გავარდნილი. ამიტომაც იმათი დაბინავება სადმე, თუნდ

დროებითაც, ყველას ეძნელება. მოვიდა ოსი, ან თათარი, და ქურდობაც გაჩნდებაო. ეს შიში ქურდობისა ძალიან უმძიმებს თათარს ბინის შოვნას, ყველა ერიდება, და თუ ბინას ვინმე მისცემს, ისეთის პირობითა, რომ კაცს უკვირს, — რითღა უნდა ირჩინოს თავი თათარმაო. თათრისათვის კი სხვა გზა არ არი, ყველა პირობას თითქმის უნდა დასთანხმდეს, ოღონდ უადგილობით პირუტყვი არ გაუწყდეს.

ამ დღეშია არამცთუ ერთი და ორი, არამედ უფროს ერთი თათარი. რაკი შემოდგომით ელი თათრისა მთილამ დაიდგინოს და ბარში ჩამოდის, მთელი ტფილისის გუბერნია მოდებულაია მათგან. ამ ბარად ჩამოსვლის პირველ ხანებში გზებზე ისე არ გაივლით, რომ ხან აქ, ხან იქ, გზების შორიანლო, არა ჰნახოთ დაბარგებული თათარი მთელის თავისის ოჯახითა, საქონლითა, რომელიც საზამთროდ ბინას დაეძებს. ხან ერთს საძოვრის პატრონს მიადგება კარზე, ხან მეორეს, ხვეწნითა და მუდართითა. საქონელი დამაყენებინეო. საბინაო პირობა ხშირად ასეთია: თუ საძოვრის პატრონს მოცადი საქონელი ჰყავს, თათარი, რამდენიც თვითონა ჰყავს, იმდენს საძოვრის პატრონისას ჩაიბარებს სანაშენოდ, და რაც საქონლის პატრონს მეტი საქონელი ჰყავს, იმასაც უნდა მოუაროს და უმწყემსოს მუქთად და უჯამაგიროდ დედაწულიანად. პირობა ხშირად სამის წლის ვადითა აქვთ. სამის წლის შემდეგ მოგება სანაშენოსი შუაზე უნდა გაიყონ, საძოვრის პატრონის ნამეტან საქონლის მონაგები კი მთლად უნდა ჩააბაროს პატრონს. არც იმისთანა პირობაა იშვიათი, რომ თათარი პირდაპირ მწყემსად დაუდგეს მთელის თავისის ოჯახით და დედაწულით მუქთადვე და უჯამაგიროდ, ოღონდ საქონელი გამოაკვებინოს საძოვრის პატრონმა თავისს ადგილებში.

რა თქმა უნდა, ამ ორისავ სახის მორიგებას ზედ დაერთვის ხოლმე ზოგიერთი სხვა პირობებიც, რომლებიც ცოტად თუ ბევრად შელავათიანები არიან, იმისდა მიხედვით, ორთაშუა ვის რა უფრო უჭირს. ხოლო არსებითი ძარღვი კი ყოველგვარ მორიგებისა ზემოხსენებული ორი გვარი პირობაა, რომელიც უტყუარად გვანიშნებს, რამოდენად გაჭირვებულია თათარი, თავისი

ორიოდე ძროხა თუ ცხვარი შეინახოს და ჰკვებოს. ხუმრობაა, მთელი ოჯახის ჯაფა და შრომა, ოჯახისა, რომელიც ხშირად ხუთისა და ექვსის სულისაგან არის შემდგარი, მარტო ორიოდე პირუტყვის საკვებას მოახმაროს და ანაცვალოს! ამ გაჭირებაში ჩავარდნილი კაცი განა შესძლებს პირუტყვი იმოდენა გაიჩინოს, რომ საბაზროდ გამოიტანოს რამ სახარბიელო? ან თვითონ პირუტყვმოშენებას რა ხეირს დააყრის ამგვარი მდგომარეობა და ვითარება საქმისა? ამგვარ ყოფაში განა შესაძლებელია კაცმა იფიქროს, რომ პირუტყვმოშენება ჩვენებურ თათრის ხელში წინ წაიწვეს იმოდენად, რომ სააღებმიცემოდ გამოელოდეს რასმე? ნეტავი ჭამა-სმად ეყოს, რასაც ამნაირი პირუტყვმოშენება იძლევა, და იმისიც მადლობელი იქნება თათარი, ისიც ათში ხუთი და ექვსი, როგორცა ვთქვით, დანარჩენნი კი ამასაც მოკლებულნი არიან.

ეს დანარჩენნი რითღა ირჩენენ თავსა, თუ საქონელიც არა ჰყავთო? — იკითხავთ. აი ჭაპანწყვეტა იმ საქმისა, რაზედაც ჩვენ დავიწყეთ საუბარი, იქნება აქაც იყოს. უფროს ერთი ამ ჯურის თათარი საქონლის პატრონს აედევნებიან ხოლმე, ზოგჯერ ცოლშვილიანად, — ოღონდ გვასვით და გვაჭამეთ, მუქთად გემსახურებითო. თუ საქონლის პატრონს კაცი აკლია და მისი ოჯახი მწყემსობას ვერ ასდის, რა თქმა უნდა, სიხარულით ხელსა ჰკიდებს ამისთანა მოსამსახურეს. მუქთი ხელი, მუქთი მოსამსახურე მწყემსობაშიაც ისე სახარბიელოა, როგორც სხვა საქმეში საქმის პატრონისათვის. ხოლო საკითხავი ეს არის: განა ჭამა-სმის მეტი აღარა უნდა რა კაცს? ჩაცმა-დახურვა, სოფლისა და სახელმწიფო ხარჯი ხომ უსაქონლო კაცისათვის ისეთი ჭირი და ბოროტია, როგორც სხვისთვის?

ყოველ ამისი პასუხი ის არის, რომ საქონლის პატრონი ხშირად მიიკედლებს ხოლმე ამისთანა ქონებით ულონო კაცს, ასმევს, აჭმევს და სხვა კი შენ თვითონ იციო, როგორც გინდა იმოვეო. ისიც ჰმობოს, რაკი სხვა გზა არ არის. თუ ამისთანა კაცს თვითონ მიმკედლებელი ამხანაგად არ გაუხდება, ხელის დამფარებლად კი — უეჭველია. უამისოდ მუქთა მსახურს ვერ იმოვის. აქედამა აქვთ თათრებს ქურდობის სახელი გა-

ვარდნილი ჩვენში. რაკი თათარი დადგა სადმე და ბინა გაიკეთა, ძნელად იქნება, რომ იქ ქურდობა არ გაჩნდეს. ყველა, რაც კი იმ არემარეში დაიკარგება, თათარს დაჰბრალდება ხოლმე. იქნება ბრალი თათარისაც არ იყოს, მაგრამ მაინც გუმანს იმაზე მიიტანენ. ხშირად მარტო ეს გუმანის მიტანა შეიქმნება ხოლმე მიზეზად, რომ ზოგიერთი უამისოდაც გარედ ტანტალს ჩვეული თამამი თათარი ფენს დაჰკრავს და ყაჩაღად გავარდება, ცალკე იმის შიშით, რომ არ გამაბან და აქედ-იქით სასამართლოებში გაუთავებლად არ მათრიონო, ცალკე იმით, გაჭირებულ ცხოვრების სიმწვავე მუდამ გულში აქვს და ნაპერწკალიც საკმაოა გული აუფეთქოს თავის დასახსნევად და გარედ გასავარდნად საშოვრისა და გაუჭირვებულ ცხოვრებისათვის, რომელსაც სამაცდურო თავისუფლება ავაზაკისა წარმოადგენს.

ჩვენ ამით ვათავებთ იმ მიზეზთა დასურათებას, რომელთ შორისაც, ჩვენის ფიქრით, უნდა მოინახოს სათავე აქაურ ავაზაკობისა საზოგადოდ და საკუთრივ მთიელ ოსისა და ელის თათრის შესახებ. მართალია, ზოგადი მიზეზი იმისთანა ავკაცობისა, რომელსაც სხვის ქონებაზე გული მიუდის, ყველგან და ყოველგან ეკონომიური უღონობა ყოფილა და იქნება კვლავაც. მაგრამ მაგ ეკონომიურ უღონობას ჩვენში აქაური, განსაკუთრებული გარემოება მკვიდრისა ჰქმნის და ამით არის შესანიშნავი. შემდეგს წერილში ყოველს იმას, რაც ზემოთ ვთქვით, ერთად თავს მოვუკრებთ და გძლად თქმულს მოკლედ გამოვნასკვავთ, რომ შესაძლებელ იყოს ნასკვი საქმისა უფრო ცხადად გავითვა-ლისწინოთ.

ტფილისი, 15 ოქტომბერი

ჩვენ წინა წერილებში\*) შევნიშნეთ იმ საბუთების ძალით, რაც გაგონილი გვაქვს, რომ ჩვენში ქურდობა და ავაზაკობა, უფრო ოსისა და თათრისაგან არის. სხვა თესლის კაცს ძალიან იშვიათად შეხვდებით ამის-

\*) იხ. „ივერია“ № 201

თანა ავკაცობის სარბიელზე. ამას რომ ვამბობთ, სახეში გვყავს მარტო ქალაქარედ მოთარეშენი.

ჩვენ ისიც ვაჩვენეთ, — რა შინაგანი მიზეზი მოქმედებს, ჩვენის აზრით, რომ ოსი და თათარი გამოდის საქურდლად და საავაზაკოდ. ეს ის მიზეზია, რომ ოსს და თათარს შინ სამუშაო და გასამრჯელო იმისთანა არა აქვს, თავი ირჩინოს და დღევანდელ ცხოვრების ჭირბოროტს გაუძღვეს. მთიელი ოსი და ჩვენებური თათარი, სხვადასხვა გარემოებათა გამო, მარტო ხვნათესვაზეა მიმდგარი და აქედგან წარმოსდგება მისი ეკონომიური უღონობა, რომელიც გულს შინ არ უყენებს და თვალს გარედ აყურებინებს.

ჩვენ ამით იმის თქმა არ გვინდა, ვითომც ხვნათესვა იმისთანა მოქმედება იყოს, რომელიც აქეზებდეს კაცს საქურდლად და საავაზაკოდ. პირიქით, მხვნელ-მთესველი ერი უფრო მშვიდობიანი, საკუთარების პატივისმცემელი, უფრო მორიდებულია და თავდაჭერილი, ხოლო ეგ იქ არის ესე, საცა ხვნათესვის ნაამაგვეს ან შინა აქვს ბაზარი, ან გარედ, და გზაც იეფი და კარგი აქვს საპალნის საზიდავად. ჩვენში სულ სხვაა. ჩვენში მხვნელ-მთესველს არც შინა აქვს ბაზარი, არც გარედ, არც გზა აქვს, არც კვალი, რომ ნაამაგვემა გზის ხარჯს გაუძლოს. ჩვენში დღეს მარტო ხვნათესვა კაცს ვერ აცხოვრებს გაუჭირებლად. ხვნათესვის ნაამაგვეს ფასი არა აქვს იმოდენა, რომ შრომის ხარჯი ამოაღებინოთ, და თუნდა ჰქონდეს, უგზოუკვლობით ბაზარში ვერ გაიტანთ უიმისოდ, რომ ზედ თავისი არ წააგლისოთ. ცხოვრება კი ჰთხოულობს ფულსა სახარჯოდ წუთისოფლის ჭირბოროტის გასაძლომად. შორს რომ არ წავიდეთ, საკმაოა თვალწინ ის დავიყენოთ, რომ დღეს რუსეთი პურს თითქმის უფრო იეფად იძლევა ჩვენში, ვიდრე ჩვენ შინ გვიჯდება, თითონ გზაც უფრო უკეთესი და იეფი აქვს შორიდან შემოტანისათვის, ვიდრე ჩვენ ახლოდამ ბაზარში გასატანად, და საიდან სად მისწვდება ჩვენებური მხვნელ-მთესველი, რომ ფასების მეტნაკლებობაში ცილობა რამ გაუწიოს. ჩვენში ხვნათესვის მოსავალს საოჯახო მნიშვნელობა თუ შერჩება, თორემ სააღებმცემო საგნად

ძნელადლა გახდება, იმოდენად მაინც, რომ ჩიტი ბღღუნად ღირდეს და დევნა მეტი არ იყოს.

არ ვიცი, იქნება ხენა-თესვის მნიშვნელობას ჩვენში მეტს ბრალს ვდებდეთ, როცა ქურდობისა და ავაზაკობის მიზეზებზე ვლაპარაკობთ, მაგრამ საკვირველი ეს უეჭველი ამბავია: რატომ იმ არემარედამ არ გამოდის ასე ხშირად ქურდი და ავაზაკი, საცა მკვიდრნი, ხენა-თესვის გარდა, სხვა მიწის მოქმედებასაც ეტანებიან, მაგალითებრ, მევენახეობას, მებაღეობას, აბრეშუმის მოყვანა იციან და სხვა ამისთანა. იქნება აქ სხვა რამ მიზეზი იყოს, მაგრამ თვალში საცემად დღეს მარტო ის გარემოებაა, რომ სარჩო-საბადებლის საშოვარი ერთგან მარტო ხენა-თესვაა, რომელიც გამრჯელს ხელს არ აძლევს, და მეორედგან – ხენა-თესვასთან ერთად სხვაგვარი მიწისმოქმედებაც, რომლის ნაამაგვეს ბაზარიცა აქვს, ფასიცა და რომელიც პურზე და სხვა ამისთანაზე უფრო სუბუქი და ადვილი საზიდია, ან ბაზარში ფასი იმოდენა აქვს, რომ ჩვენებურ გზების ვაი-ვაგლანის ხარჯს და წვალებას იტანს.

თუ ეს ეკონომიური უღონობა, რომელიც თანა სდევს ჩვენში მხენელ-მთესველს, დავიჯერეთ იმის თავდათავ მიზეზად, რომ მთიელი ოსი და თათარი საქურდლად და საავაზაკოდ გამოდის, თვითონ ეს მიზეზი პირდაპირ გვანიშნებს, რა გზით და ღონისძიებით შესაძლოა ცოტად თუ ბევრად ამოიკვეთოს ჩვენში ხსენებული ბოროტმოქმედება და ავკაცობა. გამოუცვალეთ მთიელ ოსს და ელის თათარს იგი გარემოებანი, რომელიც დღეს ერთსაც და მეორესაც ჰხუთავს, მიეცით და ასწავლეთ ერთსაცა და მეორესაც იმისთანა გასამრჯელო, რომელიც კაცს დღეს ხელს აძლევს სარჩო-საბადებლის საშოვარად, ასწავლეთ და თვალი აუხილეთ ქვეყნიერობაზე ცოტად თუ ბევრად, გაუკეთეთ გზები, ხიდები, ხელი შეუწყეთ ყოველს ახალს ცდასა, ახლის რასმის შემოღებას და მოყვანას, და სხვა ამისთანას, – და ქურდობა და ავაზაკობა, სულ თუ არ ამოიკვეთა, დიდს კლებაში კი შევა. ხოლო ყოველს ამას დიდი სამზადისი უნდა, დიდი დრო და მოხერხება, დიდი თანდათანობა, რადგანაც აწ არსებული ვითარებას ყოველივე ეს შიგ გულ-ღვიძლში

სწვდება და ძნელია კაცმა ერთის შეტევით და წინდაუხედავად შიგნეული გადმოუბრუნოს უკვე დამყარებულ ცხოვრების ავკარგიანობას. გარდა ამისა, ზოგიერთი ეს ღონისძიება ძალიან გვიან გამოიღებს თავისს ნაყოფს და მარტო შორეული მერმისი ჰნახავს მისს კეთილ შედეგსა. ეს იმას არა ჰნიშნავს, ვითომც ეხლავე არ შეუდგეს კაცი დასაწყისს იმის შიშით, რომ ჩვენ არ მოგვეწრებაო. გონიერი და წინდახედული დასაწყისი წამლობისა საჭიროა ყოველთვის და ყოველს ჟამს, რაკი სატკივარი შენიშნულია და ცნობილი.

მეტისმეტი იქნება ყოველივე ხსენებულ ეკონომიურ უღონობას დავაბრალოთ, როცა ქურდობისა და ავაზაკობის მიზეზს ვიკვლევთ. თუ ეკონომიური უღონობაა მიზეზი ქურდობისა და ავაზაკობისა ჩვენში, არიან იმისთანა გარემოებანიც, რომელნიც აქეზებენ და ასაზრდოებენ ამნაირ ავკაცობასა და რომელთა წყალობითაც გაჭირებული კაცი გაეტაცებინება ხოლმე მაცდურებას – რაც არ უთესნია, ის მოიმკოს. ერთი გარემოებათაგანი არის იმედი – არავინ გამოძევიდებაო. ქურდს და ავაზაკს ჩვენში შიში არა აქვს, რომ მღვეარი, ან მკვლევარი მეყოლებაო. თუ სადმე ქურდობა, ან ავაზაკობა მოხდება ხოლმე, მარტო გაქურდული და ჭირისუფალი შეუდგება თავში ცემას, სხვა არავინ არ იტკივებს თავს, თითქო ამისთანა ბოროტმოქმედება, როგორც ქურდობა და ავაზაკობა, საკუთარი ჭირი იყოს ცალკე კაცისა და არა მთელის საზოგადოებისა, მთელის ერისა. ადგილის მოხელენი ან იმოდენა საქმეებით არიან დატვირთულნი, რომ ამაებისათვის ვეღარ იცლიან, ან ისე გულგრილნი, რომ ამისთანაებს ყურს არ ათხოვებენ.

ასეთი გულგრილობა იქიდან წარმოსდგება, არავინ მოჰკითხავს ხოლმე მოხელეს, – აბა რა ღონისძიება იხმარე, რომ გაისარჯე ამა და ამ ქურდობისა, თუ ავაზაკობის აღმოსაჩენად. მოხელე, რომელიც უფრო ფრთხილი და გაოსტატებულია, კანცელიარულად „პროტოკოლს“ შეადგენს, ამა და ამ დღეს ესა და ეს კაცი მოვიდა და გამოძიცხადა, ხარი მომპარესო, და ქურდისა და ნაქურდალის აღმოსაჩენად კანონიერი ღონისძიებაა მიღებულიო. ასე დაწყებული საქმე ამით

თავდება. არც ღონისძიება, არც ხელის განძრევა, არც ადგილიდამ დაძვრა! საკმაოდ მიაჩნია „პროტოკოლის“ შედგენა, რომ თუ ვინიცობაა მოჰკითხონ, გასამართლებელი საბუთი ხელთა ჰქონდეს, საქმე მიწარმოებიაო. ქურდს რა უნდა და ბნელი ღამეო, და ამაზე მეტი სიბნელე განა იქნებალა?\*

საზოგადო სენი ჩვენებურ მოხელეობისა ის არის, რომ ქურდობა, და ავაზაკობა მოხელეს დიდ დავალებულ საქმედ არ მიაჩნია. ბევრს უფრო მეტი შიში და რიდი აქვს უფროსისა, თუ თავის ღროზე უწყებები არ ჩააბარა, ვიდრე იმისი, რომ ქურდობისა და ავაზაკობის კვალს არ გამოუდგა და ქურდი ხელიდამ წაუვიდა. ეს იმისათვის არის ესე, რომ უწყების არჩაბარებას მოიკითხვენ ხოლმე და ქურდისა და ავაზაკის კვალის კვლევას და არ დევნას არავინა ჰკითხულობს, თუ ერთი განსაკუთრებული, წრესგადასული ამბავი არ მოხდა, როგორც მაგალითებრ, თავ. თომა ციციშვილის სახლზედ დაცემა, ან რომელიმე დიდის კაცის გზაში ძარცვა, ფოსტის გატეხა და სხვა ამისთანა, იმაზე კი, რომ გლეხკაცს უკანასკნელი ძროხა მოჰპარეს, წაართვეს, ან დასახელებულს, ან მოჰკლეს, — თავს არავინ იტყვიებს. ამისთანაებში საკმაოდ მიჩნეულია, მოხელემ მოახსენოს ვისაც ვერ არს, რომ ყოველი ღონისძიება ხმარებული იყო და ქურდი და ავაზაკი ვერ აღმოჩნდაო. მართლა იხმარა რამ ღონისძიება, ან რაგვარი ღონისძიება იხმარა, სად რა ჩაიდინა, სად რა მოახდინა, სად რა გზები შეჰკრა, სად რა კვალს დაადგა, ამაებს კი არავინ ჰკითხულობს.

\* ამის დამწერმა ზოგიერთი მაგალითებიც იცის იმისი, რომ სოფლის პოლიციის ბოქაულს ამისთანა პასუხი ეთქვას გაქურდულისათვის: „მე ხომ შენი მეძროხე არა ვარ, შენს ხარ-კამეჩს ვუყარაულოვო, წადი, დამეკარგეო“. არ არის სულ ორი კვირა, რაც ერთს სოფელში ერთი უდელი კამეჩი მოჰპარეს გლეხკაცებს. მინდორში ვიღაცას დაეტოვებინა ცარიელი ურემი, შეაბეს თურმე მოპარული კამეჩები ქურდებმა ამ ურემში და გაუდგნენ გზას. კამეჩების პატრონები აქეთ ეცნენ, იქით ეცნენ და, რა თქმა უნდა, ვერას გახდნენ. — რატომ პოლიციის ბოქაულს არ გამოუცხადეთ? — ვუთხარით ჩვენ. — განა არაო, — გვიპასუხეს: — ორჯელ დავაპირეთ, მივედით კიდევ სახლში და ვეღარ შევბედეთ შიშით: ერთი ახირებული კაცია, ლანძღვა-თრევით გამოგვყრიდაო. მოდით და ამას იქით იკითხეთ: ქურდობა და ავაზაკობა რათ არის-თქო ჩვენში? მამ რა იქნება, საცა პოლიციის ბოქაულამდე კაცს შიშით ვერ მიუღწევია.

ჩვენის ფიქრით კი თხაც რომ დაიკარგოს, პოლიციის ბოქაულმა თავი უნდა გამოიღოს, მთელი ის არე-მარე ფეხზე დააყენოს, დიდი და პატარა მისძრას-მოსძრას, წავიდ-წამოვიდეს საძებნელად, გეში და კვალი მოხაზოს და არ მოისვენოს, ვიდრე ყოველს საქმიან და არა კანცელიარულს ღონისძიებას და ხერხს ზედ არ შეაღვეს, რომ ქურდი და ნაქურდალი ხელთ იგდოს, ან საბუთიანად დარწმუნდეს, რომ საქმეს აღარა ემველება რა. ამისთანაებში მარტო ერთი მდევრობა, ხმაურობა და განგაშიც დიდი რამ არის, რომ ქურდობას და ავაზაკობას მადა და ხალისი დაეკარგოს ცოტად თუ ბევრად და ცოტად თუ ბევრადვე კბილი მოეჭრას. ესეც ღვთის წყალობა იქნება, თუნდ მაგ ხმაურობისა და განგაშისაგან სხვა არა გამოვიდეს რა. ისე არაფერი არ ამხნევეს ქურდსა და ავაზაკსა, როგორც ყურის მოყრუება მოხელესი და დაუდევრობა. აქ, რასაკვირველია, ტყუილუბრალო ფაცაფუცს და ციებ-ციხელებას ადგილი არა აქვს, რადგანაც სიცილის მეტს სხვას არრას გამოიწვევს. აქ საჭიროა მართალი, საქმიანი გამრჯელობა და მოხერხება და არა ტყუილ-უბრალო ალიანქოთი. ყველამ უნდა იცოდეს, რომ ხერხი და ძლიერება ადგილის მოხელეობისა ზედ შეეღვევა ქურდისა და ავაზაკის გზას, თუ რამ ბოროტი და ავაზაკობა მოხდა სადმე, და მაშინ მშვიდობით გადარჩენის იმედი ისე ადვილად ვერ აიყოლიებს ბოროტ-მომქმედს და არ წაიტყუებს, როგორც დღეს არის, ჩვენდა სამწუხაროდ.

ყველამ უნდა გული დააჯეროს საქმით და მაგალითებით, რომ ქურდობა და ავაზაკობა დიდ ბოროტად მიაჩნია მოხელეობას, რომ ქურდი და ავაზაკი უდევნელად, უძებნელად ვერ გადურჩება, რომ ამ დევნასა და ძებნაში უნდა გამოიჩინოს მოხელემ თავისი ღირსება და სიკეთე, და თვით უფროსის მოხელეობა ქურდის დევნასა და აღმოჩენაში უნდა ჰპოულობდეს ღირსებას თავისის ხელქვეითის გულმოდგინებისას და ხერხიან გარჯისას.

რომ ამისთანა გულმოდგინებამ ჩვენში ფეხი აიდგას ავკაცობის ასალაგმავად, პოლიციის მოხელე ყოველთვის უნდა იყოს „на чекы“, რუსები რომ იტყვიან, რო-

გორც საზოგადოების, ისეც უფროსების წინაშე. აი, ჩვენის ფიქრით, ამისათვის რა არის საჭირო: წესად დაიდოს, რომ მაზრის უფროსმა, თუ მის არემარეში ავაზაკობა ან ქურდობა რამ მოხდა, სულ ერთია თხა მოიპარეს, თუ დიდი რამ საუნჯე – მაშინვე დაუყოვნებლივ აუწყოს გუბერნატორს, სად და როდის რა მოხდა, რა ღონისძიება იქმნა მიღებული ბოროტმოქმედების აღმოსაჩენად, რაგვარ მოიქცნენ მაზრის უფროსნი და მისნი ხელქვეითნი აკაცობის გამომჟღავნების პირველ ხანებში, სად რა გეგმა და კვალი მიტანილი, ვისზედ არის გუჟანი აღებული და სხვა ამგვარი, რაც ცხადად ჰყოფს საქმიანს მოქმედებას მოხელისას. ვიდრე საქმე ან ისე, ან ასე გათავდებოდეს, ყოველი ახალი ვითარება მისი უნდა ეუწყოს გუბერნატორს. ამ გზით უმაღლესს მოხელეობას თვალი ეჭირება, ზედამხედლობა ექმნება, ვინ და სად როგორ ირჯება, როგორ ასრულებს თავისს მოვალეობას, როგორ გულმოდგინებას და მოხერხებას იჩენს და ყოველ ამის შესაფერად მოექცევა მოხელეს. ყოველივე უქმობა, ყოველივე დაგვიანება, ყოველივე მოუხერხებლობა ამისთანა შემთხვევაში უნდა სასტიკად მოეკითხოს ხელქვეითსა და ეს შესაძლოა მარტო მაშინ, თუ ამნაირ მიწერ-მოწერას საქმიანად შიგ ჩამხედავი ეყოლება და არა კანცელიარული გამკითხავი.

ეს თვალყურისჭერა თვით ხელქვეითსაც არ დააძინებს, ყურებს ააცქვეტინებს და ბოროტმოქმედების აღმოჩენას დიდმნიშვნელობიანს საქმედ გახდის, როგორც მის საკუთარ თვალში, ისეც მკვიდრთა თვალშიაც. ჩვენ დარწმუნებულნი ვართ, რომ დაუზარებელი, სწრაფი, წინდახედული და ფიცხელი დევნა ქურდისა და ავაზაკისა მოხელეთაგან თვით ხალხსაც გაამხნევეს ბოროტმოქმედთა სადევნებლად, რაკი ჰნახვენ, რომ თვით მოხელეობა ცეცხლმოკიდებული ირჯება, და გამხნეებულ ხალხში დიდს შველას და შემწეობას იპოვის მოხელეობა. იმახიან, ხალხი არა ჰშველის მოხელეობას, ხელს არა სძრავსო, ამას სხვადასხვა მიზეზი აქვს და სხვათა შორის ის, რომ ხელს არა სძრავს თვით მოხელეობა და ხალხს სხვა რა დარჩენია რა, გულხელი დაიკრიბოს და არ მიეცეს ქურდს და ავაზაკს ან

დასახანჯლავად, ან სასიკვდილოდ, ან ცეცხლწასაკიდებლად, იმიტომ რომ უქმობა მოხელეთა ყოველ ამისაგან არა უშიშარჰყოფს.

იტყვიან, – ეს მიწერ-მოწერაც რომ ზურგზედ აეკიდოთ სოფლის პოლიციასა, სხვა საქმისათვის როგორღა მოიცალოსო. ჩვენის ფიქრით, სხვა მიწერ-მოწერისაგან რომ შეღავათი მიეცეს პოლიციას და ამ საქმეზე მოაცალონ, ქვეყანას თუ არ მოემატება, არა დააკლდება რა. მკვიდრთა უშიშარყოფა სიცოცხლისა და ქონების მხრივ ერთი უდიდესი, თუ არ უპირველესი, მოვალეობაა სახელმწიფოსი. უამისოდ არც წინსვლა ერისა, არც წარმატება რაშიმე შესაძლებელი არ არის. ამიტომაც ბევრმა რამ სხვამ ამ უშიშარყოფას თავისი უპირატესობა და ადგილი უნდა დაუთმოს, თუ სხვა ღონე არ არის. თუ მაინცდამაინც პოლიციას სხვა უფრო დიდი და მძიმე საქმე აქვს, მაშინ მკვიდრთა უშიშარყოფას სხვა პატრონი, სხვა მოხელეობა უნდა გაუზრინოთ და არ უნდა დავტოვოთ ეს საქმე იმათ ხელში, ვისაც იმისათვის დრო და მოცალეობა არა აქვს. ეს აშკარაა.

სხვა ამგვარს მიზეზს შემდეგს წერილში ჩამოვთვლით.

ტფილისი, 17 ოქტომბერი

იმ მიზეზთა შორის, რომელნიც აქებებს, ათამამებს და ამხნევეს ჩვენში ქურდობას და ავაზაკობას, უნდა ჩაირიცხოს დახანება საქმის გარჩევისა სამსაჯულოს მიერ. ქურდობისა და ავაზაკობის მოხდენის დღიდან გარჩევის დღემდე იმოდენა ხანი გადის, რომ დაზიანებულსაც ლოდინით გულს უტეხს, მოწმესაც ავიწყდება ზოგიერთი წვრილმანი, არსებითი გარემოება ნახულისა, ხშირად გეში და კვალი დანაშაულისა იშლება და იკარგება და ამით სიცხადე და საბუთიანობა აკლდება საქმეს. ქურდობისა და ავაზაკობის საქმეში თვალად წვრილმანი რამ გეში და კვალი ხშირად უფრო აცხადებს საქმის ვითარებას, უფრო მართლად და უტყუარად ჰხსნის საქმის ნასკვსა, ვიდრე სხვა რამ. ამისთანა

საქმეში მინამ თორნე ცხელია – პური უნდა გამოცხვეს.

მართალია, ავაზაკობისა და დიდ ქურდობის საქმეში, ვიდრე გასარჩევად წარსდგება, ჯერ უნდა გამოძიებულის ხელში გამოიაროს, აქ უნდა შეიკრიბოს ყოველივე ჰო და არა საქმისა და ყოველ ამას დრო და ხანი უნდა ძალაუწიებოდ. მაგრამ აქაც ტყუილუბრალოდ ბევრი დრო იკარგება ან იმის გამო, რომ გამოძიებულს მოცლა არა აქვს, ან იმის გამო, რომ გულს არ უდებს, რადგანაც მოძიებთხავი არავინა ჰყავს. რაკი გამოძიებულმა შესაძლოდ დაინახა ბრალდებული ან თავდებობით, ან საზღაურით თავისუფალად დასტოვოს და ტუსადად არ დაინარჩუნოს, იმას ბევრი აღარაფერი ატანს ძალას, რომ საქმეს სასურველად აუჩქარდეს. იგი მართო ტუსადის საქმეს აფიცხებს, რადგანაც, რაკი ტუსადია, საქმეს უფრო ცხარედ ეკიდებიან, თვალყურს უფრო ფიცხად ადევნებენ და უფრო მალ-მალე მოიკითხვენ ხოლმე. სულ სხვა სიფიცხით მიდის საქმე, როცა ტუსადი ზურგთ არა ჰკიდია გამოძიებულს, ან სამსაჯულოს, ხალხის თვალში კი ნემსის ქურდი და აქლემის ქურდი, ორივე ქურდია.

თუ მაინცდამაინც ავაზაკობისა და დიდ ქურდობის საქმეში დაგვიანება ეპატივება ვისმეს ამა თუ იმ მიზეზითა, წვრილმან პარვა-ქურდობაში კი ყოველად შეუწყნარებელია. ჩვენში და სხვაგანაც, თუ სოფლად მოპარვაა რისამე, უფრო პირუტყვისაა, ვიდრე სხვისა რისამე. ეს იმისთანა ბოროტმოქმედაა, რომელიც ხშირად თვით ადგილზედვე სტოვებს გეშსა და კვალსა, მაგალითებრ, ნავალს ქურდისას და პირუტყვისას და სხვა ამისთანას. თუ მოსამართლემ დროზე არ მოასწრო და არ ინახულა ყოველივე ეს, შესაძლოა სამუდამოდ ხელიდამ წაუვიდეს ქურდიცა და ნაქურდალიც. აქ გამოძიება და სამართალი ერთსა და იმავე მოსწრებულ დროს უნდა მოხდეს. ეს აზრია კანონმდებლისა, რომელსაც საჭიროდ დაუნახავს მოძიებელი მოსამართლე ერთსა და იმავე დროს გამოძიებელიც იყოს და მსჯავრის დამდებაცა. რომ გამოძიებამ მსჯავრის დადებამ არ დაახანოს და მსჯავრის დადებას არ დაუსუსტდეს ცხადყოფელი საბუთი.

ჩვენში კანცელარიულმა მსვლელობამ საქმისამ მთლად დაიმორჩილა მოძიებელი მოსამართლეობა, რომლის პირველი და უკანასკნელი ღირსება საცხოველყოფელო მოქმედებაა, სწრაფი საქმიანობა, დაუნახებელი სარჩლი მართლისა და დაზიანებულისა. ჩვენში გაქურდული გლეხკაცი, თუ სხვა ვინმე, მიდის მოძიებელ მოსამართლესთან და შესჩივის თავის გულის სატკივარს; მოძიებელი მოსამართლე, იმის მაგიერ, რომ მაშინვე საჩივარს გამოუდგეს და ხელი ჩაჰკიდოს, თუნდა ამისათვის სხვა მორიგ საქმეების გადადება მოუნდეს, ვინ იცის, როდის ჰნიშნავს საქმეს გასარჩევად. კიდევ შესაწყნარებელი იქნებოდა ამ შემთხვევაში დაგვიანება, რომ დრო, საქმის გასარჩევად დასანიშნავი, შეეტოლოს მარტო იმ ხანს, რაც ბრალდებულის და მოწმეების მოწვევას მოუნდება. ხშირად მოძიებელი მოსამართლე შეურჩევს ხოლმე დროს, როცა თითონ უკვე დანიშნულ მორიგ საქმეთაგან მოცლილია.

ბევრი მაგალითია იმისი, რომ მკვიდრი, ამ დაგვიანების მნახველი და ნაგემევი, სულაც აღარა სჩივის და გულჩათუთქვილი ემორჩილება თავისს უბედურებას. ამის გამო ბევრი ქურდობა სამართლამდენაც არ მიაღწევს ხოლმე და ქურდი უდევნელად და დაუსჯელად ჰრჩება, და ნუთუ ქურდობას ეს ამისთანა ამბავი გულს არ უკეთებს და უქეზებს. თუნდ ევეც არ იყოს და სამართალს მიჰმართოს დაზიანებულმა, რა მდგომარეობაში სტოვებს ან მას, ან მოწმეს და მთხრობელსა, დაგვიანება საქმისა. რაკი საქმე გვიანდება, დროც ბევრია ხიფათისა და განსაცდელის შესამთხვევად. დაზიანებული და ბრალდებული, უიმისოდაც ერთმანეთზე გულშეგარდნილნი უფრო გადაეკიდებიან ხოლმე, რაც მეტი დრო და ხანი გადის. კიდევ კარგია, თუ აღძრული მტრობა ამათ შუა დარჩა, თორემ ზოგჯერ ისეც მოხდება ხოლმე, რომ მთელი სახლობა და ნათესაობა ერთისა მეორეს გადაეკიდება, და თუ შეხვდნენ სადმე ერთმანეთს, იქნება სისხლის ღვრაც მოუხდეთ. როგორც დაზიანებული, ისეც მისი მოწმე ან მთხრობელი, მუდამ შიშსა და ფიქრშია, რომ დაგვიანებამ საქმისამ დრო და ხანი არ მისცეს ბრალეულს და მის მომხრეთ ჯავრი ამოიყარონ, არ დასწვან, არ გადაჰბუგონ და



უფრო უარესი არა აუტყვონ რა. ამნაირს შიშსა და ფიქრში მყოფს კაცს რომ რაიმე უბედურება შეემთხვას ან თავისით, ან სხვისით, საკვირველი არა იქნება რა. დრო და ხანი ამისთანა ამბებისათვის ბევრს შემთხვევას იძლევა. ამ გზით შესაძლოა ერთმა დანაშაულმა მეორე უფრო მძიმე და დიდი უბედურება გამოიწვიოს და მშვიდობიანი კაცი ავაზაკად გაჰხადოს.

თვითონ ბრალეულსაც, ტუსად აღ არის თუ თავისუფლად, საქმის დახანების გამო მსჯავრის ლოდინში გული თანდათან უფრო უწბილდება, ეძვრება. მერმისის უცნაურობაში შეშინებულის ფიქრის ტრიალი, ჰოსა და არას შუა ყოველდღე ტოკვა, შიშსა და იმედ შუა დღემუდამ ყოფნა ლოდინით დაუძლურებულ გულს ბრალდებულისას, ვინ იცის, საით არ გასწევს და გამოსწევს. განა საკვირველია, რომ ამისთანა ყოფაში ჩავარდნილ კაცს შიში იმოდენად გაუზვიადდეს, რომ გულმა უთხრას, თავს უშველეო და კაცმა ფეხი დაჰკრას და ყაჩაღად გავარდეს. განა ერთი და ორი მაგალითია, ამისთანა სულთამოძრაობას კაცი ძალაუნებურად ავაზაკად გაეხადნოს, რაკი სხვა გზა ვერ დაუნახავს გულისა და ფიქრის დაამებისა და დაწყნარებისათვის.

შესაძლოა ყოველივე ეს საქმეს დაუხანებლობაშიაც მოხდეს, მაგრამ დაგვიანება და დახანება ამისთანა შემთხვევას ახშირებს, რადგანაც დრო და ხანი შესწევს განსაცდელის მოვლენას და გულთათქმათა გაძლიერებას. სწრაფი და დაუხანებელი განაჩენი კი, — გამართლებისა, თუ გამტყუნებისა, — რაკი ერთხელ და სამუდამოდ ბოლოს მოუღებს მიზეზიანს ლოდინსა, ბევრს დროსა და ხანს აღარ მისცემს გულთათქმათა გაძლიერებას, უცნაურობით საშიშს მერმისის დამნაშავისას ცხადჰყოფს და ამით მისს ჰოსა და არას შუა ყოფნას დასასრული ეძლევა. ამ გზით გულის ჩოჩქოლი ჰნელდება, ფიქრს უცნაური შიში აღარ იტაცებს, უკვე გადაწყვეტილის ბედის დამორჩილება იღვიძებს და გულისთქმანი წყნარდებიან თვით საქმეში ასე თუ ისე ჩარეულ მხარეთა შორის. ერთის სიტყვით, დიდი ნაწილი განსაცდელის მოვლენის მიზეზთა უღონოდ ჰხდება, უქმდება, დამნაშავე, ან მისი მომხრე-მოკეთე,

ისეთივე ადამიანია, როგორც სხვა, და ერთსა და იმავე კანონს სულთა-მოძრაობისას ექვემდებარება, და ყოველ ადამიანისათვის ხომ დანახული, განცხადებული განსაცდელი უფრო ადვილად გასაძლოელია და ასატანი სულიერად, თუ ხორციელად, ვიდრე უცნაური მოსალოდნელი, რომელიც ადამიანს მით უფრო ძლიერ აბოროტებს, აშფოთებს, გულსა და ფიქრს უძვრევს, რამოდენადაც მეტად მოქმედობს თავისს მსხვერპლზე.

აქაც ვიტყვით: იქნება ჩვენ ვცდებოდეთ, რომ საქმეთა გარჩევის დაგვიანებას ამოდენა მნიშვნელობას ვაძლევთ, როცა ქურდობისა და ავაზაკობის განშირების მიზეზებზეა საუბარი. ან იქნება ამ დაგვიანებას იმ მხრით არ მოვექცეთ, საიდანაც უფრო უეჭველად დასანახავია მისი ასეთი თუ ისეთი ზემოქმედება. ეს ყველაფერი შესაძლებელია და ჩვენის მხრით მეტისმეტი ახირება იქნება, ამაში გავუჭირვეულდეთ ვისმე. ხოლო არც უიმისობაა, რომ კაცმა სრულიად თვალი მოარიდოს ამ გარემოებას და ანგარიში რამ არ გაუწიოს ცოტად თუ ბევრად. თუ ესეა, საჭიროა კაცი ჩაუფიქრდეს ამ გარემოებას და წამალი რამ იღონოს. შეძლებს წერილში ვეცდებით, ჩვენის შეძლებისამებრ, ამ მხრით გამოვარკვიოთ რამ.

ტფილისი, 31 ოქტომბერი

ჩვენ წინა წერილებში\* მოვიხსენიეთ იგი მიზეზნი, რომელნიც აქეზებენ და ათამამებენ ჩვენში ქურდობას და ავაზაკობას. ამ მიზეზთა შორის უკანასკნელ დავასახელეთ დაგვიანება საქმეთა გარჩევისა სამსაჯულოს მიერ. იქნება ჩვენ საკმაოდ და სასურველის სავსებით ვერ დავასაბუთეთ ეს ჩვენ მიერ დასახელებული მიზეზი, მაგრამ ამაზე კი არავინ უარს არ იტყვის, რომ საქმის გარჩევის დახანება და დაგვიანება არ მოქმედებდეს ცოტად თუ ბევრად ქურდობისა და ავაზაკობის წახალისებასა და წათამამებაზე. მამასადამე, თუ გვინდა ამ მხრით ცოტა რამ ხელი შევშალოს ქურდობას და ავაზაკობას, საჭიროა წამალი რამ მოვიხერხოთ,

\* იხ. „ივერია“ № 215

რომ საქმეთა გარჩევას სასურველი და შესაძლებელი სისწრაფე მიეცეს.

იმ გარემოებაში, რომელშიაც დღეს ჩვენი მართლმსაჯულება და წესნი მისთა საქმეთა წარმოებისა, იქნება საჭირო იყოს ძირეული რამ ცვლილება. ამ მხრით საქმის გამოკეთება და მართლმსაჯულების წესრიგის გაჩარხვა არ შეადგენს საგანს დღევანდელ ჩვენ წერილებისას. ჯერ იმიტომ, რომ ჩვენ უღონონი ვართ ამისთანა მძიმე საქმე ვიტვირთოთ და მეორე იმიტომ, გაზეთის მოკლე წერილებით ძნელია კაცი ამ ტვირთს გაუძღვეს. ჩვენ მარტო გავკადნიერდებით და იმ გზას ვუჩვენებთ, რომელიც ძირეულს ცვლილებას არ შეეხება და დღესვე შესაძლოა ადვილად აღსრულებაში მოვიდეს.

ყველაზე უწინარეს ჩვენი ყურადღება უნდა მიექცეს მომრიგებელ მოსამართლეობას. რა ღონისძიება უნდა მივიღოთ, რომ ამ საქმეთა გარჩევა არ იგვიანებდეს? ჩვენის ფიქრით, ერთადერთი ღონისძიებაა: უმაღლესმა მთავრობამ, რომელსაც ექვემდებარება მომრიგებელი მოსამართლეობა, ყველაზე მძიმე საქმედ უნდა მიიჩნიოს ქურდობა და მიაჩნევიოს თვით მომრიგებელ მოსამართლეობას. რომ ეს მიჩნევა უქმად არ დარჩეს და სასურველი ნაყოფი გამოიღოს, საჭიროა ზედამხედლობა მომრიგებელ მოსამართლეზე გაძლიერდეს, გასაქმიანდეს, მომრიგებელ მოსამართლეს უნდა ებრძანოს, დაუყონებლივ, რაკი ქურდობაზე საქმე ასტყდა, საქმეს ხელი ჩაჰკიდოს, თუნდა ამისათვის სხვა მორიგ საქმეების გადადება მოუნდეს, თთვისა და თთვის თავს, საცა ჯერ არს, ანგარიში წარუდგინოს თთვის განმავლობაში რამდენი საქმე გაუჩნდა ქურდობისა, რამდენი რა ხანში და როგორ გაათავა, რამდენი დარჩა და რა პატივისაღები მიზეზია საქმის დარჩენისა სამერმისოდ. ამ ანგარიშიდამ, თუ მარტო ფორმალურად არ იქნება განკითხული, აშკარად გამოჩნდება ვინ როგორ ირჯება და მომრიგებელ მოსამართლეობის უფროსობას ხელთ ექნება ყოველთვის საბუთი ზედამხედლობისა და თვალყურის ჭერისათვის. ამ გზით ზედამხედლობა და თვალყურის ჭერა თვით მომრიგებელ მოსამართლესაც არ დააძინებს, რადგანაც შესაძლო იქნება ყოველივე დაგ-

ვიანება საქმისა მოკითხოს და, თუ პატივისაღები მიზეზი არ აქვს, უსაყვედუროდ არ გადარჩეს. ეს შიში საყვედურისა და ერთობ სამსახურში სახელის წახდენისა საკმაო ღონეა, რომ მომრიგებელმა მოსამართლემ მთელი თავისი ბეჯითობა იხმაროს საქმის დაუხანებლობისათვის.

რაც შეეხება იმ საქმეებს, რომელიც დიდს ქურდობას და ავაზაკობას შეადგენს და ექვემდებარება ოლქის სასამართლოს, ჯერ საქმე უნდა აჩქარდეს გამოძიების ხელში და მერე ოლქის სასამართლოში. რომ ან ერთგან, ან მეორეთგან საქმე არა ბრკოლდებოდეს, ჩვენის ფიქრით, საჭიროა ყოველივე აკაცობა, რომელიც მიმართულია სხვის ქონების პარვამტაცებლობაზე, მიენდოს განსაკუთრებულს გამოძიებელს და განსაკუთრებულს ნაწილს ოლქის სასამართლოსას. ეს განსაკუთრებული გამოძიებელი და განსაკუთრებული ნაწილი ოლქის სასამართლოსი მარტო ქურდობისა და ავაზაკობის საქმეებზე უნდა იყოს მიჩნეული და სხვა სისხლის სამართლის საქმეთაგან თავისუფალი და ყოვლად მოცლილი.

ჩვენ წინა წერილში, ჩვენის შეძლებისამებრ, ვაჩვენეთ, როგორ უნდა მოკითხოს სასოფლო პოლიციას ქურდობისა და ავაზაკობის საქმენი. აქაც ჩვენ ჩვენი ვთქვით, რა გზით შესაძლოა სასამართლოებში ცოტად თუ ბევრად აჩქარდეს საქმეთა წარმოება შესახებ ხსენებულ აკაცობისა, მაგრამ შორსა ვართ იმაზე, რომ ვიფიქროთ, ვითომ ამით სრულად ბოლო მოეღოს ქურდობასა და ავაზაკობასა ჩვენში. ეს კია, რომ თვალაცქევით ყოფნა პოლიციისა, სასწრაფო და ფიცხელი ძიება და დევნა აკაცისა, სწრაფი და დაუყოვნებელი მართლმსაჯულება დიდს ზედმოქმედებას იქონიებს ხალხზე, ბევრს გაამხნევენს, ბევრს ხელს გამოადებინებს და მთავრობა თვით მკვიდრთა შორის მოიპოვებს შველას და შემწეობას. ესეთი მღვიძარება ცალკე მთავრობისა, ცალკე მკვიდრისა, ბევრს წაართმევს ხალხის, ბევრს მოუკლავს მადას სხვის ქონების ქურდობით და ავაზაკობით შეტენისას. იმედს დაუსჯელად გადარჩენისას, ან მთავრობის ხელიდამ თავის დასხლელტისას, ბევრად შეასუსტებს, ბევრად შეამცირებს

ასეთი შეერთებული ფიცხელი ზედმისევა პოლიციისა, მკვიდრისა და სასამართლოსი.

ერთი დიდმნიშვნელობიანი მიზეზი ქურდობისა და ავაზაკობისა მკვიდრთა უიარაღობაა. ქურდი, ავაზაკი თავიდან ფეხამდე გამოწყობილია თოფ-იარაღით მაშინ, როდესაც ძნელადღა ჰნახავთ ჩვენში სოფელს, რომ თოფი მოიპოვებოდეს. ხალხი იარაღაყრილია და, მაშასადამე, ყოვლად უღონოა, რომ თავი გამოიღოს ავაზაკის მოსაგერიელებლად და დასახვედრად, და რის შიშიღა აქვს ავაზაკს და ქურდსა? ამიტომაც ასე სასაცილოდ აგდებული ჰყავთ ავაზაკებს სოფელიც და მისი მკვიდრნიც. სასაცილოდ აგდება არ არის, მაშ რა არის, რომ შუალამისას სოფელში მთელი გუნდი ავაზაკებისა შედის, რაც ჰსურს, ყოვლად დაუსჯელად იმას სჩადის, იტაცებს, სძარცვავს, ზოგჯერ სოფელს ხარჯს ახდევინებს და მშვიდობით გამოდის, თითქო თავის სახლში შევიდა და გამოვიდაო. განა ერთი და ორი მაგალითია ამისი? ვისი რიდი და შიში უნდა ჰქონდეს ავაზაკს, როცა არავის ხელში არავითარი იარაღი არ ეგულება მთელ სოფელში. ან რა ჰქმნას თვით სოფელელმა კაცმა, თუნდაც დიდმა გულადმა და თავგამომეტებულმა? ცარიელ მუშტით ხომ წინ არ დაუდგება კარგ თოფ-იარაღში გამოწყობილ ავაზაკს? ან თუნდ დაუდგეს, რა გამოვა აქედამ, გარდა ავაზაკის გამარჯვებისა და მშვიდობისმოყვარე კაცის დამარცხებისა, წახდენისა და იქნება სიკვდილისაც.

ამბობენ იარაღის აყრა ამიტომ არის საჭირო, რომ აქაური ხალხი გულფიცხი ხალხია, ლხინსა თუ ჭირში ხან უბრალო ჩხუბში, მაშინვე იარაღსა სწვდება, ერთმანეთს აფუჭებენ, ჰხანჯვლენ და ზოგჯერ ჰხოცვენ კიდევცაო. კარგი და პატიოსანი, თუ ამისთანა ზომების ესგვარი დანაშაულობა მოისპობა, იარაღის აყრა ძალიან მოსაწონებელია და სასურველი. ხოლო ესე კია? მას აქეთ, რაც იარაღი აიკრძალა, ამგვარმა დანაშაულობამ განა იკლო? დიდად საეჭვოა. თუნდა ეკლო კიდევ, განა ამგვარ დანაშაულობის კლება და ავაზაკობის გათამამება ერთი მეორეს ჰფარავს?

დანაშაულობა, რომელიც წარმოსდგება ჩხუბისა და ერთმანეთის წაკიდებისაგან, ჯერ კიდევ იმას არა ჰნიშ-

ნავს, რომ დამნაშავე ავაზაკია, გულით წამხდარი კაცია. ესგვარი დანაშაულობა შეიძლება ფათურაკად შემთხვას ყოვლად პატიოსან კაცსა და ამიტომ ამისთანა დამნაშავე საშიში არ არის საზოგადოებისათვის. სულ სხვაა ავაზაკი, იგი დაუძინებელი მტერია, დაუძინებელი ბოროტია ყველასი. ავკაცობა მისი მუდამი ხელობა. თუ უიარაღობა პირველგვარ დანაშაულობას უშლის ხელს, ავაზაკობას ხომ ხელს უწყობს, რადგანაც უშიშარჰყოფს და ამით ათამამებს. ეს სწორედ იმასა ჰგავს, ვაის გავეყარე და ვუის შევეყარეო.

ვთქვით, უიარაღობამ გადაგვარჩინა პირველგვარ დანაშაულობას. ხოლო ამ ზომამ რომ მთელი ქვეყანა ავაზაკის სარბიელად, ავაზაკის ლუკმად გაჰხადა, განა კაცმა ამას ანგარიში არ უნდა გაუწიოს? განა ამას ფიქრი და წამალი არ უნდა? რად გაძლიერდა, ან რად არის ავაზაკობაო? სხვათა შორის იმიტომ, რომ ავაზაკს შიში არა აქვს უიარაღო კაცისა, უიარაღო სოფლისა. იცის, რომ წინ არავინ დაუდგება, არავინ გაუძალიანდება, არავინ გამოეკიდება, არავინ გამოუდგება, და რამ უნდა შეუშალოს ხელი? ისიც მიდის და არხეინად ჰთარეშობს. ესეთი მდგომარეობა, ჩვენის აზრით, წაქეზებაა ქურდისა და ავაზაკისა, მიზეზია მისის გაკადნიერებისა და ხელის გაშლისა. გარდა ამისა, უიარაღო მკვიდრი აღარც თავისის თავისათვის არის, აღარც მეზობლისათვის, აღარც მთავრობისათვის, როცა საჭიროა ავაზაკის დევნა და წინ დახვედრა. ამით მთავრობას აკლდება იგი ძლიერი ღონე, რომელსაც წარმოადგენს ამისთანა შემთხვევაში მხნეობა და თავის გამოდგება მკვიდრისა და საზოგადოებისა. აქ ხელშეკრულია მარტო მშვიდობის მსურველი და მფარველი მკვიდრი და ხელგახსნილია მარტო ქურდი და ავაზაკი. ჩვენა გვგონია, რომ ეს შეუფერებელი მდგომარეობაა, ადამიანის ყოფა-ცხოვრების თვალთ რომ დავაკვირდეთ, და საჭიროა ასეთის უხერხულ მდგომარეობისაგან გამოყვანა აქაურ მკვიდრისა.

თუ ყველას, ესე იგი თვითოეულს მსურველს ცალკე ვერ ენდობა თოფ-იარაღი იქონიოს, ეს მაინც უნდა, რომ თვითოეულ ცალკე სოფლის საზოგადოებას დაურიგდეს იარაღი, იგი ებაროს ერთს ვისმე სოფლის

მოხელეს, რომ საჭიროების დროს მოიხმარონ. თუ მთავრობისაგან დარიგება იარაღისა ამა თუ იმ მიზეზით არის შესაძლებელი, თვით სოფლის საზოგადოებას მაინც ნება მისცეს და საცა საჭიროა დაავალონ იარაღი იქონიონ სამდევროდ და საგერებლად. საქმე თოფ-იარაღის ნებართვაა და ჩვენ მარტო ეს აღვნიშნეთ, სხვას ყველაფერს ადვილად მოეველება.

ამით ვათავებთ ჩვენს წერილებს ქურდობისა და ავაზაკობის თაობაზე ჩვენში. დასასრულ, იმას დავძენთ, რომ სახეში არა გვქონია უქმი იმედი, ვითომც სრულად ამოსაკვეთად ხსენებულ ავკაცობისა რაიმე გზა და ღონე გვეჩვენებინა. ეს რომ შესაძლებელი იყოს, ჩვენზე უკეთესნი ჩვენზე ადრე აღმოაჩენდნენ მაგისტანა გზასა და ღონესა და ქვეყანაზე ქურდობა და ავაზაკობა აღარ იქნებოდა. არ არის იმისთანა ქვეყანა, თუნდაც ძლიერ დაწინაურებული სიმდიდრით და განათლებითა, საცა ამგვარი ავაზაკობა არა ჰბუღობდეს და არ იჩენდეს თავს. ამის ძირეულ მიზეზებს ფესვი მაგრა და ღრმად გადგმული აქვს, როგორც ჩვენში, ისეც სხვაგან, იმ ავკარგიანობაში, რომელსაც წარმოადგენს მეტნაკლებობა საეკონომიო და საზნეო ვითარებისა. ამაშია მისი სათავე და ამ გზით ამოწურვა საქმისა საჭირო სავესებითა ბევრს ძიებას, ცოდნას და შიგნაგანდობას თხოულობს. გარდა ამისა, საეკონომიო და საზნეო ვითარების განკარგება, გასწორება იმოდენად, რომ ამ მხრივ საზრდოება მოაკლდეს ქურდობასა და ავაზაკობას, ბევრს დროსა, ბევრს რთულს გარჯას და მეცადინეობას ნდომულობს. მინამ აქედამ საქმეს ეშველება რამ, ბევრი წყალი ჩაივლის, თუმცა საჭიროა კი, ნამეტნავად ჩვენში, მალე მიჰყონ ხელი ამ განკარგებას და ეხლავე დაიწყონ მეცადინეობა.

ამ მიზეზით ჩვენ ეს საეკონომიო და საზნეო საჭიროებანი მარტო გაკვრით მოვიხსენიეთ და უფრო ვრცლად თვალწინ დავიყენეთ ის გარემოებანი, რომელნიც გარედამ ხელს უწყობენ ჩვენში ქურდობის და ავაზაკობის განმირებას და ნავარდობას. ესგვარნი გარემოებანი თვალდათვალ დასანახავნი არიან და ადვილად გამოსაკეთებელნი. იქნება ჩვენ მიერ ნაჩვენები ზომიერებანი იმდენად არ ჰმველოდნენ საქმეს, რამოდე-

ნადაც სასურველია. უკეთესთა ზომიერებათა მონახვა და აღმოჩენა შეუძლიანთ ჩვენზე უკეთესად საქმეში შიგნაგანდობა, ხოლო ჩვენ კი მაინც ამას ვიტყვით, რომ გაურჯელობა მოხელეობისა, დავვიანება სამართლისა, და ყოველ ამითი გულის გატეხა მკვიდრისა, იგი უთოფუიარალობა, რომელიც ავაზაკს ხელში უშიშრად აძლევს ხალხის მშვიდობით ყოფას, ხალხის ქონებას, – ისეთნი მიზეზნი არიან, რომ ამაებს ანგარიშის გაწევა უნდა. კიდევ ვიტყვით, აღმოკვეთა ამა მიზეზთა მთლად არ აღმოკვეთს ქურდობასა და ავაზაკობას, მაგრამ უეჭველად ალაგმავს, შეაცოტავებს, შეასუსტებს, და, სხვა არა იყოს რა, ხელს მაინც არ შეუწყობს და ესეც მოგება იქნება. იმედი უშიშრად გადარჩენისა, ან ასე თუ ისე თავის დაძვრენისა, ბევრსა ჰმველის ქურდობისა და ავაზაკობის გაჩენას და განმირებას. ავის ზნის კაცს ეს იმედი აქეზებს და ათამამებს და საჭიროა ამ იმედს გზა შეეკრას, ეს იმედი ჩამოართვან ქურდსა და ავაზაკსა.

[1897 წ.]



## «ევროპა მაინც ორ დიდ ბანაკად ბაყოფილი დარჩა»

ტფილისი, 27 ოქტომბერი

მას აქედ, რაც ჩვენ პოლიტიკაზედ ხმა არ ამოგვი-  
ლია, ბევრი რამ საყურადღებო ამბავი მოხდა, მაგრამ,  
საზოგადოდ რომ ვთქვათ, ამ ამბებს ბევრი რამ ცვლი-  
ლება არ მოჰყოლია. ევროპა მაინც ორ დიდ ბანაკად  
გაყოფილი დარჩა, ცალ მხრივ „სამთა კავშირი“ და  
მეორე მხრივ „ორთა კავშირი“ დღესაც ჰსუფევს და,  
როგორც ჰგონიათ ყველას, ჰთავდებობს მშვიდობიანო-  
ბის შეურყეველობას.

მართალია, „სამთა კავშირს“ როგორღაც მოუღება  
ძირი და „ორთა კავშირს“ უფრო გაუმავრდა შემდეგ  
საფრანგეთის პრეზიდენტის პეტერბურგში ყოფნისას, მა-  
გრამ არც ერთი დასუსტდა და არც მეორე გამავრდა  
ისე, რომ განსაცდელის რისამე მოლოდინი გაძლიერე-  
ბულიყოს. აღმოსავლეთის საქმე, ასე უბედურად აღ-  
ძრული საბერძნეთისაგან, ჯერ ხანად არასფერს შიშს  
არ მოასწავებს. როგორც ალაპლაპდა, ისეც დანელდა.  
რაკი იგი დიპლომატიის საღეჭად გახდა, დღესაც თუ  
ხვალ დაიღეჭება კიდევ და, ვინ იცის, მოსახელებლად  
საკმაოდ დაღეჭილი გადაეცემა თუ არა მერმისს. დი-  
პლომატიას სასახელოდ ისიც ეყოფა, რომ დღეს გადა-  
საწყვეტად გამწვავებული საქმე სამერმისოდ გადიდვა  
სისხლდაუღვრელად და ომის აუტეხლად. დღეს კი  
ესეო და მერმისმა თავისი იცოდესო, აი თავი და ბო-  
ლო დღევანდელ დიპლომატიის მოქმედებისა ოსმალთ-  
ბერძენთა საქმის გამო, რომელმაც კინაღამ ცეცხლი არ  
წაუკიდა მთელს აღმოსავლეთს და აქედამ მთელს

ევროპასა. ჯერ ხანად აღმოსავლეთიც და ევროპაც  
მშვიდობით გადარჩა მოსალოდნელს განსაცდელსა. ესეც  
ნუგეშია მშვიდობის მოყვარეთათვის.

ხოლო ევროპას შიგ გულში რაღაც ბალღამი  
უტრიალებს, გული გულის ადგილას მაინც არა აქვს,  
რაღაც ნაღველა აქვს გასიებული და დიდს ფიქრშია –  
ხვალინდელი დღე რას მოიტანსო. ამისთანა მდგომა-  
რეობა საქმეთა არავის ისე ხელს არ უწყობს, როგორც  
ინგლისსა. ჩვენმა მკითხველებმა უკვე იციან, რომ მას  
აქედ, რაც სამთა კავშირი შეიქმნა ევროპაში და ამის  
გამო რუსეთმა და საფრანგეთმა ერთმანეთისაკენ მიი-  
წიეს სამეგობროდ, ინგლისი ცალკე გავიდა, არც ერთს  
მიემხრო, არც მეორეს და მიეცა პოლიტიკას  
„свободных рук“-ს, როგორც რუსები იტყვიან. ინგლის-  
მა კარგად იცის თავისის თავის ფასი, იცის, რომ არც  
ერთი მხარე ამ ორ ბანაკთა შორის ცხვირზევით არ  
აიცილებს, რომ იგი მიიმხროს და მით მეორეზე გადა-  
ჭარბებით გაძლიერდეს. საქმე მარტო იმაშია, რომელი  
მხარე უფრო მეტს დაჰპირდება, უფრო მეტს დაასარ-  
ბებს. აი, იმ დღიდან ამ დღემდე ინგლისი ამ ორ ბანაკ  
შუა სდგას ხელშეუკრელი და ელის, ვინ უფრო ბევრს  
გაიმეტებს ინგლისის სახეიროდ, რომ თავისუფალი  
ხელი იქით გაიწოდოს.

რა თქმა უნდა, მას აქედ, რაც ევროპას ორ ბანაკად  
გაყოფა შეეძინა, ასეთი სარბიელი თვალწინ გადაემა-  
ლა ინგლისს. ინგლისმა ის ბედნიერი შემთხვევა არ  
დაჰკარგა და ამ სარბიელზე ფეხი მაგრად მოიკიდა და  
დღესაც არა ჰფიქრობს ამ სარბიელის წრის გარედ  
ერთი მტკაველი მაინც გადააბიჯოს. ამასობაში როცა  
ეს ორი ნაწილი ევროპისა ძალ-ღონით თითქმის ტოლ-  
ნი და თანასწორნი არიან და, მამასადამე, ერთმანეთის  
ფიქრით ვერაფერსა ჰბედავენ, ინგლისი თავისს საკუ-  
თარს საქმეებს თავისებურად და თავისს სახეიროდ  
იკეთებს. სხვა რომ არა ვთქვათ რა, თუნდა მარტო  
აფრიკა ავიღოთ მაგალითად. ყველას მოეხსენება, რომ  
დღეს აფრიკა სანუკბარ ლუკმად გაუხდა მთელს ევრო-  
პას. გერმანია, იტალია, საფრანგეთი, ინგლისი, – ყვე-  
ლანი იმის ცდაში არიან, რომ აქ, რაც შეიძლება, მეტი  
ადგილები დაიჭირონ და დაიჩემონ და, რაც შეიძლება,

კარგი. აქ როგორც ინგლისს, ისე სხვას არავის ალჩუ არ უფლება. გერმანიასაც ცალკე უჭირვეულება და საფრანგეთსაც, არც ერთის განსაკუთრებული შიში არა აქვს, ერთსაც უპირობს თლას და მეორესაც. ვერც გერმანიას, ვერც საფრანგეთს იმოდენა ხმა ვერ ამოუღიათ, რომ ინგლისი შეაფერხონ და ხალისი მოუკლონ აფრიკაში მეტისმეტად გაძლიერებისა და განზე ფეხის გადგმისა. გერმანია გაუძალიანდება, ინგლისი მამინვე საფრანგეთს მიემხრობა, საფრანგეთი გაუჭირვეულება, გერმანიისაკენ გადავა.

ინგლისი ერთი ძლიერთაგანი და პირველ ხარისხოვანთაგანი ქვეყანაა. ამისი გადასვლა ან ერთისა, ან მეორე მხარესაკენ მოასწავებს ერთისა მეორეზე იმოდენად გაძლიერებას, რომლის წინაშე, ერთ-ერთი ანგარიშში ჩასაგდება აღარ იქნება. მაშინ ევროპაში და, მაშასადამე, მთელს ქვეყნიერობაზე იგი მხარე იბატონებს, საითკენაც ინგლისი იქნება. ამისი შიში ორსავე ბანაკსა აქვს და ადვილად მისახვედრია, რად არის დღეს ინგლისი თვალში ძელსავით ერთისა და მეორისათვისაც.

ესეთი ყოფა ინგლისისა ვერაფრად უნდა ეჭაშნიკებოდეს არც სამთა კავშირს და არც ორთა კავშირს. აშკარაა, ვერც ერთი მხარე ვერ აიტანს და შეითვისებს ასეთს მდგომარეობას, რომელიც ინგლისს დღეს ამისთანა უპირატესობას აძლევს ევროპიის პოლიტიკის აკარგიანობაში. იქნება ვცდებოდეთ და ჩვენ კი ასე გვგონია, რომ ამისთანა ყოფა-ცხოვრება ევროპისა მთელს საბელს პოლიტიკისას ხელთ აძლევს ინგლისსა, თუმცა იგი მარტოდ არის გასული და ყველას შორს უდგას. ამით აინსნება ის, რომ ინგლისის ხმას ევროპიის საქმეში ასეთი ძალა და გავლენა აქვს დღეს. ევროპას უმძიმს, თითქო ჰთაკილობს კიდევ, რომ ინგლისმა ასეთი რიზიანი ადგილი დაიჭირა ევროპაში, არავის ერიდება, არავისი ფიქრი და შიში არა აქვს და დაუბრკოლებლად თავისს გულის წადილს არხეინად ისრულებს, რამოდენადაც დრო და გარემოება შესწევს.

აქ არის მიზეზი, რომ დღეს ევროპაში ინგლისზე ბევრი გაჯავრებული ჰლაპარაკობს. გაზეთებში თითქმის ის აზრიც მოისმის, რომ მთელი ევროპა უნდა შეერთ-

დესო ინგლისის ასალაგმავად და უკან დასაწევად, თორემ ძალიან თავს გავიდა, ბევრს რაღაცას ოსტატობს და ევროპას არ ასვენებსო. ინგლისმა კარგად იცის, რომ ევროპა, რომელიც ერთმანეთში ესე აწეწილ-დაწეწილია, ერთმანეთში ასე მოურიგებელი, ერთმანეთზედ სამტროდ გადაკიდებული, თავისს დღეში ერთობას ვერ მოახერხებს და არხეინად ყურს უგდებს გაზეთების ვაისა და უუისა. იგი, როგორც წინად, ისეც ეხლა განზე სდგას, თავისს საქმეებს სხვის დაუკითხავად ასე თუ ისე არიგებს და ასე იქნება იმ დრომდე, ვიდრე რაიმე განსაკუთრებული შემთხვევა იძულებულ არ ჰყოფს პირი ან იქით მიიბრუნოს, ან აქეთ. ევროპის ორ ბანაკად გაყოფამ შესაძლოდ გაუხადა ინგლისს პოლიტიკა „СВОБОДНЫХ РУК“ და რუსეთისა და საფრანგეთ შორის საქვეყნოდ გამოცხადებულმა კავშირმა ამნაირ პოლიტიკას მტკიცე საფუძველი დაუდვა. ჩვენა გვგონია, რომ პოლიტიკა ინგლისისა სხვათა შორის იმის დაულალავ ცდაში უნდა იყოს, რომ ეს ორი ბანაკი ევროპისა არ დაიშალოს, რაც შეიძლება დიდხანს და მით ინგლისს დღევანდელი უპირატესობა ხელიდამ არ გამოეცალოს და ვგონებთ ასეც იქცევა ინგლისი დღეს.

ბევრს კი ჰგონია, რომ საფრანგეთისა და რუსეთის კავშირი უნდა სწყენოდა ინგლისსაო. პირიქით, მისთვის ეს სასურველიც უნდა ყოფილიყო, რადგანაც სამთა კავშირი და ეს ორთა კავშირი ერთმანეთის მუქარაა და საცა ორნი თანასწორნი მუქარით უდგანან ერთმანეთს პირისპირ, იქ ხერხიანი მესამე ყოველთვის მოგებაშია. სწორედ ამისთანა მესამე ინგლისია დღეს და რად უნდა გვიკვირდეს, რომ იგი მაგრად ებლაუჭება მას, რაც ბედმა ასე ადვილად მიჰმადლა და დაულოცა.

[1897 წ.]



## ახლო აღმოსავლეთი და ხმელთაშუა ზღვის გზების საკითხი

ტფილისი, 1 ნოემბერი

იყოს თუ არა ევროპაში ოსმალეთი? აი უმთავრესი ძარღვი აღმოსავლეთის საქმისა, რომელიც ეს ნახევარსაუკუნეზე მეტი ხანია, რაც ევროპას არ აძინებს, არ ასვენებს და ერთი-ერთმანეთის შურიტა და მტრობითა აქეთ-იქით ატოკებს და არყევს. ამას მოსდევს მეორე განსაკითხი, არანაკლებ მწვავე და რთული: ვთქვათ, არ იყოს, ვინ უნდა დაიჭიროს მისი ადგილი, ვინ უნდა გასწიოს მისი მაგიერობა, რადგანაც მაგიერობა მისი ევროპის ძალ-ღონეთა სასწორის უღელს ან აქეთ, ან იქით გადაჰზრის, იმისდა მიხედვით, ვინ რა ირგუნა დაცლილ სამკვიდროსაგან, ან ვინ ააფრიალა საკუთრად თვისი დროშა ბოსფორზე?

ეხლა ოსმალეთი თავისთავად არ წარმოადგენს იმისთანა სახელმწიფოს, რომ მარტოდ და ცალკე საშიშარი იყოს რომელიმე სხვა სახელმწიფოსათვის, თუ მარტოდმარტო გაემკლავებიან ერთმანეთსა. ბალკანეთის წვრილნი სახელმწიფონიც უშიშარ არიან ოსმალეთისაგან. თუმცა თითოეულ მათზე ოსმალეთი გაცილებით ძლიერია, მაგრამ არც ერთი დიდი სახელმწიფო აქ გზას არ მისცემს, არც ერთს წვრილ სახელმწიფოს ოსმალს არ გაათელვინებენ, ოსმალს ლუკმად არ გაჰზდიან. მაგალითი ამისი — დღეს დამარცხებული საბერძნეთია. მაშ რა თავის ასატკივებელია: არის ევროპაში ოსმალს, თუ არა? ვის რას უნდა უშლიდეს?

ნასკვი საქმისა სწორედ აქ არის. ამ ნახევარსაუკუნოზე მეტ ხანში, — იყოს თუ არა ევროპაში ოსმა-

ლეთი, — მაჯლაჯუნასავით გულზედ აწევს ევროპასა და ვერასვხით ვერ აუცილებია. ამ ხანის განმავლობაში ბევრნაირად ფერი იცვალა თვითეულის დიდ სახელმწიფოს პოლიტიკამ ამის შესახებ. რუსეთს სწამებენ, რომ ჯერ კიდევ პეტრე დიდმა ამოიღო ოსმალეთი ნიშანში, ხელი გაიწვდინა სტამბოლზედა, ამ გზით სვლა ანდერძად დაუდგა რუსეთსაო. ჩვენ არ ვიცით, რამოდენად მართალია ეს ანდერძადება, ხოლო კი უნდა ვთქვათ, რომ ისტორიულმა ვითარებამ პეტრე დიდის აქედ რუსეთის პოლიტიკა უფრო აშკარად მიჰმართა ოსმალეთის დაუძღურებაზე და არა ერთხელ და ორჯერ დაანახვა ოსმალეთს, რა ძლიერი მეტოქეა მისთვის რუსეთი, ევროპა, საფრანგეთისა და ინგლისის მეთაურობით, არაერთხელ სადიპლომატიო გზით და ხან თოფ-იარაღით და ჯარით მიჰშველებია ოსმალეთს რუსეთის წინააღმდეგ. გავისხენოთ ყირიმის ომები და ყოველივე ის ხლართი საქმისა, რომელსაც ინგლისი არა ჰზოგავდა, რომ რუსეთს სტამბოლში საქმე წაუხდინოს და წინ ფეხი არ გადაადგმევინოს. გავისხენოთ თუნდ უკანასკნელი ომი ოსმალეთთან, საცა გამარჯვებული რუსეთი თვით სტამბოლის კარის წინ შეყენებულ იქმნა ევროპის დიპლომატიის ძალმომრეობითა. ამ სახით, ომის დროს ევროპა ხან ჯარითაც ჰშველოდა ოსმალეთსა და ყოველთვის კი, ომია, თუ უომრობა, დიპლომატიურ ძალღონეს ზედ ალევდა რუსეთის წინააღმდეგ და ოსმალეთის სახეიროდ. ამ ნახევარსაუკუნის პოლიტიკის გზას რომ დავადგეთ, აშკარად აღმოჩნდება, ვინ იყო უკანასკნელ დრომდე ევროპაში მომხრე ევროპილამ ოსმალეთის განდევნისა და ვინ — ამისი ხელშემშლელი და ოსმალეთის მწე-მფარველი. რა თქმა უნდა, ამ უკანასკნელთ შორის თავიდათავი ინგლისი იყო.

ეხლა კი რას ვხედავთ? ინგლისმა თავი გამოიღო ოსმალეთის ევროპილამ განდევნისათვის და რუსეთი სარჩლს უწევს ოსმალეთსა. ერთისა და მეორის პოლიტიკამ პირი უკულმა იბრუნა და ამდენი ხნის თავისს საკუთარს მეცადინეობას ზურგი შეაქცია ერთმაცა და მეორემაც. საილამ უნდა წარმომდგარიყო ასეთი ძირეული ცვლილება? რა მოხდა იმისთანა ევროპაში?

ამისი პასუხი, ჩვენის ფიქრით, იმ ორ ბანაკს შუა იმაღლავს თავს, რომელიც დღეს მთელს ევროპას თითქმის ორადა ჰყოფს და რომელიც აღარავისათვის საეჭვოა მას შემდეგ, რაც რუსეთმა და საფრანგეთმა კრონშტატში და ტულონში დაანახვეს ქვეყანას, და რაც უფრო უეჭველ შეიქმნა შემდეგ ჩვენის ხელმწიფე იმპერატორის საფრანგეთში მიბრძანებისა და პეტერბურგში საფრანგეთის პრეზიდენტის სტუმრობისა. საიღამ სადაო, იკითხავთ? იქიღამ, რომ ამ ორად გაყოფამ ძალ-ღონე ორის ბანაკისა გაათანასწორა, გაატოლა. პირველ შეხედვით ეს გაათანასწორება ერთმანეთისათვის იმისთანა მუქარას აღარ წარმოადგენს, რომ ამის მიხედვით შეშლიყო რამ ევროპაში. მაგრამ სიფრთხილეს თავი არა სტკივავო, ეს ორი მხარე, რამოდენადაც უფრო ტოლ-თანასწორნი არიან, იმოდენად უფრო ადვილად მოსალოდნელია განსაცდელი ერთისა და მეორესათვის, იმიტომ რომ, საკმაოა ევროპის აწეწილობამ ან დიპლომატიურ ოსტატობამ ერთი რომელიმე ორ ბანაკ გარეთ დარჩენილი სახელმწიფო, თუნდ მეორეხარისხოვანი, ან ერთს ბანაკს მიუყენონ, ან მეორეს, და მით ერთი მეორეზე საგრძნობლად გააღონიეროს, გააძლიეროს ყოველ შემთხვევისათვის.

ვისგან უფროა მოსალოდნელი ამისთანა განსაცდელი? რასაკვირველია, ოსმალეთისაგან. ამ მხრით არც ერთი სახელმწიფოა ისე საგულვებელი, რომელმაც მთელი ოსმალეთი ევროპის დიპლომატიას ხელში სათამაშოდ ჩაუგდო, ცალკე შინაურმა არევ-დარეულობამ და მოუსვენრობამ, ოსმალეთი იმ მდგომარეობაში ჩააყენა, რომ სხვის პირში მაყურებლადლა გაჰხადა. ამასთან, იმისთანა სახარბიელო ადგილები და საზღვრები უჭირავს, ისეთი მდებარეობა აქვს, რომ არ არის არც ერთი იმისთანა დიდი სახელმწიფო, რომ არ სწყუროდეს ძიძობა მისი ხელთ იგდოს და მისი საბელი ყელისა თვით დაიჭიროს სწორედ იმ განსაცდელის მოლოდინით, რომ სხვამ არ დაგვასწროს და არ მიიყენოსო.

თუმცა, როგორცა ვთქვით, ოსმალეთი თვითოეულ ცალკე დიდ სახელმწიფოსათვის საშიშარი არ არის, მაგრამ იმოდენად კი ღონიერია, რომ ვინც გადბირებს, იგი გააძლიეროს. ამის გამო, განა საკვირველია – ვი-

ფიქროთ, რომ ამ ორის ბანაკის ძალღონეთა გათანასწორებამ თვითვეული ცალკე იძულებული გახადა ოსმალეთი გადმოიბიროს იმის შიშით, რომ გაჭირვების დროს სხვამ არ ჩაიგდოს ხელში საშველად. თუ ესეა, საკვირველი არც ის არის, რომ თვითვეული მხარე ეხლა ცალკე ჰცდილობს სტამბოლში და წელებზე ფეხს იდგამს, რომ ამ მხრით მეორეს საქმე დაასწროს და ოსმალეთი მოიმაღლიეროს. მაშ რით უნდა აიხსნას ის უცნაური ამბავი, რომ დღეს გერმანია ასე ხელს აფარებს ოსმალეთსა და მისს მომადლიერებას ჰცდილობს? რა სტკივა გერმანიას აღმოსავლეთის საქმეში? განა არ გვახსოვს ბისმარკის სიტყვა: „ჩვენ არა გვეწვის რა აღმოსავლეთის საქმეში, ჩვენ ერთს ბრანდერბურგის ჯარისკაცსაც არ გამოვიმეტებთ მაგ საქმისათვისაო“.

ჩვენ ამ საგანს კიდევ დავუბრუნდებით შემდეგ და ვეცდებით პასუხი წინათ დაყენებული საკითხისა, ჩვენის შეძლებისამებრ, მეტის სავსებით გამოვარკვიოთ თვითვეულ სახელმწიფოს მოქმედების მიხედვით, თუ გარემოებამ არ დაგვიშალა.

ტფილისი, 6 ნოემბერი

რომ უკეთესად შევიგნოთ\* – ვინ რას ეძებს აღმოსავლეთის საქმეში და ვის რა ტკივილი აქვს, – ჯერ ყველაზე უწინარესს დიდ სახელმწიფოებს უნდა გავუსინჯოთ პოლიტიკის გზები. ყველამ იცის, რომ საფრანგეთი და ინგლისი დიდი ხანია ერთმანეთს გულდაუშემვიდებლად უყურებენ და ამ ბოლოს ხანებში თითქო ერთმანეთს უფრო აულურსდნენ, ვიდრე წინად. იმ ერთმანეთის საპირისპირო საქმეთა გარდა, რომელიც ევროპის გარედა აქვთ და რომელიც ექვემდებარება საახალშენო პოლიტიკას, შიგ ევროპის სამხრეთით, ჩვენის ფიქრით, ერთი დიდი მიზეზია, რომელიც არც ერთს ხსენებულს სახელმწიფოს და არც მეორეს ერთმანეთთან ვერ ათავსებს, ვერც არიგებს. ჩვენა გვეონია, რომ მიზეზი ხმელთაშუა ზღვაა. ეს ხმელთაშუა ზღვა

\* იხ. „ივერია“ № 227



გადაჭიმულია სამხრეთ ევროპისა და ჩრდილო აფრიკის შუა და ამიტომაც ერთი მთელი თავისი გრძელი ნაპირი ევროპაში აქვს და მეორე აფრიკაში. ამ ნაპირის ერთი დიდი ნაწილი ევროპის მხრივ ეხება იტალიას და ოსმალეთსა, აფრიკის მხრივ მთელ ჩრდილო-აფრიკის საზღვარს, და იქ, საცა მთავრდება ეგვიპტის საზღვარი აღმოსავლეთით.

სადაც ატლანტის ოკეანიდამ, რომელიც ინგლისს გარშემო არტყია და საფრანგეთს დასავლეთით ჩაერთვის, იქ ვიწრო წყლის გზაა ხმელთაშუა ზღვაში გამოსასვლელი ისპანიის სამხრეთით და მაროკოს ჩრდილოეთით. და სწორედ ამ ვიწრო გასავალში ინგლისს უჭირავს თითქმის უძლეველი სიმაგრე ჰიბრალტარი, ასე რომ ხმელთაშუა ზღვაში ატლანტის ოკეანიდამ – როგორც ინგლისმა, ისე საფრანგეთმა – ამ სიმაგრეს ცხვირწინ უნდა გამოუაროს. რა თქმა უნდა, ეს სიმაგრე კარგად მოწყობილია, შორსმსროლელ უზარმაზარ ზარბაზნებითა. აბა ინგლისი ვის რა ხეირს დააყრის, თუ ვისიმე გამოშვება ატლანტის ოკეანიდამ ხმელთაშუა ზღვაში ჭკუაში არ დაუჯდა.

ამ სახით, ხმელთაშუა ზღვის სათავეში ინგლისია გამაგრებული და, მამასადამე, ბატონიცა. ხოლო ხმელთაშუა ზღვას წელიცა აქვს და ბოლოც. მარტო სათავე არაფრის მაქნისია. ზღვის არც მოწყვეტაა შესაძლებელი, არც საითმე გადაყვანა და გადაგდება. წელი, უფრო დიდი ნაწილი, იტალიასა და ოსმალეთს ჰხვდება, და ბოლოს – ერთის მხრით – ჩრდილო-აღმოსავლეთით – ზედ ებჯინება ოსმალეთის სამფლობელოს – სირიას. ეს ევროპის მხრით. აფრიკის მხრით მთელი წელი გაწოლილია მთელ აფრიკის ჩრდილო ნაპირსა, ეგვიპტის აღმოსავლეთის საზღვრის დასასრულამდე. ამ აფრიკის ნაპირას არის მაროკო, ალჟირი, ტუნისი, ტრიპოლი და ეგვიპტე.

მინამ იტალია დანაწილებული იყო და წვრილ სახელმწიფოებად დაყოფილი, უღონოც იყო როგორც სამოყვროდ, ისე სამტროდ ვისიმე. ამის გამო არავისაგან ანგარიშში ჩასავადები არ იყო, როცა ხმელთაშუა ზღვისათვის საღერღელი სახარბიელოდ აუძლებოდა ვისმე. ხოლო ოსმალეთი ძლიერი იყო დღევან-

დელზე მეტად და ხმელთაშუა ზღვის საქმეში მის ხმას ადგილი ჰქონდა ცოტად თუ ბევრად. რა თქმა უნდა, ინგლისსაც და საფრანგეთსაც სახეში უნდა ჰქონოდათ, რომ ძლიერებას ოსმალეთისას ბევრი არა დაჰკლებოდა რა და მისის კლებით სხვა არ გაძლიერებულიყო. შიში ჰქონდათ რუსეთისა, რომ თუ ოსმალეთს მოაწვა, თან გაიტანს, გამოაპობს შავ ზღვას და ხმელთაშუა ზღვაზე აგვეტუზება ეს დიდი სახელმწიფო, რომელსაც თავისით იმოღენა ღონე აქვს, რომ არამცთუ თვითვეულს ცალკე, იქნება ორივეს ერთადაც გაგვიძვესო.

სხვათა შორის, ეს იყო უდიდესი მიზეზი, რომ ყირიმის ომში ინგლისსა და საფრანგეთს ერთადა ვხედავთ წინააღმდეგ რუსეთისა. ამიტომაც ეს ომი გათავდა მით, რომ შავი ზღვის შემოსავალ-გასავალი გზა დაუკეტეს რუსეთსა. ამ მიზეზსვე უნდა მიეწეროს, რომ 1879 წლის ოსმალეთთან ომში გამარჯვებული რუსეთი სტამბოლის კარებთან შეაყენა ევროპამ, ინგლისის თაოსნობით და გერმანიის შემწეობით, და ოსმალეთთან ცალკე სან-სტეფანოში შეკრული პირობა რუსეთისა არ იყაბულეს, რადგანაც ეს პირობა ძალიან აუძლურებდა დამარცხებულს ოსმალეთს.

ევროპის სასურველი ის იყო, რომ ბოსფორზე, საცა დღეს ოსმალეთი ჰზის, არავინ ოსმალთზე ძლიერმა ფეხი საკუთრივ არ მოიკიდოს და საკუთრივ არ ამართოს იქ თავისი დრომა. ერთმანეთის შური და მტრობა არავის ამის ნებას არ მისცემს უომრად და სისხლდაუღვრელად. ოსმალეთის მაგიერ აქ სხვისა, უფრო ძლიერის ყოფნა, მეტისმეტად შეჭხუთავდა ხმელთაშუა ზღვაზე თავისუფალს სიარულს, იმიტომ რომ ყველას თავისი ქონება თავისთვის უფრო უნდა გამოსაყენებლად, ვიდრე სხვისთვის. ეს ერთი. და მეორე – ვინ იცის, ვის რა შემთხვევა აიძულებს ოდესმე ეს გზა სხვას შეუკრას, თუ ღონე შესწევს გარემოებათაგან მოვლინებულ სურვილისა. ეხლა უნდა ვიკითხოთ, – რა ხელსაყრელია ხმელთაშუა ზღვა ან რუსეთისათვის, ან ინგლისისათვის ან საფრანგეთისათვის და ან თუნდ გერმანიისათვის, რომელმაც ამ უკანასკნელ დროს კარგა მოზრდილი ფლოტი გაიჩინა და, მამასადამე, წყლის გზა საჭიროებად გაუხდა ევროპის გარედ გასასვლე-

ლად. რა ხელსაყრელია, რომ ამის გულისთვის და ამის მიხედვით ევროპაში იწყნარებენ და ინახავენ იმისთანა სახელმწიფოს, როგორც ოსმალეთია, რომელსაც სწამობენ ქრისტიანთა წევვა-გლეჯას და უღმერთოდ ხოცვა-ჟლეტასა?

მეტისმეტი არ მოგვივა ვთქვათ, რომ იქნება ხმელთაშუა ზღვა ისე სახარბიელო არასდროს არ ყოფილა ევროპის დიდ სახელმწიფოთათვის, როგორც მას აქედ, რაც სუეზის არხი გაიჭრა ეგვიპტის აღმოსავლეთით. მინამ ეს არხი არ იყო, ხმელთაშუა ზღვა, წამოსული დასავლეთიდან, სწვდებოდა მცირე აზიის და აფრიკის ხმელეთს და აქ თავდებოდა. ამ სახით, იგი ხმელთაშუა დაკეტილ ზღვას წარმოადგენდა, და თუ სახარბიელო იყო, მარტო მით, რომ მხოლოდ ევროპის სამხრეთსა და აფრიკის ჩრდილოს მისავალი გზა იყო. რაკი სუეზის არხი გაიჭრა, ხმელთაშუა ზღვა შეუერთდა მეწამულს ზღვას, რომელიც ეგვიპტისა და არაბეთის შუაზეა, ეხლა ზომალდები და ცეცხლის გემები ამ არხით ხმელთაშუა ზღვიდან შედიან მეწამულ ზღვაში, აქედამ არაბეთის ზღვაში და არაბეთის ზღვიდან გადიან ინდოეთის ოკეანეში. ინდოეთის ოკეანე კიდევ იმისთანა სახომალდო დიდი შარაგზა არის აზიის სამხრეთით, რომელიც სწვდება ინდოეთს და ბევრს იმისთანა ადგილებს, საცა ევროპის დიდ სახელმწიფოებს, სახელდობრ ინგლისსა და საფრანგეთს, უშველებელი ახალშენები აქვთ უკვე დაჩემებული.

გარდა ამისა, იგი ოკეანე ერთადერთი უფრო მოკლე, უფრო ზამთარ-ზაფხულ გამოსაყენებელი გზაა ავსტრალიისა და აზიისა ევროპიდან. ამასაც მეტისმეტი სახარბიელო მნიშვნელობა აქვს ყოველ დიდ სახელმწიფოსათვის, ვითარცა დიდს გზას იმ უზარმაზარ ალემბიცემობისას, რომელიც დღეს ასულდგმულებს ევროპასა. ინგლისი, საფრანგეთი და ამ უკანასკნელ ხანებში გერმანიაც იმოდენა სავაჭროს ამზადებს, რომ ევროპის ბაზარი ვეღარ იტევს და ჰსაჭიროებს გარეთ გატანას. უიმისოდ ევროპის ალემბიცემობას და მრეწველობას სული უნდა ამოხდეს, და აბა იფიქრეთ, — რა დღეში უნდა ჩაცვივდნენ, რომ ის გზა ვისგანმე დაიკეტოს და ან ვისმე საკუთრივ ხელში ჩაუვარდეს იმოდენ-

ნად, რომ საფიქრებელი იყოს ვისგანმე, თუ სრულიად დაკეტა არა, დაბრკოლება და წინ გადადგომა. ევროპას ამ გზით არამცთუ მარტო გააქვს თავისი საქონელი, არამედ ისიც შემოაქვს აზიიდან, ავსტრალიიდან, ამერიკიდან, აფრიკიდან, რაც თვით აკლია ცხოვრებისათვის.

აქედამ ცხადია, რა ძვირფასად მისაჩნევია ევროპის სახელმწიფოებისათვის ხმელთაშუა ზღვა, ნამეტნავად მას შემდეგ, რაც სუეზის არხმა შესაძლებელი გახადა ინდოეთის ოკეანეზე გასვლა ევროპიდან. არც ერთ სახელმწიფოსათვის ეს გზა ისე სანატრელი არ არის, როგორც საფრანგეთის და ინგლისისათვის. ერთსაც და მეორესაც ევროპის გარეთ ისეთი დიდი ადგილები აქვთ დაპრობილი, რომ ჯერ მათი ევროპიდან პატრონობა, მოვლა, მტერთაგან უშიშარყოფნა, მეტისმეტად დიდ საქმეთა ჰქმნის ხმელთაშუა ზღვაზე თავისუფალად და დაუბრკოლებლად სვლას. უამისობა ერთისა და მეორისათვის ყელზე მიბჯენილი გალესილი დანაა.

ჩვენა ვნახეთ, რომ სათავე ხმელთაშუა ზღვისა, ანუ უკედ ვთქვათ, ატლანტის ოკეანიდან შემოსავალი ვიწრო გზა — ინგლისს უჭირავს. ინგლისმა იმოდენად იოსტატა, რომ ხმელთაშუა ზღვიდან გასავალიც ხელთ იგდო, რაკი ეგვიპტეში ფეხი ჩასდგა და ამ სახით თავი და ბოლო ხმელთაშუა ზღვისა თვით დაიჭირა. ეს ამბავი ვერაფრად იამათ, ნამეტნავად საფრანგეთსა, რომელიც, ვიდრე გერმანიისაგან დამარცხდებოდა, იმდენად აფრთხობდა ინგლისს, რომ ეს უკანასკნელი უსაფრანგეთოდ ბევრს ვერაფერს ჰსაქმობდა ეგვიპტეში მარტოდ და იძულებული იყო საფრანგეთის თანხმობით და თანადასწრებით ემოქმედნა და უიმისოდ ერთი ბიჯიც არ გადაედგა. მთელის თორმეტის წლის განმავლობაში, მას აქედ, რაც გერმანიასთან ომმა დააუძლურა საფრანგეთი და განამარტოვა, ინგლისს არ ეძინა, თავის საქმეს ჰჩარხავდა ეგვიპტეში იმ აზრით, რომ აქ თავიდან როგორმე მოიმოროს საფრანგეთი და მარტო თავისის გავლენის ქვეშ იყოლიოს ეგვიპტე და აქედამ სუეზის არხს გაუბატონდეს.

როცა ეგვიპტის პატრიოტმა არაბი — ფაშამ მოიწადინა ეგვიპტე დაიხსნას ევროპიელთ ხელიდან და თავისთავად ამყოფოს და ამისათვის აჯანყება მოახდინა,

და მერე მ ა ხ დ ი გამოვიდა და ეგვიპტის სამფლობელო სუდანის საომრად გაუხადა პატრონს, – ეგვიპტის საქმენი ძალიან აიწეწნენ, ამ აწეწილობამ ინგლისს ხელი შეუწყო და ეგვიპტეში ჯარებით ჩადგა, ვითომდა დასამშვიდებლად. ევროპამაც და თვით ოსმალეთმაც, რომელსაც ეგვიპტე ეკუთვნის, დასტური დასცა, მხოლოდ იმ პირობით, რომ დასამშვიდების შემდეგ ინგლისმა ისევ გამოიყვანოს თავისი ჯარები.

იმ დღიდან ამ დღემდე ინგლისს არამცთუ ჯარები არ გამოჰყავს, უფრო მაგრა ებლაუჭება ეგვიპტეს და არავის მუქარა აინუნშიაც არ მოსდის. ან ვის უნდა შეუშინდეს? ოსმალთ, რომელსაც ვითარცა ბატონს ეგვიპტისას, ეს სამფლობელო ხელიდან ეცლება, უღონოა ინგლისის წინაშე. საფრანგეთი, რომელსაც ყველაზე მეტი ეწვის ეგვიპტის საქმეში, ხელს ვერ გამოიღებს, რადგანაც მაშინვე ინგლისი მიემხრობა გერმანიას და უღელს თანასწორობისას სამთა კავშირის სასარგებლოდ გადაჰხრის; გერმანია, რომლისათვისაც სასურველია ინდოეთის ოკეანეში გასასვლელი გზა, ვერ აეკვიპტება ინგლისსა იმავე შიშით, რომ მაშინვე ორთა კავშირს მიუღებთ. საქმე იმაშია, რომ ევროპაში ორთა კავშირს და სამთა კავშირს ერთმანეთში ისეთი დიდი საქმე აქვთ, რომ მის მიხედვით თვითოეული მათგანი ეგვიპტეზე ხელს აიღებს, ოღონდ ევროპაში საქმე გაისწოროს და მოიგოს. ინგლისსაც ესეთი მდგომარეობა ევროპისა ათამამებს ეგვიპტის საქმეში. თუ არ დავივიწყებთ, რომ ეგვიპტეს თავით აქვს ხმელთაშუა ზღვა და გვერდით ზღვა მეწამული, ცხადი იქნება, – რად არიან საფრანგეთი და ინგლისი ერთმანეთზე ალურსულნი ეგვიპტის გამო და რატომ დღეს ერთმანეთს მხარს არ აძლევენ აღმოსავლეთის საქმეში, რომლის თავი და ბოლო ოსმალეთია. რადგანაც ოსმალეთი პატრონია ეგვიპტისა და ინგლისი კი ხელსა სჭიდებს ამ სხვის სამფლობელოს, აქედამ აშკარაა, ინგლისი უნდა ერჩოდეს ოსმალეთს და საფრანგეთი ესარჩლებოდეს, რომ ოსმალეთის სახელით, ვითარცა პატრონის სახელით, მეტი საბუთი იქონიოს ეგვიპტიდან ინგლისის გამოსვლისათვის.

აქ ბევრი რამ სხვაც არის გამოსარკვევი. ეს შემდეგისათვის იყოს.

ტფილისი, 8 ნოემბერი

თუ ინგლისის გაბატონება ეგვიპტეში ჭკუაში არ უჯდებათ სხვა დიდ სახელმწიფოებს, და ინგლისს თვითოეულის სამდურავი და მუქარა აინუნშიაც არ მოსდის, რატომ დიდნი სახელმწიფონი ერთად არ მოიყრიან თავს და ერთად არ შეუტევენ ინგლისსაო? – იკითხავს მკითხველი. ინგლისმა კარგად იცის, რომ, როგორც წყალი და ცეცხლი ერთად ვერ მოთავსდებიან, ისეც დიდნი სახელმწიფონიც, რომელთაგანაც ზოგნი ერთს ბანაკს ეკუთვნიან, ზოგნი მეორესა, და ბევრი და დიდი ანგარიშები აქვთ ერთმანეთში საშუალო და გასასწორებელი. ეს ისეთი მწვავე შუღლია, რომ აქ ერთმანეთისათვის რაიმე დათმობა ნებაყოფლობით მოულოდნელია და უომრად და სისხლდაუღვრელად შეუძლებელი, ჯერ ხანად მაინც. აბა საფრანგეთი და გერმანია ერთმანეთს როგორ დაუშვნიდებიან ევროპაში იმოდენად, რომ ურთიერთს ხელი მისცეს ერთმანეთის სამოყვროდ და სხვისათვის სამტროდ. მართალია, ამ ბოლოს ხანებში ზოგიერთი გაზეთები ჰღაღადებენ – დროა თავგასულობას ინგლისსა, რომელიც ასე ჰრევს საქმეებს ევროპაში, თუ ევროპის გარეთ, ბოლო მოელოს და ერთიანმა შეტევა და სახელმწიფოებისამ ხმა გააკმედინოს და სახარბილოდ გაწვდილი ხელები უკან წააღებინოსო, მაგრამ ინგლისი ყურსაც არ იბერტყავს: იცის, რომ ტყუილი და უქმი მუქარაა, რადგანაც მაგ ერთობილად შეტევისათვის საფუძველი დიდი ხანია დაურღვევია ნაღმს დიდ სახელმწიფოების ერთმანეთის მტრობისას და შუღლისას.

ვიდრე გარემოება ევროპისა ესეა, ინგლისს არავისი შიში არა აქვს. მართალია, იყო ერთი შემთხვევა, რომელმაც ერთად ამოქმედა გერმანია, საფრანგეთი და რუსეთი. ეს იყო მაშინ, როცა ეს სამი სახელმწიფო ერთად წაესარჩლა ჩინეთს – წინააღმდეგ იაპონიისა და

\* იხ. „ივერია“ № 224


მასთან ერთად ინგლისისა, მაგრამ გერმანიას აქ სხვა მუცლის ტკივილი ჰქონდა: უნდოდა გასამრჯელო რამ დაეცინცლა დამარცხებულ ჩინეთისათვის და დაცინცლა კიდევ ზოგიერთი ადგილი – სადგურად დიდ ოკეანეში მდარულ გერმანიის ხომალდებისათვის.

თუმცა დღეს გერმანიას გამორკვევით არ გამოუთქვამს არც სიტყვით, არც მოქმედებით, რას ჰფიქრობს ეგვიპტის გამო ინგლისზე, მაგრამ საფრანგეთი კი თავს არ ანებებს ინგლისს, უნდა ეგვიპტიდამ ჯარები გამოიყვანო, და რუსეთიც მხარს აძლევს. ამ ორთა ძლიერთა სახელმწიფოთა ხმამ გამოაღვიძა თვით ეგვიპტის პატრონი ოსმალეთი, რომელიც აქამდე თუმცა ტკივილითა ჰგრძნობდა, ინგლისი მჩაგრავსო, მაგრამ მოწინებით და ხმადაბლა ძლივს ჰბედავდა ზოგიერთს დროს მოავონოს ინგლისს, რომ დროა ეგვიპტიდამ გააბძანო შენი ჯარებიო. ხოლო მაშინ, როცა ორმა ძლიერმა სახელმწიფომ იგივე მოსთხოვა ინგლისს, ოსმალეთმაც ხმა მოიმატა და გაუთამამდა ინგლისსა და მით დაუახლოვდა რუსეთსა და საფრანგეთსა. ამ დღემდე ოსმალეთი, რუსეთის შიშით, ინგლისის დიპლომატიის ხელში იყო და ინგლისი, საითაც უნდოდა, თავს იქით უზამდა. წყალობა ინგლისისა თუმცა ძვირად უჯდებოდა ოსმალეთს და რიხიანად ხმას არ აღებინებდა ეგვიპტის თაობაზე, მაგრამ კიდევ ეს ყოფა უჯობდა, ვიდრე რუსეთის თავდასხმა და მისგან განადგურება. ტკივილი ეგვიპტისა მაინცდამაინც გულს ჩარჩენილი ჰქონდა და საფრანგეთის დიპლომატია ბევრსა სცდილობდა სტამბოლში, რომ ეს ტკივილი უფრო აუტკიოს და მით შეაფიცხოს ოსმალეთი წინააღმდეგ ინგლისისა. ეს როგორცა სჩანს, მოუხერხდა საფრანგეთსა, იქნება მით უფრო, რომ საფრანგეთს მომხრედ რუსეთი ჰყავს. ესეა თუ ისე, ეგვიპტის საქმემ ხმა ამოაღებინა ოსმალეთს წინააღმდეგ ინგლისისა და მით ოსმალეთი დააშორა ინგლისს და დაუახლოვა საფრანგეთს და მასთან გაუყრელს რუსეთსა.

ინგლისის დიპლომატიამ, რაკი ველარ გადმოიბირა ოსმალეთი, რომელიც ამ დღიდან სხვის გავლენის ქვეშ ჩავარდა, ინგლისი შემოსწყრა. აბა, თუ ესეა, მე ვიჩვენებო. მართლაც უჩვენა: ჯერ ფეხზე წამოაყენა სომ-

ხების საქმე, რომელმაც შეაფიქრა ოსმალეთი და საქმეები ისე აუწეწა, რომ ამ აწეწვის მიხედვით პირდაპირ წინ დაუყენა ევროპას, რომ ოსმალეთს აღარ ედგომილება ევროპაში, მისი აღსასრული მოვიდა, იგი უნდა დაირღვეს და დანაწილდესო. რუსეთი ყველაზე უფრო მეტად წინ აღუდგა ამ ინგლისის სარჩიელსა და მისი წყალობით ოსმალეთი დღეს თავის ადგილას ჰსუფევს. ამან რაკი ვერ გასჭრა, ინგლისს აბრალებენ, ვითომც კრიტის კუნძულზე არეულობა აუტეხაო და მერე საბერძნეთი წააქეზაო საომრად ოსმალეთთან. ამბობენ, რომ დღესაც, როცა ეს ომი გათავებულია და შერიგებაზეა ლაპარაკი, ინგლისი თავისის ჰო და არათი იმოდენად აბრკოლებს საქმეს, რომ არ იციან, როდის დაბოლოვდება შერიგების საქმე. ამ დაბრკოლებით, იქნება, იმას მოელოდინება ინგლისი, რომ ამაში გართულმა ოსმალეთმა და სხვა სახელმწიფოებმა სხვა საქმეებისათვის არ მოიცალონ. ამასაც ამბობენ, რომ ყოველ ამის სამაგიეროდ ოსმალეთის ფადიშაჰმა ვითომ აუჯანყა ინგლისს მუსულმანობა ინდოეთისაო. აჯანყება კი მართალია, მაგრამ მიზეზი ოსმალეთია თუ არა, – ეს არ ვიცით. ხოლო ეს კი უეჭველია, რომ დღეს ოსმალეთში ინგლისს აბრუ გატეხილი აქვს მთლად, და ცალ მხრით რუსეთი და საფრანგეთი და მეორეს მხრით გერმანია – ჰცდილობენ გავლენა ოსმალეთზე დაისაკუთრონ. ამაში ჯერ, ჩვენის ფიქრით, გამარჯვებულია რუსეთი და მერე არ ვიცით, რა იქნება.

[1897 წ.]



**<კ. ბლუმერის აზრი ამიერკავკასიაში  
გავრცელებული ავაზაკობის ბამომწვევ  
მიზეზებზე>**

ტფილისი, 22 ნოემბერი

„Новое Время“ თავისას არ იშლის: დაუჟინია, თუ გინდათ ავაზაკობა ამოჰკვეთოთ ამიერკავკასიაში, იქაურები სულ გამოყარეთ პოლიციის სამსახურიდამაო. „ნეტარ არიან მორწმუნენი“ და ნეტარ იყოს თვით „Новое Время“-ც, რომელსაც ამისთანა ადვილი და უებარი წამალი სცოდნია თავისდა სასახელოდ. „Новое Время“ არა სჯერდება ამის ქადაგებას თავისის საკუთარის სახელით და დასჭირებია სხვის მიერ მოწმობაცა, უსათუოდ უფრო დიდის ავტორიტეტის და მცოდნე კაცისა. ამისთანა ძლიერ მოწამედ გამოსჩენია ბ-ნი კ. ბლუმერი, რომლის წერილი დაბეჭდილია „Новое Время“-ს № 7803-ში ამ ხმამაღალ სათაურით „О разбояхъ на Кавказъ“.

ბ-ნი ბლუმერი უფრო ხერხიანად მოქცეულა ამ საქმეში. რომ უცაბედად ნათქვამობა არ შესწამონ მისს წერილს, ბ-ნი ბლუმერი ჯერ იმასა სცდილობს, დააჯეროს მკითხველი, რომ მე ამ საქმეში გაწაფული, გაჩარხული კაცი ვარო, ყოველივე შიგნითი ტიკი კავკასიასი ავაზაკობისა კარგად ვიციო, მისი ალიანჩალიანი კარგად შეტყობილი მაქვსო და სხვანი და სხვანი. ამისი უტყუარი საბუთებიც მოჰყავს. მაგალითებრ, იგი გვიამბობს, რომ 7<sup>1</sup>/<sub>2</sub> წელიწადი სპარსეთში ვმსახურებდი და იქ შემხვედრია ზოგიერთნი კავკასიის ავაზაკნი, თვით სახელგანთქმული ქარიმაც

კი გავიცანიო. გვიამბობს, რომ დიდ პატივშია ქარიმა სპარსეთში, დიდის ამალით დასეირნობს და ღენერლის ხარისხს იჩემებსო. ერთხელ ქარიმამ მთელის ამალით გამაცილა თავაზიანად და ცოტა მანძილი რომ გავიარეთ, თავაზიანადვე გამომეთხოვაო. ბევრი რამ მიამბო ქარიმამ თავისი თავგადასავალი კავკასიაში და სხვათა შორის მითხრა ერთი ამბავიო. ერთხელაო, უთქვამს ქარიმას, ყაზახებმა ერთს ადგილას მომაწყვდიესო, მე გავეძვერ ხელიდამ და ერთის ბოქაულის სახლს მივატანეო. კარებში იარაღი ავიყარეო და თამამად და უშიშრად სტუმრად ვეწვიე ბოქაულსაო. ბოქაულმა ვერ გაჰბედა დაჭერა ქარიმასი, რადგანაც ამით უღალატებდა ჩვეულებას აღმოსავლეთის ხალხისას, რომელსაც სტუმარი ხელშეუხებელ კაცად მიაჩნიაო, უმატებს თვითონ ბ-ნი ბლუმერი.

რამოდენად დასაჯერია ეს დაუჯერებელი და უცნაური ამბავი — ეგ ბ-ნმა ბლუმერმა და „Новое Время“-მ ჩვენზე კარგად უნდა იცოდეს და თუ მართალია, მართლა რომ დიდი ბოლაზი უპოვნია ბ-ნ ბლუმერს ავაზაკობის საქმის ცოდნისა ჩვენში, თუ თქვენც იტყვით, მკითხველო, და მოდით და ამის შემდეგ ნუ იტყვით, რომ ბ-ნი ბლუმერი ზედმიწევნით მცოდნეა აქაურ ავაზაკობისა. თუმცა მარტო ეს ამბავიც საკმაოდ გვარწმუნებს ჩვენ, რომ ბ-ნი ბლუმერი მიგ გულ-ღვიძლში ჩასწვდენია ჩვენებურ ავაზაკობას, მაგრამ უფრო მეტის დარწმუნებისათვის სხვა ამბავიც მოჰყავს, რომელიც არანაკლებ პირველ ამბავზე გვამცნევს, რომ ბ-ნ ბლუმერს ჭა სიბრძნისა ავაზაკობის შესახებ სრულად ამოუწურავს.

იგი გვიამბობს, რომ ჩემ დროსაო სპარსეთის ჯარში განწესდა ვიღაც მირზა კ-ვეიო. ეს ვიღაც მირზა წინად კავკასიაში მსახურებდა ბოქაულად, თუ ბოქაულის თანაშემწედა, დაბადებულა და მთელი თავისი სიცოცხლე რუსეთში გაუტარებიაო. იმისდა მიუხედავად, იგი მუსულმანის ცხარე ფანატიკოსად დარჩაო. მე რომ სპარსეთიდან წამოვედიო, სამ წელიწადს შემდეგ იგი მირზა გარდაიცვალაო. ერთხელ როგორღაც სასაუბროდ შევხვდიო, ლაპარაკი კავკასიაში ავაზაკობის შესახებ დავიწყეთო და მე ვუთხარიო: პოლიცია რად არის ასე

ულონო კავკასიაში, რომ აი რვა წელიწადია რაც იბრძვის და ვერას გამხდარა ქარიმასთან, ამ ერთადერთს კაცთანაო.

– აი, უპასუხნია ხსენებულ მირზას, საქმე ხომ წასულია, მე რუსეთში აღარ დავბრუნდები, თუმცა არავინ დამიშლისო, რადგანაც იქილამ გამოქცეული არა ვარო. თქვენ მეკითხებით, ქარიმას რატომ ვერა ავუტეხე რა, მაშ ყური მივდეთ: „როცა ქარიმა მე-გულებოდა ერთს სადმე ადგილას, მე სხვა ადგილისაკენ გავქანდებოდი ხოლმე, ის მარჯვნივ წავიდოდა, მე განგებ მარცხნივ გავბრბოდი. აბა რად გავცემდი ჩემის რჯულის კაცს და თქვენ სხვა რჯულის კაცს ხელში რად ჩაუვადებდით. თქვენ ვინა გთხოვთ, რომ მოხვედით და ჩვენი ქვეყანა ძალით დაიჭირეთ. ჩვენ უთქვენოდ უფრო კარგად გვეცხოვრებოდაო“.

კიდევ კარგია, რომ ბ-ნმა ბლუმერმა საიქიოს გაისტუმრა ამისი მთქმელი მირზა, თორემ ბევრი ახირებული კაცია ქვეყანაზე, ვინ იცის, იქნება წასულიყო ვინმე სპარსეთში და მირზასათვის ეკითხნა, – მართლა ამისთანა რამ დაუროშე ბ-ნ ბლუმერსაო.

ამისთანა აბდა-უბდები არა ჰლირდა, რომ ასე ვრცლად ამოგვეწერა, მაგრამ საჭიროა ვიცოდეთ, რა გზით ცნობულობენ აქაურობას ზოგიერთი პუბლიცისტები „Новое Время“-ს ლილახანისანი და რა ჭკუის საგზალით ეკიდებიან იმისთანა რთულს და მწვავეს საჭირობოროტო საქვეყნო საქმეს, როგორიც თუნდ ავაზაკობაა, სხვა რომ არა ვთქვათ რა.

ახლა იკითხავთ: ბ-ნი ბლუმერი რად გარჯილა, რომ ეს აბდა-უბდა გვიამბო? უსათუოდ ჯერ იმიტომ, რომ გვანიშნოს, აი, რა უტყუარის და ჭეშმარიტის გზით შემისწავლია კავკასიის ავაზაკობის საქმე სპარსეთში და მერე იმიტომ, რომ რაკი ასეა, ჩემისთანა მცოდნეს სიზმარიც დაეჯერებაო. რაკი ეს ორივე საქმე შეასრულა, თავისი სიზმარიც გამოგვიცხადა. ყოველ ამის მიხედვით, მეც ვემოწმები „Новое Время“-ს და თანავეუგრძნობო, რომ კავკასიის პოლიციას ძირეულად შეცვლა უნდაო. როგორ გგონიათ, რა ძირეულ შეცვლას გვირჩევს? იქნება გვეგონოთ, რომ აქ ბ-ნი ბლუმერი მართლდა რაიმე ძირეულს ცვლილებას

ჩაჰკიდებს ხელსა, თვით პოლიციის აგებულების კარგსა და ავს განიშნებთ, ან ამ და ან იმ საპოლიციო შინაგან სისტემაზე დავიწყებთ ლაპარაკსა! ნურას უკაცროდ. ყოველ ამას მეტი გარჯა უნდა ჭკუისა და გონებისა, მეტი ცოდნა, ვიდრე იგი, რაც გამოუწურავს ბ-ნ ბლუმერს იმ ორის სასაცილო ამბისაგან, რომელიც გაუგონია ქარიმასა და ვილაც მირზასაგან.

ბ-ნი ბლუმერი ბევრს არას აციებს და აცხელებს. იგი მოკლედ სჭრის და ადვილად სცვლის ძირეულად პოლიციას. რაკი ამისთანა ამბები აუგია ბურჯად თავისის აზრისა, ადვილად გაუთვალისწინებია წამალიც. იგი ამბობს, – მე მთლად თანავეუგრძნობ „Новое Время“-ს, რომ კავკასიის პოლიციაში არც ერთი თანამდებობა არ უნდა მიეცეს არც ერთს იქაურ თესლის კაცსაო და ამ სახით კაცების ცვლა პოლიციის ძირეულად ცვლად დაუსახავს. ვთქვათ, ბ-ნს ბლუმერს მიეტევოს, რომ ვერ გაურჩევია, რომ ერთია ძირეული ცვლა დაწესებულებისა, როგორიც, მაგალითებრ, პოლიციაა, და სულ სხვაა ერთის კაცის მაგიერ მეორის დაყენება, მაგრამ როგორ უნდა ეპატიოს ასეთი უვიცობა ღიღს გაზეთს სატახტო ქალაქისას? ან როგორ უნდა შეენდოს ამისთანა გაზეთს, რომ ქარიმასაგან და ვილაც მირზასაგან დარომვილ ამბავისაგან გამოადნოს კანონად დადება აქაურების გამოყრა სამსახურიდამ? მითამდა ამიერკავკასიის მკვიდრთაგანი თვითვეულად ცალკე და ყველა ერთად ნდობის ღირსნი არ არიან და პატიოსნება და ნამუსი იმათთვის ღმერთს არ გაუჩენია. როგორ იკადრა, რა მართებულებამ მისცა ნება, რომ ასეთი სილა მოუღერა ყოველს აქაურს მკვიდრს საერთოდ და ხელალებით ყველას ერთად განურჩევლად შესწამა ორგულობა კანონისა, სამსახურის ფიცის გატეხა, მოვალეობის ღალატი, სინდისის დახშვა, ნამუსის ახდა და სხვა ამისი მზგავსნი უკადრისნი და შესაჩვენებლნი ბოროტებანი. ესეთი გაუპატიურება მთელის ამიერკავკასიისა ღიღი თავგასულობაა, სხვა რომ არა ვთქვათ რა. მერე რა საბუთით? ვილაც მირზას სპარსეთში რუსეთიდამ გადახვეწილს, რაღაც წამოუროშავს და დაუყბედნია – მეტი საბუთილა გნებავთ! ოლონდ დამჯერი იყოს, თორემ ამისთანა საბუთიან

საბუთს კაცი დღეში ათასს გამოაცხობს ცხელ-ცხელად ისე, რომ ამისათვის სპარსეთშიაც კი წასვლა არ დასჭირდება.

რა თქმა უნდა, ამისთანა ბოროტებანი არც ერთს თესლის ცალკე კაცს ქვეყანაზედ არ დაეფიცება. ავი კაცი ყველგან მოიპოვება კერძოდ. გარნა საერთოდ მთელის ერის მოხვეტა და ერთს ამისთანა მაფრამაში მოქცევა, ცოტა არ იყოს საგიჟეთის მომასწავებელია. თუ ამისთანა საქციელი ბ-ნ ბლუმერს, რომელსაც კავკასიის ავაზაკობა სპარსეთში უკვლევი, სამარცხვინოა იმისთანა კაცთათვის, რომელნიც ჰქმედობენ ქვეყნის წრთვნასა ბეჭდურ სიტყვათა და მოძღვრებითა. ბეჭდურ სიტყვის ასეთი გაფუქსავატება და გაცულ-ლუტება თავისთავად დიდი დანაშაულია.

[1897 წ.]



## «**ზ უ ლ ნ ა მ ც ე ც ა ბ უ რ ჟ უ ა ზ ი ა**»

ტფილისი, 13 დეკემბერი

საოცარი დრო დაგვიდგა, ისე არეუ-დარეული არსად არ არის, როგორც ჩვენს ქართველობაში. ფეხქვეშიდამ ლამის დედამიწა გამოგვეცალოს, ლამის ხსენება ქართველისა საქართველოში მტვრად იქცეს და ქარმა წაილოს და ჩვენ კი მოვეყოლივართ და ვიძახით: კარლ მარქსის მოძღვრება უკეთესი მოძღვრებაა, მის წინაშე ყველამ ხმა უნდა გაიკმინდოსო. იქნება ეგრეც იყოს, როცა დანა ყელზედ მოხუენილი და ლამის თავი ტანს მოაშოროს, განა კაცს დროლა აქვს ინატროს, ნეტავი ლობიოს მაგივრად ფლავი მქოდესო.

ჩვენდა საუბედუროდ, ჩვენ ქართველებს რაღაც ემ-მაკმა ჩაგვკრა თავში და თავბრუდასხმულები დავდივართ. კაცმა არ იცის, რა სასწორი აილოს ხელში, რა საწყაო, რომ ან ასაწონისა რამ გაიგოს, ან ასაწყავისა. ქართველს ეუბნებიან, ეს შენი დედაქალაქი, შენის სისხლით მორწყული, შენის მამა-პაპის ძვლებით გაპათიონებული, შენი არ ყოფილა არც წინად და არც დღეს არის, გულხელი დაიკრიბე და ჩვენს კალთას მოეჭიდე, რასაც გიწყალობებთ, ეგ ჩვენ ვიცით, და თქვენით კი არაფერზე ხელი არ უნდა გაიწვინოთო. თქვენ ანდერძაგებული ერი ხართ, „საფლავისკენ ფეხი გაგიშვირიათ“, დღესა თუ ხვალ საუკუნო სახსენებელი გეთქმით ზეიმითა და ზარითა, მორჩა და გათავდა!.. თქვენ მარტო ისლა დაგრჩენიათ, განისვენოთ იქ, სადაც მართალნი განისვენებენ, საიქიო თქვენთვის დაგვილოცნია, იმიტომ, რომ იქ ყველაფერი მუქთაა, სააქაო კი

ჩვენია, იმიტომ, რომ აქ ყველაფერს ფასი აქვს და ფასი და მაზანდა ჩვენ თქვენზე უკედ ვიცი.

მართლის მოყვარე კაცი იტყვის: უფრო უპრიანი საქართველოში ქართველი უყურებდეს მზეს, ვიდრე სხვა ვინმე, თორემ ქართველი ხომ სხვას არ უშლის ერთად ცხოვრებას. იგი არც უშლიდა არასდროს და იქნება ეს თავისი გულკეთილობა და სხვის შეწყნარება სანანურად გახდომია და ცხვირში ძმარს აღენს, მაგრამ რალა დროს? „წამხდარს საქმესა რას არგებს მერმელა თითზე კბენანი?“

ვინც გუშინ ქართველმა იძმო და შეივრდომა, დღეს იგი ეუბნება: შენ ვინა გდიხარ, ერთი ვილაც ლატაკი, უბირი, უვიცი, ბრიყვი, ზარმაცი? დღეს მე ვარ იქ, საცა გუშინ შენ იყავი. ქვეყანა ესეა, ერთი დრო არავის შერჩენია და არც ქართველს შერჩაო, უარესმა უკეთესს უნდა დაუცალოს ადგილი და გზაო. დრო იყო, როცა თოფი და ხმალი მოციქულობდა კაცთა შორის, მაშინ თქვენ წინ იყავით. ეხლა ფულია მბრძანებელი და გაბატონებული. ეხლა ჩვენ წინა ვართ და თქვენ უკან. ეხლა ბატონები ჩვენა ვართ და თქვენ ჩვენის ყმობის მეტი სხვა გზა არა დაგრჩენიათ რა. მიწათმოქმედნი ვართო, იძახით თავმოწონებით. იყავით, მაგრამ იცოდეთ, ბაზარი ჩვენია და ვისიც ბაზარია, ბატონიც ის არის დღევანდელ დღეს. მიწათმოქმედი ისეთივე ყმაა ფულის და ბაზრის პატრონისა, როგორც ყოველივე სხვა მუშაკაცი, რომლის ავლა-დიდება მარტო მარჯვენაა და სხვა არაფერი. იგი ჩვენთვის მუშაობს, ჩვენთვისა ჰლერის ოფლსა, ჩვენი ყმაა და რასაც გადაუგდებთ, იმას უნდა დასჯერდეს, თუ გაგვიძალიანდა, მიწათმოქმედს შიგ ამოვარჩობთ თავისის პურისა და სიმინდის სასვე ბედლებში. კიდევ ვიტყვით: მიწათმოქმედი ეხლანდელ დროთა ვითარებისა გამო იგივე მუშაა, როგორც ყოველივე სხვა მუშაკაცი, რომლის სახსარი მარტო ცარიელი მარჯვენაა და რომელიც ჩვენგან იმაზე მეტს არ მიიღებს, რაც საკმარისია, რომ სული ხორცს არ გაეყაროს, შიმშილით არ მოკვდეს. კაცთმოყვარეობა, ჰუმანიზმი და სხვა ამისთანა ტკბილ-ტკბილნი და თბილ-თბილნი საგალობელნი ჩვენთვის ანაზრონიზმია, ზღაპარია, სულელობაა. კაცთა

ცხოვრება ერთმანეთის თლაა, ვინც მეტს და ბევრს ითლის თავისკენ, კაცი ის არის და ქულიც, ქულიც მეთქი!.. კარტუზიცი იმასა ჰხურავს.

ვინ არ იცის, რომ ფულის არსებითი თვისება სიხარბეა და სიხარბე კიდევ ისეთი ვეშაბია, რომელიცა სნთქავს და სჭამს ყველაფერს, რასაც კი მიეკარება და ბრჭყალს მოსდებს. ფულის წარმომადგენელი საეკონომიო სარბიელზე ეგრედ წოდებული ბურჟუაზიაა, რომელიც ყველგან სამართლიანად ყბადღებულია იმის გამო, რომ ყველგან, საცა კი ნამრომ-ნაღვაწია, თავისაკენ მეტს ითლის იმოდენად, რომ თვით მშრომელს და მოღვაწეს თითქმის არას უტოვებს. ხოლო სხვაგან ამ ყბადღებულს ბურჟუაზიას ბევრ ცოდვასთან მშრომელის წინაშე, ის სიკეთე მაინც მიუძღვის, რომ ეს საოცებელი მრეწველობა შეჰქმნა, რომელიც დღეს გვაკვირვებს ქვეყნიერობაზე. ვინც რა გინდა სთქვას, ამას კი ვერავინ იტყვის, რომ ამ საქმეში თაოსნობა მისი არ იყოს. მისით ცხოვრობს ქვეყანაზე ლიტერატურა, ხელოვნება, მეცნიერება და იგი სასწაულთმოქმედი მრეწველობა, რომელმაც განაღდა მეცხრამეტე საუკუნე.

ჩვენებური ბურჟუაზია სულ სხვაა: იგი, როგორც თავი ნათესში, ჩრჩილი ტანისამოსში, ჭია ხეში, ბაცილა ტანში, სჭამს ადამიანის კეთილდღეობას, თვის გარეშემო ყველაფერს სძოვს, ჰლრლნის, სთხრის, აღარიბებს, ალატაკებს, არაფერს ჰქმნის, არაფერს აჩენს, მარტო სხვის ჯიბიდან თავის ჯიბეში გადააქვს ფული და სიმდიდრე და ოქროს ზანღუეკებზედ ფენ-მოკეცილი ჰზის. ჩვენებური ბურჟუაზია ყველა სახის ბურჟუაზიაზე უსამსი, უარესი და შეუწყნარებელია. ჩვენებური ბურჟუაზია რალაც წვრილფეხა დუქნური, მიკიტნური, ჩარჩული ბურჟუაზიაა. ქმნა და შემოქმედება მას ბედის დავთარში არ უწერია. ღმერთმა აქაურს ბურჟუაზიას ამასი შნო და უხარი, როგორც ეტყობა, არ აღირსა.

მინამ აქაური ბურჟუაზია ჩუმრუმად სჭამდა აქაურობას და ხმაგაკმენდილი ჰბუდობდა აქაურობის გვამში გამოსაღრღნელად, არავის ფიქრადაც არ მოს-



დიოდა ესინჯა, რა სიცოცხლის მიმღები სენია გაჩენილი. ესლა ხმამაღალი ღაღადია, უნდა გჭამოთო.

თითო-ოროლა კაცი გამოდის და იძახის: მინამ პირში სული გვიდგას, არ შეგეჭმევიანებით და არც შეგაჭმევიანებთ, თქვენც იცხოვრეთ და სხვაც აცხოვრეთო. ამის მთქმელს პირში ბურთსა სჩრიან და იციით რა ოსტატობით? ძმობისა და ერთობის სახელითა. არ შეგეჭმევიანებით, — რა ძმობისა და ერთობის საკადრისიაო, მე ძმა ვარ და რა დიდი საქმეა, შენი თავი შემაჭმევიანო. აი მართალი ძმობა და ერთობაც ეს არის, თუ არ დაგიშლიათ. ესეთი ფიანდაზები, ამისთანა ძმობითა და ერთობით მოქარგული, რომ სხვამ გაგიშალოთ ფეხქვეშ, კიდეც ჰო, საქმე ის არის, რომ ჩვენში, ქართველებშიც გაჩნდნენ იმისთანა უმანკო ბღარტები, რომ ამისთანა საკენკზე მიდიან და კაკანათში თავსა ჰყოფენ.

„Новое Обозрение“ ძალიან ოსტატურად იქცევა ამ შემთხვევაში. იგი, როგორც კომპროჩიკოსისაგან დამახინჯებული, ცალის ყბით იცინის და ცალის ყბით სტირის ერთსა და იმავე დროს. სიხარულით იცინის, რომ ქართველები გამოყარეს ქალაქის საბჭოდამ, იცინის, რომ ტფილისი უწინაც ქართველებისა არ ყოფილა და ესლა ხომ არ არის და არ არისო. იცინის, რომ აქაურ ბურჟუაზიისათვის ჰუმანიზმი, კაცთმოყვარეობა სულელობაა და იმავე დროს სწუხს და თავში იცემს, რომ ქართველებს ძმობა და ერთობა არ უნდათო.

აბა გვერდები ჩამოაფხიკეთ „Новое Обозрение“-ს, ტყუილის ძმობისა და ერთობის საფარებელი ახადეთ თუ თვალები არ შემოგაჭყიტოთ გულნამცეცა ბურჟუაზიის ნაძირალმა მოძღვრებამა.

ერთი გამკითხავი აღარავინ არის, ჰკითხოს: ადამიანო, თუ ძმა ხარ და ერთობა გინდა, რადა მკარ ჰანღური და გამომაგდე ჩვენის ქალაქის საბჭოდამ, რად მართმევე ჩემს დედაქალაქს და მარტო შენთვის იჩემებ, რატომ ხმა არ გაეცი შენს საკუთარს მოძმე გაზეთს, როცა კაცთა მოყვარეობა და ჰუმანიზმი, მაშასადამე, ძმობა და ერთობა, ვირზე შესვა და სანაგვეზედ გადაავლო. ეგ ძმობისა და ერთობის ისარს რომ ისვრი და მშვილდს კი ჰმაღავ, როდემდის? ძმობა და ერთობა განა ერთის ძმის მოვალეობაა და მეორისა კი არა?

სულ მე, და შენ არაფერიო და ამასთან სიხარბეს შენვე მიკითხამ ძმობისას და სიყვარულისას! ამ კომპროჩიკოსობით, ამ თვალთმაქცობით ვისი იმედი გაქვთ, მოატყუოთ? ეგ თქვენი ძმობა და ერთობა გარეგანი ვარაყია შინაგანის ძირმწარისა. ვარაყი მარტო ბაღს წაიციდნენ და აკი წაიციდნეთ კიდეც. ჩვენდა საუბედუროდ, ეს ამბავი ჩვენთვის, ქართველებისათვის არ ახალია, ძველია. ციხე ყოველთვის შიგნიდამ გაგვტყენია, ჩვენდა სამარცხვინოდ, ჩვენდა დასამხოზლად და ვინ იცის? იქნება თქვენი ღონე ამაშიც იყოს, ამ ჩვენს უბედურს ზნეში.

„Тифлисский листок“-ი ამით მაინც უკეთესია თქვენზე, რომ პირახდილი, უნიღაბოდ გამოდის და იძახის, თქვენი ძმობა და ერთობა ანახრონიზმია, სულელობაა. აშკარაა, ამ გაზეთის აზრით, კაცი კაცი-სათვის მეელი უნდა იყოს, საცა მოახელოს, ერთმა მეორე უნდა სჭამოს. თქვენ, რომელიც ერთს მეტს სიტყვას ისე არავის შეარჩენთ, რომ მეორე დღეს სამარცხვინოდ ბოძზე არ გააკრათ, თქვენს გაზეთში ამისთანა მოძღვრებას „Тифлисский листок“-ისას კი ყური მოუყრუეთ და ხმაც არ გაეციოთ. რას ჰნიშნავს ეს? ნუთუ იმას, რომ ან ეს თქვენთვის სასურველი მოძღვრებაა და იმოდენა გულადობა არა გაქვთ, ხმამაღლა აღიაროთ, ან სასურველი არ არის და იმოდენა ვაჟკაცობა არა გაქვთ, პირდაპირა სთქვათ მთელი ბარბაროსობა ამისთანა სამგლე მოძღვრებისა. აი ჭეშმარიტი საქციელი ეს არის წვრილფეხა ბურჟუასი, რომელიც ძმობას და ერთობას კალთის ქვეშ ამოეფარება ხოლმე და იმავე დროს თვალი სხვის ძეხვისაკენ უჭირავს მშიშარა კატასავით. თუ შესწავლა ძეხვს, კარგია, თუ არა და რა უშავს? იტყვის, პარასკებიაო.

დიად, ბატონებო, ჩვენ, ქართველებს, ბევრი ჭირი, ბევრი ავი ზნე გვჭირს და ამათ შორის ყველაზე უარესი ის არის, რომ როცა ვეღარ გაგვიჩვენია, ვინ არის მტერი და ვინ მოყვარე, თუ ჩვენი საქმე ასე წავიდა და თვალში სინათლის კლებამ იმატა, დრო მოვა, რომ ან ჩვენის ხელით გაგვათხრევიანებენ ჩვენსავე საფლავს, ან ყმაღ უნდა ვეყმოთ დროთა ვითარებისაგან გათამამე-

ბუღს წვრილფეხა, გულნამცეცა ბურჟუაზიას, რომლის ფარული ბაირალტარი დღეს „Новое Обозрение“-ა.

[1897 წ.]



### <კველი და ახალი ჩვენი ეკონომიური ცხოვრებისა>

ტფილისი, 20 დეკემბერი

ჯერ კიდევ პუშკინმა\* სთქვა, რომ ქვეყანაზე გაბატონებას, ქვეყნის დაჩემებას მარტო ოქრო და ხმალი ეცილებიან ერთმანეთსაო.

პუშკინმა ეს ამ სამოცი წლის წინათ სთქვა, თუ უფრო ადრეც, და მას აქეთ ბევრმა წყალმა ჩაიარა და ბევრრიგად იცვალა ცხოვრება ადამიანისა. მაშინ იქნება ხმლის ქადილს ღონეც შესწევდა და ფულს უშიშრად პირში ეღვა. ეხლა კი ხმალს მუცელში ენა ჩაუვარდა: ხმალმაც, როგორც ყოველმავე სხვამ, თოკი ყელზე შეიბა და ფულს დაუკრა თავი, ვითარცა უძლეველს ბატონს ყურმოჭრილმა ძლეულმა ყმა. ქადილი ოქროვერცხლისა, რომ ყველაფერი ჩემიო, ყველაფერს ვიყიდო, გამართლდა ქვეყნის საუბედუროდ. ეხლა რაც არის – ფულია და სხვა არაფერი. უფულო ერი ერთა შორის და უფულო კაცი ადამიანთა შორის ყმაა ფულიანისა.

ბევრიც რომ თავი მოვიწონოთ და ყელი მოვიღეროთ, აქაოდა მე ბრწყინვალე თავადი ვარ, კეთილშობილი აზნაური, მიწისმფლობელი, თუ მიწისმომქმედი, ტყუილი და სასაცილო ღონიჯის შემოყრა იქნება.

---

\* Все мое, сказало злато  
Все мое, сказал булат  
Все куплю, сказало злато,  
Все возьму, сказал булат.  
პუშკინი

ყოველმა ამისთანამ ეხლანდელ დროში თავისი მშვილდი ძირს უნდა დასდოს გაბატონებულ ფულის წინაშე. რაც გინდ ქუდი კახურად ჩავიკეცოთ, ყურთმაჯები ვაჟკაცურად მხრებზე გადავიყაროთ და, ისპანიის გაკოტრებულ უდა-აზნაურივით ულვაშები გავიწკიპოთ, ჟანგმოკიდებული ხმალი ჩამოვიკანკუროთ და ღონიჯის შემოყრით ვიძახოთ: ჰოი ხმალი პაპაჩემისაო, ფულის ბრძანებას და ბატონობას მაინც ვერსად გავექცევით, ვერსად ვერ დავემალებით: საცა იქნება და როცა იქნება, მოგვასწრობს და ქეჩოში წაგვაგვლებს ხელს, ან მეყმე და ან შიმშილით სული ამოირთვით, გვეტყვის.

მართალია, აქ ფული მეტისმეტად სულგრძელად გვექცევა, რადგან ორში ერთის არჩევანს ჩვენს ნებაყოფლობაზე აგდებს. მაგრამ ბევრი სახარბიელო არც ყმობაა და არც სულის ამორთმევა, თორემ ფული არც ისე გაბედოვლათდებოდა, ერთიცა და მეორეც ჩვენს ნებაზე მოეგდო. წყეულ იყოს ამისთანა სულგრძელობა და ამისთანა გარემოება, რომელიც ან ყმობას გვიქადის, ან სულის ამორთმევას და, ამ ორს საარჩევანოს გარდა, სხვა გზას არ აძლევს ადამიანსა.

ნუ გეგონებათ, ვითომც ეს სულთა და ხორცთამხუთავი ძალ-ღონე ფულს დაწერილ კანონისაგან ჰქონდეს მინიჭებული. ესეთი კანონი არა რჯულში არა სწერია, არა კანონმდებელს თავის დღეში ფიქრადაც არ მოსვლია. ესეთი ძალ-ღონე ფულისა იმ უწერელმა კანონმა შექმნა, რომელსაც ცხოვრებას ეძახიან და რომლის ძალმომრეობა თვით დაწერილ კანონზე უძლიერესია და თავში გამწვევი მოუდრეკელად. ჟამთა ცვლამ და ეკონომიურ შინაგან და გარეგან ვითარების წინსვლამ ისტორიაში ისე მოუმართა ფულს ხელი, რომ ყველგან და ყოველმხრივ ცხენის ძუის ბადე გააბა: გაინძრევით თუ არა, ამ ბადეში გაიხლართებით, როგორც ბუზი აბლაბუდაში.

თუ კანონს აქ დანაშაული რამ მიუძღვის, მარტო ის დანაშაული, რომ ამისთანა ძალმომრეობას ფულისას იწყნარებს და მჭამელისა და ჭამულის შუა არ ჩასდგება ხოლმე, რომ ერთი მეორეს არ აჩაგვრინოს, ერთი მეორეს არ ათელვინოს. თუ კანონი ბატონისა და ყმის შუა ჩაერია და ერთის ძალმომრეობა და მეორის

ყმობა დასთრგუნა და გააქარწყლა და მით ქვეყნის მადლობა სამართლიანად მოიხვეჭა, რატომ აღარ უნდა ამოიღოს თავისი ძლევაძმოსილი ხმა იქ, საცა ბატონი ფულია და სხვა ყოველი მისი ყურმოჭრილი ყმა. ან მეყმე და ან შიმშილით სული ამოირთვით, ეს ისეთი შეუწყნარებელი მდგომარეობაა, რომ ამასთან აწ საუკუნოდ განსვენებული ბატონყმობაც კი მაღლად ჩასათვლელია.

რა თქმა უნდა, ამ კანონისაკენ მიმართულს დაღდებას ჩაგრულისას, ქურდბაცაცა ბურჟუაზია ჩვენ დიდ ცოდვად ჩაგვითვლის ბუკითა და ნაღარითა: პოლიციის მოწვევა რეტროგრადების საქმეაო. აქაურ ბურჟუაზიის სუტ-ლიბერალური ავანჩავანი „Новое Обозрение“ მოგვდგება და წრიპინს დაიწყებს: დახეთ, დახეთ, შეძუსრეს დედააზრი ლიბერალობისა, პოლიციას იწვევენო. ჩვენ აქ ისეთი წრიპინ-წივილი არ გვიკვირს: რაკი კულზე ფენს დაადგამთ, დაიწვილებს, მა რა ეშმაკია. ჩვენთვის საოცარი მარტო ის წინდაუხედავი კადნიერება და გაბედულობაა, რომელიც კაცს ნებას აძლევს ამისთანა ფეხმოკლე თვალთმაქციობა გაასაღოს, გაანაღლოს ლიბერალების სახელითა. განა საკვირველია, რომ ამისთანა სუტ-ლიბერალობა ჩვენებურ წვრილფეხობაში მუშტარს პოულობდეს და ჰპოულობს კიდევ? განა ცოტა ბრძენია ქვეყანაზე, რომელსაც ჰგონია, რომ თავია ქულისათვის გაჩენილი და არა ქუდი თავისათვის?

ჩვენ ამ საგანს, რომელიც შეეხება სახელმწიფო მოქმედებას საეკონომიო ურთიერთობის სარბიელზედ, იქნება სხვა დროს დაეუბრუნდეთ და შეძლებისამებრ უფრო ვრცლად მოვილაპარაკოთ. ეხლა კი დავჯერდეთ ამ გზადაგზად ხსენებულს და ვთქვათ, რომ ესეა თუ ისე, აღვირაშვებულმა ფარფაშობამ ფულისამ ისე გაჰბაწრა და შესთოკა ადამიანი ეხლანდელ დროში, რომ ვისაც უფულობაში მოასწრო, იმის გაფულისანება თითქმის შეუძლებელიდაა პატიოსან შრომითა და გარჯითა, თუ ერთი უეცარი ბედი რამ არ მოეკლინა, მაგალითებრ, შადრევანი ნავთისა, ან ყალბი ფული მართალ ფულად არ გაასაღა, ან მამპანურიით სავსე ბოთლი ცარიელ ბოთლად არ შემოეპარა საბაჟოს, ან

ერთზე ორი სარგებელი არ აიღო გასესხებულ ფულში და სხვა ამისთანა ჟამთა საფერ საქმეში კოჭი აღჩუდ არ დაუჯდა და სინილისმა არ დააბრკოლა. თუ არ ამ გზებით, დღეს კაცმა, მარტო და უფულომ, გაფულიანებაზე იმედი უნდა გადიწვიტოს, რადგანაც მეტფულიანი ნაკლებფულიანს ყველგან სულსა ჰხდის, საცა კი მოასწრობს. ტყუილად კი არ არის ნათქვამი: ფული ფულთან მიდისო. ჩვენ, ქართველები, უფულონი ვართ და თუ აგრეა, რამღა უნდა გვიშველოს? სადღაა და რაშიღაა ხსნა? ჩვენი დღევანდელი თავში საცემი საკითხი სწორედ ეს არის და სხვა არა რა. ამას უნდა შევალთოთ ყოველი ჩვენი სულიერი და ხორციელი ღონე და გზა ხსნისა როგორმე გავიგონოთ, გავითვალისწინოთ.

ერთგვარნი სახსარნი იმისთანანი არიან, რომ ჩვენს საკუთარს თაონობასა, მხნეობასა და საქმის გაბედულად შეჭიდებაზედ არიან დამოკიდებულნი. უნდა ვეცადნეთ, რომ რაც თვითვეულ ცალკე კაცისათვის მიუწვდომელია, ის ერთიანის შეკრულ-შებოტვილ ღონით ვიმოქმედოთ: თვითვეულის ცალკე გროში ერთად შევაგროვოთ, ღონე ღონეს შევაკეცოთ, შრომა შრომას მიუუყენოთ და ამგზით ბევრნი ერთად შევებნეთ უღელში ცხოვრების ავკარგიანობის საწევლად, რომ ჩვენი ნაოფლი, ჩვენი ნალგაწი ჩვენვე გვრჩებოდეს, ჩვენვე გვრგებოდეს. ნუ დაივიწყებთ, რომ ჩვენ საქმე გვაქვს ჩარჩულ ფულთან, რომელიც ყოველ სხვა ფულზე უფრო უღონოა. ჩარჩული ფული ბუნებითად მხდალია, იმიტომ რომ ქურდბაცაცაა, იქა მკის, საცა არ უთესნია. იგი ქვეყანას ქონს აცლის და სამაგიეროს არას აძლევს, იგი გასამრჯელოს იქ იღებს, საცა არ ირჯება, იგი ჰსუქდება მით, რომ სხვას ამჭლევებს, აჭლექებს, იგი თვითონ ივსება და სხვას აცარიელებს. უფულო კაცი და უფულო ერი მისი საძოვარია, მისი საცხოვრებელია, მამასადამე, ჩვენის უღონობით არის იგი ძლიერი. ოღონდ ერთობით, ამხანაგობით ჩვენ ღონე მოვიცეთ და ჩარჩული ფული თავისს საკუთარს ბედისწერას გადაჰყვება, თვითონ შესჭამს თავისს თავსა, საკუთარის გესლით მოიწამლება, როგორც ქვემძრომი მორიელი.

თუ ჩარჩული ფული (და სხვა ფულს კი ჩვენში არა ვხედავთ), დღეს ჩვენში ცალკე კაცს თავში სცემს, ბევრს ერთად თავმოყრილს და მაგრად შეკრულს ძნელად თუ გაუძალიანდება, ძნელად თუ გაუსწორებს ომს, რომელს ეკონომიურს სარბიელზედაც გინდა შეხვდეს, იმიტომ რომ ჩარჩული ფული არა ჰქმნის სარჩოსაბადებლს და მარტო სთვლის თამასუქებს და სად ვის რა ასცინცლა. იგი ეკონომიური წარმოებისათვის მკვდარია და, მამასადამე, მკვდარია იმისთანა მოქმედებისათვის, რომელიც ერთადერთი სამართლიანი და მოუწყვეტელი წყაროა გაღონიერებისა, გამდიდრებისა და თუნდ გაფულიანებისაცა, რაკი დღეს ფულია სიმდიდრედ აღიარებული.

მინამ ჩარჩულს, ქურდბაცაცა ფულს გული თავისით ხისა აქვს და აბჯარი კი, ჟამთა ვითარების წყალობით, რკინისა, მასთან ომი კიდევ შესაძლებელია და საიმედო, იმიტომ რომ ომში გამძლეა მარტო გული რკინისა, თუნდ აბჯარი ხისაც იყოს, და არა პირიქით. მინამ საქმე ასეა, მოცდა და დაგვიანება მომაკვდინებელი ცოდვა იქნება ჩვენის მხრით. თუ ეხლავე არ ვუშველეთ თავსა, ჩვენი საქმე წასულია. ამიტომაც ყოველსავე ეკონომიურ სარბიელზე საშრომს, საღვაწს, საწარმოებელს, — ვაჭრობა და ალებ-მიცემობა, კეთება და მოყვანა რისამე, თუ სხვა ამგავრი მექმეობა, — ამხანაგური კრებული უნდა ავუჩინოთ, რაკი ცალ-ცალკე ამისათვის უღონონი ვართ. იმოდენად უნდა ერთად მოვგროვდეთ ღონით თუ ფულით, რამოდენათაც თვითვეული ცალკე საქმე რომელისამე წარმოებისა იკმარებს გასამარჯვებლად. თუ დღეს ცოტანი ბევრსა გვძლევენ და გვჩაგვრენ, ეგ იმიტომ მოგვდის, რომ ცალ-ცალკე მოგვიხელეებენ ხოლმე და ცალკე კაცისათვის ჭიდილი ფულთან, თუნდ ჩარჩული ფულიც იყოს, ძნელია. აბა ჩარჩს ყველგან, საითაც კი ხელს გაიწვდის, წინ კარგად შეკრული ამხანაგობა, ან სხვა რამე კრებული დავახვედროთ, ერთობით გაღონიერებული, და მაშინ იქნება ღმერთმა ჩვენკენაც მოიხელოს.



### კატარა საუბარი

თ. გ. თუმანიშვილის გაზეთმა ამ უკანასკნელ დროს პანტასავით მოგვაყარა სხვადასხვა სიბრძნე და მით მეცნიერების საგანძურს ბევრი კარგი შესძინა. ტყუის სახელგანთქმული შექსპირი, როცა ამბობს, რომ ქვეყანაზე ბევრი იმისთანა საიდუმლოა, რომელიც თქვენს ფილოსოფოსებს არც კი ესიზმრებათო. თ. გ. თუმანიშვილისათვის ამისთანა საიდუმლო არ არსებობს. ამ ბოლოს ხანებში პატივცემულმა თავადმა ისეთი საიდუმლო აღმოაჩინა, ისეთს რასმე ახადა ფარდა, რომ შექსპირის სიტყვა დასაჯერი აღარ არის. მაგალითებრ, შეიძლებაო კაცი კარგი პოეტი იყოს, კარგი ორატორიცა და პუბლიცისტად კი და ჟურნალისტად არ ვარგოდესო. მართალია, შეიძლება. ხოლო, ხომ ისიც შეიძლება, რომ კაცი არც კარგი პოეტი იყოს, არც კარგი ორატორი და არც კარგი პუბლიცისტად ვარგოდეს და არც ჟურნალისტად? ამბობენ, ეხლა თ. გ. თუმანიშვილი ამ ახალს საიდუმლოებას იკვლევსო და თავისს საკუთარს ნაწერებში ეძებს ამის საპასუხოდ უტყუარს საბუთებსა და მაგალითებსაო. ღმერთმა ხელი მოუმართოს, თავანკარა წყაროსათვის მიუვნია. პასუხი ყოველგვარ ეჭვს გარედ იქნებაო, იძახიან გულსწრაფნი მოყვარენი მეცნიერებისა და სიბრძნისა.

[1897 წ. 20 დეკემბრამდე.]



### <ფიქრები ქრისტეს შობის დღესასწაულის წინ>

ტფილისი, 24 დეკემბერი

„ხოლო რა ჟამს მოვიდეს ძე კაცისა დიდებისა თვისითა და ყოველნი ანგელოზნი მისნი მისთანა, მაშინ დასჯდეს საყდართა დიდებისა ვისისათა და შეჰკრბენ წინაშე მისთა ყოველნი ნათესავნი და განარიდნეს ივინი ურთიერთარს, ვითარცა იგი მწყემსმან რა განარჩინოს მაცხოვარნი თიკანთაგან, და დაადგინეს ცხოვარნი მარჯვენით მისსა და თიკანნი მარცხენით.

„მაშინ ჰრქვას მეუფემან მარჯვენითა მათ მისთა: მოვედით, კურთხეულნი მამისა ჩემისანო, და დაიმკვიდრეთ განმზადებული თქვენთვის სასუფეველი დასაბამითგან სოფლისად, რამეთუ მშობიდა და მეცით მე ჭამადი; მწყუროდა და მასვით მე; უცხო ვიყავ და შემეწყნარეთ მე; შიშველ ვიყავ და შემომოსეთ მე; სნეულ ვიყავ და მომხედეთ მე; საპყრობილესა ვიყავ და მოხვედით ჩემდა.

„მაშინ მიუგონ მას მართალთა მათ და ჰრქვან: უფალო, ოდეს გიხილეთ შენ მშვიერი და გამოგზარდეთ, ანუ წყურთიელი და გასვით შენ? ოდეს გიხილეთ შენ უცხო და შეგიწყნარეთ, ანუ შიშველი და შეგმოსეთ შენ? ოდეს გიხილეთ შენ უძლური, ანუ საპყრობილესა და მოხვედით შენდა?

„და მიუგოს მეუფემან მან და ჰრქვას მათ: ამინ გეტყვით თქვენ: რავდენი უყავთ ერთსა ამას მცირესაგანსა ძმათა ჩემთასა, იგი მე მიყავთ.“

„მაშინ ჰრქვას მარცხენითა მათთა: წარვედით ჩენგან, წყეულნი, ცეცხლსა მას საუკუნესა, რომელი

გამზადებულ არს ეშმაკისათვის და ანგელოზთა მისთათვის, რამეთუ მშობლა და არა მეცით მე ჭამადი; მწყუროდა და არა მასვით მე; უცხო ვიყავ არა შემიწყნარეთ მე; შიშველ ვიყავ და არა შემოსეთ მე; უძღურ ვიყავ და საპყრობილესა და არა მოხვედით ჩემდა. მაშინ მიუგონ მათცა და ჰრქვან: უფალო, ოდეს გიხილეთ შენ მშიერი, ანუ წყურიელი, ანუ უცხოებასა, ანუ შიშლოებასა, ანუ უძღურებასა, ანუ საპყრობილესა და არა გამსახურეთ შენ?

„მაშინ მიუგოს მან და ჰრქვას მათ: ამინ გეტყვით თქვენ, რამდენი რა უყავთ ერთსა ამასა მცირეთაგანსა, მე არა მიყავთ“.

რას მოასწავებს ეს დიდებული მოძღვრება მისი, ვისის შობის დღესაც ვდღესასწაულობთ? ვინც მშიერს არ მიეცით ჭამადი, მწყურვალს არ ასვით, უცხო არ შეიწყნარეთ, შიშველი არ შემოსეთ, სნეულს არ მიხედეთ, საპყრობილეში მყოფს ნუგეში არ ეცით, იგი ქრისტიანე არ არისო, რადგანაც რამდენად არ განიკითხეთ ერთი ამა მცირეთაგანი, არ განმიკითხეთ მე, ღმერთი თქვენო.


საცა მადლია, იქ ღმერთია და როცა იგი მადლი არ გამოგვიძეუნია ჩვენთა მცირეთა ძმათათვის, გვიგძია ღმერთი, გვიგძია იესო ქრისტიე, გვიგძია მისი კაცთა მხსნელი მოძღვრება, უარგვიყვია ქრისტიანობა. სიტყვითა ვდღესასწაულობთ დღევანდელს დღეს და საქმით კი შორსა ვართ. ბევრნი არიან თიკანნი და ცოტანი ცხოვარნი.

მეტი არ იქნება, თუ ყოველდღე არა, ქრისტეს შობის დღეს მაინც, წელიწადში ერთხელ, ჩვენს გულში ჩავიხედოთ და სვინიდისი ჩვენი დავისვათ ჩვენდა გამკითხავად. ნეტარ არის იგი, ვისაც შეეძლება ამ განკითხვის შემდეგ მართლა სთქვას გულსა შინა თვისსა: მშიერ იყო და მივეცი ჭამადი, მწყურვალ იყო და ვასვი, უცხო იყო და შევიწყნარე, შიშველ იყო და შევმოსე, სნეულ იყო და მივხედე, საპყრობილესა იყო და ნუგეში ვეცი.

კურთხეულ არიან ესენი, ბრძანებს იესო ქრისტიე: და ამათთვის არის დასაბამიდგანვე სოფლისა მომზადებული სასუფეველიო. შობა ქრისტესი უხაროდეთ ამათ,

რადგანაც მათთან არს ქრისტიე-ღმერთი სააქაოს და საიქიოსაც. ნეტარ არის იგიც, ვისაც ერთი მცირეთაგანი თუმცა არ განუკითხავს, არ შეუწყნარებია, მაგრამ დღესასწაული ესე გარდაუქმნია ამ მიხეზით სინანულის დღედ, დღედ განწმენდისად წარსულ ცოდვათაგან, რათა ეღირსოს იგიც თქმას: ჩემთანა არს ღმერთი და მე მასთანა.

[1897 წ.]



### კატარა საუბარი

– ეს „ლალი“ რა ხელობის კაცია?  
 – მწერალია.  
 – უკაცრაოდ, მოკრივე უნდა იყოს.  
 – როგორ თუ მოკრივე? რას ამბობ?  
 – თუ არ მოკრივე, განა ნამდვილი მწერალი დაიქადებს, – ჩვენ ამჟამად ბევრნი ვართ, თქვენდა საუბედუროდო? \* მწერლობა განა მუშტი-კრივია, რომ ბევრი ცოტას სჯობნიდეს? სხვას რას ჰნიშნავს ესეთი ქადილი, თუ არ მუქარასა და მუშტის მოღერებას? მწერლობაში – ვინ ბევრია და ვინ ცოტა – რა სათქმელია? გინდ ბევრი იყოს, გინდ ცოტა, საქმე ის არის, შიგ რა ჰყრია.

– ეჰ, შენც ერთი!..  
 – როგორ თუ მეც ერთი!.. განა ნამდვილი მწერალი ამისთანა ქადილით იკადრებს მოედნიდამ ბურთის გატანას! ეს რა მწერლის საბუთია, თუ ლილახანა არ წახდენია? რომელი ჯაგლაგი მწერალი იქნება იმისთანა, რომ მინამ ამისთანას იტყოდეს, ათჯერ არ წამოწითლდეს. ბევრნი ვართო!.. თუნდ მართლა ქვიშაზე უმრავლესნი იყვნენ. ამით მითამ რაო? კალია კი არ არის ხოლმე ბევრი და რა კარგია? ერთი მარცვალი ხორბალი არა სჯობია მთელს ხვავს კალიასა! ბევრნი ვართო! ჭკუისა და გონების საქმეში, როგორც მწერლობაა, საცა მძლეველი მართალია და ძლეული მტყუანი და საცა ამისათვის მარტო საბუთი საბუთს უნდა პირში წაუდგეს, ბევრი რაა, ცოტა რაა? დარვინი ერთია და „ლალისთანა“ მწერალი ათასი და ამით მითამ რაო?

\* იხილეთ „კვალი“ №33, გვერდი 932.

მითამ ათასი „ლალი“ სჯობია ერთს დარვინს? საცა საქმე მუშტით მორევნაზეა, იქ, იქნება ამისთანა ქადილი ანგარიშში მისაღები იყოს, მწერლობაში მაგისთანა რამ რა მოსატანია? როგორ გგონია, განა ერთი ჭკუა ათასს უჭკუობას არა სჯობია?

– უნდა სჯობდეს, თუ რუსთაველს დაუუჯერეთ, აი რუსთაველი რას ამბობს:

ასი ათასსა აჯობებს,  
 თუ გამორჩევით მქნელია.

– მაშ რის მაქნისია ქადილი „ლალისა?“ რა მუქარაა „თქვენდა საუბედუროდო?“ მითამ მოგესევით და წაგიღებთო?

– ეჰ, შენც რას გადაეკიდე? ბაშური ფახიფუხია. არ იცი, ბაშვი რომ ჯონს გადააჯდება, თავი მხედარი ჰკონია.


– არა, ძმაო და მეგობარო, ეს ჯონსცხენობა არ არის, ეს დროთა ნიშანია. ბევრნი ვართ, თქვენდა საუბედუროდო! ეს იცი, რა მაღალზნეობური ქადილია! ბევრთანა ცოტამ „სუო“, ძლიერთან უძლეურო „ნუო“, მოდი და ნუ იტყვი:

შაბაშ სიტყვა, შაბაშ კაცი,  
 შაბაშ საქმე მისგან ქმნილო!..

თუნდ ეგეც არ იყოს, დიდი სახელოვანებაა განა, რომ ბევრნი არიან და სხვის საუბედუროდ არიან! დიდი სირცხვილი იქმნებოდა განა, რომ სხვის საბედნიეროდ ყოფილიყვნენ. აი გიდი, ჩვენო მწერლობავ, აქამდისაც მიხვედი... რას იზამ?

კარგი რამ გვჭირდეს, გვიკვირდეს,  
 ავი რა საკვირველია.

[1897 წ. 27 დეკემბრამდე]



## რა გითხრათ? რით გაგახაროთ?

ტფილისი, 31 დეკემბერი

აჰა, ერთი კიდევ ახალი წელიწადი!.. რა მოულოცოთ ჩვენს თავს, ქართველნი? რა გვაქვს დღეს სასურველი, რომ დავიკვებოთ და შევირჩინოთ, რა გვაქვს ხვალ სანატრელი, რომ ვინატროთ და მოვილოდინოთ? უკან მივიხედავთ ამ ახლო ხანებში და ისეთი არა გვრჩება რა, რომ თავი მოვიწონოთ, ან ნანვითა ვთქვათ: „ჰოი, წამოვ სინარულისავე, ესე სწრაფად სად წახვედი!“ წინ ვიყურებით და ხვალინდელის ნისლში იმისთანა არა მოსჩანს რა, რომ გული გულის ადგილასვე დაგვრჩეს, ან ნატვრით ვთქვათ: “მოვედინ, დღეო სინარულისაო!..“ რა გითხრათ? რით გაგახაროთ?

ნუთუ ისევ ძველებურადვე თავი უნდა დაგიკრათ და მოგახსენოთ: „შემოვდგი ფეხი, გწყალობდეთ ღმერთი...“ სულ წყალობა ღვთისა და წყალობა ღვთისა, ერთხელ ჩვენ თვითონაც თითი გავძრათ, ერთხელ ჩვენ თვითონაც მივდგეთ-მოვდგეთ. წყალობა ღვთისა კარგია, მაგრამ რა ქმნას მარტო წყალობამ, თუ ღვთის მიერ ნაწყალობებს თვითონ ადამიანი არა ჰრწყავს, არა სხლავს, არა ჰფურჩქნის, არ უვლის, არა ჰპატრონობს. ღმერთმა რაც წყალობა იყო, უკვე მოიღო ჩვენზე, დანარჩენი თქვენ იცით და თქვენმა კაცობამაო. რა კაცობა გამოვიჩინეთ?.. რა გითხრათ? რით გაგახაროთ?

ჩვენთვის ღმერთს არა დაუშავებია რა, არა დაუზოგვია რა, არა დაუკლია რა; თუ ქვეყანაზე ერთი-ორი კუთხეა იმისთანა, რომ კაცს ეთქმოდეს, – ქრისტე-ღმერთმა თავისი კალთა უხვებისა აქ დაიბღერტაო,

იმათში უკანასკნელი საქართველო არ არის. რაც ღვთის შემძლებელობით არის და არა კაცისათი, ის ყველაფერი უკვე მოგვმადლა ღმერთმა. ხელთ გვიჭირავს ეს მშვენიერი ქვეყანა, რომლის მნახავთ შეუძლიანთ სამართლიანად სთქვან: „სხვა საქართველო სად არის, რომელი კუთხე ქვეყნისა“. ამ სამოთხე ქვეყანაში მარტო ქართველს უგუბდება სული, გული ელევა, ხორცი ადნება... რა გითხრათ? რით გაგახაროთ?

ტყე-მინდორი, მთა-ბარი, მიწა-წყალი, ჰავა-ჰაერი იმისთანა გვაქვს, რომ რა გინდა სულო და გულო, არ მოიხვეჭო, არ იშოვო, არ გამოიყენო. აქ, ჩიტის რძეს რომ იტყვიან, ისიც იშოვება, ოღონდ ხელი გასძარ, გაისარჯე, იმხნევე, მუცელსა და გულთათქმას ბატონად ნუ გაიხდი. იცოდე, დღეს მძლეოთა მძლეა გარჯა, შრომა და ნაშრომის გაფრთხილება, შენახვა, პატრონობა, გამოზოგვა საჭიროებისამებრ და არა გაუმაძღარ სურვილისამებრ. ვართ კი ასეთნი?... რა გითხრათ? რით გაგახაროთ?

რა არ გადაგვხდენია თავს, რა მტრები არ მოგვსევინან, რა ვაი-ვაგლახნი, რა სისხლის ღვრა, რა ღრჭენა კბილთა არ გამოგვივლია, რა წისქვილის ქვა არ დატრიალებულა ჩვენს თავზედ და ყველას გაგუძეულით, ყველას გაგუმაგრდით, შევიანხეთ ჩვენი თავი, შევირჩინეთ ჩვენი ქვეყანა, ჩვენი მიწა-წყალი, ლანგთე-მურებმა ჩვენს საკუთარს სისხლში გვაბანეს და მაინც დავრჩით და გამოვცოცხლდით. შაჰ-აბაზებმა ჩვენის კბილით გვაგლეჯინეს ჩვენი წვრილშვილი და მაინც გამოვბრუნდით, მოვსულიერდით. ალა-მაჰმად-ხანებმა პირქვე დაგვაძხეს, ქვა-ქვაზედ არ დაგვიყენეს, მოგვსრნეს, მოგვჟლიტეს და მაინც ფეხზედ წამოვდგეთ, მოვშენდით, წელში გავსწორდით. გაგუძეულით საბერძნეთს, რომსა, მონღოლებს, არაბებს, ოსმალ-თურქებს, სპარსელებს, რჯულიანს და ურჯულოს და დრომა ქართველობისა, შუბის წვერით, ისრით და ტყვიით დაფლეთილი, ჩვენს სისხლში ამოვლებული, ხელში შევირჩინეთ, არავის წავადებინეთ, არავის დავანებეთ, არავის შევაგინებინეთ. ცოდვა არ არის, ეს დრომა ეხლა ჩრჩილმა შესჭამოს, თავგმს დაგვიჭრას!..



დრო-ჟამი ამას გვიქადის... რა გითხრათ? რით გაგახაროთ?

ქრისტე-ღმერთი ჯვარს ეცვა ქვეყნისათვის ჩვენც ჯვარს ვეცვით ქრისტესათვის. ამ პატარა საქართველოს გადავუღელეთ მკერდი და ამ მკერდზედ, როგორც კლდეზედ, დავუდგით ქრისტიანობას საყდარი, ქვად ჩვენი ძვლები ვინმარეთ და კირად ჩვენი სისხლი, და ბჭეთა ჯოჯოხეთისათა ვერ შემუსრეს იგი. გავწყდით, გავიჟლიტენით, თავი გავიწირეთ, ცოლ-შვილი გავწირეთ, უსწორო ომები ვასწორეთ, ხორცი მივეცით სულისთვის და ერთმა მუჭა ერმა ქრისტიანობა შევინახეთ, არ გავაქრეთ ამ პატარა ქვეყანაში, რომელსაც ჩვენს სამშობლოს, ჩვენს მამულს – სამართლიანის თავმოწონებით ვეძახით. ცოდვა არ არის, ეს ერი მოსწყდეს! ცოდვა არ არის, ეს ლომი კოლომ საბუღარად გაიხადოს! ცოდვა არ არის, მელა-ტურამ გამოღრღნას როგორც მძოვარი, როგორც ლემი! რათ? რისთვის? ვის რა ვირი მოვპარეთ?... რა გითხრათ? რით გაგახაროთ?

ყველა ეს შევძელით და საკითხავად საჭიროა, – რამ შეგვაძლებინა? რამ გვიხსნა? ჯვარცმულნი ქრისტესთვის როგორ გადავრჩით? წამებულნი და სისხლმთხვეველნი მამულისათვის რამლა გვაცოცხლა, რამ გვასულიერა? მან, რომ ვიცოდით – იმ დროს რა უნდოდა, რა იყო მისი ციხე-სიმაგრე, მისი ფარ-ხმალი. ვაჟკაცობა უნდოდა, ვაჟკაცი ვიყავით. ხმალი უნდოდა, ხმლის ჭედვა ვიცოდით. ომის საქმეთა ცოდნა უნდოდა, ომის საქმენი ვიცოდით. აი რამ შეგვაძლებინა, რამ გვიხსნა, რამ შეგვინახა!.. იმ დროთა ჩარხზე გამოჩინდნენ ვიყავით, იმ დროთა ქარცეცხლში გამოფოლადებულნი, იმ დროთა სამჭედურში ნაჭედნი. „სიღბო გვქონდა ნაქსოვისა“ – ვით ქრისტიანებს და „სიმტკიცე ნაჭედისა“ – ვით მეომრებსა და მამულიშვილებს. ამით გავიტანეთ თავი, დროთა შესაფერი ღონე ვიცოდით, დროთა შესაფერი ხერხი, დროთა შესაფერი ცოდნა გვქონდა, დროთა შესაფერი მხნეობა და გამრჯელობა. წავიდა ის დრო: დაჩლუნგდა ხმალი, გაუქმდა ვაჟკაცობა. ეხლა ხმალი თაროზე უნდა შევდვათ, აღარაფრის მაქნისია; ეხლა ან ადლი უნდა გვე-

ჭიროს ხელში, ან გუთანი, ან ჩარხი ქარხანისა, ან მართულები მანქანისა. ეხლა ვაჟკაცობა ომისა კი არ უნდა, რომ სისხლსა ჰღვრიდეს, ვაჟკაცობა უნდა შრომისა, რომ ოფლი ჰღვაროს. კიდევ ვიტყვი, ქვეყანა ეხლა იმისია, ვინც ირჯება და ვინც იცის წესი და ხერხი გარჯისა, ვინც უფრო უფროთხილდება ნაშრომს, ვინც იზოგავს ნაღვაწს. დღეს მძლეუთა-მძლეუ მარტო ის, ვინც მცველია და ბეჯითი სულითა და ხორცითა, ცოდნითა და მარჯვენითა. გვჭირს კი დღეს რომელიმე ეს დროთა შესაფერი სიკეთე?... რა გითხრათ? რით გაგახაროთ?

ხმლიანმა მტერმა ვერ დაგვათმობინა, ვერ წავართვა ჩვენი მიწა-წყალი, ჩვენი ქვეყანა. ხმლიანს მტერს გავუძელით, გადავრჩით. ქვეყანა და სახელი შევინახეთ, სახსენებელი არ ამოვიკვეთეთ, შევირჩინეთ, საქოლავი არავის ავაგდებინეთ. ხმლით მოსეულმა ვერა დაგვაკლო რა, – შრომით და გარჯით, ცოდნით და ხერხით მოსეული კი თან გაგვიტანს, ფეხქვეშიდამ მიწას გამოგვაცლის, სახელს გაგვიქრობს, გაგვიწყვეტს, სახსენებელი ქართველისა ამოიკვეთება, და ჩვენს მშვენიერს ქვეყანას, როგორც უპატრონო საყდარს, სხვანი დაეპატრონებიან. შრომასა და გარჯას, ცოდნასა და ხერხს ვერავინლა გაუძლებს, თუ შრომა და გარჯა, ცოდნა და ხერხი წინ არ მივაგებეთ, წინ არ დავახვედრეთ, წინ არ დავუყენეთ. ვართ კი ყოველ ამისათვის მზად? ან გვეტყობა რაშიმე, რომ ყოველივე ეს ვიცით და ვემზადებით?... რა გითხრათ? რით გაგახაროთ?


ეხლაც ომია, ხოლო სისხლის ღვრისა კი არა, ოფლის ღვრისა, ომი უსისხლოა, მშვიდობიანი, წყნარი. ამ ომმა არც ბუკი იცის, არც ნაღარა. უბუკნაღაროდ სთესავს, უბუკნაღაროდ მკის. კოკისებურ, შხაპუნა ნიაღვარს კი არა ჰგავს, რომ მთა და ბარი თან წაილოს, მოარღვიოს, მოღაროს და მოგრაგნოს, „მღუმარე წვიმისაებრ ნაყოფის გამომცემელია“. არც რბევა იცის, არც ძარცვა. ეს მის ბუნებაში არა სწერია, თუ თითონ ადამიანმა გესლი უღმობელის სიხარბისა შიგ არ ჩააწვეთა, ბუნება არ მოუწამლა, არ მოუშხამა. ეს ომი შრომისაა, და ვითარცა შრომა – პატიოსანია, ნამუსიანია, და ისეთივე თავმოსაწონებელი, თავგამო-

საჩენი, როგორც უწინ თოფისა და ხმლის ომი იყო. ვაჟკაცობა ამისთანა ომში ბევრით წინ არის სისხლით ომის ვაჟკაცობაზე. ვაჟკაც გულადზე მშრომელი სამის გაფრენით მეტიაო, – იტყოდა გლეხკაცი თავისებურად და ზედგამოჭრით, თუ მართალს ათქმევინებთ. რა გლეხკაცი! თითონ დღევანდელი დღე ამას გვეუბნება, ამას ჰლაღადებს და ჩვენ გვესმის კი ეს ლაღადი? ვაი რომ არა!.. მაშ რა გითხრათ? რით გაგახაროთ?

არ ვიცით – რანი ვყოფილვართ, არ ვხედავთ – რანი ვართ, ვერ გამოგვისახია – რანი ვიქნებით! ყურებში ბამბა გვაქვს დაცული და თვალებზე ხელი აგვიფარებია. არც არაფერს ვხედავთ, არც არაფერი გვესმის. უზარმაზარი თხრილია ჩვენ, ქართველების, წინ და აინუნშიაც არ მოგვდის. ამ თხრილის პირას ვდგევართ და საკმაოა ხელი გვკრან – და შიგ გადავიჩეხებით დედაბუდიანად. ორბი, არწივიც კი ველარ გვიპოვის, ველარ დასწვდება ჩვენს ძვლებს, რომ გამოხრან, გამოსწიწკნონ, ისეთი ღრმაა ეს თხრილი, ისეთი უძირო. ვდგევართ და უღონოთა ვბზუით “მე ვარ და ჩემი ნაბადიო” და ამ ბზუილიდამ არა გამოდის რა. იქნება იმიტომ, რომ ყველა ბუზი კი ბზუის, ფუტკართან კი ყველა ტყუის. ახალო წელიწადო, თუ რამ შეგიძლიან, თვალი აგვიხილე, ყურებიდან ბამბა გამოგვაცალე, ფუტკრისაგან გვასწავლე დროთა შესაფერი სამამაცონი ზნენია, რომ ჩვენმა შემდეგმა მაინც აღარა სთქვას: რა გითხრათ? რით გაგახაროთ?

[1897 წ. 31 დეკემბერი]

## შენიშვნები და კომენტარები



### ტიქსტიკისათვის

ილია ჭავჭავაძის თხზულებათა სრული აკადემიური გამოცემის XIII ტომი მოიცავს 1894-1897 წლებში დაწერილსა და თავის დროზე გაზ. „ივერიის“ ფურცლებზე გამოქვეყნებულ პუბლიცისტურ წერილებს, კორესპონდენციებს, ფელეტონებს, პამფლეტებს.

აქ წარმოდგენილი 78 თხზულებიდან აღრინდელ გამოცემებში არ დაბეჭდილა 57 წერილი. ამათგან ერთი გამოქვეყნდა გაზეთ „ლიტერატურა და ხელოვნებაში“ (1952 წ. № 44), ხოლო სამი დაისტამბა კრებ. „საისტორიო მოამბეში“ (1971 წ. ტ. 25-26). 53 თხზულება კი გაზ. „ივერიის“ შემდეგ პირველად ამ გამოცემაშია წარმოდგენილი. ისინი დასათაურებულია ჩვენ მიერ.

აქვე უნდა აღვნიშნოთ ისიც, რომ რომ 78 დასახელებაში შევიდა 105-ზე მეტი წერილი, რომელთაგან ზოგიერთი საკითხისა და თემატიკის მიხედვით გაერთიანდა ერთი საერთო სათაურით.

ტომში მოთავსებული თხზულებები თავმოყრილია ყველა არსებულ ბიბლიოგრაფიაზე დაყრდნობით.

მკვლევარმა ლევან ჭრელაშვილმა ახალი საარქივო მასალების გამოვლენითა და შესწავლით, ასევე აკად. კორნელი კეკელიძის სახელობის ხელნაწერთა ინსტიტუტში ილია ჭავჭავაძის არქივში დაცული ხელნაწერი კრებულებისა და ავტორის სიცოცხლისდროინდელი გამოცემების სკრუპულოზური ანალიზით ახლებურად გააშუქა გაზ. „ივერიისა“ და გაზ. „დროებაში“ ილია ჭავჭავაძის მიერ ხელმოწერილად დაბეჭდილი წერილების ატრიბუციის საკითხი, რითაც მწერლის პუბლიცისტური წერილების რაოდენობა რამდენიმე ტომით გაიზარდა. საარქივო მასალების ძირფესვიანად შესწავლისა და ანალიზის შედეგად დადგინდა, რომ ილია ჭავჭავაძე მონაწილეობდა და თვალყურს ადევნებდა თავისი ნაწერების ჟურნალ-გაზეთებიდან გადმოწერის საქმეს. გაირკვა იმ

პირთა ვინაობაც, რომლებმაც გადმოწერეს ზემოხსენებული წერილები და დადგინდა ისიც, რომ სათანადო ხელშეკრულებით ხელნაწერები მწერალმა თვითონ გადასცა „ქართველთა შორის წერა-კითხვის გამავრცელებელ საზოგადოებას“. ამ ხელნაწერ კრებულებს გადამწვევტი მნიშვნელობა აქვს ილია ჭავჭავაძის პუბლიცისტური წერილების ატრიბუციის საკითხის გასარკვევად.

ასევე მნიშვნელოვანია თედო სახოკიას მიერ შედგენილი და აკად. კორნელი კეკელიძის სახელობის ხელნაწერთა ინსტიტუტში დაცული „ილია ჭავჭავაძის ნაწერთა ბიბლიოგრაფიის“ მოკლევა-გამომზერება ლევან ჭრელაშვილის მიერ და მისი მეცნიერული ანალიზი.<sup>1/</sup>

აღნიშნული ნაშრომიდან ირკვევა, რომ თ. სახოკიას „ილია ჭავჭავაძის ნაწერთა ბიბლიოგრაფია“ დიდი და ხანგრძლივი შრომის შედეგია. სრულიად ბუნებრივია ვიფიქროთ, რომ იგი „ივერიის“ ანალიტიკურ ბიბლიოგრაფიაზე უფრო ადრე შეიქმნა, მაგრამ შემდგენელს ხსენებული ბიბლიოგრაფია თავის ბიცოცხლეში არ გამოუქვეყნებია და სხვა უამრავ მასალასთან ერთად თავის პირად არქივში შეუნახავს.

საფიქრებელია ისიც, რომ „ივერიის“ ანალიტიკური ბიბლიოგრაფიის შემდგენელს მისი გამოქვეყნება არ შეეძლო.

ჩვენს ხელთ იყო ილია ჭავჭავაძის ნაწერთა ბიბლიოგრაფიის ორი წყარო: თ. სახოკიას „ილია ჭავჭავაძის ნაწერთა ბიბლიოგრაფია“ და თამარ მაჭავარიანის, პლატონ კეშელავასა და სხვათა მიერ შედგენილი „ივერიის“ ანალიტიკური ბიბლიოგრაფია, რომელთა ავტორები ერთმანეთისაგან დამოუკიდებლად „ივერიაში“ დაბეჭდილ ხელმოწერილ წერილებს ვარაუდით ილია ჭავჭავაძის ნაღვაწად თვლიდნენ. „ივერიის“ ანალიტიკური ბიბლიოგრაფიის შემდგენლებმა თემატიკაზე, შინაარსზე, ენაზე, ქართველ მოღვაწეთა მიერ მოწოდებულ ცნობებზე დაყრდნობით „ივერიის“ ხელმოწერილი მეთაური წერილები ილია ჭავჭავაძის სახელს დაუკავშირეს.

ლევან ჭრელაშვილმა ყველა წყაროს შეჯერებითა და საარქივო ცნობების მოშველიებით დაადგინა, რომ „ივერიის“ ეს ხელმოწერილი წერილები ილიას კალამს ეკუთვნის; ამან საფუძველი შეუქმნა როგორც ილიას ხელნაწერი კრებულების ავთენტიკურობას, ისე ბიბლიოგრაფიების

<sup>1/</sup> ლ. ჭრელაშვილი, ილია ჭავჭავაძის თხზულებათა ატრიბუციისა და გამოცემის საკითხები: ყ. „მაცნე“, ენისა და ლიტერატურის სერია, 1981, № 2, 3.

გარეშე დარჩენილი წერილების ილიასადმი მიკუთვნებას, რამაც გამოიწვია, როგორც ზემოთ აღვნიშნეთ, მწერლის მემკვიდრეობის რამდენიმე ტომით გაზრდა.

ეფიქრობთ, მეტად საუზლისხმოა იონა მეუნარგიას და არტემ ახნაზაროვის ცნობა, რომ „ივერიის“ გაზეთად გადაკეთების პირველ ორ-სამ წელიწადს ილია თითქმის ყოველდღე მეთაურ წერილებს წერდა გაზეთისათვის და ეს წერილები ხელმოწერადა იბეჭდებოდა. თუ ვინმე დაწერდა მეთაურს, მხოლოდ მაშინ აღინიშნებოდა წერილის ბოლოში დამწერის ვინაობა, ფსევდონიმი ან სახელისა და გვარის ინიციალები...<sup>1</sup> როგორც ჩანს, ილია და გაზეთი „ივერია“ შემდეგ წლებშიც აგრძელებდნენ ამ ტრადიციას. ამის შესახებ მიუთითებენ ილია ჭავჭავაძის პუბლიცისტური წერილების ტომების შემდგენლებიც (იხ. ტ. VIII, ტ. IX, ტ. X, ტ. XI).

ჩვენ საგანგებოდ შევისწავლეთ გაზ. „ივერიის“ 1894-1897 წლებში დაბეჭდილი მეთაური წერილები. კვლევისას დადგინდა: „ივერიაში“ იბეჭდებოდა მეთაურები **ხელმოწერებით: კიტა, ფარნაოზი, ალ. ფრონელი. შირად ქვეყნდებოდა მეთაურები ხელმოწერადა. ასევე ხელმოწერადა** დაიბეჭდა რამდენიმე პატარა საუბარი, ფელეტონი და ნარკვევი (ჟურნალ-გაზეთებიდან).

ამ ხელმოწერილ წერილებს სხვებისაგან აშკარად გამოარჩევს რამდენიმე ნიშანი. ესენია: **შინაარსობრივ-სტრუქტურული** – ილიას ინტერესთა სპექტრი ძალიან ფართოა, მისი წერილები ეხება პოლიტიკას, ეკონომიკას, სოფლის მეურნეობას, განათლებას, საზოგადოების სხვადასხვა ფენის ყოფას, მეზობელ ერებთან ურთიერთობას, თბილისის კომუნალურსა და ფინანსურ საკითხებს და მრავალ სხვას.

ყველა ეს წერილი დაწერილია ამგვარი თანმიმდევრობით: საკითხის ზოგადი მიმოხილვა, არსებული ვითარების ანალიზი, პრობლემის დასმა და გამოსავლის ძიება. ილიას პუბლიცისტისათვის ნიშანდობლივია აგრეთვე ზოგადის მიმართება კონკრეტულისაკენ.

**ტიქსტოლოგიური** კვლევა ცხადყოფს, რომ ტომში წარმოდგენილი მეთაურების მთელი ციკლი ეძღვნება იმ დროისათვის აქტუალურ რამდენიმე პრობლემურ საკითხს; მაგ: წერილების სერია „ ბ-ნ შაუმოვის „სელდებისა“ და ბ-ნ

<sup>1</sup> ლ. ჭრელაშვილი, ილია ჭავჭავაძის თხზულებათა ატრიბუციისა და გამოცემის საკითხები: ყ. „მაცნე“, ენისა და ლიტერატურის სერია, 1981, №2,3.

არუთინოვის „ტრიხინიანი“ ღორებისა და ღორების საკითხი“ (იხ. გვ.357-409). გარდა იმისა, რომ თ. სახოკიას მოგონებით დგინდება ამ წერილთა ილიასეულობა, ყოველი წერილის დასაწყისში ავტორი უთითებს (იხ. გვ. 373) წინა წერილის შესახებ.

წერილების სერია თბილისელ სომეხთა შესახებ, ასევე უდავოდ ილიას კალამს ეკუთვნის.

ხშირად წერილის ატრიბუციისათვის უტყუარი წყაროა ოპონენტის წერილის მინაარსი. ამ შემთხვევაში ჟ. „კვალში“ დაბეჭდილი გ. წერეთლის წერილით ირკვევა, რომ სომეხთა საკითხის შესახებ დაწერილი ყველა ხელმოუწერელი მოწინავე ილიასია.

არის საკითხები, რომლებსაც ილია სხვადასხვა დროს რამდენჯერმე უბრუნდება. მაგ. ინგლისის მინისტრებს (სალუსბერი და როზბერი) ახსენებს VII, VIII, IX ტომებში დაბეჭდილ პუბლიცისტურ წერილებშიც და წინამდებარე ტომში წარმოდგენილ მეთაურშიც: „ინგლისმა პირი იბრუნა რუსეთისაკენ“ (გვ.58). რამდენიმე ნომრის შემდეგ დაბეჭდილ მეთაურში „ინგლისის პოლიტიკის ახალი მიმართულება“ (გვ.65). ილია აგრძელებს იმავე თემაზე მსჯელობას: „ჩვენ ამას წინათ დავიწყეთ საუბარი იმაზე, რომ ინგლისი დღეს საჭიროდ ჰხედავს რუსეთს დაუკავშირდეს.“ მამასადაბე, ეს არგუმენტიც იმ აზრს ამყარებს. რომ გაზ. „ივერიის“ ხელმოუწერელი მეთაურები ილიას კალამს ეკუთვნის.

**ენობრივ-სტილისტური ფორმები** არის ერთ-ერთი ყველაზე სარწმუნო არგუმენტი ატრიბუციის საკითხის დადგენისათვის. ილიას ენა ძალიან მდიდარია, მისი ნაწერები გაჯერებულია ხალხური გამონათქვამებითა და ფრაზეოლოგიზმებით. მაგ: „ოზმა-ოზმად უწყვიათ“, „ზაპლა წაილო“, „აბრუნდის ემახიანო“, „მტრედული უგუნებობა“, „დაფოლება“, „თაბაუთი“, ბაშვი, „სამეურნოე“, „ერთბამად“, „უფროს-ერთი“, „კაზუისტობა“, „ორჭობად ლაპარაკი“, „დალაბრებული ბეჯითობა“, „სართადაუდებლად“, „ფენმოკლე ოსტატობა“, „ურგენიათ“, „აბერჩხარდება ვენახი“, „ნაპოლიონი“, და მრავალი სხვა. ვფიქრობთ, ილიას პუბლიცისტური ნაწერები შესანიშნავი წყარო იქნება მისი ენის შემდგომი კვლევისათვის.

<sup>1</sup> ჯ. გაბოძე „ილიას უცნობი წერილები თბილისელ სომეხთა შესახებ“. საერთაშორისო კონფერენცია. „ილია ჭავჭავაძე და მისი ეპოქა“, თბ. 2007 წელი.

ჩვენ მიერ გამოსაცემად მომზადებულ ტომში მასალა დავალაგეთ ქრონოლოგიურად, წერილები შევუდარეთ ავტორისდროინდელ ყველა ხელნაწერ და ნაბეჭდ წყაროს, დავადგინეთ ტექსტი, გავითვალისწინეთ ავტორის ბოლო ნება – ხელუხლებლად დავტოვეთ ავტორისეული პარალელური ფორმები, გავასწორეთ მხოლოდ აშკარა კორექტურული შეცდომები, ხელნაწერის კალამლაფსუსი, კომპოზიტივის მართლწერა და პუნქტუაცია.

გაზ. „ივერიაში“ დაბეჭდილი ხელმოუწერელი მოწინავე წერილების უმრავლესობა უსათაუროა, ახლავს მხოლოდ ასეთი მინაწერი: ტფილისი, 3 იანვარი; ტფილისი, 12 თებერვალი; ტფილისი, 15 აპრილი და ა. შ., რაც ვერ გამოხატავს წერილის თემატიკასა და შინაარსს. ამიტომ ილია ჭავჭავაძის თხზულებათა კრებულების გამოცემის დროს მკვლევარ პავლე ინგოროყვას მიზანშეწონილად ჩაუთვლია მათი დასათაურება წერილში განხილული საკითხების მიხედვით, ან თვით წერილის ტექსტიდან ამოღებული ფრაზით. ამ სათაურებს მკითხველი ათეული წლების მანძილზე ილიასეულად აღიქვამდა და ჩვენც ისინი უცვლელად დავტოვეთ, შენიშვნებში კი მივუთითეთ, რომ სათაური პ. ინგოროყვასია და არა ავტორის. უსათაურო წერილების დიდი ნაწილი ჩვენ დავასათაურეთ შინაარსის მიხედვით.

სათაურები, რომლებიც ილიასეული არ არის, ჩავსვით კუთხოვან ფრჩხილებში ამგვარად: < — >

გაზ. „ივერიის“ შემდეგ პირველად ჩვენს გამოცემაში დაბეჭდილი წერილის მისანიშნებლად ამ ინფორმაციის გამეორება ყოველი ასეთი წერილის ბოლოს მკითხველისათვის საჭიროდ მივიჩინეთ. შენიშვნებშივე მივუთითეთ ცნობა, რომ ხსენებული წერილები ჩვენ დავასათაურეთ.

როგორც ცნობილია, პავლე ინგოროყვას გამოცემებში მასალა თემატური პრინციპით არის დალაგებული და ერთ საკითხზე სხვადასხვა დროს დაწერილი წერილები ერთი სათაურის ქვეშ არის გაერთიანებული.

ჩვენს გამოცემაში დავიცავით რა ქრონოლოგიური პრინციპი, ერთგვარად დავარღვიეთ წინა გამოცემების თემატური ქარგა, თუმცა ერთ საკითხთან დაკავშირებით გაზ. „ივერიის“ უახლოეს ნომრებში დაბეჭდილი მეთაური წერილები ჩვენც გავაერთინეთ ერთი სათაურის ქვეშ ქრონოლოგიის მცირე დარღვევით..

ტექსტის დაწერის თარიღად დავტოვეთ გაზ. „ივერიისეული“ თარიღები: – ტფილისი, 16 იანვარი; ტფილისი, 28 იანვარი, ტფილისი, 5 თებერვალი და ა. შ. რაც, ვფიქრობთ, უფრო ახლოსაა ზუსტ თარიღთან. როგორც ჩანს, ეს მოწინავეები იწერებოდა გამოქვეყნებამდე ერთი დღით ადრე. უთარილო წერილების ტექსტის ბოლოს ოთხკუთხა ფრჩხილებში ჩავსვით პირველი პუბლიკაციის თარიღი, ან ჩვენ მიერ დადგენილი თარიღი და შენიშვნებში ავხსენით, თუ რის მიხედვით დავათარიღეთ ისინი.

პირველი პუბლიკაციის მიხედვით წერილის დათარიღებისას ანგარიში გაეწია ცენზურის ნებართვის თარიღს. (ასე, მაგალითად: თუ ცენზურამ გაზეთს 20 თებერვალს დართო დაბეჭდვის ნება, რაღა თქმა უნდა, მასში დაბეჭდილი წერილი 20 თებერვლამდეა შექმნილი და თარიღის დაზუსტების მიზნით ტექსტის ბოლოს მივანიშნეთ – ამა და ამ წლის 20 თებერვლამდე).

შენიშვნებისა და კომენტარების განყოფილებაში ცალკეული თხზულების ე. წ. პასპორტში მივუთითეთ ავტორისდროინდელი ყველა ნაბეჭდი თუ ხელნაწერი წყარო. პასპორტშივე მივანიშნეთ ძირითადი ტექსტისაგან განსხვავებული რომელიმე წყაროს სათაური, თარიღი და ხელმოწერა.

უთარილო და ხელმოწერილი წერილებისაგან განსხვავებით ტექსტიდან პასპორტში ვადმოვიტანეთ ყოველგვარი ხელმოწერა, ფსევდონიმი ან კრიპტონიმი.

შენიშვნებში, თუ ამას მოითხოვდა ტექსტი, განვიხილეთ დათარიღების თუ ატრიბუციის საკითხი, მივანიშნეთ, ესა თუ ის ხელმოწერილი წერილი პირველად ვინ მიაკუთვნა ილია ჭავჭავაძეს და „ივერიის“ შემდეგ პირველად სად დაიბეჭდა იგი, დაუერთეთ ისტორიულ-ლიტერატურული კომენტარი.

ტომს დასასრულს დაუერთეთ ანოტირებული საძიებლები: პირთა საძიებელი, გეოგრაფიულ სახელთა საძიებელი, წიგნთა და პერიოდულ გამოცემათა საძიებელი და თემატური საძიებელი. ეს უკანასკნელი, გარდა იმისა, რომ მიგვანიშნებს მრავალფეროვან თემატიკაზე, რაც ილიას ინტერესთა სფეროში იყო მოქცეული, დაეხმარება მკითხველს მისთვის საინტერესო წერილის მოძებნაში.

ჯულიეტა გაბობე, ეთერ შარაშენიძე

### <ქუთაისის ბანკის შესახებ> (გვ. 11)

ნ ა ბ ე ჯ დ ი: გაზ. „ივერია“, 1894, № 11, 16 იანვარი, გვ.1-2.

თ ა რ ი ლ ი: ტფილისი, 16 იანვარს.

ეს ხელმოწერილი მეთაური წერილი „ივერიის“ შემდეგ პირველად დაბეჭდა მკვლევარმა პავლე ინგოროყვამ ილია ჭავჭავაძის თხზულებათა VII ტომში 1956 წელს სათაურით „ისევ ქუთაისის ბანკის შესახებ“.

ამ წერილის ილიასეულობას ადასტურებს ლ. ჭრელაშვილის კვლევა-ძიების შედეგად და თ. სახოკიას „ილია ჭავჭავაძის ნაწერთა ბიბლიოგრაფიაც“.

### <„კახეთის მემანახეთა საზოგადოების“ დაარსება> (გვ. 16)

ნ ა ბ ე ჯ დ ი: გაზ. „ივერია“, 1894, № 21, 28 იანვარი, გვ.1-2; № 22, 29 იანვარი, გვ. 1-2; № 23, 30 იანვარი, გვ.1-2.

თ ა რ ი ლ ი: ტფილისი, 28 იანვარს; ტფილისი, 29 იანვარს; ტფილისი, 30 იანვარს.

ეს ხელმოწერილი მეთაური წერილები საგაზეთო პუბლიკაციის შემდეგ ჩვენს გამოცემაში იბეჭდება პირველად.

ბიბლიოგრაფ პლატონ კეშელავას ცნობით, ეს წერილები, 1894 წ. გაზ. „ივერიის“ სამ ნომერში (№№ 21, 22, 23) დაბეჭდილი ხელმოწერილი მეთაური წერილი, რომელიც „კახეთის ვენახის პატრონთა საზოგადოების“ დაარსებას, კახური ღვინის დამზადებას, გასაღებას და ღვინის ნარჩენი მასალის გამოყენებას შეეხება, ილია ჭავჭავაძეს ეკუთვნის. „ივერიის“ ანალიტიკურ ბიბლიოგრაფიაშიც ის სავარაუდოდ ი. ჭავჭავაძის სახელთან არის დაკავშირებული, ამ წერილების ილიასეულობას ადასტურებს ლ. ჭრელაშვილის კვლევა-ძიების შედეგებიც. სამ ნომერში დაბეჭდილი ზემოხსენებული წერილი ერთმანეთის გაგრძელებად უნდა ჩაითვალოს. მიუხედავად იმისა, რომ ისინი ცალ-ცალკე მოწინავე წერილებად არის

დაბეჭდილი გაზ. „ივერიაში“ და „ივერიის“ ანალიტიკურ ბიბლიოგრაფიაშიც ასევე ცალ-ცალკეა შეტანილი, ჩვენ შესაძლებლად მივიჩნით ამ წერილების გაერთიანება ერთი სათაურის ქვეშ.

**<„სამთა კავშირი“> (გვ. 25)**

ნ ა ბ ე ჯ დ ი: გაზ. „ივერია“, 1894, № 182, 25 აგვისტო გვ. 1-2.

თ ა რ ი ღ ი: ტფილისი, 24 აგვისტო.

ეს ხელმოუწერელი მეთაური წერილი „ივერიის“ პუბლიკაციის შემდეგ იბეჭდება პირველად.

„სამთა კავშირი“, გერმანიის, ავსტრია-უნგრეთისა და იტალიის სამხედრო-პოლიტიკური ბლოკი, უმთავრესად რუსეთისა და საფრანგეთის წინააღმდეგ მიმართული, შეიქმნა 1882 წელს, სამოკავშირო ხელშეკრულება დაიდო 1882 წლის 20 მაისს ვენაში, იარსება 1915 წლამდე.

**<საზრანგეთსა და გერმანიას შორის  
მშვიდობიანი ურთიერთობის დასაწყისი>  
(გვ. 29)**

ნ ა ბ ე ჯ დ ი: გაზ. „ივერია“, 1894, № 183, 27 აგვისტო, გვ. 1-2.

თ ა რ ი ღ ი: ტფილისი, 26 აგვისტო.

ეს ხელმოუწერელი მეთაური წერილი იბეჭდება პირველად „ივერიის“ შემდეგ.

**<სოფლის მეურნეობა რუსეთში> (გვ. 32)**

ნ ა ბ ე ჯ დ ი: გაზ. „ივერია“, 1894, № 184, 28 აგვისტო, გვ. 1-2.

თ ა რ ი ღ ი: ტფილისი, 28 აგვისტო.

ეს ხელმოუწერელი მეთაური წერილი „ივერიის“ პუბლიკაციის შემდეგ იბეჭდება პირველად.

ამ ხელმოუწერელი მეთაური წერილის ილიასეულობას ადასტურებს „ივერიის“ ანალიტიკური ბიბლიოგრაფიაც, თედო სახოკიას „ილია ჭავჭავაძის ნაწერთა ბიბლიოგრაფიაც“, აგრეთვე ლევან ჭრელაშვილის კვლევა-ძიების შედეგები.

**<მაგულუბის გამიჯვნის თაობაზე> (გვ. 35)**

ნ ა ბ ე ჯ დ ი: გაზ. „ივერია“, 1894, № 186, 2 სექტემბერი, გვ. 1-2.

თ ა რ ი ღ ი: ტფილისი, 2 სექტემბერი.

ეს ხელმოუწერელი მეთაური წერილი გაზ. „ივერიის“ შემდეგ გამოქვეყნდა კრებულში „საისტორიო მოამბე“, 1971 წ., ტ. 25-26.

ამ წერილის ილიასეულობას ადასტურებს „ივერიის“ ანალიტიკური ბიბლიოგრაფიაც, თედო სახოკიას „ილია ჭავჭავაძის ნაწერთა ბიბლიოგრაფიაც“ და ლევან ჭრელაშვილის კვლევა-ძიების შედეგებიც.

**<მინისტრის მოლოდინში> (გვ. 39)**

ხ ე ლ ნ ა წ ე რ ი: ავტოგრაფი, დაცულია გიორგი ლეონიძის სახელობის ლიტერატურის სახელმწიფო მუზეუმში № 2943.

ნ ა ბ ე ჯ დ ი: გაზ. „ივერია“, 1894, № 188, 4 სექტემბერი გვ. 1.

თ ა რ ი ღ ი: ტფილისი, 3 სექტემბერი.

ეს ხელმოუწერელი მეთაური წერილი „ივერიის“ პუბლიკაციის შემდეგ იბეჭდება პირველად.

ამ წერილის ავტოგრაფს გ. ლეონიძის სახელობის ლიტერატურის მუზეუმში მიაკვლია ამ მუზეუმის მეცნიერ

თანამშრომელმა ნუნუ ზომერიკმა (იხ. მისი წერილი 1952 წ. გაზეთ „ლიტერატურა და ხელოვნებაში“, № 44, სათაურით – „ილია ჭავჭავაძის ერთი უცნობი ავტოგრაფი“).

ეს ხელმოწერილი ავტოგრაფი ნაწერია სამი სხვადასხვა ზომის ფურცელზე შავი მელნით, აქა-იქ ნასწორებია. პირველი და მეორე ფურცლის თავკიდურზე ილიას ხელით მიწერილი აქვს „მეთაური“. მესამე ფურცლის თავკიდური მოხეულია.

გაზ. „ივერიაში“ დაბეჭდილი ტექსტი ხელნაწერს აბსოლუტურად ემთხვევა.

ავტოგრაფის მიკვლევა დაადასტურა ბიბლიოგრაფ პლ. კეშელავას ვარაუდი, რომ გაზ. „ივერის“ №188-ში დაბეჭდილი ხელმოწერილი მეთაური წერილის ავტორი ილია ჭავჭავაძეა.

**<ჩვენნი სარჩიელი სოფლის მშენებლის  
ძვირფას ღარგებზე> (გვ. 42)**

ნ ა ბ ე ჯ დ ი: გაზ. „ივერია“, 1894, № 198, 18 სექტემბერი, გვ. 1-2; № 200, 21 სექტემბერი, გვ. 1.

თ ა რ ი ღ ი: ტფილისი, 18 სექტემბერი; ტფილისი, 21 სექტემბერი.

„ივერიაში“ დაბეჭდილი ეს ორი ხელმოწერილი მეთაური წერილი პირველად პ. ინგოროყვამ გააერთიანა და დაბეჭდა ი. ჭავჭავაძის თხზულებათა სრული კრებულის VII ტომში 1956 წ. სათაურით: „ჩვენი სარჩიელი სოფლის მშენებლის ძვირფას ღარგებზე“. ამ წერილების ილიასეულობას ადასტურებს „ივერის“ ანალიტიკური ბიბლიოგრაფიაც, თ. სახოკიას „ილია ჭავჭავაძის ნაწერთა ბიბლიოგრაფიაც“, აგრეთვე ლ. ჭრელაშვილის კვლევა-ძიების შედეგები.

**<მიწათმოქმედების სწორად  
წარმართვისათვის> (გვ. 48)**

ნ ა ბ ე ჯ დ ი: გაზ. „ივერია“, 1894, № 204, 25 სექტემბერი, გვ. 1-2.

თ ა რ ი ღ ი: ტფილისი, 25 სექტემბერი.

ეს ხელმოწერილი მეთაური წერილი „ივერის“ პუბლიკაციის შემდეგ იბეჭდება პირველად ჩვენს გამოცემაში.

ბიბლიოგრაფი თ. მაჭავარიანი „ივერის“ ანალიტიკურ ბიბლიოგრაფიაში აღნიშნავს, რომ ეს ხელმოწერილი წერილი წინა მეთაურების მსგავსად ი. ჭავჭავაძის კალამს ეკუთვნის.

ამ წერილის ილიასეულობას ადასტურებს თ. სახოკიას „ილია ჭავჭავაძის ნაწერთა ბიბლიოგრაფიაც“, აგრეთვე ლ. ჭრელაშვილის კვლევა-ძიების შედეგები.

**<იმპერატორ ალექსანდრე III-ის  
გარდაცვალების გამო> (გვ. 52)**

ნ ა ბ ე ჯ დ ი: გაზ. „ივერია“, 1894, № 224, 22 ოქტომბერი, გვ. 1.

თ ა რ ი ღ ი: ტფილისი, 22 ოქტომბერი.

ეს ხელმოწერილი მეთაური წერილი „ივერის“ პუბლიკაციის შემდეგ იბეჭდება პირველად.

ამ წერილის ილიასეულობას „ივერის“ ანალიტიკური ბიბლიოგრაფიის გარდა, ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“, აგრეთვე ლ. ჭრელაშვილის კვლევა-ძიების შედეგები.

„...ნაშთი რუსეთ-ოსმალის ომებისა“ – იგულისხმება 1877-1878 წლების რუსეთ-ოსმალეთის ომი.

„...ომი საფრანგეთსა და გერმანიას შორის“ – იგულისხმება საფრანგეთ-პრუსიის ომი 1870-1871 წლებში.

„...კრონშტადტისა და ტულონის სადღესასწაულო ამბებმა „სამთა კავშირს“ თვალი აუხილა და ქარქაშიდან ამოღებული ხმლები უკანვე ჩააგებინა“ – იგულისხმება 1891-1893 წლებში რუსეთ-საფრანგეთის კავშირის შექმნის შედეგად ამ ორ სახელმწიფოს შორის დამყარებული სრული თანხმობა, რომელიც სადღესასწაულოდ აღინიშნა რუსეთის იმპერატორის საფრანგეთში სტუმრობის დროს ქ. ტულონში და საფრანგეთის პრეზიდენტის რუსეთში სტუმრობის დროს ქ. კრონშტადტში.



**„აღმოსავლეთის საქმე“** – იგულისხმება ისტორიულ ლიტერატურაში პირობითად მიღებული ტერმინი „აღმოსავლეთის საკითხი“, რომელიც აღნიშნავს XIX-ს-დან XX ს. დასაწყისში საერთაშორისო წინააღმდეგობებს, დაკავშირებულს ოსმალთა იმპერიის მოახლოებულ დაშლასთან და ევროპის დიდი სახელმწიფოების (ავსტრია-უნგრეთის, დიდი ბრიტანეთის, პრუსიის (გერმანიის), რუსეთის, საფრანგეთის, იტალიის, მოგვიანებით აშშ-ის) ბრძოლასთან ოსმალეთის სამფლობელოების (უპირატესად ევროპაში) დასანაწილებლად.

ტერმინი „აღმოსავლეთის საკითხი“ დიპლომატიებმა პირველად იხმარეს ოსმალთა წინააღმდეგ ბერძენთა ეროვნულ-განმათავისუფლებელი აჯანყების გამო (1821-1829 წ.წ.)

**„ბოლგარეთის ამბები რომ გავიხსენოთ“** – იგულისხმება XIX ს. 80-იან წლებში ბულგარეთის მთავრის ალექსანდრე ბატენბერგის (1857-1893) რეაქციული პოლიტიკა და ცდა, ბულგარეთი ექცია ავსტრია-გერმანიის დასაყრდენად ბალკანეთში, რამაც რუსეთის მთავრობის უკმაყოფილება გამოიწვია.

**„მიზეზიანი ამბავი მოხდა 1885 წელს კუშკაზე ავღანელებთან“** – იგულისხმება ავღანეთსა და რუსეთს შორის საზღვრის დადგენისას წარმოქმნილი კონფლიქტის გამო 1885 წ. რუსეთისა და ავღანელების ჯარების შეჯახება დღევანდელი თურქმენეთის რესპუბლიკის სამხრეთ საზღვარზე მდებარე ქალაქ კუშკასთან.

**<ინგლისმა პირი იბრუნა რუსეთისაკენ სამპობროლ> (გვ. 58)**

ნ ა ბ ე ჯ დ ი: გაზ. „ივერია“, 1894, № 250, 25 ნოემბერი, გვ. 1-2.

თ ა რ ი ღ ი: ტფილისი, 25 ნოემბერი.

ეს ხელმოუწერელი მეთაური წერილი „ივერიის“ პუბლიკაციის შემდეგ იბეჭდება პირველად.

ამ წერილის ილიასეულობას „ივერიის“ ანალიტიკური ბიბლიოგრაფიის გარდა, ადასტურებს თ. სახოკიას „ილია ჭავჭავაძის ნაწერთა ბიბლიოგრაფიაც“, აგრეთვე ლევან ჭრელაშვილის კვლევა-ძიების შედეგები.

**„ნაპალეონის დამარცხების შემდეგ“** – იგულისხმება საფრანგეთის იმპერატორის ნაპოლეონ ბონაპარტის (1769-1821) დამარცხება რუსეთში 1812 წელს, სადაც საფრანგეთის დიდი არმია მთლიანად განადგურდა.

**„...უიმედო ავადმყოფობა განსვენებულის იმპერატორისა და მისი უდროოდ გარდაცვალება“** – იგულისხმება რუსეთის იმპერატორის ალექსანდრე III-ის (1845-1894) ავადმყოფობა და გარდაცვალება გატჩინის სასახლეში.

**<მართლმსაჯულება ძვენიანსა და მრის სამსახურში> (გვ. 62)**

ნ ა ბ ე ჯ დ ი: გაზ. „ივერია“, 1894, № 251, 26 ნოემბერი, გვ. 1-2.

თ ა რ ი ღ ი: ტფილისი, 26 ნოემბერი.

გაზ. „ივერიის“ ეს ხელმოუწერელი მეთაური წერილი დაიბეჭდა კრებულში „საისტორიო მოამბე“, 1971 წ. ტ. 25-26.

**<ინგლისის კოლიტიკის ახალი მიმართულება> (გვ. 65)**

ნ ა ბ ე ჯ დ ი: გაზ. „ივერია“, 1894, № 255, 2 დეკემბერი, გვ. 1-2.

თ ა რ ი ღ ი: ტფილისი, 2 დეკემბერი.

ეს ხელმოუწერელი მეთაური წერილი „ივერიის“ პუბლიკაციის შემდეგ იბეჭდება პირველად.

წერილის ილიასეულობას ადასტურებს ლ. ჭრელაშვილის კვლევა-ძიების შედეგები.

**„აღმოსავლეთის საქმე“**, იხ. შენიშვნების გვ. 510.  
**„პარიჟის ხელშეკრულება“**, – იგულისხმება პარიზის 1856 წლის საზავო ხელშეკრულება, რომლითაც დასრულდა ყირიმის ომი (1853-1856). ხელშეკრულებას ხელი მოაწერეს 18 (30) მარტს პარიზში სახელმწიფოთა კონგრესის დასკვნით სხდომაზე რუსეთის, საფრანგეთის,

დიდი ბრიტანეთის, ოსმალეთის, ავსტრიის, პრუსიის და სარდინიის წარმომადგენლებმა.

„სამთა კავშირი“, იხ. შენიშვნების გვ. 506

„ვის არ ახსოვს კუშკაში მომხდარი ამბები“ იხ. შენიშვნების გვ. 510

„Все мое, - сказал Булат“, ციტატა ა. ს. პუშკინის ლექსიდან „Золото и Булат“.

**<ინგლისის ფლოტის ბატონობა საზღვაო-სავაჭრო საქმიანობაში> (გვ. 70)**

ნ ა ბ ე ჯ დ ი: გაზ. „ივერია“, 1894, № 257, 4 დეკემბერი, გვ. 1-2.

თ ა რ ი ლ ი: ტფილისი, 4 დეკემბერი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

ბიბლიოგრაფ პლ. კეშელავას ვარაუდით, ეს წერილი ილიას კალამს უნდა ეკუთვნოდეს. „ივერიის“ ბიბლიოგრაფიაშიც იგი სავარაუდოდ ილიას სახელთან არის დაკავშირებული. წერილის ილიასეულობას ადასტურებს ლ. ჭრელაშვილის კვლევა-ძიების შედეგები.

„ჩინეთ-იაპონიის ომი“, – იგულისხმება 1894 წ. დაწყებული ომი ჩინეთსა და იაპონიას შორის (გაგრძელდა 1895 წ. 27 აპრილამდე), რომლის საბაბი გახდა კორეასთან დაკავშირებული კონფლიქტი.

„...წარვიდნენ დრონი ინგლისისათვის ნაგებნი მტკბარად“ – იგულისხმება ინგლისის მოცილე ევროპული ქვეყნების კოლონიზატორული მოქმედება აფრიკაში, რაც ინგლისს უქმნიდა კოლონიების დაკარგვის საშიშროებას.

„...პამირის საქმის მშვილობიანად გათავება“ – იგულისხმება 1878-1880 წლებში ინგლისის მიერ წარმოებული ომი ავღანეთთან, რომლის მიზანი იყო შუა აზიაში რუსეთის გავლენის შესუსტება. თავგამოდებულმა ავღანელებმა ინგლისს ომზე ხელი ააღებინეს და თვითონ გადავიდნენ შეტევაზე, დაიკავეს ტერიტორიის ერთი ნაწილი, მთლიანად მის დაპყრობაში კი რუსეთმა შეუშალა ხელი. 1885 წ. ინგლის-რუსეთის შეთანხმებით საბოლოოდ დადგინდა ავღანეთ-რუსეთის ჩრდილო საზღვარი. 90-იან

წლებში კი კომპრომისული შეთანხმებით დადგინდა სახელმწიფო საზღვარი პამირის ზონაში.

„...ხელმოწიფე-იმპერატორი დაუმოყვრდა ინგლისის სამეფო გვარეულობას“ – იგულისხმება 1894 წ. რუსეთის უკანასკნელი იმპერატორის – ნიკოლოზ II-ის (1868-1918) დაქორწინება ჰესენ-დარმშტადტის ჰერცოგის ქალიშვილზე ალისა (ალექსანდრა) თედორეს ასულზე.

**<პრედიტი საქართველოს მიმართეთათვის> (გვ. 77)**

ნ ა ბ ე ჯ დ ი: გაზ. „ივერია“, 1894, № 265, 15 დეკემბერი, გვ. 1-2.

თ ა რ ი ლ ი: ტფილისი, 15 დეკემბერი.

ეს ხელმოწერილი მეთაური წერილი პ. ინგოროვამ შეიტანა ი. ჭავჭავაძის თხზულებათა სრული კრებულის VII ტომში 1956 წელს.

ამ წერილის ილიასეულობას ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“, აგრეთვე ლ. ჭრელაშვილის კვლევა-ძიების შედეგები.

**<პრეზიდენტისა და მთავრობის უმცვლა საზრანგეთში და მისი საზოგადოებრივი მიზანუბნი> (გვ. 82)**

ნ ა ბ ე ჯ დ ი: გაზ. „ივერია“. 1895, № 9, 13 იანვარი, გვ. 1-2; № 11, 17 იანვარი, გვ. 1-2.

თ ა რ ი ლ ი: ტფილისი, 13 იანვარი; ტფილისი, 17 იანვარი.

„ივერიის“ ეს ხელმოწერილი მეთაური წერილი პირველად პ. ინგოროვამ და ალ. აბაშელმა შეიტანეს ი. ჭავჭავაძის თხზულებათა X ტომში 1929 წელს. წერილის ილიასეულობას ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“, „ივერიის“ ანალიტიკური ბიბლიოგრაფია, აგრეთვე ლევან ჭრელაშვილის კვლევა-ძიების შედეგები.

**<სიტყვა ქართული საადგილმამულო ბანკის  
წლიურ კრებაზე> (გვ. 90)**

ნ ა ბ ე ჯ დ ი: გაზ. „ივერია“, 1895, № 106, 20  
მაისი, გვ. 3-4.

თ ა რ ი ღ ი: ტფილისი, 20 მაისს 1895 წელს.

სათაური: სიტყვა თავ. ილია ჭავჭავაძისა.

ეს წერილი პ. ინგოროყვას ი. ჭავჭავაძის თხოვნებითა  
სრული კრების IX ტომში 1957 წელს დაბეჭდილი აქვს  
სათაურით: „სიტყვა ილია ჭავჭავაძისა ქართული  
საადგილმამულო ბანკის წლიურ კრებაზე 20 მაისს, 1895  
წელს“. ჩვენ საჭიროდ დავინახეთ ამოგველო ამ სათაურიდან  
ორატორის სახელი და გვარი, ვინაიდან ისედაც გასაგებია,  
რომ ჩვენს ტომში მხოლოდ ილია ჭავჭავაძის წერილები და  
სიტყვებია დაბეჭდილი და სათაურში მისი მინიშნება  
ზედმეტად ჩავთვალეთ.

**„...ჩემი ქება-დიდება მოვისმენიათ ერთის ორატორისაგან“**

– იგულისხმება ტფილისის თავად-აზნაურთა  
საადგილმამულო ბანკის წევრთა კრებაზე 1895 წლის 18  
მაისს თავ. ნიკოლოზ ვახტანგის ძე ორბელიანისაგან ილია  
ჭავჭავაძის ლანძღვა.

**„...აქ ერთს ორატორს მეორეზედ უთქვამს: ეგ მოსული  
არისო და ჩვენთან არავითარი საქმე არა აქვსო“** –  
იგულისხმება იმავე კრებაზე თავ. ნიკოლოზ ვახტანგის ძე  
ორბელიანის მწვავედ ნათქვამი სიტყვა, თავ. ვლადიმერ  
მიქელაძე უცხოა მოსული, ჩვენს თავადაზნაურობასთან  
არავითარი საერთო არა აქვს და არც უფლება აქვს ჩვენ  
დაგვარიგოსო.

**ნარკვევი (ჟურნალ-გაზეთებიდან) (გვ. 92)**  
(სახალხო სკოლების უფლებათა შესახებ)

ნ ა ბ ე ჯ დ ი: გაზ. „ივერია“, 1895, № 167, 6  
აგვისტო, გვ. 3.

ს ა თ ა უ რ ი: ნარკვევი (ჟურნალ-გაზეთებიდან)

ეს ხელმოწერილი მეთაური წერილი „ივერიის“  
პუბლიკაციის შემდეგ იბეჭდება პირველად ჩვენს გამოცემაში.

ბიბლიოგრაფიულ თამარ მაჭავარიანის მტკიცებით, გაზ.  
„ივერიის“ 1895 წ. № 167-ში და № 181-ში დაბეჭდილი  
ხელმოწერილი ნარკვევები ილია ჭავჭავაძის კალამს  
ეკუთვნის. „ივერიის“ ანალიტიკურ ბიბლიოგრაფიაშიც ისინი  
ვარაუდით ილიას სახელთან არის დაკავშირებული.  
ნარკვევების ილიასეულობას ადასტურებს ლევან  
ჭრელიაშვილის კვლევა-ძიების შედეგებიც.

**„კატკოვის თავყანისმცემელი“** – ამ ირონიულ  
გამონათქვამში იგულისხმება რუსი რეაქციონერი  
პუბლიცისტი მის. კატკოვი, რომელმაც გამოილაშქრა  
ქართული ეროვნული კულტურისა და საერთოდ ქართველი  
ერის წინააღმდეგ. (იხ. სახელთა საძიებელში).

**„ორივე საქართველო“** – იგულისხმება საქრისტიანო  
საქართველო და სამაჰმადიანო ანუ „ოსმალის  
საქართველო“.

**ნარკვევი (ჟურნალ-გაზეთებიდან) (გვ. 96)**  
(„ნოვოე ვრემიას“ კორესპონდენტი ცილს სწამებს  
ქართველობას)

ნ ა ბ ე ჯ დ ი: გაზ. „ივერია“, 1895, № 181, 24  
აგვისტო, გვ. 3-4.

ს ა თ ა უ რ ი: ნარკვევი (ჟურნალ-გაზეთებიდან)

ეს ხელმოწერილი მეთაური წერილი „ივერიის“  
პუბლიკაციის შემდეგ იბეჭდება პირველად.

ამ ნარკვევის ატრიბუციის შესახებ იხ. აქვე, წინა  
ნარკვევის შენიშვნები.

**<პრწანისის გმირთა მოსახსენებლად>**  
(გვ. 99)

ნ ა ბ ე ჯ დ ი: გაზ. „ივერია“, 1895, № 194, 10  
სექტემბერი, გვ. 1-2.

თ ა რ ი ლ ი: ტფილისი, 11 სექტემბერი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

მკვლევარისა და ბიბლიოგრაფის პლატონ კეშელავას მტკიცებით ეს ხელმოწერილი მეთაური წერილი ილიას კალამს ეკუთვნის. „ივერიის“ ანალიტიკურ ბიბლიოგრაფიაშიც იგი სავარაუდოდ ილიას სახელთან არის დაკავშირებული.

„...კრწანისის გმირთა მოსახსენებელ წერილში“ დამოწმებულია ციტატები ვრ. ორბელიანის პოემიდან „სადღერძელო“ (1827-1870 წწ.), ნ. ბარათაშვილის პოემიდან „ბედი ქართლისა“ (1839 წ.) და ვაჟა-ფშაველას პოემიდან „მოხუცის ნათქვამი“ (1883 წ.).

„...კრწანისის მინდორზე პანაშვიდია დანიშნული...“ – იგულისხმება 1795 წ. 11 სექტემბერს თბილისის მახლობლად კრწანისის ველზე ქართლ-კახეთისა და სპარსეთის ლაშქარს შორის სამკვიდრო-სასიცოცხლო ბრძოლაში დაღუპულ ქართველთა ხსოვნის აღსანიშნავი პანაშვიდი.

**<კახეთის სოფლის მშურნეთა კავშირი>**  
(გვ. 105)

ნ ა ბ ე ჯ დ ი: ვაზ. „ივერია“, 1895, № 240, 5 ნომბერი, გვ 1; № 243, 9 ნომბერი, გვ. 1-2; № 248, 16 ნომბერი, გვ. 1-2; № 249, 17 ნომბერი, გვ. 1-2; №256, 26 ნომბერი, გვ. 1-2; № 258, 29 ნომბერი, გვ. 1-2; № 262, 3 დეკემბერი, გვ. 1-2.

თ ა რ ი ლ ი: ტფილისი, 4 ნომბერი; ტფილისი, 9 ნომბერი; ტფილისი, 16 ნომბერი; ტფილისი, 17 ნომბერი; ტფილისი, 26 ნომბერი; ტფილისი, 29 ნომბერი; ტფილისი, 3 დეკემბერი.

1895 წელს „ივერიის“ ექვს ნომერში დაბეჭდილი ხელმოწერილი მეთაური წერილები – ტფილისი, 4 ნომბერი (№240); ტფილისი, 7 ნომბერი (№243); ტფილისი, 16 ნომბერი (№248); ტფილისი, 17 ნომბერი (№249); ტფილისი, 26 ნომბერი (№256); ტფილისი, 29 ნომბერი (№258); ტფილისი, 3 დეკემბერი (№262)

მკვლევარმა პ. ინგოროყვამ გააერთიანა და დაბეჭდა ი. ჭავჭავაძის თხზულებათა ხუთტომეულის IV ტომში (1955 წ) სათაურით: „კახეთის სოფლის მეურნეთა კავშირი“.

ვაზ. „ივერიაში“ №240-ში და №243-ში დაბეჭდილ მეთაურ წერილებს სათაურად აქვს „ტფილისი, 4 ნომბერი“ (ასევე აქვს დაბეჭდილი პ. ინგოროყვასაც). ჩვენი აზრით №243-ში დაბეჭდილი წერილის სათაურში ციფრი 4 კორექტურული შეცდომაა, ვინაიდან წერილი იწყება სიტყვებით: „ჩვენს მეთაურში ამ რამდენისამე დღის წინაა...“ თუ წინა წერილი 4 ნომბრით თარიღდება, რამდენიმე დღის შემდეგ დაწერილ წერილში ციფრი 4 ალბათ კორექტურული შეცდომაა.

ზემოჩამოთვლილი წერილების ილიასეულობას ადასტურებს თ. სახოკიას მიერ შედგენილი „ილია ჭავჭავაძის ნაწერთა ბიბლიოგრაფია“, აგრეთვე ლევან ჭრელაშვილის კვლევა-ძიების შედეგები.

**<ახლო აღმოსავლეთი და ინგლისის დღევანდელი პოლიტიკა>** (გვ. 124)

ნ ა ბ ე ჯ დ ი: ვაზ. „ივერია“, 1895, № 247, 14 ნომბერი, გვ. 1-2.

თ ა რ ი ლ ი: ტფილისი, 14 ნომბერი.

ეს ხელმოწერილი მეთაური წერილი პირველი პუბლიკაციის შემდეგ დაბეჭდა პ. ინგოროყვასა და ალ აბაშელის რედაქციით გამოცემულ ი. ჭავჭავაძის თხზულებათა X ტომში 1929 წელს, სათაურით: „ახლო აღმოსავლეთი და ინგლისის დღევანდელი პოლიტიკა“.

წერილის ილიასეულობას ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“, აგრეთვე ლ. ჭრელაშვილის კვლევა-ძიების შედეგები.

„აღმოსავლეთის საქმე“, იხ. შენიშვნების გვ. 510 „სამთა კავშირი“, იხ. შენიშვნების გვ. 506

**<ოსკალეთის არაპრობა და ეპრობა> (გვ. 128)**

ნ ა ბ ე ჯ დ ი: გაზ. „ივერია“, 1895, № 251, 19 ნომბერი, გვ. 1-2.

თ ა რ ი ლ ი: ტფილისი, 19 ნომბერი.

ეს ხელმოუწერელი მეთაური წერილი პირველი პუბლიკაციის შემდეგ დაიბეჭდა პ. ინგოროყვასა და ალ აბაშელის რედაქციით გამოცემულ ი. ჭავჭავაძის თხზულებათა X ტომში 1929 წელს.

**<იქნება ომი თუ არა?> (გვ. 131)**

ნ ა ბ ე ჯ დ ი: გაზ. „ივერია“, 1895, № 253, 23 ნომბერი, გვ. 1.

თ ა რ ი ლ ი: ტფილისი, 23 ნომბერი.

ეს და მომდევნო ხელმოუწერელი წერილი პირველი პუბლიკაციის შემდეგ ჩვენს გამოცემაში იბეჭდება პირველად.

ამ და მომდევნო ხელმოუწერელი მეთაური წერილების ილიასეულობას, „ივერიის“ ანალიტიკური ბიბლიოგრაფიის გარდა, ადასტურებს თედო სახოკიას „ილია ჭავჭავაძის ნაწერთა ბიბლიოგრაფიაც“, აგრეთვე ლ. ჭრელაშვილის კვლევა-ძიების შედეგები. (ამ შენიშვნას ქვემოთ აღარ გავიმეორებთ).

„აღმოსავლეთის საქმე“ იხ. შენიშვნების გვ. 510

„სამთა კავშირი“ იხ. შენიშვნების გვ. 506

„ორთა კავშირი“ იგულისხმება რუსეთ-საფრანგეთის კავშირი, რომელსაც საფუძველი ჩაეყარა რუსეთის იმპერატორის ალექსანდრე III-ის დროს 1891-1893 წლებში.

„ახალგაზრდა იმპერატორი გერმანიის“ – იგულისხმება ვილჰელმ II (1859-1941), გერმანიის იმპერატორი და პრუსიის მეფე 1888-1918 წლებში.

**<ცისქვი ჯლომა უფრო ახშობს ზნეობას, ვიდრე აფხიზლმბს> (გვ. 135)**

ნ ა ბ ე ჯ დ ი: გაზ. „ივერია“, 1895, № 254, 24 ნომბერი, გვ. 1.

თ ა რ ი ლ ი: ტფილისი, 24 ნომბერი.

ეს ხელმოუწერელი მეთაური წერილი „ივერიის“ პუბლიკაციის შემდეგ ჩვენს გამოცემაში იბეჭდება პირველად.

**<ელექტრონით განათება ტფილისისა> (გვ. 138)**

ნ ა ბ ე ჯ დ ი: გაზ. „ივერია“, 1895, № 256, 26 ნომბერი, გვ. 1-2.

თ ა რ ი ლ ი: ტფილისი, 26 ნომბერი.

ეს ხელმოუწერელი მეთაური წერილი „ივერიის“ პუბლიკაციის შემდეგ ჩვენს გამოცემაში იბეჭდება პირველად.

**<წყალდიდობა საქართველოში> (გვ. 141)**

ნ ა ბ ე ჯ დ ი: გაზ. „ივერია“, 1895, № 263, 5 დეკემბერი, გვ. 1-2.

თ ა რ ი ლ ი: ტფილისი, 5 დეკემბერი.

ეს ხელმოუწერელი მეთაური წერილი „ივერიის“ პუბლიკაციის შემდეგ ჩვენს გამოცემაში იბეჭდება პირველად.

**<ოსკალეთის სომხთა განწირვა> (გვ. 145)**

ნ ა ბ ე ჯ დ ი: გაზ. „ივერია“, 1895, № 274, 19 დეკემბერი, გვ. 1.

თ ა რ ი ლ ი: ტფილისი, 19 დეკემბერი.

ეს ხელმოწერილი მეთაური წერილი პირველი პუბლიკაციის შემდეგ დაიბეჭდა პ. ინგოროყვასა და ალ. აბაშელის რედაქციით გამოცემულ ილია ჭავჭავაძის თხზულებათა კრებულის X ტომში 1929 წელს. წერილის ილიასეულობას ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“, აგრეთვე ლ. ჭრელაშვილის კვლევა-ძიების შედეგები.

„სომეხთა საქმე“ – იგულისხმება XVI საუკ. II ნახევრიდან ოსმალეთის ბატონობის მძიმე უღელქვეს ტანჯული სომხეთის მოსახლეობის, ე.წ. ოსმალეთის სომხების დარბევა-დაწიოკება XIX საუკ. 80-90-იან წლებში. ოსმალეთის სულთანმა აბდულ-ჰამიდ II-მ (1842-1918), ქვეყანაში დაამყარა დესპოტური რეჟიმი „ზულუმი“. ამას თან მოჰყვა ეროვნული უმცირესობის – განსაკუთრებით სომხების – სისხლიანი დარბევები და პანისლამიზმის რეაქციული პოლიტიკის გატარება.

სულთანი – იგულისხმება ოსმალეთის სულთანი აბდულ-ჰამიდ II. (1842-1918), რომელიც სულთანის ტახტზე იჯდა 1876-1909 წლებში.

**<სამოქალაქო სახელმწიფო სამსახურის მოკვებულნი ფისფისობილების შეცვლის საჭიროებაზე> (გვ. 148)**

ნ ა ბ ე ჯ დ ი: გაზ. „ივერია“, 1895, № 276, 21 დეკემბერი, გვ. 1-2.

თ ა რ ი ღ ი: ტფილისი, 21 დეკემბერი.

ეს ხელმოწერილი მეთაური წერილი „ივერიის“ შემდეგ პირველად გამოქვეყნდა „საისტორიო მოამბეში“ 1971 წ. ტ. 25-26. მის ილიასეულობას „ივერიის“ ანალიტიკური ბიბლიოგრაფიის გარდა, ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“, აგრეთვე ლ. ჭრელაშვილის კვლევა-ძიების შედეგები.

**<ქართული სკოლების გიმნაზიებად გადაკეთების თაობაზე> (გვ. 153)**

ნ ა ბ ე ჯ დ ი: გაზ. „ივერია“, 1895, № 282, 30 დეკემბერი, გვ. 1-2.

თ ა რ ი ღ ი: ტფილისი, 30 დეკემბერი.

გაზ. „ივერიის“ პუბლიკაციის შემდეგ ეს ხელმოწერილი მეთაური წერილი პირველად ჩვენს გამოცემაში იბეჭდება.

პლ. კეშელავას ვარაუდით ამ ხელმოწერილი მეთაური წერილის ავტორი ილია ჭავჭავაძეა. „ივერიის“ ანალიტიკურ ბიბლიოგრაფიაშიც სავარაუდოდ იგი ილიას სახელთან არის დაკავშირებული. წერილის ილიასეულობას ადასტურებს აგრეთვე ლ. ჭრელაშვილის კვლევა-ძიების შედეგები.

„არწრუნისეული ქარვასლა“, – მდებარეობდა დღევანდელი თავისუფლების მოედანზე, იმ მიდამოებში, სადაც ამჟამად გრიბოედოვის სახელობის თეატრია. ქარვასლის მეპატრონე იყო სომეხი პუბლიცისტი და საზოგადო მოღვაწე, გაზ. „მშაკის“ რედაქტორი გრიგოლ არწრუნი.

ქართული თეატრის მესვეურთა თხოვნით გასული საუკუნის 80-იან წლებში ქარვასლის დიდი დარბაზი გადაკეთდა თეატრად, რომელიც 1880 წლის 24 სექტემბერს საზეიმოდ გაიხსნა და ეწოდა „არწრუნის თეატრი“.

**<მინაური მიმოსილვა 1895 წლისა> (გვ. 160)**

ნ ა ბ ე ჯ დ ი: გაზ. „ივერია“, 1896, № 2, 4 იანვარი, გვ. 1-2.

თ ა რ ი ღ ი: ტფილისი, 4 იანვარი.

„ივერიის“ ეს ხელმოწერილი მეთაური წერილი პირველად შეტანილ იქნა პ. ინგოროყვასა და ალ. აბაშელის რედაქციით გამოცემულ ილია ჭავჭავაძის თხზულებათა VII ტომში 1928 წელს. წერილი დასათაურებულია მათ მიერ.

ალსანიშნავია, რომ ზემოხსენებულ გამოცემაში წერილში ზოგი ადგილი გამოტოვებული იყო.

ჩვენს გამოცემაში წერილი იბეჭდება სრული სახით.

„ადამიანი არა მარტო პურითა ერთითა ცოცხალ არს“  
– ციტატა მათეს და ლუკას სახარებიდან (4.4).

„ვით მამა ზეცისა იყავნ შენც სრული“ – ციტატა მათეს სახარებიდან (5, 48).

**ნარკვევი (ჟურნალ-გაზეთებიდან) (გვ. 167)**  
(რუსეთის გავლენიანი გაზეთები ამხედრებულან ჩვენს წინააღმდეგ)

ნ ა ბ ე ჯ დ ი: გაზ. „ივერია“, 1896, № 11, 16 იანვარი, გვ. 2-3.

ს ა თ ა უ რ ი: ნარკვევი (ჟურნალ-გაზეთებიდან)

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

ბიბლიოგრაფ თამარ მაჭავარიანის მტკიცებით, ნარკვევი ილია ჭავჭავაძის კალამს ეკუთვნის. „ივერიის“ ანალიტიკურ ბიბლიოგრაფიაშიც იგი ვარაუდით ილიას სახელთან არის დაკავშირებული. წერილის ილიასეულობას ადასტურებს აგრეთვე ლ. ჭრელაშვილის კვლევა-ძიების შედეგები.

### ფელეტონი

**ჩვენი მსლანდელი სიბრძნე-სიცრუე (გვ. 171)**

ნ ა ბ ე ჯ დ ი: გაზ. „ივერია“, 1896, № 20, 26 იანვარი, გვ. 1-2; № 21, 27 იანვარი, გვ. 1-3; № 22, 28 იანვარი, გვ. 1-3.

ს ა თ ა უ რ ი: ფელეტონი.  
ჩვენი სიბრძნე-სიცრუე

ხ ე ლ მ ო წ ე რ ა: ჯიბრეილ (და არა ჯიბრაელ, როგორც პ. ინგოროყვა მიუთითებს).

პირველი პუბლიკაციის შემდეგ ეს ფელეტონები დაიბეჭდა პ. ინგოროყვასა და ალ აბაშელის რედაქციით გამოცემულ ილია ჭავჭავაძის თხზულებათა IX ტომში 1928

წელს. წერილის ილიასეულობას ადასტურებს ლ. ჭრელაშვილის კვლევა-ძიების შედეგებიც.

**მესამე დასი** – პირველი სოციალ-დემოკრატიული ჯგუფი საქართველოსა და ამიერკავკასიაში შეიქმნა 1892 წ. გაზ „კვალში“ – გ. წერეთელმა ახალ მიმართულებას უწოდა „მესამე დასი“.

„თამარაშენელი ბულანჟე“ – იგულისხმება ივანე მაჩაბელი, რომელიც თამარაშენიდან იყო. ბულანჟე იხ. სახელთა საძიებელში.

„...უშვერსიტყვაობა... ობოლ მარგალიტებსავით მოეყვანა ამას წინად „დავიწყებულ მწერალს“ „ივერიაში“ – იგულისხმება ვლადიმერ მიქელაძის წერილი სათაურით „ნაწყვეტი“, რომელიც დაიბეჭდა გაზ. „ივერიაში“ 1896 წლის №1-ში და №2-ში. წერილი ხელმოწერილია ფსევდონიმით – „დავიწყებული მწერალი“.

**<გაზეთ „მოსკოვსკიე ველომოსტის“  
მოზოღიშების თაობაზე > (გვ. 198)**

ნ ა ბ ე ჯ დ ი: გაზ. „ივერია“, 1896, № 22, 28 იანვარი, გვ. 1-2.

თ ა რ ი ლ ი: ტფილისი, 28 იანვარი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

ამ წერილის ილიასეულობას „ივერიის“ ანალიტიკურ ბიბლიოგრაფიის გარდა, ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“ და ლ. ჭრელაშვილის კვლევა-ძიების შედეგებიც.

„...ქუთაისის გუბერნიის თავად-აზნაურთა მარშლის სიტყვა“ – იგულისხმება თავად სიმონ წერეთლის, ქუთაისის გუბერნიის თავად-აზნაურთა მარშლის სიტყვა, რომელიც მან წარმოთქვა 1895 წ. 17 დეკემბერს თავად-აზნაურთა კრებაზე; გამოქვეყნდა გაზ. „ივერიაში“ № 10, 1896 წ. 14 იანვარს.

**<სამეურნეო-საკრედიტო საზოგადოების  
უსაფუძვლო კრიტიკის თაობაზე> (გვ. 201)**

ნ ა ბ ე ჯ დ ი: გაზ. „ივერია“, 1896, № 27, 6  
თებერვალი, გვ.1-2.

თ ა რ ი ლ ი: ტფილისი, 6 თებერვალი.

ეს ხელმოწერილი მეთაური წერილი „ივერიის“  
პუბლიკაციის შემდეგ იბეჭდება პირველად ჩვენს გამოცემაში.

ამ წერილის ილიასეულობას „ივერიის“ ანალიტიკური  
ბიბლიოგრაფიის გარდა, ადასტურებს თელო სახოკიას „ილია  
ჭავჭავაძის ნაწერთა ბიბლიოგრაფია“ და ლ. ჭრელაშვილის  
კვლევა-ძიების შედეგები. თბილისში გამომავალი რუსული  
გაზეთის სათაური „Кавказ“ წერილში ქართულად  
წარმოდგენილია ხან „კავკასის“, ხან „კავკასის“ ფორმით.  
ჩვენ ყველგან დავიცავით ერთი ფორმა „კავკასი“ (ეს  
შენიშვნა ვრცელდება მომდევნო წერილებზეც).

**<ქართული სამონასტრო მამულები ბერძენი  
ბერძენის სამსხურში> (გვ. 207)**

ნ ა ბ ე ჯ დ ი: გაზ. „ივერია“, 1896, № 29, 8  
თებერვალი, გვ.1.

თ ა რ ი ლ ი: ტფილისი, 8 თებერვალი.

ეს ხელმოწერილი მეთაური წერილი „ივერიის“  
პუბლიკაციის შემდეგ იბეჭდება პირველად.

ბიბლიოგრაფ პლ. კემელავას მტკიცებით ეს  
ხელმოწერილი მეთაური წერილი ილია ჭავჭავაძის კალამს  
ეკუთვნის, „ივერიის“ ანალიტიკურ ბიბლიოგრაფიაშიც იგი  
სავარაუდოდ ილიას სახელთან არის დაკავშირებული.  
წერილის ილიასეულობას ადასტურებს თ. სახოკიას „ილია  
ჭავჭავაძის ნაწერთა ბიბლიოგრაფია“, აგრეთვე ლ.  
ჭრელაშვილის კვლევა-ძიების შედეგები.

**„...მონასტერი, რომელიც ძველისძველიდანვე  
ქართველებისა იყო“** – იგულისხმება ათონის ივერთა  
მონასტერი, ძველი ქართული მწერლობისა და კულტურის

უმნიშვნელოვანესი კერა ათონის მთაზე, ქალკედონის  
ნახევარ კუნძულზე (საბერძნეთი). დაარსდა 980-983  
წლებში. მისი შექმნა დაკავშირებულია იოანე  
მთაწმინდელისა და თორნიკე ერისთავის მოღვაწეობასთან.

**<გაბრიელ ეპისკოპოსის გარდაცვალების  
ბამო > (გვ. 210)**

ნ ა ბ ე ჯ დ ი: გაზ. „ივერია“, 1896, № 32, 11  
თებერვალი, გვ 1-2.

თ ა რ ი ლ ი: ტფილისი, 11 თებერვალი.

ეს ხელმოწერილი მეთაური წერილი „ივერიის“  
პუბლიკაციის შემდეგ იბეჭდება პირველად ჩვენს გამოცემაში.

**სიტყვა თქმული გაენათის მონასტერში  
გაბრიელ ეპისკოპოსის დასაფლავების დღეს  
(გვ. 214)**

ნ ა ბ ე ჯ დ ი: გაზ. „ივერია“, 1896, № 63, 19  
მარტი, გვ. 2-3. ჟ. „მოამბე“, 1896, № 3, განყ. II, გვ.  
110-115.

ს ა თ ა უ რ ი: სიტყვა თქმული, ილია ჭავჭავაძის  
მიერ გაენათის მონასტერში გაბრიელ ეპისკოპოსის  
დასაფლავების დღეს.

**„გაბრიელ ეპისკოპოსი“** – გამოჩენილი მოაზროვნე  
პედაგოგი და ფსიქოლოგი. 1860-1896 წლებში მეთაურობდა  
იმერეთის ეპარქიას. ავტორია კაპიტალური ნაშრომისა  
„ცდისეული ფსიქოლოგიის საფუძვლები“ (რუსულ ენაზე),  
რომელიც დიდხანს იხმარებოდა ფსიქოლოგიის  
სახელმძღვანელოდ რუსეთის სემინარიაში. გაბრიელ  
ეპისკოპოსი გარდაიცვალა 1896 წლის 25 იანვარს 71  
წლის ასაკში. დაკრძალეს გელათის საკათედრო ტაძარში  
1897 წლის 10 მარტს. ილიას სიტყვა გაბრიელ  
ეპისკოპოსის დაკრძალვაზე ორატორული ხელოვნების  
ნიშნულია. ამ სიტყვასთან დაკავშირებით იხ. ექვთიმე



თაყაიშვილის მოგონება ილიაზე („დაბრუნება“ – ქართული ემიგრანტული ლიტერატურის მრავალტომეული, I, თბ., 1991, გვ. 412-418).

ილიას სიტყვა ავტორისდროინდელი ნაბეჭდის შემდეგ დაიბეჭდა პ. ინგოროყვასა და ალ აბაშელის რედაქციით გამოცემულ ი. ჭავჭავაძის თხზულებათა კრებულის VII ტომში 1928 წელს. ნაბეჭდის სათაურიდან გამომცემლებმა ამოიღეს სიტყვები: „ილია ჭავჭავაძის მიერ“.

### პოლიტიკური მიმოხილვა (გვ. 220)

ნ ა ბ ე ჯ დ ი: გაზ. „ივერია“, 1897, № 1, 17 იანვარი, გვ.1-2.

ეს ხელმოუწერელი მეთაური წერილი „ივერიის“ პუბლიკაციის შემდეგ იბეჭდება პირველად ჩვენს გამოცემაში.

ამ მეთაური წერილის ილიასეულობას, „ივერიის“ ანალიტიკური ბიბლიოგრაფიის გარდა, ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“, აგრეთვე ლ. ჭრელაშვილის კვლევა-ძიების შედეგებიც.

„სამთა კავშირი“ – იხ. შენიშვნების გვ. 506

„...ხელმწიფე იმპერატორის და ხელმწიფე იმპერატორის პარიზში მიბძანება...“ – იგულისხმება რუსეთის იმპერატორის ნიკოლოზ II-ის (1868-1918) და მისი მეუღლის ალექსანდრა (ალისა) თედორეს ასულის (1872-1918) სტუმრობა პარიზში.

„...კრონშტადტისა და ტულონის ამბების შემდეგ“ – იხ. შენიშვნების გვ. 509

„...იტალიის კოროლი“ – იგულისხმება იტალიის მეფე 1878-1900 წლებში რუმბერტ რაინერ კარლ ემანუელ მარია ფერდინანდ ევგენი (1844-1900), შვილი მეფე ვიქტორ ემანუელ II-ისა.

„...საფრანგეთი, რომელსაც დღეს აქამომდე გული გულის ადგილას არა აქვს გერმანიის მიერ დამარცხებისაგან...“ – იგულისხმება საფრანგეთ-პრუსიის ომში (1870-1871 წლებში) საფრანგეთის დამარცხება.

„ეგრედწოდებული სომეხთა საქმე...“ – იხ. შენიშვნების გვ. 519

„...ადმოსავლეთის საქმე“ – იხ. შენიშვნების გვ. 510

„ეგვიპტის საქმეში ოსმალეთმა მხარი დაიჭირა საფრანგეთისა – XIX ს-ში ეგვიპტე, რომელსაც

ფორმალურად ოსმალეთის იმპერიის ხელისუფლება განაგებდა, ინგლისისა და საფრანგეთის კოლონიზატორული მეტოქეობის ასპარეზი იყო და ამ ვითარებაში ოსმალეთი საფრანგეთს უჭერდა მხარს.

„...კრიტის კუნძულის ამბავი“ – იგულისხმება 1896 წ. კრიტის კუნძულზე ოსმალთა წინააღმდეგ მომხდარი შეტაკება.

„...ინგლისის საპოლიტიკო ცას ჯანლი გადაეფარა ვენეცუელის და ტრანსვალის საქმეთაგან“ – იგულისხმება ვენეცუელის სახელმწიფოს შიდა პარტიებს შორის ბრძოლის შედეგად შექმნილი ვითარება და სამხრეთ აფრიკის ტერიტორიის – ტრანსვალის მოსახლეობის ბრძოლები დამპყრობთა წინააღმდეგ.

„...ინგლისი მზად არის ეგვიპტეს თავი დაანებოს და ჯარები გამოიყვანოს მაშინვე, რაკი წაართმევს მადლის...“ – 1882 წლიდან ეგვიპტეში დამყარდა ინგლისის კოლონიური ბატონობა, რამაც განაპირობა ეგვიპტეში ეროვნულ-განმათავისუფლებელი მოძრაობის გაფართოება. XIX საუკ. 90-იან წლებში აქ ყალიბდება ეროვნულ-პოლიტიკური ორგანიზაციები, რომლებიც აწყობენ თავდასხმებს კოლონიზატორთა შეიარაღებულ ძალებზე. ინგლისი თანახმაა თავი დაანებოს ეგვიპტეს, თუკი ხელში ჩაიგდებს ცისფერი და თეთრი ნილოსის შესართავთან მდგარ საპორტო ქალაქს ხართუმს.

### <არწრუნისქული ქარვასლის ბედი> (გვ. 233)

ნ ა ბ ე ჯ დ ი: გაზ. „ივერია“, 1897, № 2, 18 იანვარი, გვ. 1-2.

თ ა რ ი ღ ი: ტფილისი, 17 იანვარი.

დაბეჭდილია ხელმოუწერლად და უსათაუროდ.

ეს ხელმოუწერელი მეთაური წერილი „ივერიის“ პუბლიკაციის შემდეგ იბეჭდება პირველად.

ამ და მომდევნო წერილების ილიასეულობას „ივერიის“ ანალიტიკური ბიბლიოგრაფიის გარდა, ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“, აგრეთვე ლ. ჭრელაშვილის კვლევა-ძიების შედეგებიც.

„არწრუნისეული ქარვასლა“, – იხ. შენიშვნების გვ. 521

**<სულიერი გაღატაკება და საზოგადოების  
გულგრილობა (გვ. 236)**

ნ ა ბ ე ჯ ჳ დ ი: გაზ. „ივერია“, 1897, № 3, 19  
იანვარი, გვ. 1-2.

თ ა რ ი ღ ი: ტფილისი, 18 იანვარი.

ეს ხელმოუწერელი მეთაური წერილი „ივერიის“  
პუბლიკაციის შემდეგ იბეჭდება პირველად ჩვენს გამოცემაში.

**<ოძისის სამეურნეო სკოლის საკითხზე>  
(გვ. 238)**

ნ ა ბ ე ჯ ჳ დ ი: გაზ. „ივერია“, 1897, № 4, 20  
იანვარი, გვ. 1; №5, 21 იანვარი, გვ. 1-2.

თ ა რ ი ღ ი: ტფილისი, 20 იანვარი; ტფილისი, 21  
იანვარი.

ეს ორი ხელმოუწერელი მეთაური წერილი გაზ.  
„ივერიის“ შემდეგ პირველად პ. ინგოროყვამ გააერთიანა და  
დაბეჭდა ი. ჭავჭავაძის თხზულებათა ათტომეულის IV  
ტომში (1955 წ.) სათაურით „ოძისის სამეურნეო სკოლის  
საკითხზე“. გაზ. „ივერიისეული“ სათაურები კი, როგორც  
წესი, წერილების ერთმანეთისაგან გამყოფ ქვესათაურებად  
დატოვა.

**<თავად-აზნაურთა კრებების უფლება-  
მოვალეობა> (გვ. 245)**

ნ ა ბ ე ჯ ჳ დ ი: გაზ. „ივერია“, 1897, № 15, 2  
თებერვალი, გვ. 1-2.

თ ა რ ი ღ ი: ტფილისი, 1 თებერვალი.

ეს ხელმოუწერელი მეთაური წერილი „ივერიის“  
პუბლიკაციის შემდეგ იბეჭდება პირველად.

**<სამეურნეო სასწავლებლის დაარსების  
საჭიროება> (გვ. 250)**

ნ ა ბ ე ჯ ჳ დ ი: გაზ. „ივერია“, 1897, № 21, 9  
თებერვალი, გვ. 1.

თ ა რ ი ღ ი: ტფილისი, 8 თებერვალი.

ეს ხელმოუწერელი მეთაური წერილი „ივერიის“  
პუბლიკაციის შემდეგ იბეჭდება პირველად.

ამ ხელმოუწერელი მეთაური წერილის ილიასეულობას  
„ივერიის“ ანალიტიკური ბიბლიოგრაფიის გარდა,  
ადასტურებს თ. სახოკიას „ილია ჭავჭავაძის ნაწერთა  
ბიბლიოგრაფია“, აგრეთვე ლ. ჭრელაშვილის კვლევა-ძიების  
შედეგებიც.

**<კრიტიკის ახალი აშლილობა და ოსმალების  
საკითხი> (გვ. 253)**

ნ ა ბ ე ჯ ჳ დ ი: გაზ. „ივერია“ 1897, № 22, 11  
თებერვალი, გვ. 1.

თ ა რ ი ღ ი: ტფილისი, 10 თებერვალი.

ეს ხელმოუწერელი მეთაური წერილი „ივერიის“  
პუბლიკაციის შემდეგ იბეჭდება პირველად ჩვენს გამოცემაში.

ეს წერილი გაზ. „ივერიის“ №48-ში (1897 წ.)  
დაბეჭდილ ხელმოუწერელ მეთაურ წერილთან (ტფილისი,  
13 მარტი) ერთად „ივერიის“ შემდეგ პირველად  
გაერთიანებული სახით დაიბეჭდა პ. ინგოროყვასა და ალ  
აბაშელის მიერ გამოცემულ ი. ჭავჭავაძის თხზულებათა  
კრებულის X ტომში 1929 წელს, სათაურით: „კრიტიკის  
ახალი აშლილობა და ოსმალების საკითხი“.

ჩვენ წინა გამოცემებისაგან განსხვავებით ეს ორი  
წერილი ქრონოლოგიურ ჩარჩოში მოვათავსეთ და ცალ-  
ცალკე დავბეჭდეთ ისე, როგორც ილიას ჰქონდა  
გამოქვეყნებული გაზ. „ივერიაში“. პირველ წერილს  
დაუტოვეთ რედაქტორების მიერ მიცემული სათაური.  
წერილის ილიასეულობას ადასტურებს ლ. ჭრელაშვილის  
კვლევა-ძიების შედეგები, ასევე „ივერიის“ ანალიტიკური

ბიბლიოგრაფია და თ. სახოკიას „ილია ჭავჭავაძის ნაწერთა ბიბლიოგრაფია“.

„კრიტიკის კუნძულის გამო ატენილი ალიაქოთი“ – იხ. შენიშვნების გვ. 526

**ნარკვევი (ჟურნალ-გაზეთებიდან) (გვ. 258)**  
(სამეურნეო საზოგადოების პროექტის თაობაზე)

ნ ა ბ ე ჯ დ ი: გაზ. „ივერია“, 1897, № 22, 11 თებერვალი, გვ. 2-3.

ს ა თ ა უ რ ი: ნარკვევი (ჟურნალ-გაზეთებიდან)

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

ეს ხელმოწერილი ნარკვევი ტომში შევიტანეთ „ივერიის“ ანალიტიკური ბიბლიოგრაფიის მიხედვით, რომელშიც იგი ილია ჭავჭავაძის სახელთან არის დაკავშირებული. ნარკვევის ილიასეულობას ადასტურებს ლ. ჭრელაშვილის კვლევა-ძიების შედეგებიც.

წერილი „Кавказская утопия“ დაიბეჭდა ჟურნ. „Неделя“-ში 1897 წ. – № 2.

**<ქრონის საპითსი და დეკუტატია  
საკრებულს> (გვ. 261)**

ნ ა ბ ე ჯ დ ი: გაზ. „ივერია“, 1897, № 27, 16 თებერვალი.

თ ა რ ი ლ ი: ტფილისი, 15 თებერვალი.

„ივერიის“ ეს ხელმოწერილი მეთაური წერილი შეტანილი იქნა პავლე ინგოროყვას რადაქციით გამოცემულ ილია ჭავჭავაძის თხზულებათა სრული კრებულის VII ტომში 1957 წელს. წერილის ილიასეულობას ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“, აგრეთვე ლ. ჭრელაშვილის კვლევა-ძიების შედეგები.

**<სწავლა-განათლება და საზოგადო  
მოღვაწის მოვალეობა> (გვ. 266)**

ნ ა ბ ე ჯ დ ი: გაზ. „ივერია“, 1897, № 30, 20 თებერვალი, გვ. 1-2.

თ ა რ ი ლ ი: ტფილისი, 19 თებერვალი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად ჩვენს გამოცემაში.

ამ ხელმოწერილი მეთაური წერილის ილიასეულობას, „ივერიის“ ანალიტიკური ბიბლიოგრაფიის გარდა, ადასტურებს თ. სახოკიას „ილია ჭავჭავაძის ნაწერთა ბიბლიოგრაფიაც“, აგრეთვე, ლ. ჭრელაშვილის კვლევა-ძიების შედეგები.

ეს შენიშვნა ვრცელდება მომდევნო წერილებზეც.

**<საზოგადო საქმისათვის პასუხისმგებლობის  
თაობაზე> (გვ. 270)**

ნ ა ბ ე ჯ დ ი: გაზ. „ივერია“, 1897, № 32, 23 თებერვალი, გვ. 1-2.

თ ა რ ი ლ ი: ტფილისი, 22 თებერვალი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად ჩვენს გამოცემაში.

**<შინაური საქმისათვის საქმიანობა და  
თავად-აზნაურთა უფლება-მოვალეობა>  
(გვ. 275)**

ნ ა ბ ე ჯ დ ი: გაზ. „ივერია“, 1897, № 38, 2 მარტი, გვ. 1-2.

თ ა რ ი ლ ი: ტფილისი, 1 მარტი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

„არწრუნისეული ქარვასლა“ – იხ. შენიშვნების გვ. 521

**პატარა საუბარი (გვ. 281)**

ნ ა ბ ე ჯ დ ი: გაზ. „ივერია“, 1897, № 38, 2 მარტი, გვ.1-3.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად ჩვენს გამოცემაში.

ეს და მსგავსი ფელეტონები სათაურით „პატარა საუბარი“ გაზ. „ივერიის“ სხვადასხვა ნომერში ხელმოწერლად იბეჭდებოდა. „ივერიის“ ანალიტიკურ ბიბლიოგრაფიაში ზოგიერთი მათგანი ილია ჭავჭავაძის სახელთან არის დაკავშირებული, მაგრამ ერთი-ორი გამონაკლისის გარდა, ისინი ი. ჭავჭავაძის თხზულებათა ადრინდელ გამოცემებში არ დაბეჭდილა. ჩვენს გამოცემაში შევიტანეთ „ივერიის“ ანალიტიკურსა და ლ. ჭრელაშვილის მიერ დაზუსტებულ ბიბლიოგრაფიებზე დაყრდნობით წერილის სტილიც ცხადყოფს, რომ იგი ილიას ეკუთვნის.

**თავადი ნ.ზ. ჭავჭავაძე (გვ. 290)  
ნეკროლოგი**

ნ ა ბ ე ჯ დ ი: გაზ. „ივერია“, 1897, № 45, 11 მარტი, გვ 1-2.

წერილის ილიასეულობას მიუთითებს მისი სტილისთვის ნიშანდობლივი სიტყვები, მაგ. თაბაუთი.

ეს ხელმოწერილი ნეკროლოგი გაზ. „ივერიის“ შემდეგ პირველად ჩვენს გამოცემაში იბეჭდება „ივერიის“ ანალიტიკური ბიბლიოგრაფიის მიხედვით.

აღსანიშნავია, რომ თ. სახოკიას „ილია ჭავჭავაძის ნაწერთა ბიბლიოგრაფიაში“ ეს ნეკროლოგი ჯერ შეუტანია, შემდეგ კი გადაუხაზავს.

**<კრიტიკის კუნძულის ნაპირადგზრების  
ბლოკადა> (გვ. 293)**

ნ ა ბ ე ჯ დ ი: გაზ. „ივერია“, 1897, № 48, 14 მარტი, გვ. 1.

თ ა რ ი ღ ი: ტფილისი, 13 მარტი.

ეს ხელმოწერილი წერილი გაზ. „ივერიაში“ №22 (1897 წ.) დაბეჭდილ ხელმოწერილ მეთაურ წერილთან (ტფილისი, 10 თებერვალი) ერთად პირველად პ. ინგოროყვამ და ალ. აბაშელმა შეიტანეს ილია ჭავჭავაძის თხზულებათა X ტომში 1929 წელს, გაერთიანებული სათაურით: „კრიტიკის ახალი ამლილობა და ოსმალეთის საკითხი“.

ჩვენ წინა გამომცემლებისაგან განსხვავებით, ეს ორი წერილი ცალ-ცალკე დაბეჭდეთ ისე, როგორც ილიას ჰქონდა გამოქვეყნებული და მოვათავსეთ ქრონოლოგიურ ჩარჩოში. პირველ წერილს, როგორც უკვე აღვნიშნეთ სათანადო ადგილას (გვ. 529), დაუტოვეთ პ. ინგოროყვას და ალ. აბაშელის მიერ მიცემული სათაური, მეორე კი დავასათაურეთ ტექსტიდან ამოღებული ფრაზით.

წერილის ილიასეულობას ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“, აგრეთვე ლ. ჭრელაშვილის კვლევა-ძიების შედეგები.

„აღმოსავლეთის საქმე“ – იხ. შენიშვნების გვ. 510

**<მოზრანდა ახალი მთავარმართებელი  
კავკასიისა> (გვ. 296)**

ნ ა ბ ე ჯ დ ი: გაზ. „ივერია“, 1897, № 49, 15 მარტი, გვ. 1-2.

თ ა რ ი ღ ი: ტფილისი, 14 მარტი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად ჩვენს გამოცემაში.

ამ წერილის ილიასეულობას „ივერიის“ ანალიტიკურ ბიბლიოგრაფიასთან ერთად ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“, აგრეთვე ლ.

ჭრელაშვილის კვლევა-ძიების შედეგები (შენიშვნა ეხება მომდევნო წერილებსაც).

**<ტფილისში სომხობამ ხელთ იგდო ქალაქის თვითმართვლობა> (გვ. 300)**

ნ ა ბ ე ჯ ჳ ღ ი: გაზ. „ივერია“, 1897, № 53, 20 მარტი, გვ. 1-2.

თ ა რ ი ღ ი: ტფილისი, 19 მარტი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

„სომეხთა საქმე ოსმალეთში“ – იხ. შენიშვნების გვ. 519

**<სად სომხეთი და სად ტფილისის ქალაქი?> (გვ. 309)**

ნ ა ბ ე ჯ ჳ ღ ი: გაზ. „ივერია“, 1897, № 56, 23 მარტი, გვ. 1-2.

თ ა რ ი ღ ი: ტფილისი, 22 მარტი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

„ჩვენს მეთაურში ამას წინად ვთქვით“ – იგულისხმება გაზ. „ივერიის“ №53-ში დაბეჭდილი ხელმოწერილი მეთაური წერილი. რასაც ადასტურებს გაზეთის სქოლიოს მითითება (იხ. „ივერია“ №53).

წერილების ციკლი სომეხთა შესახებ იბეჭდებოდა გაზეთ „ივერიის“ შემდეგ ნომერებშიც, რაც კიდევ ერთი არგუმენტია ამ მოწინავეების ატრიბუციის გასარკვევად.

**პატარა საუბარი (გვ. 312)**

ნ ა ბ ე ჯ ჳ ღ ი: გაზ. „ივერია“, 1897, № 59, 28 მარტი, გვ. 3.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

გაზ. „ივერიაში“ ამ ფელეტონს პირველი ნაწილის ბოლოს მინიშნებული აქვს სქოლიო: – „ეს საუბარი ჩვენგან დამოუკიდებელ მიზეზთა გამო დაგვიანდა და ეხლა იბეჭდება“.

**<მოვიდა სომეხი და მოიტანა სხვა მხნიო> (გვ. 316)**

ნ ა ბ ე ჯ ჳ ღ ი: გაზ. „ივერია“, 1897, № 61, 30 მარტი, გვ. 1-2.

თ ა რ ი ღ ი: ტფილისი, 29 მარტი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

ამ წერილის ილიასეულობას, „ივერიის“ ანალიტიკურ ბიბლიოგრაფიის გარდა, ადასტურებს თ. სახოკიას „ილია ჭავჭავაძის ნაწერთა ბიბლიოგრაფიაც“, აგრეთვე ლ. ჭრელაშვილის კვლევა-ძიების შედეგები. ამასთანავე წერილის შინაარსი აგრძელებს „ივერიის“ წინა ნომერებში დაწყებულ მწვავე კამათს ქართველ-სომეხთა შესახებ. წერილის სქოლიოში მითითებულია (იხილეთ „ივერია“ №56).

„აქაური რუსული გაზეთი სომხის რედაქტორობით“ – იგულისხმება 1884-1906 წლებში თბილისში გამოცემული რუსული გაზეთი „Новое Обозрение“, რომელსაც 1891-1906 წლებში რედაქტორობდნენ კ. და ბ. თუმანიშვილები.

**პატარა საუბარი (გვ. 321)**

(უმაღლესად დამტკიცებულია სამოსწავლო გეგმა...)

ნ ა ბ ე ჯ ჳ ღ ი: გაზ. „ივერია“, 1897, № 61, 30 მარტი, გვ. 3.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

ეს ფელეტონი ჩვენს გამოცემაში შევიტანეთ „ივერიის“ ანალიტიკურ ბიბლიოგრაფიასა და მკვლევარ ლ. ჭრელაშვილის მიერ დაზუსტებულ ბიბლიოგრაფიაზე დაყრდნობით.

**<ქართველებისა და სომხების  
ბანსხვაკვამული ხასიათი და ინტერესი>  
(გვ. 323)**

ნ ა ბ ე ჯ დ ი: გაზ. „ივერია“, 1897, № 67, 6 აპრილი, გვ. 1-3.

თ ა რ ი ღ ი: ტფილისი, 5 აპრილი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად. წერილს აქვს სქოლიო. (იხ. „ივერია“ №61).

**<ბ-ნ გ. წამრეთლის წამრელის ბამო> (გვ. 330)**

ნ ა ბ ე ჯ დ ი: გაზ. „ივერია“, 1897, № 72, 17 აპრილი, გვ. 1-2.

თ ა რ ი ღ ი: ტფილისი, 16 აპრილი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

„ეს წერილი განლაგეთ ბ-ნ გ. წერეთლისა“ – იგულისხმება 1897 წ. შ. „კვალის“ № 17-ში, გვ. 328. დაბეჭდილი წერილი სათაურით „ღია წერილი თ. ილია ჭავჭავაძეს“

„მესამე დასი“ – იგულისხმება საქართველოსა და ამიერკავკასიაში 1892 წ. შექმნილი პირველი სოციალურ-დემოკრატიული ჯგუფი, რომელსაც 1894 წ. გ. წერეთელმა უწოდა „მესამე დასი“.

გ. წერეთლის ამ წერილის შინაარსიც ადასტურებს იმას, რომ სომეხთა საკითხზე „ივერიის“ ყველა ხელმოწერილი მოწინავე ილიას ეკუთვნის.

**პატარა საუბარი (გვ. 334)  
(წაიკითხავდით „კავკასში“ ერთს ამბავს...)**

ნ ა ბ ე ჯ დ ი: გაზ. „ივერია“, 1897, № 72, 17 აპრილი, გვ. 3.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

ეს ფელეტონი ჩვენს გამოცემაში შევიტანეთ „ივერიის“ ანალიტიკური ბიბლიოგრაფიის მიხედვით.

ეს წერილი აშკარად ილიასია, რადგან ავტორი აგრძელებს საუბარს ისევ – სომეხ-ქართველთა საკითხის შესახებ და იგი მკაცრად აკრიტიკებს სომეხთა მიერ „კუმანურობას“ სისულელედ გამოცხადებას, ამ საკითხს ილიამ რამდენიმე წერილი უძღვნა.

„უკანასკნელი რუსთ-ოსმალთა ომების დროს“ – იხ. შენიშვნების გვ. 509

**<სწავლა-ცოდნა, როგორც მხოლოდ  
ფულის სკამის საბანი> (გვ. 338)**

ნ ა ბ ე ჯ დ ი: გაზ. „ივერია“, 1897, № 75, 20 აპრილი, გვ. 1.

თ ა რ ი ღ ი: ტფილისი, 19 აპრილი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად. წერილს ახლავს სქოლიო (იხ. „ივერია“ №67), რითაც ავტორი აგრეთვე მინიშნებს, რომ ამ წერილში აგრძელებს ადრე დაწყებულ თემას.

„აქაური სომეხთ რუსული გაზეთები“ – იხ. შენიშვნები წინა გვერდზე. 535

**<უსიცოცხლო ცოდნა სკმდრია უნიჭობისა>  
(გვ. 343)**

ნ ა ბ ე ჯ დ ი: გაზ. „ივერია“, 1897, № 78, 25 აპრილი, გვ. 1.

თ ა რ ი ლ ი: ტფილისი, 24 აპრილი.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად. წერილს ახლავს სქოლიო (იხ. „ივერია“ №75).

**პატარა საშუბარი (გვ. 348)**  
(სიტყვამან შენმან გამოგაჩინოს შენ...)

ნ ა ბ ე ჯ დ ი: გაზ. „ივერია“, 1897, № 78, 25 აპრილი, გვ. 2-3.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

ეს ფელეტონი ჩვენს გამოცემაში შევიტანეთ „ივერიის“ ანალიტიკური ბიბლიოგრაფიის მიხედვით. გარდა ამისა, წერილის ატრიბუციის დასადგენად საკმარისია მისი შინაარსის გაცნობა, წერილი გაგრძელება ილიას მიერ სომეხთა საკითხის შესახებ დაწყებული საუბრებისა.

„**ოროთავიანი იანუსი**“ – ძველ რომაულ მითოლოგიაში ყოველგვარი დასაწყის-დასასრულის ღვთაება ორი პირისაგან.

„**ღვარძლის მთესველი ვერ მომკის იფქლსა ბასრისა ცელითა**“ – ციტატა მოყვანილია „ქილილა და დამანას“ ქართული თარგმანიდან.

**<ჩვენში დიკლომია ნიშანი მკურნალის ცოდნისა და არა თვით ცოდნა> (გვ. 352)**

ნ ა ბ ე ჯ დ ი: გაზ. „ივერია“, 1897, № 80, 27 აპრილი, გვ. 1-2.

თ ა რ ი ლ ი: ტფილისი, 26 აპრილი.

ეს არის ერთ-ერთი ბოლო წერილი სომეხ-ქართველთა საკითხის შესახებ გამოქვეყნებულ წერილებს შორის. ამ საკითხზე დაწერილი ყველა წერილი შინაარსით ერთმანეთს მისდევს და ამკარად ემჩნევა ერთი ავტორის სტილი, რაც კიდევ ერთხელ გვარწმუნებს, რომ ყველა ეს მოწინავე

ილიასია. (ილია ხშირად იმეორებს ერთსადიმავე სიტყვებს, მაგ. „კულტუროსანნი“, რომელიც სომხებს მიემართება და ახსნას წინა წერილები შეიცავს).

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად. წერილს ახლავს სქოლიო, რაც ამ წერილის ილიასეულობას ადასტურებს (იხილეთ „ივერია“ №75).

**<ბ-ნ შაშოვის „სმელდების“ და ბ-ნ არუთინოვის „ტრიხინიანი“ ღორების და ღორების საქმე> (გვ. 357)**

ნ ა ბ ე ჯ დ ი: გაზ. „ივერია“, 1897, № 81, 29 აპრილი, გვ. 1-2; № 85, 3 მაისი, გვ. 1-2; № 86, 4 მაისი, გვ. 1-3; № 88, 8 მაისი, გვ. 1-2; № 89, 9 მაისი, გვ. 1-2; № 90, 11 მაისი, გვ. 1-2; №93, 16 მაისი, გვ. 1-2.

თ ა რ ი ლ ი: ტფილისი, 28 აპრილი; ტფილისი, 2 მაისი; ტფილისი, 3 მაისი; ტფილისი, 7 მაისი; ტფილისი, 8 მაისი; ტფილისი, 10 მაისი; ტფილისი, 15 მაისი.

ეს ხელმოწერილი მეთაური წერილები „ივერიის“ პუბლიკაციის შემდეგ იბეჭდება პირველად ჩვენს გამოცემაში.

ამ ხელმოწერილი მეთაური წერილების ილიასეულობას, „ივერიის“ ანალიტიკური ბიბლიოგრაფიის გარდა, ადასტურებს თ. სახოკიას „ილია ჭავჭავაძის ნაწერთა ბიბლიოგრაფიაც“, აგრეთვე ლ. ჭრელაშვილის კვლევა-ძიების შედეგები. არსებობს თედო სახოკიას მოგონება, რომელშიც იგი ვრცლად ეხება შიო არაგვისპირელის ბიოგრაფიიდან ერთ მომენტს: კერძოდ, მწერლის სასაკლაოზე მუშაობის დროს სპანდარიანცის მიერ „ტრიხინიანი“ ღორების ხორცის ბაზარზე გაყიდვას და წერს: „ილია ჭავჭავაძემ 1897 წელს „ივერიაში“ №85, №86, №88, №89 და №90 თითოეული გაზეთის ცალ გვერდიანი მეთაური უძღვნა ქალაქის სასაკლაოზე მომხდარ საქმეს. სააშკარაოზე გამოიტანა ქალაქის გამგეობის მელაძუობა, ყოველი მათი დასაგმობი საქციელი და ამ საქმეში მონაწილეობა კრიტიკის

ქარცეცხლში გაატარა.\* (იხ. თ. სახოკიას „ჩემი საუკუნის ადამიანები“, თბ. 1969, გვ. 210).

ჩვენ ზემოხსენებული წერილები გავაერთიანეთ ერთი სათაურის ქვეშ: აქვე ქრონოლოგიურ ჩარჩოში მოვათავსეთ ამავე საკითხზე გაზ. „ივერიის“ 1 მაისის №83-ში დაბეჭდილი ფელეტონი სათაურით „პატარა საუბარი“, რომელიც „ივერიის“ ანალიტიკურ ბიბლიოგრაფიაში სავარაუდოდ ილიას სახელთან არის დაკავშირებული.

**<საგაზეთო შენიშვნები ტფილისის ქალაქის გამგეობის მიმდინარე საქმიანობაში> (გვ. 410)**

ნ ა ბ ე ჯ დ ი: გაზ. „ივერია“, 1897, № 94, 17 მაისი, გვ. 1-2.

თ ა რ ი ღ ი: ტფილისი, 16 მაისი.

ეს ხელმოწერილი მეთაური წერილი გაზ. „ივერიის“ შემდეგ პირველად დაბეჭდა პავლე ინგოროყვამ ი. ჭავჭავაძის თხზულებათა სრული კრებულის VIII ტომში 1957 წელს სათაურით „საგაზეთო შენიშვნები თბილისის ქალაქის გამგეობის მიმდინარე საქმიანობაში“.

**<საზოგადოებრივი ცხოვრების ნაკლნი და მისი ეკონომიური მიზეზები> (გვ. 414)**

ნ ა ბ ე ჯ დ ი: გაზ. „ივერია“, 1897, № 189, 13 სექტემბერი, გვ. 1-2; № 190, 14 სექტემბერი, გვ. 1; № 194, 19 სექტემბერი, გვ. 1-2; № 196, 21 სექტემბერი, გვ. 1; № 200, 26 სექტემბერი, გვ. 1; № 201, 28 სექტემბერი, გვ. 1-2; № 215, 16 ოქტომბერი, გვ. 1-2; № 217, 18 ოქტომბერი, გვ. 1; № 226, 1 ნოემბერი, გვ. 1-2.

თ ა რ ი ღ ი: ტფილისი, 12 სექტემბერი; ტფილისი, 13 სექტემბერი; ტფილისი, 18 სექტემბერი; ტფილისი, 20

\* მოწინავეში ნახსენებია შიო დედაბრიშვილი (არაგვისპირელი), რომელიც იმ ხანად მუშაობდა მთავარი სანიტარული სამსახურის დირექტორის ისპანდერიანცის მოადგილედ.

სექტემბერი; ტფილისი, 25 სექტემბერი; ტფილისი, 27 სექტემბერი; ტფილისი, 15 ოქტომბერი; ტფილისი, 17 ოქტომბერი; ტფილისი, 31 ოქტომბერი.

ეს ხელმოწერილი მეთაური წერილები „ივერიის“ პირველნაბეჭდის შემდეგ პ. ინგოროყვამ და ალ. აბაშელმა გააერთიანეს საერთო სათაურით: „საზოგადოებრივი ცხოვრების ნაკლნი და მისი ეკონომიური მიზეზები“ და დაბეჭდეს ი. ჭავჭავაძის თხზულებათა VIII ტომში 1928 წელს.

აქვე უნდა აღვნიშნოთ, რომ გამოცემლებს გამოუტოვებიათ ამავე საკითხზე გაზ. „ივერიის“ №190-ში დაბეჭდილი ხელმოწერილი მეთაური წერილი, **ტფილისი, 13 სექტემბერი**; – რომელიც საერთოდ არცერთ გამოცემაში არ დაბეჭდილა. იგი ჩვენს გამოცემაში შევიტანეთ „ივერიის“ ანალიტიკური ბიბლიოგრაფიის მიხედვით.

ამ წერილის ილიასეულობას ზემოხსენებულ წერილებთან ერთად ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“, აგრეთვე ლ. ჭრელაშვილის კვლევა-ძიების შედეგები.

თ. სახოკიას მიერ შედგენილ ბიბლიოგრაფიაში გამოტოვებულია გაზ. „ივერიის“ №217-ში დაბეჭდილი მეთაური წერილი – ტფილისი, 17 ოქტომბერი.

აღსანიშნავია, რომ ერთი სათაურის ქვეშ გაერთიანებულ ამ წერილთა შორის გაზ. „ივერიაში“ დაბეჭდილია ერთი პოლიტიკური ხასიათის წერილი – (სახელდობრ №222-ში გამოქვეყნებული მეთაური წერილი: ტფილისი, 27 ოქტომბერი), რომელიც ჩვენ ქრონოლოგიის მცირე დარღვევით გადავიტანეთ №226-ში დაბეჭდილი წერილის შემდეგ.

საყურადღებოა ისიც, რომ გაზ. „ივერიაში“ ყოველი წერილის დასაწყისში სქოლიოში მინიშნებულია ამ საკითხისადმი მიძღვნილი წინა წერილი, რაც უტყუარი ცნობაა მათი ატრიბუციის დასადასტურებლად.

**<მეგობარ მანინს ორ დიდ განაკად გაყოფილი დარჩა> (გვ. 454)**

ნ ა ბ ე ჯ დ ი: გაზ. „ივერია“, 1897, № 222, გვ. 28 ოქტომბერი, 1-2.

თ ა რ ი ღ ი: ტფილისი, 27 ოქტომბერი.



ეს ხელმოუწერელი მეთაური წერილი „ივერიის“ პუბლიკაციის შემდეგ იბეჭდება პირველად.

ამ წერილის ილიასეულობას „ივერიის“ ანალიტიკური ბიბლიოგრაფიის გარდა, ადასტურებს ლ. ჭრელაშვილის კვლევა-ძიების შედეგები.

„სამთა კავშირი“ – იხ. შენიშვნების გვ. 506

„ორთა კავშირი“ – იხ. შენიშვნების გვ. 518

„აღმოსავლეთის საქმე“ – იხ. შენიშვნების გვ. 510

„ოსმალთ-ბერძენთა საქმე“ – იგულისხმება ოსმალთა წინააღმდეგ ბერძენთა ეროვნულ-განმათავისუფლებელი აჯანყება 1821-29 წლებში.

### <ახლო აღმოსავლეთი და სამელთაშუა ზღვის გზების საკითხი> (გვ. 458)

ნ ა ბ ე ჯ დ ი: გაზ. „ივერია“, 1897, № 227, 2 ნომბერი, გვ. 1-2; № 231, 7 ნომბერი, გვ. 1-2; № 233, 9 ნომბერი, გვ. 1-2.

თ ა რ ი ღ ი: ტფილისი, 1 ნომბერი; ტფილისი, 6 ნომბერი; ტფილისი, 8 ნომბერი.

ეს ხელმოუწერელი მეთაური წერილები „ივერიის“ პირველნაბეჭდის შემდეგ გამოაქვეყნეს პ. ინგოროყვამ და ალ. აბაშელმა ი. ჭავჭავაძის თხზულებათა X ტომში 1829 წელს გაერთიანებული სათაურით: „ახლო აღმოსავლეთი და ხმელთაშუა ზღვის გზების საკითხი“.

ამ წერილების ილიასეულობას ადასტურებს აგრეთვე ლ. ჭრელაშვილის კვლევა-ძიების შედეგები და თ. სახოკიას „ილია ჭავჭავაძის ნაწერთა ბიბლიოგრაფია“.

„აღმოსავლეთის საქმე“ – იხ. შენიშვნების გვ. 510

„ეირიმის ომები“ – იგულისხმება 1853-1856 წწ. აღმოსავლეთის ომი, ომი ინგლისის, საფრანგეთის, ოსმალეთისა და სარდინიის კოალიციასა და რუსეთს შორის ახლო აღმოსავლეთში ბატონობისათვის.

„უკანასკნელი ომი ოსმალეთთან“ – იგულისხმება რუსეთ-თურქეთის ომი 1877-1878 წლებში.

„...მას შემდეგ, რაც რუსეთმა და საფრანგეთმა კრონშტადში და ტულონში დაანახვეს ქვეყანას“ – იხ. შენიშვნების გვ. 509

„ჩვენი ხელმოწევი იმპერატორის საფრანგეთში მიბრძანება“ – იხ. შენიშვნების გვ. 526

„...სან-სტეფანოში შეკრული პირობა“ – იგულისხმება 1878 წ. 19 თებერვალს (3 მარტს) სტამბოლის მახლობლად სან-სტეფანოში დადებული ხელშეკრულება, რომლითაც დასრულდა რუსეთ-ოსმალეთის 1877-1878 წწ. ომი.

„სამთა კავშირი“ – იხ. შენიშვნების გვ. 506

„ორთა კავშირი“ – იხ. შენიშვნების გვ. 518

„სომხების საქმე“ – იხ. შენიშვნების გვ. 145

### <კ. ბლუმბერის აზრი ამიერკავკასიაში გავრცელებული ავაჯაკობის გამოჩვენების მიზეზებზე> (გვ. 470)

ნ ა ბ ე ჯ დ ი: გაზ. „ივერია“, 1897, № 243, 23 ნომბერი, გვ. 1-2.

თ ა რ ი ღ ი: ტფილისი, 22 ნომბერი.

ეს ხელმოუწერელი მეთაური წერილი „ივერიის“ პუბლიკაციის შემდეგ იბეჭდება პირველად ჩვენს გამოცემაში.

ამ წერილის ილიასეულობას „ივერიის“ ანალიტიკური ბიბლიოგრაფიის გარდა, ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“, აგრეთვე ლ. ჭრელაშვილის კვლევა-ძიების შედეგები. ილიას წერის მანერა და სტილი.

### <ბუნდამცემა ბურჟუაზია> (გვ. 475)

ნ ა ბ ე ჯ დ ი: გაზ. „ივერია“, 1897, № 259, 14 დეკემბერი, გვ. 1-2.

თ ა რ ი ღ ი: ტფილისი, 13 დეკემბერი.

ეს ხელმოუწერელი მეთაური წერილი „ივერიის“ პუბლიკაციის შემდეგ იბეჭდება პირველად ჩვენს გამოცემაში.

ამ წერილის ილიასეულობას, „ივერიის“ ანალიტიკური ბიბლიოგრაფიის გარდა, ადასტურებს ლ. ჭრელაშვილის კვლევა-ძიების შედეგები.

**„კომპრაჩიკოსებისაგან დამახინჯებული“ (Компрачикосы) – კომპრაჩიკოსი, XIII-XVII სს-ში** ესპანეთში. ინგლისში და სხვა ქვეყნებში არსებული დანაშაულებრივი საზოგადოება, რომელიც ბავშვებს იტაცებდა, ფიზიკურად ამახინჯებდა, ასაჭურისებდა, აქცევდა მასხარად და ყილდა.

**<კველი და ახალი ჩვენი ეკონომიური ცხოვრებისა> (გვ. 481)**

ნ ა ბ ე ჯ დ ი: გაზ. „ივერია“, 1897, № 265, 21 დეკემბერი, გვ. 1-2.

თ ა რ ი ღ ი: ტფილისი, 20 დეკემბერი.

ეს ხელმოწერილი მეთაური წერილი „ივერიის“ შემდეგ პირველად დაბეჭდა პ. ინგოროყვამ ი. ჭავჭავაძის თხზულებათა VII ტომში 1956 წელს სათაურით „ძველი და ახალი ჩვენი ეკონომიური ცხოვრებისა“. ამ წერილის ილიასეულობას ადასტურებს თ. სახოკიას „ილია ჭავჭავაძის ნაწერთა ბიბლიოგრაფია“.

Все мое, сказало злато,  
Все мое, сказал булат,  
Все куплю, сказало злато,  
Все возьму, сказал Булат.  
პუშკინი.

სქოლიოში დამოწმებულია ციტატა პუშკინის ლექსიდან „Золото и Булат“.

**პატარა საუბარი (გვ. 486)**

(თ. გ. თუმანიშვილის გაზეთმა ამ უკანასკნელ დროს...)

ნ ა ბ ე ჯ დ ი: გაზ. „ივერია“, 1897, № 265, 21 დეკემბერი, გვ. 3.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად.

ეს ფელეტონი ჩვენს გამოცემაში შევიტანეთ „ივერიის“ ანალიტიკური ბიბლიოგრაფიისა და ლ. ჭრელაშვილის კვლევა-ძიების შედეგების მიხედვით.

**<ფიქრები ქრისტეს შობის დღისასწავლის წინ> (გვ. 487)**

ნ ა ბ ე ჯ დ ი: გაზ. „ივერია“, 1897, № 268, 25 დეკემბერი, გვ. 1.

თ ა რ ი ღ ი: ტფილისი, 24 დეკემბერი.

ეს ხელმოწერილი მეთაური წერილი გაზ. „ივერიის“ შემდეგ პირველად ჩვენს გამოცემაში შევიტანეთ თ. სახოკიას „ილია ჭავჭავაძის ნაწერთა ბიბლიოგრაფიაზე“ დაყრდნობით, ამ წერილის ილიასეულობას ადასტურებს აგრეთვე ლ. ჭრელაშვილის კვლევა-ძიების შედეგები.

**პატარა საუბარი (გვ. 490)**

(ეს „ლალი“ რა ხელობის კაცია?...)

ნ ა ბ ე ჯ დ ი: გაზ. „ივერია“, 1897, № 269, 28 დეკემბერი, გვ. 2.

ეს ხელმოწერილი მეთაური წერილი „ივერიის“ პუბლიკაციის შემდეგ იბეჭდება პირველად. ჩვენს გამოცემაში.

ეს ფელეტონი ჩვენს ტომში მოვათავსეთ „ივერიის“ ანალიტიკურ ბიბლიოგრაფიის მიხედვით.

ფელეტონში დამოწმებულია ციტატები შოთა რუსთაველის „ვეფხისტყაოსნიდან“.

„...ჩვენ ამჟამად ბევრი ვართ თქვენდა საუბედუროდ“, – ამონაწერი გიორგი ლასხიშვილის – „ლალის“ ფსევდონიმით გამოქვეყნებული წერილიდან, რომელიც დაიბეჭდა 1897 წ. გაზ. „კვალის“ №53-ში (გვ. 932) სათაურით „სამშობლო ციხის გუმბაზი“.

<რა გითხრათ, რით გაგახაროთ> (გვ. 492)

ნ ა ბ ე ჯ ჳ ლ ი: გაზ. „ივერია“, 1898, № 1, გვ. 1-2.

თ ა რ ი ლ ი: ტფილისი, 31 დეკემბერი.

ეს ხელმოწერული მეთაური წერილი „ივერიის“ შემდეგ პირველად დაიბეჭდა პ. ინგოროყვასა და ალ. აბაშელის მიერ გამოცემული ი. ჭავჭავაძის თხზულებათა VI ტომში 1927 წელს სათაურით: „რა გითხრათ, რით გაგახაროთ?“.

## საძიებლები

### სახელთა საძიებელი

პირთა საძიებელი

ა

**ავთანდილოვი** – ხმოსანი. 400

**ალექსანდრე III** (1845-1894) – რუსეთის იმპერატორი 1881-1894 წლებში. 52, 53, 54, 55, 56, 60, 65.

**ალიბეგოვი** – ქალაქის მაშინდელი ლაბორატორიის გამგებელი. 362.

**ანდერსენ** ჰანს კრისტიან (1805-1875) დანიელი მწერალი. 179.

**ანდრონიკაშვილი** ივანე ზაქარიას ძე. 240.

**არუთინოვი** კევორქა თუ გეურქა – თბილისის მცხოვრები, ყასაბი. 237, 256, 257, 365, 369, 374-394, 396, 397, 401, 403, 408.

**არწრუნი** – გრიგოლ (1845-1892), სომეხთა პუბლიცისტი, მწერალი, საზოგადო მოღვაწე, ლიბერალთა დასის მეთაური, გაზ. „მშაკის“ რედაქტორი. 156, 233, 234, 279.

**ასტროვსკი** (ოსტროვსკი) ოსტროვსკი მიხეილ ნიკოლოზის ძე (1827-1901 წ.წ.) – 1881-1893 წლებში სახელმწიფო-ქონებათა ყოფილი მინისტრი, რუსი დრამატურგის ალექსანდრე ნიკოლოზის ძე ოსტროვსკის (1823-1886 წ.) უმცროსი ძმა. 38.

**ალა-მაჰმად ხანი** (1742-1797) – ირანის გამგებელი, შემდეგ ირანის შაჰი, 1795 წ. გაილაშქრა საქართველოზე და დაარბია თბილისი. 493.

ბ

**ბაგრატიონი** პეტრე ივანეს ძე (1765-1812) – თავადი. რუსეთის ინფანტერიის გენერალი, 1812 სამამულო ომის გმირი. ქართველი მეფის ვახტანგ VI-ის ძმის იესეს შვილიშვილის შვილი. 199.

**ბალფიური** (ბალფური) ართურ ჯეიმზ (1848-1930) – ინგლისის სახელმწიფო მოღვაწე. 1874 წლიდან პარლამენტის წევრი. კონსერვატიული პარტიის ლიდერი. 226, 227.

**ბარათაშვილი** ნიკოლოზ (1817-1845) – ქართველი პოეტი. 100, 103, 313, 314.

**ბარბიე** ანრი ოგიუსტ (1805-1882) – ფრანგი პოეტი. პოეტური ჰამფლეტების ავტორი. 350.

**ბატივეი** ავეტიქ – თბილისის მცხოვრები. 386.

**ბასტაძე** ილია ლუკას ძე („ილია ხონელი“) (1859-1900) – ქართველი პუბლიცისტი, ჟურნალისტი, მთარგმნელი. 201, 202, 203, 204, 205, 206, 210, 211, 212, 213.

**ბენტამი** ერემა (1748-1832) – ინგლისელი სამართლისმცოდნე და ფილოსოფოსი. 429.

**ბისმარკი** ოტო ედუარდ ლეოპოლდ, თავადი ფონ ბისმარკი შენჰაუზენი (1815-1898) – გერმანელი სახელმწიფო მოღვაწე, იუნკრულ-ბურჟუაზიული გერმანიის იმპერიის დამაარსებელი და პირველი რაიხსკანცლერი. 221, 222, 223, 461.

**ბლუმერი** კ. ჟურნალისტი – გაზ. „Новое Время“. 470, 471, 472, 473, 474.

**ბოტკინი** სერგეი პეტრეს ძე (1832-1889) – რუსი ექიმი თერაპევტი. 355.

**ბრისსონი** ეჟენ ანრი – ფრანგი პოლიტიკური მოღვაწე. 87, 88.

**ბულანჯე** – ჟორჟ ერნესტ-ჟან მარია (1837-1891) ფრანგი გენერალი, პოლიტიკური მოღვაწე, მონაწილეობდა პარიზის კომუნის ჩანშობაში. (1887-1889 წ.წ.) სათავეში ჩაუდგა შოვინისტურ მოძრაობას, მონარქისტებთან მისი ურთიერთობის გამომჟღავნების შემდეგ, ბელგიაში გაიქცა, სადაც იგი მოკლეს. 197.

**ბურჟუა** ლეონ ვიქტორ ოგიუსტ (დაიბ. 1851-) ფრანგი პოლიტიკური მოღვაწე. 89.

## ბ

**გაბრიელ** ეპისკოპოსი (ერისკაცობაში გერასიმე მაქსიმეს ძე ქიქოძე) (1825-1896) – იმერეთის ეპისკოპოსი, მოაზროვნე, პედაგოგი, ფსიქოლოგი, საზოგადო მოღვაწე. 210, 211, 214, 218.

**გალილეი** გალილეო (1564-1642), იტალიელი ფიზიკოსი, მექანიკოსი და ასტრონომი, ბუნებისმეტყველების ერთერთი ფუძემდებელი, პოეტი, ფილოლოგი და კრიტიკოსი. 173.

**გალიცინი** (გოლიცინი) გრიგოლ სერგეის ძე – კავკასიის მთავარმართებელი. 296.

**გოგებაშვილი** იაკობ სიმონის ძე (1840-1912), ქართველი პედაგოგი, მეცნიერული პედაგოგიკის ფუძემდებელი საქართველოში, პუბლიცისტი და საბავშვო მწერალი. 191

**გოგოლი** ნიკოლოზ ვასილის ძე (1809-1852) – რუსი მწერალი. 350.

**გონიანი** II **გონივეი** – ექიმი 358, 359, 360, 364.

**გორემიკინი** – სამიჯნო უწყებათა გამგებელი და მმართველი. 35, 38.

**გრიმები ძმანი**, იაკობ (1785-1863), ვილჰელმ (1786-1859), გერმანელი ფილოლოგები, ფოლკლორისტები და ენათმეცნიერები. 179.

**გუნია ვალერიან** – ცნობილი მსახიობი. იგი თავდაპირველად ილიას მიერ დაარსებული „ივერიას“ თანამშრომელი იყო, შემდეგ ქართული თეატრის დასის წევრი. 312, 313.

**გურამიშვილი** – თავადი, გურამიშვილი დავით ალექსანდრეს ძე (1857-1926), ფერმწერი. სხვადასხვა დროს თანამშრომლობდა ჟურნალ-გაზეთებში „ფალანგა“ და „ობზორი“. 167, 168, 169.

## დ

**დავიწყებული მწერალი** – იხ. მიქელაძე ვლადიმერ. 172.

**დარვინი** ჩარლზ რობერტი (1809-1882) – ინგლისელი ბუნებისმეტყველი. 490, 491.

**დედაბრიშვილი** შიო ზაქარაის ძე (არაგვისპირელი) (1867-1926) – ქართველი მწერალი, პროფესიით ბეითალი, ექიმი-ვეტერინარი. – იმჟამად ისპანდერიაანის თანამშემწე. 387, 388, 394, 399.

**დეკანოზიშვილი** პოეტი, რომელიც ესწრებოდა ბარათაშვილის ნემტის გადმოსვენებას. 191.

**დრაგომანოვი** მიხეილ პეტრეს ძე (1841-1895), უკრაინელი ბურჟუაზიული ლიბერალი, პუბლიცისტი. 199.

**დუპუი** (დიუპუი) შარლ ალექსანდრ (დაიბ. 1851-) ფრანგი პოლიტიკური მოღვაწე. 87.

## ე

**ევანგულოვი** – თბილისის ქალაქის საბჭოს თავ-რე 1890-იან წლებში, ხმოსანი. 400.

**ეზოპე** (ესოპე) ძვ. წ. VI საუკუნის ბერძენი მწერალი, იგავარაკების ჟანრის ფუძემდებელი. 179.

**ერეკლე მეორე II** მეფე ერეკლე (1720-1798), 1744-1762 წლებში კახეთის, 1762 წლიდან ქართლ-კახეთის მეფე. 100.

**ერისთავი** ზაქარია, ოძისის მკვიდრი თავადი. შემდგომში დუმეთის მახრის თავად-აზნაურთა წინამძღოლი. 238, 239, 240, 241.

**ერისთავი** რაფიელ დავითის ძე (1824-1901) ქართველი მწერალი, ეთნოგრაფი, საზოგადო მოღვაწე. 164, 165.

**ერმოლოვი** ალექსეი სერგეის ძე – სახელმწიფო ქონებათა და მიწათმოქმედების მინისტრი. 39.

### ვ

**ვალდეკ რუსსო** იხ. რუსსო. 88.

**ვაჟა-ფშაველა** (1861- 1915) 100, 101, 103.

**ვართანიანცი**, ექიმი. 312, 313, 317, 370, 371.

**ვართანოვი**, ხმოსანი. 400.

**ვანაძე** რევაზ ქაიხოსროს ძე. 240.

**ველიჩკო**, ვასილი ლევის ძე (დაიბ. 1860- ) – რუსი პოეტი და ჟურნალისტი. ერთხანს რედაქტორობდა თბილისის გაზეთს „კავკაზს“. 350.

**ვილჰელმი** (ვილჰელმ II) (1859-1941) – გერმანიის იმპერატორი და პრუსიის მეფე 1888-1918 წლებში. 29, 31, 136.

**ვიტტე** (ვიტე) სერგეი იულის ძე (1849-1915) – რუსი სახელმწიფო მოღვაწე, 1892 წლიდან ჯერ გზათა, შემდეგ ფინანსთა მინისტრი. 251.

### ზ

**ზაზარინი** გრიგოლ ანტონის ძე (1829-1897) – რუსი ექიმი თერაპევტი. 355.

### თ

**თამაშოვი**, ხმოსანი. 400.

**თარხანიანცი**, მთავრობის საქალაქო მკურნალი. 362.

**თეშურლიენგი** (ლანგთეშური) (1336-1405) – შუააზიელი სისასტიკით გამორჩეული მხედართმთავარი, რომელიც თავის ლაშქრით რვაჯერ შემოესია საქართველოს და უდიდესი ზიანი მიაყენა სახელმწიფოსა და ქართველ ხალხს. 493.

**თუმანიშვილი** (თუმანიანცი) გიორგი მიხეილის ძე (1854-1920) – ქართველი საზოგადო მოღვაწე, პუბლიცისტი, 1891-1903 წწ. ვ. ლა კ თუმანიშვილებთან ერთად გაზ. „Новое Обозрение“-ს გამომცემელი. 262, 313, 314, 486.

### ი

**ივანენკო** – გამომძიებელი. 376-379, 382-390, 393, 394, 396-399, 400, 402

**იზმაილოვი** პავლე (1852-1905) – თბილისელი სომეხი ჟურნალისტი და მოღვაწე. 1869-1882 წლებში თანამშრომლობდა ქართულ, რუსული და სომხურ პერიოდულ გამოცემებში. 1893 წ. აირჩიეს თბილისის ქალაქის თავად, ეკუთვნოდა ბურჟუაზიულ-დემოკრატიულ მიმართულებას. 361, 362, 363.

**იოსელიანი** გიორგი ნიკოლოზის ძე (1847-1919), ქართველი საზოგადო მოღვაწე და პედაგოგი. წერდა წყალტუბოელის ფსევდონიმით. 191.

**ისპანდიაროვი II** ისპანდიაროვი მხიტარ ოჰანჯანის ძე, ექიმი. – სავეტერინარო სამსახურის მაშინდელი უფროსი. 394-397, 399, 400, 402-405.

### კ

**„კავკაზეცი“**– „ნოვოე ვრეშია“-ს კორესპოდენტი. 169.

**კაზიმირ პერიე** – იხ. პერიე. 82, 85, 87, 88, 89.

**კაპრივი** ლეონ ფონ (1831-1899) – გერმანელი სახელმწიფო მოღვაწე, გენერალი, გრაფი (1891), 1890-1894 წლებში რაინსკანცლერი (შეცვალა ბისმარკი) და ამავე დროს (1890-1892 წლებში) პრუსიის მინისტრი – პრეზიდენტი. 222.

**კატკოვი** მიხეილ ნიკიფორის ძე (1818-1887) – რუსი ჟურნალისტი და პუბლიცისტი, რადაქტორი გაზეთ „მოსკოვსკიე ველომოსტისა“, რეაქციონერი, გამოილაშქრა ქართული ეროვნული კულტურისა და საერთოდ ქართველი ერის წინააღმდეგ, რასაც მოჰყვა ქართველ მწერალთა და მოღვაწეთა გამანადგურებელი პასუხები. 93, 183.

**კატონი** მარკუს ჰორაციუს (ძვ. წ 234-149) – ძვ. რომის პოლიტიკური მოღვაწე და მწერალი, რომაული პროზის ფუძემდებელი. 168.

**კ-ევო მირზა** 471

**კობიაშვილი** ალექსანდრე იოსების ძე. 240.  
**კრილოვი** ივანე ანდრეას ძე (1769-1844), რუსი მწერალი მეიგავე. 179.

**კრისპი** ფრანჩესკო (1818-1901) – იტალიის სახელმწიფო მოღვაწე, 1887-1891 და 1893-1896 წლებში სახელმწიფოს მეთაური, იტალიის იმპერიალისტური ავანტურის ერთ-ერთი მოთავე აფრიკაში. 1893-1894 წლებში სასტიკად ახშობდა გლეხთა მოძრაობას სიცილიაში. 221, 223.

**კრისტინა** – ბესარაბიის აზნაური. 207.

**კურარიანი**, ხმოსანი. 400.

## ლ

**ლანგთემური** – იხ. თემურლენგი. 493.

**ლასნიშვილი** გიორგი მიხეილის ძე (“ლალი”) (1865-1931), პუბლიცისტი, რედაქტორი, საზოგადო მოღვაწე. 490, 491.

**ლაფონტენი** ჟან (1621-1695), ფრანგი პოეტი, საფრანგეთის აკადემიის წევრი 1684 წლიდან. 179.

**ლიბინი** იუსტუს (1803-1873) – გერმანელი ქიმიკოსი. 344.

## მ

**მარქსი** კარლ (1818-1883) 475.

**მარაბელი** ივანე გიორგის ძე (1854-1898), ქართველი მწერალი, მთარგმნელი, პუბლიცისტი, საზოგადო მოღვაწე. 176, 190-197.

**მარაბელი** მიხეილ – ქალაქის გამგეობის ხმოსანი, ივანე მარაბლის ძმა. 173-175, 184-188.

**მასლი** (მაჰლი) (1844-1885), სუდანელი მუჰამად აჰმედ, აღმოსავლეთ სუდანის განმათავისუფლებელი მოძრაობის ბელადი. სუდანის მაჰდისტური სახელმწიფოს დამაარსებელი. 71.

**მასსარ-ბეი** – პოლკოვნიკი. 227.

**ტერ-მინასოვი** – საპნის ქარხნის მეპატრონე. 389, 390, 395.

**მირზაშვილი** ალექსანდრე 195.

**მიქელაძე** ვლადიმერ – თბილისის გამგეობის ხმოსანი. 191, 357, 407.

**მოსე წინასწარმეტყველი**, იუდეველთა სარწმუნოების მიხედვით უდიდესი წინასწარმეტყველი და ებრაული რელიგიის ფუძემდებელი. 353.

**მრეველიშვილი**, ექიმი. 362.

**მუსხელიძე** დ. ი. 240.

**მუსრანსკი** 334.

## ნ

**ნაპოლეონი** ნაპოლეონ I ბონაპარტე (1769-1821) – საფრანგეთის იმპერატორი 1804-1815 წლებში. 58.

**ნიკოლოზ პირველი** (ნიკოლოზ პავლეს ძე რომანოვი) (1796-1855) – რუსეთის იმპერატორი 1825-1855 წლებში. 225.

**ნიუტონი** ისააკ (1643-1727) – ინგლისელი ფიზიკოსი, მათემატიკოსი და ასტრონომი. კლასიკური ფიზიკის ფუძემდებელი. 216.

## ო

**ოპოჩინინი** – ხმოსანი. 400, 401, 402, 403.

**ორბელიანი** გრიგოლ დიმიტრის (ზურაბის) ძე (1804-1883), პოეტი და საზოგადო მოღვაწე, ინფანტერიის გენერალ-ლეიტენანტი. 101.

**ორბელიანი** ვახტანგ ვახტანგის ძე (1812-1890). ქართველი პოეტი. ერეკლე II-ის ქალიშვილის თეკლა ბატონიშვილის ვაჟი 1838 წლიდან იყო სამხედრო სამსახურში, 1860 წ. გენერალი. 91.

**ორბელიანი საბა** (სულხან-საბა) (1658-1725), მწერალი, მეცნიერი, პოლიტიკური მოღვაწე. 177, 178, 179, 181.

## პ

**პერიე კაზიმირ** – საფრანგეთის რესპუბლიკის პრეზიდენტი. 82, 85, 87, 88, 89.

**პეტრე დიდი**, პეტრე I (მეფე ალექსი მიხეილის ძის ვაჟი) (1672-1725) – რუსეთის მეფე იმპერატორი, სახელმწიფო მოღვაწე, სარდალი, დიპლომატი. 183, 459.

**პროზოროვსკი** – ექიმი. 362.

**პუშკინი** ალექსანდრე სერგეის ძე (1799-1837) – დიდი რუსი პოეტი. 68, 350, 481.

**რ**

**როზბერი** – ლორდი, არჩიბალდ, გრაფი, ინგლისელი პოლიტიკოსი (დაიბ. 1847). გლადსტონის კაბინეტში საგარეო საქმეთა მინისტრი იყო. ლიბერალობის მოთავე. 60, 68.

**როსტომაშვილი** 190.

**რუდინი** 221.

**რუდკოვსკი**, ექიმი. 358, 360, 361, 362.

**რუსთაველი** შოთა. 63, 180, 491.

**რუსსო ვალდეკ** – კონსერვატორი, ფრანგი პოლიტიკური მოღვაწე, პრეზიდენტობის კანდიდატი. 88.

**ს**

**საბათო მამა სინაის მთიდან** 295.

**სალვატორი** – იტალიელი ბერი. 227

**სალუსბერი** – რობერტ არჩელი (1830-1903). მარკიზი დერბის კაბინეტში პირველ მინისტრად ნამყოფი. კონსერვატორების მოთავე (სოლსბერი) რობერტ არტურ ტილბოტ გასკონ სესილ (1830-1903) – დიდი ბრიტანეთის პოლიტიკური და სახელმწიფო მოღვაწე. ინდოეთის მინისტრის ადგილი ეკავა. გამოჩენილი კონსერვატორი. გლადსტონის კაბინეტის ყოფილი საგარეო საქმეთა მინისტრი. 60, 68, 225.0

**სარაჯოვი** – ალექსანდრე სარაჯიშვილი 358.

**ტერ-სიმონიანცი** – ყარაული. 377, 389, 392, 394, 399, 400.

**სიტოვსკი** – პოლიციის ბოქაული. 358, 361, 363.

**სტენლი** – ინგლისის პალატის წევრი. 226, 227.

**სტეპანიანცი** (სტეფანოვი) – სანიტარულ-სამკურნალო სამსახურის ინსტრუქტორი. 366, 399.

**სუვორინი** ალექსი სერგის ძე (1834-1912) – რუსი პუბლიცისტი, ლიტერატორი, გამომცემელი. 1876 მისი რედაქტორობით პეტერბურგში გამოდიოდა გაზ. „Новое Время“. 92, 93, 96, 97.

**სძივტი** (სვიფტი) ჯონათან (1667-1745) – ინგლისელი მწერალი. 350.

**ტ**

**ტერ-სტეფანიანცი** – თბილისის ღორების სასაკლავოს ყარაული. 387, 388.

**უ**

**უვაროვისა** – პრასკოვია სერგეის ასული (1840-1924), მეუღლე რუსი არქეოლოგის გრაფ ალექსი უვაროვის, 1879 წლიდან იყო კავკასიაში არქეოლოგიური გათხრების ხელმძღვანელი. 142.

**ფ**

**ფელიქს ფორი** – საფრანგეთის რესპუბლიკის პრეზიდენტი (189 წწ) – რესპუბლიკელი. 88, 89.

**ძირანკლინი** (ფრანკლინი) ბენჯამინ (1706-1790) – ამერიკელი განმანათლებელი, სახელმწიფო მოღვაწე და მეცნიერი. 355.

**ქ**

**ქარიმა** 470-473.

**ქიქობე** – გუბერნიის ექიმი. 362, 374, 375, 382, 383, 391, 393, 394, 397, 402, 403, 404, 406, 408.

**ქობულოვი** ბეჟან – თბილისის მცხოვრები. 386.

**შ**

**შარკო** შან მარტენ (1825-1893) – ფრანგი ნევროპათოლოგი. 555

**შაუმიოვი** არტემ ლაზარეს ძე – პირველი გილდიის ვაჭარი. 356-364, 366, 368, 369, 394.

**შაჰ-აბაზი** (შაჰ-აბას დიდი) (1571-1629) – ირანის შაჰი, მხედართმთავარი. 493

**შერემეტიევი** – მთავარმართებელი. 250.

**შექსპირი** უილიამ (1564-1616) – ინგლისელი დრამატურგი, პოეტი. 486.

**შილლერი** (შილერი) იოჰან – კრისტოფ ფრიდრიხ (1759-1805) – გერმანელი დრამატურგი, პოეტი, ხელოვნების თეორეტიკოსი, ისტორიკოსი. 327.

**შიერდინი** (სალტიკოვ-შიერდინი) – მიხეილ ევგრაფის ძე (1826-1889) – რუსი მწერალი. 350.

ჩ

ჩოლოყაშვილი ალექსანდრე ზაალის ძე – ქალაქის გამგეობის ხმოსანი. 357, 407.

ც

ციციშვილი თომა 440.

ცხვედაძე ნიკოლოზ (ნიკო) ზებედეძის ძე (1845-1911), – საზოგადო მოღვაწე, პედაგოგი, პუბლიცისტი. 190

წ

წერეთელი გიორგი ექვთიმეს ძე (1842-1900) – ქართველი მწერალი, პუბლიცისტი, საზოგადო მოღვაწე. 172, 173, 178, 179, 180, 182, 183, 192, 331, 332, 333, 336, 337.

წერეთელი სვიმონ – იმერეთის თავად-აზნაურთა წინამძღოლი, ქუთაისის გუბერნიის თავად-აზნაურთა მარშალი. 167, 196

წინამძღვრიშვილი იოსებ ივანეს ძე ილიას გიმნაზიის დირექტორი მეგობარი. 240.

ჭ

ჭავჭავაძე ივანე სულხანის ძე თბილისის გუბერნიის თავად-აზნაურთა კრებაზე იგი დასახელებულ იქნა ილიასთან ერთად სახელმწიფო საბჭოს წევრთა ამომრჩეველთა კანდიდატურიდან. 240.

ჭავჭავაძე ნ.ზ. (ნიკოლოზ ზურაბის ძე) (1830-1897) – რუსეთის არმიის კავალერიის გენერალი. 290, 292.

ხ

„ხითაროვი“ 334, 335, 336.

„ხონელი“ (ილია ხონელი) იხ. ბახტაძე ილია. 201-206, 210, 211, 213

ხოსროვი – თბილისის მაშინდელი გამგეობის წევრი. 376.

ხუდადოვი ნიკო, ექიმი და საზოგადო მოღვაწე, ქალაქის თვითმართველობის წევრი, ხმოსანი, სახალხო თეატრის მესვეური, „სახალხო კითხვათა კომისიის“ თავმჯდომარე. 403.

ჰ

ჰუმბერტი რეინერ კარლ ემანუელ იოჰან მარია ფერდინანდ ევგენი (1844-1900), იტალიის მეფე, შვილი მეფე ვიქტორ ემანუელ II-ისა. 128.



## გეოგრაფიულ სახელთა საძიებელი

ა

აბასთუმანი 424.  
ავსტრალია 464, 465.  
ავსტრია 25, 26, 65, 66, 131, 132, 133, 221, 222, 223.  
ავსტრი-ვენგრია II ავსტრი-უნგრეთი 25, 126, 128, 226.  
ავღანისტანი 54, 67, 68.  
ავჭალა 310.  
აზია 66, 67, 75, 77, 77, 420.  
ათონის მთა 208.  
ალბიონი 72.  
ალჟირი (ალჟირი) 462.  
ამერიკა 45, 75, 184, 415, 432, 465.  
ამიერკავკასია 17, 18, 43, 46, 64, 77, 323, 353, 418, 421, 470, 473.  
არაბეთი 464.  
არაბეთის ზღვა 464.  
ასტრახანი 358, 361.  
ატლანტის ოკეანე (ატლანტიკის ოკეანე) 462, 465.  
აფრიკა 73, 74, 75, 76, 455, 456, 462, 464, 465.  
ახალქალაქი II ახალქალაქის მაზრა 424.  
ახალციხე II ახალციხის მაზრა 424.

ბ

ბათუმი 18.  
ბალკანეთის კუნძული II ბალკანეთი, ბალკანეთის სახელმწიფო 65, 66, 124, 221, 294, 458.  
ბაქო 18.  
ბელგია 135.  
ბერლინი 220, 223.  
ბერლინი (ქალაქი უკრაინაში) 310.  
ბესსარაბია 207, 208.  
ბირმანი (ბირმა) – სახელმწიფო სამხ.-აღმ. აზიაში 73.  
ბოლგარეთი II ბოლგარია 54, 256.  
ბორჩალო (ყაზახ-ბორჩალო) 431, 433.  
ბორჯომი 424.  
ბოსნია 256.  
ბოსფორი 228, 458, 463.  
ბრანდერბურგი 461.

558

გ

გამბურგი (ჰამბურგი) 222.  
გერმანია 25-31, 52, 54, 64, 66, 71, 73-76, 126, 131-133, 136, 220-224, 310, 345, 455, 456, 461, 463-469.  
გორი 422, 424.  
გორის მაზრა 422, 424.

დ

დარდანელი 66, 146, 228.  
დიდი ბრიტანია (დიდი ბრიტანეთი) 127.  
დიდი ოკეანე 468.  
დუშეთი 424.  
დუშეთის მაზრა 424.

ე

ეგვიპტე 67, 73, 226, 227, 256, 462, 464-468.  
ევროპა 25, 27, 28, 30, 31, 52-55, 57, 59-61, 65-67, 70, 75, 83, 93, 124, 125, 127-135, 146, 147, 173, 220, 224-228, 253-257, 288, 293, 294, 340, 353, 420, 454-467, 469.  
ესპანეთი – იხ. ისპანია 74, 462, 482.

ვ

ვენეცუელა (ვენესუელა) 226.  
ვლადიკავკასი (ვლადიკავკაზი) 431.

ზ

ზულუ, ამაზულუ, ზულუსები – სამხრეთ-აფრიკის რესპუბლიკაში ნატალის პროვინციაში მცხოვრები ხალხი. 71

თ

თამარაშენი 197.  
თელავი 23, 105, 107, 110, 111, 360.  
თიანეთი 23.

559

ი

იაპონია 27, 73, 75, 467.  
ინგლისი 27, 54, 58-61, 65-68, 70-76, 85, 124-128, 224, 226-228, 256, 455-457, 459, 461-469.  
ინდოეთი 66, 67, 68, 71, 73, 464, 465, 466, 469.  
ინდოეთის ოკეანე 73, 464, 465, 466.  
ისპანია (ესპანეთი) 74, 462, 482.  
იტალია 25, 26, 74, 126, 128, 131, 132, 133, 221, 223, 227, 455, 462.

კ

კავკასია 94, 168, 199, 200, 296-298, 305, 316, 336, 338, 348, 355, 414, 470-474.  
კართაგენი – ძვ. ქალაქ-სახელმწიფო ხმელთაშუაზღვისპირეთში, ახლანდ. ტუნისის ყურე. 168.  
კახეთი 16-21, 23, 105, 114, 116, 119, 273, 291.  
კორეა (კორეა) 27, 75.  
კრიტიკის კუნძული 226, 253, 256, 257, 293, 294, 469.  
კრონშტადტი (კრონშტადტი) 54, 220, 222, 460.  
კრწანისი 99, 100, 102, 103, 104, 163, 164.  
კუმუკა – ქალაქი თურქეთის რესპუბლიკის სამხრეთ საზღვართან. 54, 67.

ლ

ლილო 188, 196.

მ

მაღაგასკარი 73.  
მაკედონია 257, 294, 295.  
მანჩესტერი 226.  
მაროკო (მაროკო) 462.  
მეწამული ზღვა 353, 464, 466.  
მოსკოვი 141, 142.  
მტკვარი 139, 140.  
მცირე აზია 464.

ო

ოდესა 45.  
ოსმალეთი 124, 125, 127-131, 134, 145, 146, 225-229, 253, 257, 294, 303, 458-464, 466, 468, 469.  
ომისი 238, 239, 241, 242, 243, 273.

პ

პამირი 75.  
პარიჟი 66.  
პერმი 169.  
პეტერბურგი 220.  
პორტუგალია 74.  
პოზნანი 64.  
პოლონეთი 93.  
პრუსია 136, 221

ჟ

ჟენევა 139, 140.

რ

რომი 227, 377  
რუმელია (ბულგარეთი) 256.  
რუმინია (რუმინეთი) 294  
რუსეთი 16, 19-23, 27, 32, 39, 45, 46, 52-61, 63, 65-68, 71, 73, 75-77, 93, 98, 110, 115, 131, 133, 148, 150, 151, 167, 168, 198-200, 220-228, 262, 275, 297, 310, 311, 353, 425, 432, 437, 455, 457, 459, 460, 463, 467-469, 471-473.

ს

საბერძნეთი 124, 253, 254, 255, 256, 257, 293, 294, 348, 454, 458, 469, 493.  
სან-სტეფანო 463.  
საქართველო 19, 35, 40, 43, 46, 64, 77, 90, 91, 92, 94, 99, 100, 101, 103, 108, 114, 141, 167, 181, 186, 187, 192, 195, 200, 208, 210-213, 239, 250, 251, 271, 290, 291, 310, 311, 316, 320, 321, 421, 424, 475, 476, 493, 494.

საქართველოს სამხედრო გზა 424.

საფრანგეთი 25-27, 29-31, 52, 54, 66, 67, 71, 73-76, 82-89, 128, 131, 133, 152, 220-224, 226-228, 335, 345, 454-457, 459, 460-467, 468, 469.

სერბია 294.

სიამი – (სიამ-პირმანი) ძველი სახელწოდება დღევანდელი ტაილანდის სახელმწიფოსი სამხრეთ-აღმოს. აზიაში. 73.

სინაის მთა – სინას ნახ. კუნძულზე არაბეთსა და აფრიკას შორის, წითელი ზღვის ყურესა და სუეცის არხთან აღმართული მთა. 295.

სირია 462.

სილნალი 23, 360.

სონუმბი 96, 97.

სპარსეთი 470, 471, 472, 473, 474.

სტამბოლი 459, 461, 463, 468.

სუდანი 466.

სუეცის II სუეზის არხი 67.

## ტ

ტომსკი 169.

ტონკინი – ამჟამად ბაკხო – ვიეტნამის ჩრდ. ნაწილი. 73.

ტრანსკალი (ტრანსკავალი) 226.

ტრიპოლი 462.

ტულონი 54, 220, 222, 460.

ტუნისი 462.

ტფილისი 13, 17, 18, 35, 40, 77, 138-141, 258, 284, 300, 301, 307-311, 323, 336, 345, 346, 356-360, 364, 366, 367, 369, 370-373, 375, 377, 378, 383, 384, 388, 390, 393, 397, 398, 403, 405-410, 431, 478.

ტფილისის გუბერნია 153, 258, 259, 262, 263, 433, 434.

## ფ

ფინლანდია (ფინეთი)

ფრიდრიხსრუე – ქალაქი 223.

## ქ

ქიზიყი 18.

ქუთაისი 11, 12, 13, 14, 40, 245, 248, 360.

ქუთაისის გუბერნია 11, 141, 167, 198, 245, 427.

## ყ

ყვარელი 291.

## შ

შავი ზღვა 228, 432, 463.

შვეიცარია 139.

შინდისი 336.

## ჩ

ჩერნოგორია 294.

ჩინეთი 27, 73, 75, 467, 468.

ჩინეთის ზღვა 73.

## ც

ციმბირი 417.

## ხ

ხართუმი 226.

ხმელთაშუა ზღვა 66, 458, 461, 462, 463, 464, 465, 466.

## პ

პერცოგოვინა 256.

პიბრალტარი 462.

წიგნთა და კერიოლულ გამოცემათა  
საძიებელი

ღ

„Deili news“ 60.  
„Deili Cronicle“ 60.

ქ

„Eclair“ – პარიზის გაზეთი 226.

ჰ

„ვერსტმინსტერი“ – ინგლისის გაზეთი 75.  
„ვეფხვისტყაოსანი“ 180.

ი

„ივერია“ – ქართული პოლიტიკურ-ლიტერატურული პერიოდული გამოცემა 1877-1906 წწ. (1877-1878 – ყოველკვირეული გაზეთი; 1879-1885 – ჟურნალი; 1886-დან ყოველდღიური გაზეთი). დამაარსებელი და რედაქტორი ი. ჭავჭავაძე. 29, 44, 48, 77, 86, 172, 309, 313, 316, 323, 338, 343, 350, 352, 357, 373, 397, 409, 436, 447, 461, 467.  
„იურიდ. გაზ.“ – [„იურიდიული გაზეთი“?] 168.

კ

„Kavkaz“, „კავკასი“ („კავკაზი“) – ყოველდღიური პოლიტიკური და ლიტერატურული რუსული გაზეთი, გამოდიოდა თბილისში 1846-1918 წწ. 201-205, 210-213, 301, 303, 334.  
„კვალნი“ – ქართული ყოველკვირეული პოლიტიკური, სამეცნიერო და ლიტერატურული გაზეთი. გამოდიოდა 1893-1904 თბილისში. რედაქტორები ა. თუმანიშვილი-წერეთლისა (ფაქტობრივი რედ. გამომც. – გ. წერეთელი), ნ. ალექსი-მესხიშვილი. 168, 172, 178, 179, 180, 331, 490.

მ

„Московские Ведомости“, „მოსკოვსკაია ვედამოსტი“ („მოსკოვსკიე ვედომოსტი“) – რუსული გაზეთი. გამოდიოდა 1756-1917 მოსკოვში. 1863 წლიდან რეაქციულია. რედ. მ. კატკოვი და პ. ლეონტიევი. 93,

ნ

„Неделя“ – რუსული ყოველკვირეული ლიტერატურულ-პოლიტიკური გაზეთი, გამოდიოდა 1866-1901 პეტერბურგში. 258.  
„Новое Время“ – რუსული ბურჟუაზიულ-მემამულეთა გაზეთი, გამოდიოდა 1868-1917 პეტერბურგში. 470-473.  
„Новое Обозрение“ – რუსული ყოველდღიური გაზეთი, გამოდიოდა თბილისში 1884-1906. სწავლასხვა დროს რედაქტორ-გამომცემლები იყვნენ: ა. სტეპანოვი, ო. ნიკოლაძე, მ. უსპენსკი, ფაქტობრივი რედაქტორი ნ. ნიკოლაძე (1887-1891), კ. და ვ. თუმანიშვილები (1891-1906). 478, 480, 483, 312-315, 317, 350, 409, 478, 480, 483.

პ

„Pall Mall Budget“ 59.  
„Pall Mall Gasette“ 60.  
„Правительственный Вестник“ „პრავიტელ. ვესტ.“ [„პრავიტელსტვენნი ვესტნიკ“]  
გაზ. „პუნჩი“ – „Пунч“ 59.

ს

„სტანდარტი“ – ინგლისის გაზეთი. 75

ტ

„Temps“ – ფრანგული გაზეთი. 227, 335.

„Тифлисский листок“ – რუსული ყოველდღიური გაზეთი, გამოდიოდა თბილისში 1886-1919 წლებში. ძირითადად იბეჭდებოდა ქრონიკა და ახალი ამბები. 479.

ფ

„Fun“ 59.

„ფიგარო“ 227, 228.

ქ

„ქართული სახარება“, „ქართული ფსალმუნები“ და სხვა. 321.

ნაწარმოებთა და ამრსონაჟთა  
საპიგუელი

ა

ავთანდილი 180.

ბ

„ბულქანი“ 180.

ვ

„ვეფხვის-ტყაოსანი“ 180

თ

თინათინი 180.

ნ

ნესტან-დარეჯანი 180.

რ

„რუხი მგელი“ 180

ს

„სიბრძნე-სიცრუისა“ 171, 176, 177, 181, 183, 188, 189, 193, 194, 197.

ტ

ტარიელი 180.

ფ

ფრიდონი 180.

## თემატური სამიჯგუფო

### I. პოლიტიკა, სამართალი.

#### 1. უცხოეთის საგარეო და საშინაო პოლიტიკა

- ა) ევროპის ქვეყნების პოლიტიკის საკითხები 58-61, 220-229, 454-457.
- ბ) გერმანიის საგარეო და საშინაო პოლიტიკა 29-31, 131-133.
- გ) ინგლისის საგარეო და საშინაო პოლიტიკა 58-61, 65-69, 70-76, 124-127, 467-469.
- დ) ევროპის სახელმწიფოები და აღმოსავლეთის საქმე 65-69, 461-466.
- ე) საფრანგეთი 82-86, 87-89,
- ვ) ახლო აღმოსავლეთი და ხმელთაშუა ზღვის ვხების საკითხი 70-76, 124, 458-469.
- ზ) ოსმალეთის საკითხი და ევროპის სახელმწიფოები, 128-130.
- თ) კრიტიკის კუნძული (საბერძნეთი) და ოსმალეთი 253-257, 293-295.
- ი) სომეხთა საქმე. ოსმალეთის სომეხთა განწირვა 145-147.
- კ) „სამთა კავშირი“ 25-26, 29, 54, 244.
- ლ) „ორთა კავშირი“ 29-31.
- მ) პარლამენტის დეპუტატებისა და რესპუბლიკის პრეზიდენტის არჩევნები 82-85, 86-89.
- ნ) სხვადასხვა დაჯგუფებები უცხოეთის პოლიტიკურ სარბიელზე: 82-86  
ანარჩისტები (84), ბურჟუაზია (84) კლერიკალები (84), მონარქისტები (84) ოპორტუნისტები (84), რადიკალები (84) რესპუბლიკელები (84).

#### 2. რუსეთის საშინაო და საგარეო პოლიტიკა

#### 3. სოციალურ-დემოკრატიები და ბურჟუაზია საქართველოში

- ა) “მესამე დასი”, გ. წერეთელი 178
- ბ) ბურჟუაზია 475-480

#### 4. საქართველოს შინაური ცხოვრება

- ა) ბანკის წევრთა არჩევნები 11, 78, 281.
- ბ) თავად-აზნაურთა კრებები 245-249, 278.
- გ) სიტყვა თავ. ილია ჭავჭავაძისა (ტფილისის თავად-აზნაურთა საადგილმამულო ბანკის კრებაზე 20 მაისს 1895 წელს) 90-91.
- დ) ქალაქის საბჭოს არჩევნების შესახებ. 410-411.  
ერობის საკითხი და დეპუტატთა საკრებულო 261-265
- ე) საზოგადო საქმისადმი პასუხისმგებლობის თაობაზე. 270-274.
- ვ) თბილისელი სომხები და მათი ურთიერთობა ქართველებთან 300-308, 309-320, 323-325, 330-336, 338-347, 348-350.
- ზ) თავად-აზნაურთა უფლება-მოვალეობები 245, 275.
- თ) ქალაქის გამგეობა 410.

#### 5. ამიერკავკასიის სხვადასხვა ხალხის შესახებ 418-421

- ა) თათრები 427-436
- ბ) ოსები 422-427
- გ) კ. ბლუმერის აზრი ამიერკავკასიაში გავრცელებული ავანაკობის გამომწვევ მიზეზებზე 470-475.

#### 6. სამართალი და მართლმსაჯულება

- ა) მთავარმართებლის, ჩინონიკ-მოხელეთა და გლეხთა უფლებები 148-152, 443.
- ბ) სამართალი და ეროვნული საკითხი საქართველოში 62-64.
- გ) სასამართლო, მოსამართლეები 448.

## II. ისტორია, რელიგია

#### 1. ისტორია

- ა) ქართველი ერის ისტორიიდან 99-104.
- ბ) მატანე 1895 წლისა (შინაური მიმოხილვა) 160-166.

## 2. რელიგია

- ა) ქართული სამონასტრო მამულები 205-209.
- ბ) სიტყვა თქმული გაენათის მონასტერში გაბრიელ ეპისკოპოსის დასაფლავების დღეს. 210-213.
- გ) ქრისტიანობა საქართველოში 487.
- დ) ქრისტეს ზოგიერთი მოძღვრების შეგონება 487.

## III. ეკონომიკა

### 1. თავად-აზნაურთა საადგილმამულო ბანკი და საქართველოს ეკონომიური მდგომარეობა

- ა) ბანკი და მასთან დაკავშირებული სხვადასხვა საკითხი 78-79, 90, 281-283.
- ბ) ქუთაისის ბანკის შესახებ 11-15.

### 2. სოფლის მეურნეობა

- ა) კახეთის სოფლის მეურნეობა კავშირი 105-107, 109, 111, 123, 144.  
კახეთის მევენახეთა კავშირი 116-123.
- ბ) კახური ღვინის შესახებ 16-20, 21-24.
- გ) კრედიტი საქართველოს მევენახეთათვის 16, 18, 19, 20-24, 77-81.
- დ) მიწათმოქმედება და გლეხთა საქმეთა გამგეობა 48-51  
სოფლის თვითმართველობა (ერობა) 35-38.
- ე) სამეურნეო საკრედიტო საზოგადოება 201-206, 258-260  
სასოფლო ბეგარა და ფერმების საჭიროების შესახებ 42-44.
- ვ) საზოგადოებრივი ცხოვრების ნაკლნი და მისი ეკონომიური მიზეზები 414-416.

### 3. მრეწველობის განვითარება

- ა) საფაბრიკო და საქარხნო წარმოება 56.
- ბ) ალემბიცემობის განვითარება 44-47.
- გ) სახელმწიფო ქონებათა მმართველობა 38, 482-485.

## 4. ეკონომიური ცხოვრების აკარგაიანობა

- ა) ქალაქის საკრედიტო საზოგადოება 284.
- ბ) ძველი და ახალი ჩვენი ეკონომიური ცხოვრებისა 481-485.
- გ) არწრუნისეული ქარვასლა 233-235.
- დ) სამეურნეო სკოლების საჭიროება 49, 238-244.
- ე) ათონის სამონასტრო მამულების თაობაზე 207.
- ვ) კახეთის რკინისგზა
- ზ) საქართველოში წყალდიდობით მიყენებული ზარალის ლიკვიდაციისათვის 141-144.
- თ) სამეურნეო საზოგადოების პროექტი 258-260.

## 5. ტფილისის კეთილმოწყობა

- ა) ტფილისში ქუჩების მოკირწყველა 346.
- ბ) წყლის გამოყვანა 344.
- გ) საყასბოს შენება 345.
- დ) კანალიზაციის მშენებლობა 345.
- ე) ელექტრონით განათება 138-140.

## 6. რუსეთის ეკონომიკის შესახებ

- ა) რუსეთის შინაური ეკონომიური პოლიტიკა და იმპერატორ ალექსანდრე III-ის დროს მომხდარი ზოგიერთი ცვლილებები 52-57, 60.
- ბ) საფაბრიკო და საქარხნო წარმოების აღორძინება რუსეთის იმპერიაში 56.
- გ) სოფლის მეურნეობა მდგომარეობა რუსეთში 32-34.

## IV. სწავლა-განათლება

### 1. ქართული სკოლებისა და სასწავლებლების შესახებ

- ა) ქართულ სკოლებში რუსულის სწავლების თაობაზე 92-95
- ბ) ქართული სკოლების გიმნაზიებად გადაკეთების თაობაზე 153
- გ) ოძისის სამეურნეო სკოლის შესახებ 238-244.
- დ) სამეურნეო სასწავლებლის დაარსების საჭიროება 49, 182-188, 190-196, 250-252.
- ე) სახალხო სკოლების უფლებათა შესახებ 92-94.

- ვ) ნ. ზ. ჭავჭავაძის ანდერძი 290-292
- ზ) ქართულ სამრევლო სკოლებში ქართული საეკლესიო ენის სწავლების შესახებ 321.

**2. განათლების შესახებ**

- ა) უნიჭო დიპლომიანი ცოდნის შესახებ 338-341, 343-345, 352-356.
- ბ) სწავლა-განათლება 266-269.

**V. მედიცინა**

- ა) ტფილისის მკურნალები 352, 355.
- ბ) ტფილისის სანიტარ-ვეტერინართა და მკურნალთა ცული მუშაობის სავალალო შედეგი 357-365, 366-409.

**VI. პრესა**

- ა) რუსეთის პრესა საქართველოს შესახებ 167-170, 198-200.
- ბ) თბილისის რუსული გაზეთები ჩვენ შესახებ 96-98.

**VII. სხვადასხვა**

- ა) რა გითხრათ, რით გაგახაროთ? 492-496.
- ბ) სულიერი გაღატაკება და საზოგადოების გულგრილობა 236-237.
- დ) ზნეობის შესახებ 135.

**ს ა რ ჩ ე ზ ი**

**1894 წელი**

<ქუთაისის ბანკის შესახებ>.....11 / 505  
 <„კახეთის მევენახეთა საზოგადოების“ დაარსება>.....16 / 505  
 <„სამთა კავშირი“>.....25 / 506  
 <საფრანგეთსა და გერმანიას შორის მშვიდობიანი ურთიერთობის დასაწყისი>.....29 / 506  
 <სოფლის მეურნეობა რუსეთში>.....32 / 506  
 <მამულების გამიჯვნის თაობაზე>.....35 / 507  
 <მინისტრის მოლოდინში>.....39 / 507  
 <ჩვენი სარჩიელი სოფლის მეურნეობის ძვირფას დარგებზე>.42 / 508  
 <მიწათმოქმედების სწორად წარმართვისათვის>.....48 / 508  
 <იმპერატორ ალექსანდრე III-ის გარდაცვალების გამო>.....52 / 509  
 <ინგლისმა პირი იბრუნა რუსეთისაკენ სამეგობროდ>.....58 / 510  
 <მართლმსაჯულება ქვეყნისა და ერის სამსახურში>.....62 / 511  
 <ინგლისის პოლიტიკის ახალი მიმართულება>.....65 / 511  
 <ინგლისის ფლოტის ბატონობა საზღვაო-სავაჭრო საქმიანობაში>.....70 / 512  
 <კრედიტი საქართველოს მევენახეთაგან>.....77 / 513

**1895 წელი**

<პრეზიდენტისა და მთავრობის შეცვლა საფრანგეთში და მისი საზოგადოებრივი მიზეზები>.....82 / 513  
 <სიტყვა ქართული საადგილმამულო ბანკის წლიურ კრებაზე>.....90 / 514  
 ნარკვევი ჟურნალ-გაზეთებიდან (სახალხო სკოლების უფლებათა შესახებ) .....92 / 514  
 <„ნოვოე ვრემიას“ კორესპოდენტი ცილს სწამებს ქართველებს>.....96 / 515  
 <კრწანისის გმირთა მოსახსენებლად>.....99 / 515



<კახეთის სოფლის მეურნეობა კავშირი>.....	105 / 516
<ახლო აღმოსავლეთი და ინგლისის დღევანდელი პოლიტიკა>.....	124 / 517
<ოსმალეთის არეულობა და ევროპა>.....	128 / 518
<იქნება ომი თუ არა?> .....	131 / 518
<ციხეში ჯდომა უფრო ახშობს ზნეობას, ვიდრე აფხიზლებს>.....	135 / 519
<ელექტრონით განათება ტფილისისა>.....	138 / 519
<წყალდიდობა საქართველოში>.....	141 / 519
<ოსმალეთის სომეხთა განწირვა>.....	145 / 519
<სამოქალაქო სახელმწიფო სამსახურის მოძველებული წესწვობილების შეცვლის საჭიროებაზე>.....	148 / 520
<ქართული სკოლების გიმნაზიებად გადაკეთების თაობაზე>.....	153 / 521

## 1896 წელი

<შინაური მიმოხილვა 1895 წლისა>.....	160 / 521
ნარკვევი (ჟურნალ-გაზეთებიდამ) (რუსეთის გავლენიანი გაზეთები ამხედრებულან ჩვენს წინააგმდეგ>.....	167 / 522
ფ ე ლ ე ტ ო ნ ი ჩვენი ეხლანდელი სიბრძნე-სიცრუე.....	171 / 522
<გაზეთ „მოსკოვსკიე ვედომოსტის“ მობოდიშების თაობაზე>.....	198 / 523
<სამეურნეო-საკრედიტო საზოგადოების უსაფუძვლო კრიტიკის თაობაზე>.....	201 / 524
<ქართული სამონასტრო მამულები ბერძენი ბერების სამსახურში>.....	207 / 524
<გაბრიელ ეპისკოპოსის გარდაცვალების გამო>.....	210 / 525
სიტყვა თქმული გაენათის მონასტერში გაბრიელ ეპისკოპოსის დასაფლავების დღეს.....	214 / 525
პოლიტიკური მიმოხილვა.....	220 / 526

## 1897 წელი

<არწრუნისეული ქარვასლის ბედი>.....	233 / 527
<სულიერი გაღატაკება და საზოგადოების გულგრილობა>.....	236 / 528
<ოძისის სამეურნეო სკოლის საკითხზე>.....	238 / 528
<თავად-აზნაურთა კრებების უფლება-მოვალეობა>.....	245 / 528
<სამეურნეო სასწავლებლის დაარსების საჭიროება>.....	250 / 529
<კრიტიკის ახალი აშლილობა და ოსმალეთის საკითხი>.....	253 / 529
ნარკვევი (ჟურნალ-გაზეთებიდამ) (სამეურნეო საზოგადოების პროექტის თაობაზე).....	258 / 530
<ერობის საკითხი და დეპუტატთა საკრებულო>.....	261 / 530
<სწავლა-განათლება და საზოგადო მოღვაწის მოვალეობა>.....	266 / 531
<საზოგადო საქმისდმი პასუხისმგებლობის თაობაზე>.....	270 / 531
<შინაური საჭირბოროტო საქმეები და თავად-აზნაურთა უფლება-მოვალეობა>.....	275 / 531
პატარა საუბარი (– მართალია, კაცო...) .....	281 / 532
თავადი ნ. ზ. ჭავჭავაძე (ნეკროლოგი) .....	290 / 532
<კრიტიკის კუნძულის ნავსადგურების ბლოკადა>.....	293 / 533
<მობრძანდა ახალი მთავარმართებელი კავკასიისა>.....	296 / 533
<ტფილისში სომხობამ ხელთ იგდო ქალაქის თვითმართველობა>.....	300 / 534
<სად სომხეთი და სად ტფილისის ქალაქი?> .....	309 / 531
პატარა საუბარი (ჩვენმა დარბაისელმა...) .....	312 / 534
<მოვიდა სომეხი და მოიტანა სხვა მეხიო>.....	316 / 535
პატარა საუბარი (უმალღესად დამტკიცებულა...) .....	321 / 535
<ქართველებისა და სომხების განსხვავებული ხასიათი და ინტერესი>.....	323 / 536
<ბ-ნ გ. წერეთლის წერილის გამო>.....	330 / 536
პატარა საუბარი (წაიკითხავდით „კავკასიში“ ...).....	334 / 537
<სწავლა-ცოდნა, როგორც მხოლოდ ფულის ზეგვის საგანი>.....	338 / 537
<უსიცოცხლო ცოდნა ზვედრია უნიჭობისა>.....	343 / 537
პატარა საუბარი (სიტყვამან შენმან...) .....	348 / 538

<ჩვენში დიპლომა ნიშანი მკურნალის ცოდნისა და არა თვით ცოდნა>.....	352 / 538
<ბ-ნ შაუმოვის „სელდების“ და ბ-ნ არუთინოვის „ტრინინან“ ღორების და ღორების საქმე>.....	357 / 539
პატარა საუბარი (შაუმოვის „სელდების“...)	366
<საგაზეთო შენიშვნები ტფილისის ქალაქის გამგეობის მიმდინარე საქმეებზე>.....	410 / 540
<საზოგადოებრივი ცხოვრების ნაკლნი და მისი ეკონომიური მიზეზები>.....	414 / 540
<ევროპა მანც ორ დიდ ბანაკად გაყოფილი დარჩა>.....	454 / 541
ახლო აღმოსავლეთი და ხმელთაშუა ზღვის გზების საკითხი.....	458 / 542
<კ. ბლუმერის აზრი ამიერკავკასიაში გაგრცელებული ავაზაკობის გამომწვევ მიზეზებზე>.....	470 / 543
<გ უ ლ ნ ა მ ც ე ც ა ბ უ რ ყ უ ა ზ ი ა >.....	475 / 543
<ძველი და ახალი ჩვენი ეკონომიური ცხოვრებისა>.....	481 / 544
პატარა საუბარი (თ. გ. თუმანიშვილის...)	486 / 544
<ფიქრები ქრისტეს შობის დღესასწაულის წინ>.....	487 / 545
პატარა საუბარი (– ეს „ლალი“ რა ხელობის კაცია?...)	490 / 545
რა გითხრათ? რით გაგახაროთ? .....	492 / 546
შენიშვნები და კომენტარები.....	497
ტექსტისათვის.....	499
სახელთა საძიებელი.....	547
პირთა საძიებელი.....	547
გეოგრაფიულ სახელთა საძიებელი.....	558
წიგნთა და პერიოდულ გამოცემათა საძიებელი.....	564
ნაწარმოებთა და პერსონაჟთა საძიებელი.....	567
თემატური საძიებელი.....	568

ИЛЪЯ ГРИГОРЪЕВИЧ ЧАВЧАВАДЗЕ  
ПОЛНОЕ СОБРАНИЕ СОЧЕНЕНИЙ  
В 20-ТИ ТОМАХ

ТОМ XIII

(На Грузинском языке)

ТБИЛИСИ

“ИЛИАС ФОНДИ”

2007

კორექტორი: ელენე ბელუკაძე  
ტექსტი ააწყო: ნათელა ბერიშვილმა  
დააკაბადონა: ნიკოლოზ ბერიშვილმა

ტირაჟი 300

ფასი სახელშეკრულებო